
ПИРИМҚУЛ ҚОДИРОВ

сайланма

ЮЛДУЗЛИ ТУНЛАР

3

ПИРИМҚУЛ
ҚОДИРОВ

С а й л а н м а

уч жилдлик

учинчи жилд

ЮЛДУЗЛИ ТУНЛАР

Роман

Тошкент

Ифтихор Гулом номидаги Адабиёт ва санъат нашриёти

1988

253521



Сўнгсўз муаллифи —
филология фанлари доктори
Умарали Норматов

Қодиров, Пиримқул.

Сайланма: 3 жилдлик. Ж. З. Юлдузли тунлар: Роман
[Сўнгсўз муаллифи У. Норматов]. Т.: Адабиёт ва санъат
нашриёти, 1988.—448 б.

Пиримқул Қодиров «Сайланма» снинг учинчи жилдига адабнинг тарихи
мавзуда ёзилган «Юлдузли тунлар» романи киритилди.

Асарда шоир ва шох Бобур ҳаёти тасвирланган. Бу улкан, мураккаб
шахснинг тарих саҳнасига чиққан кундан бошлаб то ўлимга қадар салкам
қирк йиллик ҳаёти, оилавий мухити; ижодкор — шоир, носир, олим сифати
даги маънавий руҳий дунёси; саркарда, шох, фотиҳ сифатидаги ички зил-
дияти ёритилади. Шунингдек, ёзувчи XV аср охири ва XVI аср бош-
ларида юз берган Ўрта Осиё, Афғонистон, Хиндистон тарихидаги муҳим
воқеаларни ҳаққоний гаўдалантиради.

Кадыров П. Избранные произведения в 3-х томах.
Т. 3. Звёздные ночи: Роман.

4702570200—115

К ————— 6—88

М352(04)—88

ISBN 5—635—00078—9 (т. III.)

ISBN 5—635—00062—2

АРОСАТ

ҚУВА.

ҚИЛ УСТИДА ТУРГАН ТАҚДИРЛАР

1

Милодий 1494 йилнинг ёзи. Саратон иссиғида Фарғона водийсининг осмонига чиққан қуюқ булутлар куни бўйи хавони дим қилиб турди-ю, кечки пайт бирдан жала қуйиб берди. Қизил тупроқли теналиклар орасидан ўтиб келаётган серсув Қувасой қон қўшиб оқизилгандек қип-қизил бўлиб кетди.

Сой бўйидаги мажнунтоллар панасида бир йиғит билан қиз шивирлашиб гаплашмоқда эди.

— Робия, ишон, мен тирик бўлсам, сенга бало-қазони йўлатмасмен!

— Тангрим сизни ҳам паноҳида асрасин, Тоҳир оға!.. Ёғийнинг¹ минг-минг аскарлари бор. Қайси бирига бас келурсиз? Ана, қочқинларга қаранг!..

Тоҳир орқасига ўгирилиб, Қувасойнинг қуйи томонларига кўз югуртирди. Пастда қамишзор ботқоқлик ва унинг устидан ўтган узун ёғоч кўприк бор эди. Кўприкдан чумолидай беҳисоб одамлар, отлар, моллар, аравалар тизилиб ўтиб келаётгани ёмғир пардаси орасидан элас-элас кўзга чалинарди.

Самарқанд подшоси Қўқонни босиб олиб, қўшинига талатган ва Марғилонга ҳужум қилган эди. Босқинчилар шаҳару қишлоқларни талаш билан қаноатланмай, қўхлик қизларни чўриликка олиб кетишар эди. Бунинг ҳаммасини эшитган одамлар ёвдан қочиб, тинч жой излаб бормоқда эдилар.

— Улуснинг шўри қурсин!— деди Тоҳир.— Касофат подшолар урушмай туролмаса. Биридан қочсанг, бошқасига тутилсанг. Ундан кўра қочмаймиз! Таваккал. Пешонага битилгани бўлур!

Тоҳир ёмғирда ҳўл бўлиб, баданига ёпишиб турган қалами яқтак устидан ханжар тақиб олган эди. Робия ханжарга кўрқа-писа кўз ташлади-да:

— Қайдам,— деди.— Отамлар мени кўрғонга элтиб қўймоқчилар.

¹ Ёғий — ёв.

— Кайси кўрғонга?

— Андижон кўрғонида амаким борлар-ку.

Тоҳир Робиянинг ҳозирок жўнаб кетишидан чўчигандай унинг билагидан олди. Илгарилар хуркович оҳудек туткич бермайдиган Робия ҳозир алланечук ювош бўлиб қолган эди. Унинг хина қўйилган қўллари гулдай чиройли. Бошига отасининг қора жун чакмонини ёпишиб чиққан экан. Ёмғирда ҳўл бўлиб оғирлашган чакмон унинг нозик бўйинга оғирлик қилди. Робия чакмонни елкасига туширди. Шуида ёқасининг битта боғичи ечилиб кетди-ю, қизнинг мармардай сиклик бўйинининг пастки кўринди. Яшил нимчаси ўн етти ёшлик қизлардагина бўладиган толма белидан қучиб, қаттиқ кўкракларини маҳкам чирмаб турар эди.

Болалиқдан Робия билан девордармён кўшини бўлиб ўсган Тоҳир унинг қанчалик жозибали киз эканини, босқинчи бек ва навкарлар мапа шунақа қизларга қанчалик ўч бўлишини гўё энди астойдил ҳис қилди.

Бу йил баҳорда ота-оналари уларни унаштириб қўйган пайтларида ҳам Робия Тоҳирга ҳозиргичалик чиройли кўринмас эди. Рамазон ойи ўтгандан кейин уларнинг тўйлари бўлиши керак. Тоҳир Робия билан ҳадемай бир ёстикқа бош қўйишларига ишониб, беҳавотир юрган эди. Бироқ энди уруш довули Қувага яқинлашиб келаётган шу хатарли дамларда Робия унга ҳар қачонгидан ҳам азиз, ҳар қачонгидан ҳам ганимат кўринди.

Тоҳир Робиянинг Андижон кўрғонида бирорта бўйини йўғон бекнинг тузоғига илиниб қолиши мумкинлигини ўйлади-ю:

— Йўқ!— деди.— Мени десанг кўрғонга борма!

Робия Тоҳирнинг бахмалдай майин мўйлови тагида хиёл титраб турган лабига ва изтироб билан қақнаётган кўнғир кўзларига тикилди.

— Менинг ҳам сиздан йироққа кетким йўқ... Лекин не қилай... Кўркамен!..

Тоҳир қизни чакмон билан бирга қучиб, бағрига босди. Робиянинг майин соч толалари йиғитнинг юзига тегди, бир лаҳза икковининг нафаси нафасига қўшилиб кетди. Тоҳир қизнинг бадани титраётганини сизди-ю:

— Чиндан кўрқканингми бу, Робия?— деди.— Сенга не бўлди?..

— Мен бир ваҳимали туш кўрдим, Тоҳир оға! Илоҳи тушим ўнг келмасин!..

Энди Тоҳир ҳам хавотирланиб, қизни қучоғидан бўшатди-да, унинг катта-катта бўлиб кетган кўзларига қаради:

— Ёмон тушми?

— Айтишга ҳам тилим бормайдир.

— Тушга иелар кирмас!.. Айт!.. Майли..

— Сизни бир қора ҳўкиз ханжардай шохлари билан сузиб... Йўқ! Йўқ! Эсласам, этим жунжикиб кетадир!

Тоҳир ёмон бир фалокатни олдидан сезгандай юраги увушди:

— Шошилмай гапир! Сузган бўлса, қон оқдими?

— Қон? Ҳа, ҳа... Қон тирқираб кетди.

— Ундай бўлса кўрқма. Тушдаги қон — ёруғлик. Отам доим шундай дейди.

— Тангрим шу таъбирни рост келтирсин! Тоҳир оға, мен... Агар Андижонга сиз бормасангиз... мен ҳам кетмасмен. Неки бўлсак, шу ерда... бирга...

Мажнунтол барглари орасидан сиркиб тушаётган ёмғир томчилари қизнинг пайваста қошларига, тнғиз киприklarига теккан. Тоҳирнинг назарида, Робия ёмон бир бажтсизлик бўлишини ҳозирдан сезиб, кўзига ёш олаётгандек кўришарди.

— Мендан кўп хавотирланма. Робия. Мен бир деҳқон одаммен. Ҳаво очилса далага чиқиб кўшимни ҳайдаймен. Ўроғимни ўрамен. Ёғийнинг менга не иши бор? Лекин сен... аҳтиётингни қил. Андижон кўрғонида амакиларнинг бор...

— Андижонда сизнинг ҳам мулла тоғойингиз борлар-ку! Ё бирга кетайликми?

Тоҳир ўйланиб қолди. Унинг Андижонда меъмор бўлиб ишлайдиган Фазлиддин тоғаси эл орасида танилган машҳур одам. Қувасой ботқоғининг устидан ўтган мана шу узун ёғоч кўприк ҳам мулла Фазлиддин чизиб берган тарх¹ бўйича қурилган. Андижон аркида мулла Фазлиддин самовий нақшлар ва кошинлар билан безаб қурган девонхона тождор Умаршайх мирзога маъқул бўлгандан кейин унга тўбичоқ от ва бир ҳамён олтин инъом қилганини Тоҳир ҳам эшитган. У тоғасининг шаҳар кўрғонидан ташқаридаги Боғот маҳалласида туришини билади. Мулла Фазлиддин Қувада турган пайтларида Тоҳирга хат-савод ўргатган эди. Энди жияни паноҳ истаб борса қано-ти тагига олиши мумкин. Лекин бу ерда чол-кампирлар шима держин? Тоҳир — ёлғиз ўғил, жавоб бермасликлари мумкин. У Андижонга Робия туфайли боришини эса ота-онасига айтишдан уялади... Балки буни Робиянинг акаси Маҳмуд айтар?

— Робия, майли, иложи бўлса, Андижонга бирга кетурмиз. Лекин дадамларни кўндиринч осон эмас... Маҳмуд оғанг эшик-дами?²

— Дўконга чиққан эдилар. Ифторгача келурлар. Нима эди?

¹ Т а р х — чизма, лойиҳа.

² Э ш и к — бу ерда уй, ҳовли маъносида.

— Ифтордан сўнг бизникига ўтсин. Маелаҳат бор.

— Ҳўи, мен айтамен.

Робия юзини Тоҳирнинг кенг кўкрагига босди:

— Тангрим бизни бир-биримизга кўп кўрмасин!— деди-да, мажнунтол шохлари орасидан чиқди.

Сой бўйида турган бўш мис кўзани ёмғир томчилари чертиб-чертиб қўяди. Робия сувга келганини шу кўзага қараб эслади ва уни тўлдириб, уйлари томон кўтариб кетди.

Қаллиқлар одамларнинг кўзидан йироқда — яширикча учрашиб юрар эдилар. Қиз узоқлашиб кетгандан кейин Тоҳир ҳам мажнунтолларнинг панасидан чиқди.

Шуида Робиянинг тушига кирган кўрқинчли воқеа унинг эсига тушди-да, номаълум бир хатар вужудига ларза солиб ўтди...

2

Бу йилги рўза ёз чилласига тўғри келган, жазирама кунларда тонг саҳардан кечқурун қоронғи тушгунча туз тотмай оч юриш кўп одамнинг силласини қуритар, бунинг устига ташналик азоби қўшиларди. Рўзадорлар кунни қандай кеч қилишларини билмай тезроқ қош қорайишини интизорлик билан кутишарди.

Ғира-шира қоронғиликда Қува масжидининг минорасидан азон товуши эшитилди. Уруш таҳликаси қанчалик кучли бўлмасин, дастурхон атрофига йиғилган одамлар рўзасини очаётган пайтда очлик ва ташналиқдан қийналган вужудлари роҳатланиб, дунё ғамлари бирпасга бўлса ҳам ҳасёлларидан узоқлашди.

Тоҳир кекса ота-онаси билан бирга ифтор қилмоқда эди. Дастурхондан сепаналик иссиқ нон ва ҳандалак ҳиди келади. Нон еб, бир косадан қатикли ош ичганларидан кейин Тоҳир Андижонга кетиш ҳақидаги гапнинг учини чиқаришга чоғланди.

Шу пайт кимдир қамчи дастаси билан дарвозани тақиллатди. Ҳовлида ётган кекса кўнпак ит йўгон ва хирри товуш билан вовуллади. Тоҳир ўрнидан турган эди, отаси:

— Эҳтиёт бўл!— деди овозини пасайтириб.— Аввал кимлигини сўраб бил.

Ташқарида ёмғир тинган, лекин осмон булутли, қоронғиликда ҳеч нарсани кўриб бўлмас эди. Тоҳир дарвозахонага яқин бориб:

— Ким?— деб сўради. Кўнпак қаттиқроқ хура бошлади. Ташқаридаги одам овозини баладлатиб:

— Тоҳир, жиян?— деб сўради.— Оч, мен тоғойингмен!

Тоҳир ташқаридаги овозни таниб, очик дарча орқали ичкарига:

— Ая, Фазлиддин тоғойим! — деди-ю, чопиб бориб дарвозанинг занжирини туширди.

Ичкаридан чиққан чол-кампирлар меҳмон билан кўришайтганда Тоҳир қорайиб турган икки гилдиракли соябон аравани кўрди. Аравага қўшилган отнинг эгари устидан кимдир пайпаслашиб тушмоқда эди.

— Мулла тоға, арава сизданми?

— Ха, жияним. Кўч-кўроим билан келдим.

— Шунақами? — деди Тоҳир хайрон бўлиб. Унинг кўнгилида боя тоғасини кўрганга ёнган қувонч энди ташвишли йўллар билан алмашипти. Тоҳирнинг Андижондаги паноҳи — мана шу тоғаси эди. Тоғаси кўчиб келган бўлса, Тоҳирнинг кўроғига борадиган йўли бекилгани шу. Робия нима бўлади?

— Тоҳир, нега аграйиб турибсан? Юкларини туширишинг! — деди онаси. — Мулло тоғойинг ёмғирда кўп азоб тортганга ўхшайдир.

— Э, азоб ҳам гапми, она! Арава лойларга тикилавериб жонимиздан тўйдирди. Йўллар тирбанд. Қочоқлар беҳисоб.

Тоҳир аравадан юк тушираётиб, отнинг сағрисиغا қўли тегиб кетди. Шунда қўлига шилимшиқ лой илашганини сизди. Лой отнинг сағрисиғача чиққан бўлса, бу бечоралар келакелгунча қапчалик қийналганикин? Ҳамма ёвдан қочиб Андижонга қараб кетаётганда булар нега Қувага кўчиб келганикин? Тоҳир қанор қонга солинган юкни аравадан туширмоқчи бўлганда тоғаси:

— Ҳушёр бўл, жуда оғир, икковлашиб кўтаринглар, — деди аравакашга.

Тоҳир қоннинг ичида унча катта бўлмаган пўлат сандиқ борлигини сизди. Мулла Фазлиддин ўтда куймайдиган, сув кирмайдиган бу сандиқни Қуванинг темирчи усталарига буюртма бериб ясаттирган эди. Унинг ичида тархлар, лойиқалар, суратлар сақланарди. Мулла Фазлиддин уч йил Самарқандда, тўрт йил Ҳиротда таҳсил кўрган, ўша ёқдан меъморлик саъяти билан бирга мусаввирлик¹ни ҳам ўрганиб келган эди. Ҳиротда жангномалар ичига суратлар чизиш одат тусига кирган, мавлоно Беҳзод чизган Алишер Навоий ва Ҳусайн Бойқаро тасвирлари расмий доираларда шухрат топган, лекин Самарқандда, хусусан, Фарғона водийсида одам шаклини чизиш ҳали ҳам қуръон номидан қаттиқ тақиқланиб келмоқда эди. Шунинг учун мулла Фазлиддин ўзи чизган суратларини мана шу пўлат сандиқда доим махфий сақлар эди.

Тоҳир қондаги пўлат сандиқни аравакаш билан кўтаришиб уйга олиб киришди.

¹ Мусаввир — рассом.

Мулла Фазлиддин ҳўл бўлиб оғирлашган пиёзи чакмони ва этигини даҳлизда ечиб қолдирди. Оёғига чарм кавуш кийиб, обрез четида бет-қўлини ювди. Сўнг боя Тоҳирлар ўтирган дастурхонлик уйга кирди.

Унинг чакмонидан ўтган ёмғир калта енглик абосини нам қилган эди. Лекин ёз оқшоми илиқ бўлганлиги учун кийим алмаштириш эсига келмади. Йўлда қаттиқ толиққанлиги учун дуруст овқат ҳам емади. Фақат бир-икки тилим ҳандалак еди-ю, уч-тўрт пиёла чой ичди. Аравакаш йигит икки коса тўла қатикли ош ичгандан кейин отларига қараш учун ҳовлига чиқиб кетди.

— Оббо! Мулла Фазлиддин-ей!— деди Тоҳирнинг отаси узун оқ соқолини ўйчан эзгилаб. — Зап келибсиз-да. Шу нонич кунларда бирга бўлганимизга не етсин!

— Ҳамма ёғийдан қочганда биз аждаҳоннинг комига яқин келиб қолганимиз ғалати бўлди,— деб мулла Фазлиддин жиянига маънос қўзлари билан қаради.

— Бирон сабаб билан келгандирсиз-да, мулла тоға?— сўради Тоҳир.

— Сабаб шуким, жиян, уруш бошланса, қурилиш тўхтайдди, меъморнинг кераги бўлмай қоладир...

— Ие, ахир, сизни подшонинг ўзи хизматига олган эмасмиди?

— Подшо Аҳси қўрғонида мудофаа билан овора. Тошкент хони Маҳмудхон ҳам Хўжанд томондан бизга қарши қўшин тортиб келмоқда эмиш. Қашқар ҳокими Абубакир дуғлат деган яна бир босқинчи шарқдан ўзгантининг устига бостириб келишдир.

Тоҳирнинг кекса отаси қўркиб, ёқасини ушлади:

— Ё тавба! Бу ёққа Самарқанд қўшини... Уч томонимиздан ёғий бостириб келибдими, а? Бу не қўргулик, мулла Фазлиддин? Ахир бу подшолар сал муроса қилсалар бўлмайдимми, а? Ҳаммаси бир-бирига қариндош эмиш-ку. Шу ростми?

— Ҳа, рост. Тошкент хонига бизнинг подшомиз куёв бўладир. Қўқонни талаб, бизнинг устимизга қўшин тортиб келаётган Самарқанд подшоси Султон Аҳмад мирзо эса бизнинг подшомиз билан бир отадан бўлган оға-инидирлар. Яна бу икки подшо бир-бирларига қуда бўлмоқчи эдилар. Самарқанд подшосининг қизи бизнинг валиаҳдимиз Бобур мирзога беш яшарлигидан унаштириб қўйилган эди. Шундан билингки, оға инига, қайнота куёвга қарши қилич қўтариб чиқмишдирлар!

— Ё пока парвардигор! Охирзамон дегани шумикин, мулла Фазлиддин?

— Билмадим, почча. Ҳар қалай, ёмон тождорларнинг

замонаси охирлаб қолаётганга ўхшайдир. Кошки ўзлари билан ўзлари олишиб, бизни тинч қўйсалар! Урушнинг бутун жабру жафоси эл-улуснинг бошига тушадир.

— Шўримиз бор экан-да!

— Ҳа, толе бўлмаса қийин экан! Мен не-не орзулар билан илм-хунар ўрганиб келган эдим! Ватанимиз бўлмиш Фарғона водийсида Самарқанддагидек, Ҳиротдагидек мадрасалару кўркам обидалар қурмоқчи эдим. Бу салтанату подшолардан не қолур? Ҳаммаси ном-нишонсиз кетгай! Биздан ёдгорлик бўлиб қолса Улугбек мадрасасидек, Навоий Унсиясидек санъат асарлари қолур!

Мулла Фазлиддин оғзидан чиқиб кетган сўнги гаплардан хавотирланиб, эшик томонга қараб қўйди. Унинг сарой аҳлига яқин юриб, айғоқчилардан юрак олдириб қўйганини Тоҳир ҳам сезд.

— Мулла тоға, сўзлайверинг, бу ерда ҳамма ўз-ўзимиз... Андижон қўрғонидан нечун сизга жой бермадилар?

Мулла Фазлиддин сўнги кунларда бошдан кечирган мудҳиш ҳодисаларини эслаб, бир лаҳза оғир сукутга кетди...

Ўтган куни хуфтон пайтида мулла Фазлиддин ўзларидан беш-олти уй нарида турадиган бир хаттот ошнасиникида ифтор қилиб ўтирганда қандайдир номаълум кишилар унинг уйига бостириб киради. Ҳовлидаги ит вовуллаб қўймаганда уни қилич билан чопиб ташлайдилар. Бугун бу ерга араваин миниб келган хизматкор йигитнинг оғзига латта тикиб, қўлоғини боғлайдилару қазноққа ташлайдилар. Сўнг уйга кириб, тинтув ўтказадилар ва пўлат сандиқни кўрадилар. Лекин уни очишнинг иложини тополмай, қулфини болта билан уриб синдиришга киришадилар.

Қилич билан чопилган ит каттиқ вангиллаганда девордармиён қўшнилари бир фалокат бўлганини сезадилар. Улардан бири чиқиб мулла Фазлиддиндан хабар олмоқчи бўлса, дарвоза қаршисидаги дарахт панасида бир одам тўртта отини жиловидан ушлаб турибди. Унинг юзи қора ниқоб билан бекитиб олинган, фақат кўзлари кўринади. Ичкаридан эса пўлат сандиқ қулфига урилаётган болта товуши эшитилади...

Мулла Фазлиддинга кадрдон бўлган қўшнини унинг уйига ёмон одамлар тушганини сезади-ю, дарҳол хаттотникига чопади. Ундан воқеани эшитган мулла Фазлиддин уйига югуриб келди.

Пўлат сандиқнинг қулфини синдириб очиб, ундаги қоғозларни титкилаётган боқинчилар уй эгасини кўриб, дарчадан айвонга сакрашди.

— Тўхта, нобакор!— деб мулла Фазлиддин биттасининг қаршисидан чиққан эди, юзига қора ниқоб тутган айиқдай

зўр йигит уни елкаси билан уриб четлатди-да, кўчага отилди. Бошқалари ҳам кўчадаги отларига миниб, бир лаҳзада гойиб бўлишди.

Мулла Фазлиддин уларни қувлаб етолмаслигини сизди-да, тўс-тўполоп бўлган уйга қараб интилди ва очик ётган пўлат сандиқнинг тепасига келди. Токчада қўшалок шам ёниб турибди. Унинг ёруғида аралаш-қуралаш бўлиб кетган, баъзи жойлари йиртилган лойиҳалар ва чизмалар кўзга ташланди. Сандиқ ичида подшоҳ инъом қилган олтиннинг бир қисми ҳамёни билан турган эди. Шу йўқ. Лекин ҳозир мулла Фазлиддиннинг кўзига олтин ҳам кўринмас эди. Унинг бутун хаёли сандиқ тубидаги махфий тағқутини бекитиб турган силлиқ мис нарчасида эди. Уни чапга секин сурган эди, тағқутининг калит солинадиган жойи очилди. Мулла Фазлиддин атрофига аланглади — уйда бошқа одам йўқ, кўшниси қазноқдаги хизматкорнинг оёқ-қўлини ечиш билан овора эди. Мулла Фазлиддин кўйнидан кичкина калит олиб, тағқутининг қулфига солди. Қулф очилгандан кейин тағқутининг мис қопқоғини секин кўтарди-ю, юнқа жилд ичидаги суратларни очиб кўрди... Кекса боғбоннинг дарахт пайванд қилаётган пайти... Чилмаҳрам тоғларидага ов тасвири... Энг пастда чапг чалаётган гўзал бир қизнинг сурати...

Бу — Умаршайх мирзонинг қизи Хонзода бегим. Мулла Фазлиддин Ҳиротдан келиб, Андижон чорбоғида подшоҳ оиласи учун тиллакори кўшк қурган пайтларида ўн саккиз ёшлик Хонзода бегим унинг мусаввир ҳам эканлигини билиб қолиб, ўзининг суратини чиздирган. Мулла Фазлиддин бу ишни яшириқча қилган. Агар шариат пешволари унинг одам суратини чизганини билиб қолишса соғ қўйишмайди. Яна тагин гўзал малика билан яшириқча тил бириктириб сурат чизгани қизнинг подшоҳ отасига маълум бўлса борми, мулла Фазлиддинни тилка-пора қилиб ташлашлари ҳеч гап эмас.

Шу сабабли ҳозир уни энг қаттиқ кўрқитган нарса — бу суратнинг босқинчилар қўлига тушиб қолиш эҳтимоли эди. Хайриятки, улар сандиқ тагида махфий тағқути борлигини сезишмабди. Лекин сандиқни отларига ўнгариб кетишса нима бўларди? Унда тағқутидаги суратларни ҳам албатта топиб олишарди!..

Хизматкор йигит сал ўзига келгандан сўнг мулла Фазлиддин ундан ва кўшнисидан воқеанинг тафсилотларини сўраб билди, ўзининг кўрганларига буни таққослаб, шундай хулосага келдики, унинг уйига тушганлар — оддий ўғрилар эмас, балки қайси бир зўравон бекнинг йигитлари. Улар уйини тинтиб нимани қидиришган? Тарҳларни ташлаб кетишибди. Демак, суратларни излашган... Мулла Фазлиддиннинг сурат

чизишни биладиган одам... унда қасди бор бек юборган бўлиши керак бу йиғитларни!...

Изтиробли ўйлар туни билан мулла Фазлиддиннинг кўзига уйку кўндирмади. Урушнинг алғов-далғовида тобора бўйин йўғон бўлиб кетаётган бебош беклар эсига тушгани сари кўнгли безовта бўларди.

Андижонлик беклардан Ҳасан Ёқуб дегани шу йили баҳорда мулла Фазлиддинни чорбоғига чақиртириб, катта бир иш топширмақчи бўлди.

— Мирзо ҳаммомдан ҳам улканроқ бир ҳаммом қурдирмоқчимен... Ёзда салқинлайдиган мраммар хоналари бўлсин... — Ёқуббек овозини пасайтириб давом этди. — Чиройлик асира қизлар сотиб олмаймен. Олтишим старли. Ўша қизлар ҳаммомнинг мраммар ҳовузига чўмилганда мен ўлтириб томоша қиладиган махфий туйнуклари ҳам бўлмоғи лозим. Уқдишгизми? — деб Ёқуббек хахолаб кулди-да, гапнинг хулосасини айтди. — Ана шу ҳаммомнинг тарҳини ўзингиз чизинг. Қурилишига ҳам сиз саркор бўлинг. Қанча ҳақ тиласангиз берай. Хўпми?

Меъморликни муқаддас бир санъат деб ишонган мулла Фазлидин Ёқуббекнинг шахвоний ниятларини эшитиб нафрати келди:

— Жаноб бек, узр, мен ҳаром ишдан кўрқаман!..

— Нимаси ҳаром?.. Мен ҳаммомни ўз ақчамга қурдиргаймен!

— Ҳаммомга махфий туйнуклар қўйиб қурадиган саркорлар бошқа... Сиз ўшаларга мурожаат қилинг. Менга мирзо ҳазратлари покиза бир даргоҳ қурдирмоқчилар. Шу қишларда мадраса тарҳини чизиш билан бандмен. Рухсат этинг, мен борай...

Ўринларидан турганда Ёқуббек мулла Фазлидинга ўқрайиб кўз тикди:

— Лекин мен айтган гап шу ерда қолсин, жаноб меъмор. Акс ҳолда...

— Албатта, бу гап шу ерда қолур! Лекин сиз ҳам мендан озурда бўлманг. Ора очик! Маъқулми, жаноб бек?

— Маъқул!

Мулла Фазлидин шу билан бу бўйин йўғон бекдан қутулдим, деб ўйлаган эди. Лекин буидан ўн беш кунча бурун Аҳмад Танбал деган бир бадавлат бек мулла Фазлидинни сўроқлаб, кечки пайт унинг уйига келди. Икковлари холи қолганда Аҳмад Танбал чўнтагидан бир ҳамён олтин олди-да, мулла Фазлидинга узатди:

— Таксир, мана шу олгинини олдинги битта сурат чизиб бering.

— Қанақа сурат?

Ёши йиғирма бешлардан ошган бўлса ҳам юзига ҳали дуруст соқол чиқмаган, кўсанамо Аҳмад Танбал оғзини меъморнинг қулоғига яқинлаштириб шивирлади:

— Маликамизнинг сурати керак менга!

— Қайси маликамиз?— сергакланиб сўради мулла Фазлиддин.

— Чорбоғда тиллакори кўшк қурганингизда кўргансиз... Хонзода бегим... Ўзи ҳам сизнинг санъатингизга ихлосманд эмиш-ку...

Мулла Фазлиддиннинг юраги така-пука бўлиб кетди. Нахотки бу бек пўлат сандиқдаги суратдан хабардор бўлса!

— Ким сизга шундай деди?.. Мен меъмормен... Мен фақат иморатларнинг суратини чизаман...

— Мендан яширманг, жаноб меъмор! Мен шарият пешвоси эмасмен. Сурат чизишни бизда ман қилганларига мен ҳам қаршимен! Хиротда Шохруҳ мирзо Вайсунқур мирзо учун қурдирган саройнинг деворлари гўзал қизлар сурати билан безалган экан. Тўғрими?

— Тўғри-ю, лекин... Ҳар жойнинг ўз тошу тарозиси бор. Агар Хонзода бегимнинг сурати ҳақида сиз айтган гапни подшоҳ хазратлари билиб қолсалар, нима бўлишини ўйлайсизми?

— Билмагай!— деб шивирлади Аҳмад Танбал.— Иккови-миздан бошқа ҳеч ким огоҳ бўлолмагай! Хўп денг! Манг, олтинни олинг!

— Шошманг, бек. Мени сурат чизади, деб сизга ким айтди?..

— Эшитдикда!

— Кимдан?.. Хасан Ёқуббекданми?..

— Хасан Ёқуббек бир боғбондан эшитган экан...

«Демак, Аҳмад Танбалнинг бу ерга келганидан Хасан Ёқуббек хабардор!— ўйлади мулла Фазлиддин.— Булар бир-галашиб мени кўлга туширмақчи бўлса керак. Сендек қурбақатахлит бек учун Хонзода бегимнинг суратини чизиб бериб мен аҳмоқ эмасмен!»

— Жаноб Аҳмадбек, камшиа боғларнинг суратини чизганда бир четига боғбонни ҳам тасвирлашим мумкин. Меъморлик санъати буни инкор этмайди. Аммо маликанинг суратини чизиш учун менда на санъат бор, на ҳақ ва на журъат!

— Хуллас, менинг сўзимни ерда қолдирмоқчимисиз?

— Бошқа иложим йўқ. Мени маъзур тутинг, жаноб бек. Бундай таклиф билан келиш сиз учун ҳам хатардан холи эмас!

— Э, мен буздиллардан¹ эмасмен!— деб Аҳмад Танбал қаҳр билан ўрнидан турди ва йирик тишларини иржайтириб қўшиб қўйди:— Лекин сиз менинг шахтимни қайтарганингиз учун хали пушаймон бўлдурсиз!

¹В у з д и л — экиюррак, қўрқоқ.

Бу таҳдид маъна энди тўртга босқинчининг қиёфасига кириб, қоронғида унинг уйига бостириб келган бўлса ажаб эмас. Қуролсиз, навқарсиз мулла Фазлиддин Аҳмад Танбалдай юз-икки юзтадан қуролли йигитлари бор бекларга қандай бас келади? Лекин «бўлари бўлди», деб индамай юраверса, бу қутурган бек эртага бешбаттар ёмонликлар қилиши мумкин эмасми?

Мулла Фазлиддин эрталаб подшоҳ инъом қилган тўбичок отни минди-да, шаҳар доруғаси¹ қабул қиладиган маҳкамага йўл олди. Узун Ҳасан исмли ингичка, новча доруға аскарликка одам олиш ва шаҳарни яқинлашиб келаётган душмандан химоя қилиш ташвиши билан банд экан. Мулла Фазлиддиннинг арзини қаёққадир кетмоқчи бўлиб шошилиб турган пайтда тинглади-да:

— Тарҳларингизга тегмай, ҳамёнингизни олиб кетган бўлса, бу — тўқайдан чиққан ўғриларнинг иши,— деди.— Ёғий ташвишидан қутулсак, тўқайларни ўғрилардан тозалалаймиз... Ҳозир аҳволни кўриб турибсиз!..

Қўл қовуштириб тикка турган мулла Фазлиддин доруғага яқинроқ келди:

— Менинг бошқа гумоним бор, жаноб доруға,— деди. Сўнг Аҳмад Танбалдиннинг сурат чиздирмоқчи бўлганини, рад жавоби олганда эса аччиқланиб кетганини айтиб берди.

— Кимнинг сурати?— деб доруға қизиқиб қолди.

Мулла Фазлиддин Хонзода бегимнинг номини тилга олишга кўрқди.

— Парилар суратимиди? Яхши тушунмадим.

— Сандиғингизда парилар сурати бормиди? Босқинчилар шунини олиб кетибдирми?

— Сурат ўзи бўлмаса нени олиб кетсин! Мен ҳазрати олийлари буюрган мадраса тарҳини чизиш билан бандмен. Суратқашликка вақтим йўқ. Сандиқда хомаки лойиҳаларим бор эди, холос.

— Улар жойида қолганми, ахир? Ундоқ бўлса Аҳмадбекдан нечун гумонсирамоқдасиз?

— Сабабини айтдим, жаноб доруға! Тафтиш ўтказишингизни сўраймен!

— Аҳмадбек — султонлар авлодидан эканини унутган бўлсангиз мен эслатиб қўяй. Ҳазрати олийларининг катта хотинлари Фотима бегим Аҳмадбекка қариндош бўлурлар. Фотима бегимнинг чақирғи билан Султон Аҳмадбек бугун азонда пойтахтимиз Аҳсига кетдилар.

«Агар ўша бек сандиқдаги суратларни қўлга туширса, Аҳсига элиб, подшоҳ оиласига кўрсатмоқчи бўлганми?— деган ўй мулла Фазлиддиннинг ичиди музлатиб ўтди.— Булар

¹ Доруға — шаҳар ҳокими.

менинг қонимга шунчалик ташшами? Балки Аҳмад Танбал Хонзода бегимни ҳам шу сурат орқали қўлга туширмоқчидир? Хали уйланмаган бу бек подшога қуёв ва Хонзода бегимдек гўзал қизга эр бўлишини жон-дили билан истаса керак!»

Ўргимчак тўрига ўхшаш ёнишқоқ бир бало атрофини ўраб келаётганини сезган мулла Фазлиддин жон-жаҳди билан бу тўрни йиртиб чиқиб кетишга уриди:

— Жаноб доруға, мен сиздан адолат истаб келдим! Подшоҳ ҳазратлари мени сизнинг ҳимоянгизга топширган эдилар! Агар босқинчиларни топиб жазо бермасангиз, мен подшоҳ ҳазратларининг ҳузурларига паноҳ истаб кетишга мажбур бўлурмен!

— Аммо шуни биллингки, жаноб меъмөр, ҳазрати олийининг ҳузурига сиздан ҳам олдин баъзи бир гапларингиз етиб бориши мумкин!

— Яъни қайси гапларим, жаноб доруға?

— Баъзи меъморлар ўзларини подшоҳлардан ҳам баланд қўярмишлар. «Бу тахту салтанатлар беному нишон йўқолур, фақат меъмору мусаввирлар яратган зўр санъат асарлари тирик қолур» деган густохона ақидалар бизга маълум!

Мулла Фазлиддин бугун Қувада поччасининг уйида беҳосдан айтиб юборган бу эътиқодини бошқа ишонган одамларига ҳам айтган пайтлари бўлган эди. Ана шу ишонганларидан аллақайсиси айғоқчилик қилиб, бу гапни доруғага етказганини, энди доруға буни подшоҳга дастурхон қилиб олиб бориши мумкинлигини сизди-ю, баданидан совуқ тер чиқиб кетди. Лекин доруғага сир бой бериш қанчалик хатарли эканини пайқаб:

— Бу ҳаммаси иғво!— деб хитоб қилди:— Жаноб доруға, сизнинг устингиздан иғво қилувчилар ҳам оз эмас! Буни билурсиз! Мен Андижонда неки бино қилган бўлсам, ҳаммасига мирзо ҳазратларининг номларини битмоқдамен! Арқдаги девонхонани кўринг! Чорбоғдаги кўшкни кўринг! Мен уларнинг бирор жойига ўз номимни ёзибменми? Қани, иғвогарлар далил келтурсинлар! Мен ҳаммасига мирзо ҳазратларининг муборак номларини битганмен! Демак, тарихда менинг номим эмас, мирзо ҳазратларининг номи қолсин, деганмен! Шундоқми, йўқми? Қани айтинг!

Доруға бу мантиқли далилларни рад этолмасдан:

— Шундоқликка шундоқ, аммо...

— Аммоси йўқ, жаноб доруға! Сиз мени босқинчилардан ҳимоя қилиш ўрнига, айғоқчиларнинг туҳматига ишонадирган бўлсангиз, мен алҳол Аҳсига бориб, мирзо ҳазратларига арз қилурмен!..

Узуи Ҳасан бу дўқини инсанд қилмай:

— Майли, боринг, арз қилинг!— деди.— Лекин шуни биллигини, атрофимизни ёғиғи босган бу хатарли дамларда подшоҳга меъмордан кўра навкар зарурроқ! Аҳмадбекдек, мендек жанговар беклар учун подшоҳ ҳозир сиздеклардан қанчасининг бахридан ўтур!

— Аҳсига борганда кўрурмиз,— деб мулла Фазлиддин маҳкамадан шахт билан ташқарига чиқди. Унинг вазоҳати ҳозирроқ Аҳсига, подшоҳ ҳузурига арзга борадиганга ўхшарди.

Лекин у отланиб уйига қайтаётганда сал ҳовуридан тушди-ю, узун Ҳасан айтган сўнги гапларда аччиқ бир ҳақиқат борлигини сизди. Ёв қуршовида қолаётган Умаршайх мирзо битта меъморни деб уч юз-тўрт юздан навқари бор зўравон бекларга қарши бормаслиги аниқ. Аҳмад Таибал бугун Аҳсида — шоҳ саройида. Агар у мулла Фазлиддиннинг малика суратини чизгани ҳақида гап тарқатса... Лекин Аҳмад Таибал буни қандай пайқаганикин? Мулла Фазлиддин Хонзода бегимнинг суратини чизиш учун у билан тиллақори кўшқда ишхон учрашганда буни зимдан кўриб қолган қанизлар ёки савдарлар¹ бўлса, Аҳмад Таибал шунинг бир четини эшитиб, ҳалиги ҳамёини кўтариб келганмикин? Босқинчи йиғитларини ишга солиб ҳам мақсадига етолмаган бу ёвуз бек энди шоҳ саройига бориб пешгирлик қилиши мумкин. Агар у ўзи эшитган мишмишнинг ҳарамдаги аёллар орқали подшоҳнинг қулогига етказса... Умаршайх мирзо бўй етган қизининг қаёқдаги бир меъмор билан яшириқча учрашиб, сурат чиздирганини ўз шаънига қатта иснод деб билиши аниқ. Шоҳ исковуқлари ишга туширилса, мулла Фазлиддин яшириб юрган суратни топиб олиб, Аҳмад Таибалнинг гапига далил қилиш кўлларидан келади. Ана ундан сўнг шоҳ қизига иснод келтирган мусаввирни минг қийноқларга солиб ўлдиришлари турган гап!

Мулла Фазлиддин Хонзода бегимнинг суратини чизиш билан нечоғлиқ хатарли ишга қўл урганини энди астойдил ҳис қилди. Агар сурат қўлга тушса, у қиз ҳам маломатга қолади. Дунё бусиз ҳам ташвиш-тахликага тўла!.. Мулла Фазлиддин тағкутидаги малика суратини титроқ қўллар билан жилдан олди. Ифвогар аблаҳларга далил қолдирмаслик учун буни йўқ қилиши керак! Мулла Фазлиддин ўчоқда ёнаётган оловга яқин борди.

Рағли бўёқлар билан ишланган мўъжазгина суратдаги гўзал қиз шу пайт унга тирик бир одам бўлиб кўринди. Аланга ёлқинида қизнинг кичриклари, лаблари билинар-билнимас нафис ҳаракатлар қилаётганга ўхшаб кетди. Қизнинг ақлини шоширадиган жозибаси бор эди. Бу жозоба мулла

¹ Савдар — ҳос хизматкор.

Фазлиддинни ҳар галгидай яна сеҳрлаб олди. бояги таҳлика хаёлидан узоқлашиб, қалбида илқ туйғулар уйғонди. «Наҳотки мен бу қизга ошқ бўлсам? — хайрат ичида ўйлади мулла Фазлиддин. — Қора халқ орасидан чиққан мендай бир сураткашнинг шоҳ қизига мухаббат қўйиши қулғили эмасми? Йўқ! Мен фақат ўзим чизган суратга — ўз ижодимга меҳр қўйганмен, холос! Бошим омон бўлса, бундай суратни яна чизгаймен!»

Шу ўй билан суратни ўтга ташламоқчи бўлиб эгилди. Қиз тасвири оловга яқинлашганда юзи қизариб бўғриққандек, кўзлари эса чақнаб кетгандек кўринди. Мулла Фазлиддин тирик одамни ўлдираётгандек, севаклисини ўтга ташлаётгандек сесканиб орқага чекинди. Ички бир овоз уни «Қўрқоқсен!» — дегандек жеркиди. «Душманларнинг устинга бостириб келаётгани йўқ-ку! Аҳмад Таибал ҳали Аҳсида. Билиб қўй, сен бундан гўзал суратни иккинчи марта чиза олмассен! Тасвирга бунчалик тирик жозоба бахш эта олганинг — такрорланмас бир илҳомнинг натижаси. Ботир бўлсанг қутқариб қолурсен!»

Мулла Фазлиддин суратни таққутига қайтариб солди-ю, хизматкор йиғитни чақирди:

— Кўчларни йиғиштир! Аравани қўш! Қувага жўнагаймиз!.. Тез!.. Тезроқ!..

Мана ҳозир онасининг уйида ўтириб, юз берган воқеани поччаси билан жиянига сўзлаб берар экан, пўлат сандиқда Хонзода бегимнинг сурати борлигини уларга ҳам айтмади: Бу сирни у ҳеч кимга билдирмоқчи эмас эди...

— Во дариё! — деб Тоҳирнинг отаси оғир уҳ тортди: — Бизнинг суянган тоғимиз сиз эдингиз, мулла Фазлиддин!.. Энди сиз ҳам қувғиёга учраган бўлсангиз.

— Начора? Ҳаммамизнинг ҳам тақдиримиз қил устида турибди!

— Подшоҳга арзга борсангиз, доднингизга етмасмикин, мулла тоға?

— Бу тўнолошлар босилса, бир марта бориб арз қилишим аниқ. Агар додимга етса етди, етмаса, яна Ҳиротга қайтиб кетурмен! Алишер Навоий Шифоня деган бино қурдирмоқчи, деб эшитган эдим. Оламда биз учун ёнган ягона умид чироғи ўша сиймо бўлиб қолди.

— Ҳирот орзусини қилманг, мулла Фазлиддин, Фарғонада ҳам хунарингизнинг қадрига етадиган одамлар бор. Қуванинг кўприги сизнинг режангиз билан қурилган эди. Халқ ҳалигача сизни дуо қилиб юрибдир.

— Халқ! Қани эди бу кўприқдан фақат халқ ўтса! Эрта-индин бу кўприқдан ёғий қўшинлари ўтиб келур! Халқнинг бошига ёғиладиган балоларни ўйласам, бугунги жалалар

селга айланиб, ўша кўприкни окизиб кетмаганига афеус қиламен! Агар ёғий, бу томонга ўтолмасин деб, ўша кўприкни хозир ёндириб юборсалар, мен жон деб рози бўлур эдим!

«Чиндан ҳам,— ўйлади Тоҳир ўзинча.— ёғоч кўприк. Ёғ сенса ёнур. Ёғий фақат шу кўприкдан ўтиши мумкин. Кечув ҳам йўқ. Ҳаммаёқ ботқоқлик, қамишзор. Агар кўприк ёндирилса ёғий ўтолмагай!» Тоҳир кутилмаган жойдан нажот йўлини тоғандай бўлди. Тасавурида гавдаланган ёғий алангасидан гўё унинг бадани кизиб кетгандай туюлди. Робияни бало-қазодай асрайдиган энг зўр қалқон ана ўша олов бўлиши мумкин! Тоҳир қалтис истакдан кўзлари ёниб отасига қаради. «Айтсам-микни? Йўқ! Розилик бермас. Ёлғиз ўғилмен. Тоғам... нозик одам, аралашмагани маъқул. Таваккалчи йиғитлардан топишим керак!»

Тоҳир секин ўридан туриб, ҳовлига чиқди.

Осмоини тўлдирган булутларнинг йиртиғидан бирда-ярим юлдузлар кўришиб қолади. Уйлар чироқсиз. Кўчалар сукутда. Аҳён-аҳёнда кучуклар ҳургани эшитилади.

Ифторни қилиб чиққан Маҳмуд Тоҳирга дарвоза олдида учради. Робиянинг акаси бўлган бу кәсиб йиғит Андижон кўрғонига кетишдан гап очган эди:

— Э, бу ниятлар ҳаммаси пучга чиқди!— деб Тоҳир унга тоғасидан эшитганларини айтиб берди. Маҳмудни ҳам бирдан ғам босиб:

— Энди қайдан нажот излаймиз, э худо!— деди.

— Ўзинг учун ўл етим, деган гап бор. Маҳмуд... Юр, дарво-заҳонага кирайлик. Бир сир айтамен. Оғзингдан чиқарма! Кўприкни ёндирамыз!..

— Қандай қилиб?— хайрат билан сўради Маҳмуд.

Тоҳир унга ўзининг режасини шивирлаб тушунтирди:

— Ёғ сепсак, ёғоч тез ёйгай. Билдингми?

— Жинни бўлибсен! Кўприкда соқчилар бор-ку.

— Ўзимизнинг беклар қўйган соқчиларми? Ҳали ёғий яқин келса ҳаммаси кўрғонга қочгай. Ўшанда биз...

— Йўқ, шошма! Ахсидан бизнинг подшомиз қўшин тортиб келаётган эмиш. Бу кўприк ҳали ўзимизга керак!..

— Подшойнинг кўрғонидан чиқса шу кунгача чиқар эди! Ана, Марғилон ҳам бой берилибди! Подшодан дарак йўқ!..

— Билмасам, кадхудо¹ гузарда ишонтириб айтди. «Подшо ҳазратлари йўлда, эрта-индин ҳимоямызга етиб келишлари аниқ!»— деди.

— Чиндан йўлга чиқибдими-а?

¹ Кадхудо — қишлоқ оксоқоли.

— Ҳа, ўз қулоғим билан эшитдим! Бултур подшомиз ёғий билан Хўжаиддан нари Ховосга бориб урушган экан-ку. Қува Ахсига Ховосдан ёвуқрок¹ эмасми?

— Ёвуқликка ёвуқ-ку!.. Зора сен айтганинг рост чикса-я, Маҳмуд?

— Ҳа, ахир, кўприкка соқчиларни бекорга қўйганларми?.. Подшомиз эрта-индин келиб жўнимизга ора киргай... Мана, кў-рурсен!..

Шу тонда Тоҳирнинг кўнглида ҳам умид учқунлагандай бўлди. У қоронги осмоннинг узоқ бир четида — Сирдарёдан нарида жойлашган Ахси томонга интизор кўзлар билан тикилди.

АХСИ.

АЖАЛГА ДАВО ЙУҚ

I

Баланд тепалик устига қурилган Ахси қалъаси тун оғушида тоғ қоясига ўхшаб қорайиб кўрилади. Қалъа этагида Косонсой Сирдарёга гувуллаб қўйилаётгани, икки дарё тўлкинлари бир-бирлари билан олишиб, қирғоққа шалонлаб урилаётгани узоқдан эшитилиб туради.

Ахсининг ҳукмрони Умаршайх мирзо бу кеча ҳарамда ўн саккиз ёшлик Қоракўз бегимнинг хобгоҳида ухлаб ётибди. Шоҳона тўшакнинг инак пардаси ортида биттагина шам липиллаб ёниб турибди. Унинг заиф ёғдуси ташқаридан босиб кирмоқчи бўлаётган тун қоронгисидан кўрққандай титраб-қалтирайди.

Саҳар иайтида қалъа сукунатини бузиб ҳазин сурнай товуши янгради. Сўнг унга қўш нақора товуши жўр бўлди. Рўза тутиш — шоҳу малайга баробар келган мажбурият бўлгани учун сурнай ва нақора сарой аҳлини саҳарликка уйғотмоқда эди.

Ёз тунлари қисқа, уйқуга тўймай саҳарликка туриш хийла нохуш. Шундай бўлса ҳам Қоракўз бегим ўрнидан оҳиста туриб ювинди, кийинди. Лекин нарқу тўшакда бақувват кўллари-ни инак чойшабдан чиқариб ухлаб ётган Умаршайх мирзо ҳамон уйғонмас эди.

Хобгоҳдан икки хона нарида ҳашаматли танобий уйда аллақачон тузаб қўйилган дастурхон Мирзога мунтазир эди. Унинг кеча ифтордан сўнг берган амрига мувофиқ бугунги саҳарлик учала хотинлари ва болалари билан бирга қилиниши керак эди. Мирзонинг биринчи хотини Фотима Султон, иккин-

¹ Ёвуқ — яқин.

чи хотини Қутлуг Нигор хоним. Ун саккиз ёшлик қизи Хонзода бегим ва ун яшар ўғли Жаҳонгир мирзо — ҳаммалари ўша та-
нобий уйга йиғилган эдилар. Лекин ҳазратнинг ўзлари келма-
гунча ҳеч ким тамадди қила олмас эди.

Ички эшикдан Қорақўз бегим чиқиб келди. Кичик жуссали бу ёш жувои тепада ёнаётган қандил ёруғида беҳад чиройли кўриди. У катта бегимларга уялибгина салом берди-да, ҳаз-
ратни уйғотишга журъат этолмаганини айтди.

Қорақўз бегимнинг ёшлиги, гўзаллиги, хусусан, уялиб га-
пириши ҳозир унинг энг суюкли хотин эканини эсга тушир-
ди-ю, Фотима Султоннинг рашкини кўзгади.

— Ҳазратимни мунча қаттиқ ухлатибсиз, энди уйғотиш
печун илгингиздан келмайдир?

Қутлуг Нигор хоним болалар олдида қилинган бу киноядан
озорланиб:

— Қўйинг, оға ойи. Бу бегимда айб йўқ! — деди.

Хонзода бегим ойисининг юзига маъноли кўз ташлаб: «Айб
бизнинг отамиздами?» — демоқчи бўлди. Подшоҳ ота қизи
тенглик Қорақўз бегимнинг хобгоҳида қонли уруш ҳаммани
бесаражом килиб турган шундай тахликали тунда қотиб
ухлаб ётиши унга беҳад хунук туюлди. Ҳозир отаси келса,
Хонзода бегим унинг юзига қарай олмаслигини сизди-ю, ойиси-
дан илтимос қилди:

— Рухсат беринг, мен кетай... Саҳарликни бошқа қизлар
билан қилай...

— Ҳазрат отангиз сўрасалар биз не деймиз? Хафа бўлма-
синлар, тағин. Сабр қилинг, қизим... Мунча ошиқманг...

Ташқари эшикдан таъзим қилиб кирган чошнагир¹ аёл
овозини кўркув билан пасайтириб хабар берди:

— Осмонда юлдузлар сийрак қолди. Ҳадемай тонг ёришур.
Ҳазрати олий саҳарликсиз қолурларму?

Тонг отиб, азон айтилгандан сўнг рўза ўз кучига кира-
ди, ҳеч ким ҳеч нарса еб-ичиши мумкин бўлмай қолади.
Узун ва иссиқ ёз кунида подшоҳни саҳарликсиз қолдириш
бегимлар учун ўзлари оч-наҳор қолишларидан кўрқинчлироқ
эди.

Барча кўзлар ички эшик олдида ийманиб турган Қорақўз
бегимга тикилди. Мирзо унинг хобгоҳида ётибди, у ерга кириб
ҳазратнинг ширин уйқусини бузишга бошқа ҳеч ким ботинол-
майди. Чошнагир аёл Қорақўз бегимга илтижо қилди:

— Илоҳо Рустамдай ўғил кўринг, бегим!.. Бутун умидимиз
сиздан!

¹ Ч о ш н а г и р — подшонинг дастурхонига қарайдиган ходима.

Қоракўз бегим ташвишли юз билан секин бурилди-ю, ички эшиклардан ўтиб, хобгоҳга қайтиб борди. Умаршайх мирзо боши ёстикка ботиб, қаттиқ ухламоқда эди. Қоракўз бегим олтин шамдонни нарда ортидан олиб, нақшни токчага қўйди. Шам ёруғи Мирзонинг юзига тушди. Аммо бу ҳам уни уйғотолмади — Мирзо кечаси маъжун¹ еган эди.

Қоракўз бегим уни чўчитиб юборишдан кўрқиб, майин товуш билан:

— Ҳазратим! — деб чақирди. Бу ҳам кор қилмади. Қоракўз бегим гилам узра чўккалаб, ваҳимадан хиёл титраётган нафис кўдларини ҳазратнинг майин чойшаб устида ётган залварли биллагига қўйди. Тўшакдан гул ҳиди келмоқда эди — кеча оқшом чойшабларга гул атри сешилган эди. Қоракўз бегим Мирзонинг уйғонмаётганидан ажабланиб, унга тикилиб қаради. Лаблари ярим очик, оқиш юзи ғасойишта. Шу ётишда у кўрқинчли подшоҳ эмас, ҳали қирқ ёшга тўлмаган ва баҳодирона уйқуга чўмган кўҳлик бир йигит бўлиб кўринди. Бу йигит Қоракўз бегимга тўсатдан жуда ғанимат туюлди. Ҳозир юрт нотинч, Аҳсига ёв босгириб келяпти. Мирзони ажал кутаётганини олдиндан сезгандек, Қоракўз бегимнинг юраги ёмон бир увушди. У тўсатдан эгилиб, Мирзонинг юзидан, кўзларидан видолашган каби ўла бошлади.

Умаршайх мирзонинг киприклари титради. У кўзини очиб, тенасида турган Қоракўз бегимга карахт юз билан бир лаҳза тикилиб турди.

Қоракўз бегимнинг катта-катта кўзлари хавотирлик туйғусидан яна ҳам улканлашиб кетди. У уйқудаги Мирзони ўлиш беадаблик саналишидан таҳликага тушган эди. Мирзо:

— Сизми? — деди-ю, нима бўлганини фаҳмлаб кулимсиреди.

Қоракўз бегим энди енгил тортди ва дадилланиб таъзим қилди.

— Ҳазратим, саҳарлик вақти ўтиб кетмасин.

— Сизнинг бўсаларингиз саҳарликдан ширинроқ...

Бегим жиддий гапирди:

— Оға ойим, хоним ойи — хаммалари ҳазратимга мунтазирлар.

Умаршайх мирзо бугунги режалари ва уруш ташвишларини эслаб қовоғини солди-да, индамай ўрнидан турди.

У зардўзи кўрпачалар тўшалган танобийга тўрдаги эшикдан кириб келди. Ғалласи ва камарига қадалган қимматбаҳо

¹ Маъжун — зиравор ва доривор гвёҳлардан тайёрланган. Кўшичча унга афюн ҳам кўшганлар.

гавҳарлар шам ёруғида нафис жилोलанарди. Одатдаги таъзимлардан сўнг, аёллар нафасларини ичларига олиб, бир лаҳза жим қолдилар. Подшоҳ кимни қайси ёнига таклиф қилса — кимнинг ҳурмати қай даражада экани шу билан белгилаб берилади.

Фарғона водийсига уч томондан душман ҳужум қилиб келаётган шу оғир вазиятда Умаршайх мирзо ҳамма хотинларига иложи борича илтифот кўрсатмоқчи бўлди. Хотинлари орасида энг ёши улўғи ва энг обрўпарастни Фотима Султон бўлганлиги учун Мирзо биринчи бўлиб уни юқорига таклиф қилди. Фотима Султоннинг кўзлари қувончдан чакнаб кетди. У подшоҳнинг ўнг томонига ўтмоқчи бўлиб бораётган эди. Бироқ Умаршайх мирзо унга чап томонидан жой кўрсатди. Энг муътабар ҳисобланган ўнг томонга эса Қутлуғ Нигор хонимни таклиф қилди. Хоним — тахт вориси Заҳириддин Муҳаммад Бобурнинг онаси эми, унинг ўнг томонида ўтириши адолатдан эканини кичик хотинлар тан олар эдилар. Аммо Фотима Султон ўзининг ҳурмати Қутлуғ Нигор хонимникидан наст эканини яна бир марта ҳис қилиб, кўзлари алам билан қисилди.

Дастурхонга тортилаётган кийик қабоби, каклик гўштлари ҳазратдан сўнг Қутлуғ Нигор хонимга қўйилар, ундан кейин Фотима Султонга навбат келар эди. Шу сабабли оғизда эрийдиган энг аъло гўштлар ҳам Фотима Султонга илтима овқатдек мазасиз туюларди.

Оқшом ифторда ейилган таомлар ҳазм бўлиб улгурмаган, дастурхон атрофидагиларнинг кўпчилиги ҳали қун бўйи оч юришини ўйлаб, ўзини мажбур қилиб бўлса ҳам кўпроқ овқат ейишга интилар эди. Қутлуғ Нигор хонимнинг ёнида ўтирган Қоракўз бегим овқатдан ҳам кўпроқ бодринг, хандалак ер, шарбат ичар эди — кеча қун иссиғида ташналикдан ниҳоятда қийналгани эсидан чиқмас эди.

Осмон оқариб қолди. Тонг ёришган сари қандилдаги шамларнинг нури хира торта бошлади. Азон айтадиган пайт ўтиб боряпти. Арқдан ташқаридаги масжиднинг имоми кошчилик минорага чиқиб, баковул¹нинг инорасини сабрсизлик билан кутяпти. Ахир Мирзо ҳазратлари саҳарлик қилиб улгурмасдан азон айтиш хатардан ҳоли эмас.

Овқат ейилиб, чойга ўтилганда Умаршайх мирзо хотинларига вазият қанчалик оғирлашаётганини айтиб берди.

Шу пайт масжид томондан азон товуши эшитилди. Чой ичаётган Хонзода бегим шошилиб ниёласини дастурхонга қўйди. Умаршайх мирзо хотинларига бир-бир қараб деди:

¹ Баковул — подшоҳ ошхонасининг жавобгар ходими.

— Мўйсафидлар «тўрт мучаг бутун бўлсин», деб дуо қилурлар. Фотима Султон, Қутлуғ Нигор хоним, Қорақўз бегим, фарзандларимиз Хонзода бегим, Жаҳонгир мирзо — ҳар биригиз оиламизнинг азиз бир мучасидирсиз. Истайменки, бу мушкул вазиятда ҳамма мучаларимиз бутун бўлсин, бир-бирларига меҳру шафқат кўрсатсин! Илик¹ ўз ўрнида азиз. Кўз ўз ўрнида мўтабар. Агар кўз билан илик бир-бирига ни-зо қилса, бундан ҳар иккиси жабр кўрур.

Сўнги гап Фотима Султон билан Қутлуғ Нигор хонимга қаратилганини ҳамма сизди. Хонимнинг хаёли шу хатарли вазиятда ота-онадан узоқда — Андижонда турган ёлғиз ўғли Бобурда эди. Ҳазрат уни нега фарзандлари қатори тилга ол-мади?

— Ҳазратим, берган ўғитингизни бебаҳо гавҳар ўрнида қабул қилурмиз,— деди Нигор хоним.— Ижозат берсангиз, битта ўтинчим бор.

— Ижозат.

— Уруш хатари кучлик экан. Бобур мирзони Андижондан пойтахтга чақиртирсангиз, ёнимизда бўлсалар...

— Андижон қалъаси мустаҳкам. Бобур мирзо у ерда бўлса қалъа янада мустаҳкам бўлур. Бизнинг Мирзога ишончимиз катта.

Бу жавоб билан хонимнинг илтимоси рад этилди. Фотима Султон ёнида уйқуеираб ўтирган ўғилчаси Жаҳонгир мирзо-ни секин бағрига босиб, бошини силаб қўйди. Бу билан у Қутлуғ Нигор хонимдан кўра ўзининг аҳволи яхшироқ эканини намоён қилмоқчи эди.

— Бобур мирзонинг онаси сиздан умрбод мишнатдор, ҳазратим,— деди Қутлуғ Нигор хоним,— фақат ҳали ўн ик-ки ёшга тўлмаган бола... уруш майдонида...

— Хоним, ортиқча хавотирга ўрин йўқ. Бобур мирзонинг ёшига энг яхши беқларимиз юборилган. Ёш бўлса ҳам сар-кардаликка тайёрланмоғи зарур. Агар менинг куним битса, ўрнимни Бобур мирзо олгай.

Энди ўттиз тўққиз ёшга кирган ва қирчиллама йигит ёши-ни яшаётган Мирзонинг ўз ўлими ҳақидаги сўзларидан ҳарам аҳли оғир жимликка чўмди. Ҳамманинг хаёли қонли урушга кетди. Хонзода бегим отаси ҳақидаги баяги нохуш ўйлари-ни унутиб, унга кўзи мўлтираб қаради. Умаршайх мирзо гап-нинг таъсирини янада оширгиси келиб давом этди.

— Агар мен бу фойий дунёдан кўз юмсам, ҳаммангиз Бобур мирзонинг амрини ҳозирги менинг амрим каби бажо келтиргайсиз. Жаҳонгир мирзо!

¹ Илик — бу ерда қўл маъноснда.

— Подшоҳ отаси билан муомалага яхши ўргатилган ўн яшар бола дарҳол сергакляниб, қўлини кўксига қўйди:

— Лаббай, ҳазратим!..

— Менинг бу гапларимни сен ҳам эсда тутгил. Бобур мирзо сендан фақат икки ёш катта бўлса ҳам агар менинг ўрнимда қолса, сен унга фарзанддек содик бўлгил.

— Хўп, ҳазратим!..

Бола отасининг сўзларидаги маънони дуруст тушулмагани учун бунчалик тез ва осон «хўп» деди. Аммо аёллар мураккаб ҳислар туғёнида қолдилар. Қоракўз бегимнинг Умаршайх мирзога термилиб турган кўзларида ёш йилтиллади. Мирзо буни кўрди-ю, суюкли хотинининг бояги ўпичлари эсига тушиб, видолашув аломатига ўхшаб туюлди. Умаршайх мирзо ўзининг сўнгги гаплари ҳам васиятга ўхшаб кетганини энди сизди. Юзига бирдан ажал шарпаси теккандай юраги «шиғ» этди. «Менга не бўлди? Ўлимни бўйнимга олиб васият қилдимми? Йўқ, йўқ!»

Мирзо ўз гапларидан ўзи кўрқиб кетганини пайқаган Хонзода бегим бугун отасининг алланечук ёрдамга мухтож бир аҳволда эканини кўриб, унга бехосдан раҳми келди.

— Ҳазратим, мен мунглиқ қизингиз, сизга худодан Шайх Саъдпўйнинг умрини тилаймен! Илоҳим юзга кириг!

— Айтганинг келсин, қизим!— деб Умаршайх мирзо енгил бир сўлиш олди. У қизининг зийраклигини, сўнгги пайтда бўй етиб, ҳусни етилиб, кўзга ниҳоятда яқин бўлиб қолганини гўё энди сизди-да, қўшиб қўйди:— Мен ахир сенинг тўйингни ўтказмоқчимен!

Хонзода бегимни Самарқанд подшосининг ўғли Бойсунқур мирзога сўратган эдилар. Лекин Умаршайх мирзо бунга рози бўлмаган эди. Мана энди агар жула дўнни топ келса, балки у қизини подшоҳ акасининг ўғлига бериб, шу йўл билан урушни ярашга айлантирар? Лекин бундай истиқбол Хонзода бегимга қоронғи тундек мавҳум ва ваҳимали туюларди. Унинг бошқа орзулари бор эди. Шунинг учун отасининг сўнгги ниятидан чўчиб, гапни бошқа ёққа бурди:

— Агар инимиз Бобур мирзони чақиртириш имконсиз бўлса, мен билан ойимга рухсат беринг, биз Андижонга борайлик!

— Қизим, сен менинг энг бебаҳо гавҳарларимдансен. Бу хатарли аснода сени қанотим остидан чиқармагаймен!

— Ундоқ бўлса менга рухсат беринг, ҳазратим!— деди Қутлуг Нигор хоним.

— Хоним, Марғилондан чопар кутмоқдамиз. Вазият аниқланса рухсат олурсиз.

Умаршайх мирзо дастурхонга фотиҳа ўқиб, ўридан турди-ю, шошилинич тадбирлар ўйлаб, ҳарамдан чиқди.

Ҳарамга кириш ҳуқукидан маҳрум қўрчилар туни билан ташқарида қўриқчилик қилган эдилар. Энди ҳазрати олийнинг эътиборини тортмасликка ва хаёлини бўлмасликка тиришиб, секингина унга эргашдилар.

2

Тонг энди отган, ҳали офтоб чиқмаган бўлса ҳам қўлчилик беклар ва мулозимлар девониюмда ҳозир эдилар. Ҳаммалари мирзони таъзим билан қарши олдилар. Зарбоф тўн кийган, белига тилла камар боғлаган серсоқол эшик оға биринчи вазир даражасидаги энг катта бек эди. Мирзо унга юзланиб, қардан чопар борлигини сўради.

— Ҳазрати олийлари, Исфарадан.

Эшик оға икки букилиб таъзим қилар экан, юзи тунд қўринди.

— Қандай хабар, бек?

— Ҳазратим, кулингизнинг бир қошиқ қонидан ўтинг... Демак, Исфара ҳам ёв қўлида! Мирзо ички бир титроқ билан Марғилон чопарини сўради.

— Ҳазратим, Марғилон чопарига интизормиз.

Наҳотки Марғилон ҳам таслим бўлган? Унда Андижон ҳам хавф остида қолади! Ёки чопарлар ёв қўлига тушганмикин? Балки бирортаси хиёнат қилиб, нариги ёққа ўтиб кетгандир?

— Ҳазрати олийлари, яна чопар юборишга фармон берурларми?

— Чопар юбориб яна неча кун йўлига қарайлик?!

Эшик оға узр сўрагандек таъзим қилиб, орқага чекинди. Ахси қалъасининг қамалда қолиши Мирзога энди муқаррардек туюлди. У эшик оғага олти ойлик захира тайёрлатишни буюрди. Қалъа баланд тепалиқда тургани учун унга сув чиқмас, сувни мешкобчилар ташиб келтиришар эди. Мирзо ўттиз ёшлик, хушқомат Қосимбекка қалъа ичида бир тошхонувуз қурдириш ва уни сув билан тўлдиртириш амрини берди.

Мирзонинг авзойи ёмонлигини сезиб турган беклар дарҳол унинг фармонини бажаришга киришдилар. Мирзонинг ўзи эса отланиб арқдан чиқди. Мулозимлар ва қўрчилар ҳам отланиб, одатдагидай, унга эргашдилар.

Умаршайх мирзо қалъанинг бир четида дарёнинг баланд киргоғи устида, жар лабида турган кабутархонага қараб йўл олди. Отлиқ чопарлар дом-дараксиз кетганликлари учун Мирзо энди қаноғлик «чопар»ларини ишга солмоқчи эди.

Кабутарларнинг дон ва сувларига қараётган кабутарбон-

лар подшоҳни яқин келиб қолганда кўрдилару шоша-пиша таъзимга чиқдилар. Мирзо отини тўхтатди. Орқадаги мулозимлардан иккитаси — рикобдор¹ билан жиловдор тез отдан тушдилар. Бирини Мирзо минган қора кашқа отнинг олтин жиловидан, иккинчиси кумуш узангисидан тутди. Мирзо каттагина қорин қўйган семиз одам эди, отдан эҳтиёт билан секин тушди.

Марғилон ва Қўқонга учадиган махсус кабутарлар келтирилди. Найча қилинган қисқа хатлар уларнинг қанотлари тагига маҳкамланди. Умаршайх мирзо кабутарларни ўз қўли билан учиритишни яхши кўрар эди. У ҳаворанг чиний кабутарини қўлига олиб, ёғоч зина билан кабутархонанинг томига чиқди.

Томдан атроф жуда яхши кўринар эди. Узоқдаги тоғ ортидан қуёш жимгина кўтарилиб келар, пастда шовуллаётган дарёнинг тўлқинлари нафис жилованиб турар, ғир-ғир эсаётган эрталабки шабада шаклдай майини туюлар эди. Умаршайх мирзо том тепасида туриб, ўзи мустаҳкамлатган ва пойтахтга айлантирган Аҳсига кўз югуртириб чиқди. Қўрғоннинг қўлетмас баландликка қурилганидан ва атрофи чуқур ўнгирлар билан ихота қилинганидан алоҳида бир мамнуният сизди. «Ҳали бу жарларга қанчадан-қанча ёғийларим қулагай», деган ўй кўнглини шод қилди.

Бироқ бу баҳайбат ўнгирлар оёқ остидаги заминни ичдан хилвиратиб қўйганини, кабутархона ортидаги жарнинг тагини сув ўйиб кетганини, ер ўпирилгудек бўлиб турганини Мирзо ҳам, унинг атрофидаги мулозимлар ҳам мутлақо сезмас эдилар. Тупроғи тўкилиб, қулашга баҳона тополмай турган жарнинг қаърида хатарли бир шарпа борлигини ҳозир фақат кабутарлар сезаётган бўлса эҳтимол. Чиройли тўрлар ва озода катаклар ичида ўтирган бу жониворлар бугун кечаси негадир жуда безовталаниб, патир-патир қилиб чиқишди. Ҳозир ҳам улар дон-сувга қарамай, нуқул ташқарига интилишар. катак чивикларини асабий чўқишар эди. Кабутарбонлар бушнинг сабабини тушунмай хайрон эдилар.

Фақат Умаршайх мирзонинг қўлидаги чиний кабутар катакдаги хатардан қутулгандай осойишта бўлиб қолган эди. Ҳозир бутун олам Умаршайх мирзога мана шу кабутардай маъсум ва осуда туюлди. У том ўртасига бориб, кабутарнинг майини қанотини юзига босди. Уни учиритишдан олдин:

— Марғилонга уч, қанотли чопарим! — деб шивирлади. Тагидан нураб турган жар шу аснода бирдан ўпирилди. Кабутарлар қўнадиган айри ёғоч «шақ» этиб пастга учиб кетди.

¹ Рикобдор — узангичи.

Одамлар нима бўлаётганини тушуниб улгурмасларидан кабултархонанинг нариги девори жар билан бирга ўнгирга қулаб, томиши ҳам тортиб кетди. Томишиг ўртасида турган Умаршайх мирзо чап-тўзон ичида қаттиқ бир чайқалди-ю, гапдираклаб йиқилди. Унинг жон аччиги билан қичқиргани ваҳимали қарсиллаш ва гурсиллашларга қўшилиб эшитилди. У йиқилиб тушаётганда қўлидаги кабултарни қўйиб юборган эди. Чиний кабултар чап-тўзон орасидан юлқиниб чиқиб, осмонга караб отилди. Мирзонинг ўзи эса том ёғочларига, сомон сувоқларига, жар тупроқларига аралашиб, уч терак бўйи настга қулаб кетди.

Мирзонинг кетидан томга энди чиққан кабултарбон зина-поядан ўзини ерга отди. Мулозимлар ва қўрчилар кутилмаган фалокатдан ваҳимага тушиб орқага қочдилар. Отлар хурқиб, нўхталарини узгудек силтаишар ва кишнашарди.

Ҳазрати олийши хавф-хатардан асраймиз, деб юрган қўрчилар аввал нима бўлганини фаҳмлай олмай эсанкираб қолдилар. Кейин улар жар ўпирилганини фаҳмладилар, лекин Мирзонинг олдига тезда етиб бора олмадилар. Чунки бош айланадиган баладликдан настга тушиб бўлмас, нураб турган жарнинг лабига одам борса яна ўпирилиши мумкин эди. Қўрчилар ва мулозимлар қалъадан от чоптириб чиқиб, Мирзо қулаб кетган жар этагига етиб боргуларича, сўнг уйилиб ётган тупроқ, кесак ва ёғочлар орасидан уни тошиб, кавлаб олгуларича ўн жонидан бири ҳам қолмаган эди.

Унинг жасадини аркка киритиб ювдилар. Мажақланиб, таниб бўлмас ҳолатга келган юзини оқ шоҳи билан ёшиб қўйдилар.

Бугун эрталаб Умаршайх мирзо саҳарлик еган танобийда Қорақўз бегим Қутлуғ Нигор хонимни кучоқлаб уввос тортиб йиғлар эди.

— Мен сабаб бўлдим, хоним ая! Ҳазратимни мен нечун уйғотдим?! Уйғотмасам ўша жойга кечроқ борар эдилар-ку! Мен юзи қора сабаб бўлдим бу ўлимга! Мен!

Бугун саҳарлик пайтида Мирзо худди ўлишини билгандай васият қилганини эслаб, Қутлуғ Нигор хоним ҳам ўзини йиғидан туюлмас эди.

— Э воҳ, раҳматлик куни битганини қандай билган экан-а?! Шундай гапларни айтдилар...

Қорақўз бегим хонимнинг кучоғидан чиқиб, кичкина мушти билан чаккасига урди.

— Мен ҳали туғилмаган фарзандимни отасидан жудо қилдим, хоним ая!— деб ўртаниб шивирлади:— Бўйимда бўлганини шу кеча билиб эдилар! «Ўғил бўлсин!»— деб орзу қилиб эдилар! Энди бу болага отасини қайдан топамиз?! Қай-

дан толамиз?! Мен ҳазратимни нечун уйғотдим, хоним ая? У кишига келган ажал мени олса бўлмасмиди? Уша жардан мен қуласам бўлмасмиди?

— Ундоқ деманг, жоним! Биз ҳам энди жар лабида қолдик! Бугун атрофимиз таҳликали жар!

Кутлуғ Нигор хоним эринишг кутилмаган ўлимида қандайдир сирли бир маъно борлигини ҳозир тилига келган шу сўзлардан сездди. Умаршайх мирзодек жанговар одам конли урушларда қилнч чоғиб юрганга ўлмасдан, жардан қулаб ўлгани тасодифмикин? Мирзонинг ота-боболари барпо этиб кетган давлат мана шундай баланд жарлар лабига қурилган биноларга ўхшамасмикин? Парча-парча бўлиб кетган ва ўзаро урушларда емирилаётган улкан давлат Кутлуғ Нигор хонимнинг тасавурида жарга қулаб тушаётган ўша биноларга ўхшаб кўринди-ю, вужудини сескантириб юборди. Ахир унинг ёлғиз ўғли, суюкли фарзанди Бобур ҳам мана шу биноларнинг бирида истикомат қилмаяптими? Отасини олиб кетган ўширилишлар Бобурнинг бошига ҳам тушмасмикин?!

— Йўқ, йўқ! Ташғрим уни паноҳида асрасин! Мен бораёй, бегим, Андижонга чопар юбораёй! Бобур мирзони бу фалокатлардан огоҳ қилай!

Кутлуғ Нигор хоним кўз ёшларини артиб, ўз хонасига чиқди ва энг ишонган амирларидан Қосимбекни чақиртирди. Уни тоғиб келгуиларича Андижон чорбоғида Бобур билан бирга турган оваси Эсон Давлат бегимнинг помига мактуб ёзди.

Фотима Султон бегимнинг товшириги билан Андижонга яширинча жўнаган Аҳмад Таибал бу орада Сирдарё кўпригидан ўтиб, Банди Солор йўли билан анча жойга бориб қолган эди. Кўзга ташланмаслик учун биттагина навкар эргаштириб кетаётган Аҳмад Таибал кеча Андижондан олти мишта навкар билан келган эди. Бугун Фотима Султон унга катта ваъдалар берди. Агар Аҳмад Таибал Андижондаги содиқ бекларнинг бошини қовуштириб, Бобурни четлатса-ю, тахтга Жаҳонгир мирзони ўтказса, марра уники. Аҳмад Таибал Умаршайх мирзо саройида иккинчи даражали беклар қаторида шунча йил кўнгли чўкиб юрди. Энди бае! Жаҳонгир мирзо подшоҳ бўлса, Аҳмад Таибал унинг энг биринчи вазирга айланади. Норасида подшоҳга вазир бўлиш эса подшоҳ бўлиш билан баробар! Ана унда қаёқдаги мусаввирдан Хонзода бегимнинг суратини сўраб юрмайди. У Хонзода бегимнинг ўзини олади! Мана шу орзу билан Андижонга от суриб бораётган Аҳмад Таибал орқага ўғринча ўгирилиб караб қўйди.

Банди Солор йўлида бошқа ҳеч ким кўринмас эди. Орадан

бир неча соатлар ўтиб, Аҳмад Танбал кўзга кўринмай кетганидан кейин Аҳсидан Қосимбек қавчин тўртта навқари билан от чоптириб чиқди. У ҳам тезроқ Андижонга етиб боришга интилар, Бобур мирзонинг тарафдорларини йиғиб, уни тахтга ўтказиш иштиёқи билан ёнар эди.

АНДИЖОН.

ГУЛ ВА ҚУЮН

1

Чопарлар ҳали йўлда. Уруш тўполони Андижонга етиб келганича йўқ. Шаҳарнинг шимолидаги кўркам чорбоғ баланд девор билан ўралган, дарвозаларга соқчилар қўйилган. Чорбоғ ичида ўн икки ёшлик Бобур мирзо чавандозлик машқлари ўтказмоқда. У чорбоғ четидаги ялангликдан бўз отни чоптириб чиқди-ю, бирдан жиловни қўйиб юборди. Камонга чапдастлик билан ўқ ўрнатди ва чошиб бораётган от устидан нишонга отди. Ёй ўқи нишон ёғочига «тақ» этиб урилгани баралла эшитилди.

Бир тўп отлиқлар машқни чинор соясида туриб қузатмоқда эдилар. Қора отлиқ Мазидбек нишонга биринчи бўлиб яқинлашди. У Бобурнинг бек аткаси¹ эди. Бобур отини қайтариб келаётганда, Мазидбек унга:

— Мўлжални андак баландроқ олибсиз,— деди.— Аммо зарбингиз беҳад яхши.

Мазидбек сопига садаф қадалган ёй ўқини нишондан авайлаб суғуриб олди-да, қанчалик чуқур ботганини бармоғи билан ўлчаб кўрди:

— Билагингизда куч кўп, амирзодам! Шерпанжасиз. Подшоҳ ҳазратлари сизни Бобур деб агаганлари бежиз эмас. Бобур арабча шер демакдир!

Бобур мирзонинг навқарлари, яроқбардор, тенгдош-кўкалдош² мулозимлари ҳам нишон атрофида йиғилдилар. Улар Бобурнинг ҳали ёш ўспирин эканини, қўлидаги камони бўйи бастига мос қилиб кичрайтириб ишланганини билар эдилар. Шунини ўйлаб, Бобур мақтовни ўзинга олгиси келмади.

— Шерпанжа деб отамни айтсинлар. Мен кўрганмен, зарблари бундан ўн ҳисса ортиқ. Мушт урсалар, энг зўр йиғитни ҳам йиқитурлар.

¹ Бек атка — ҳали балоғатга етмаган мирзоларга ҳомийлик қилиш учун подшоҳ томонидан тайин этиладиган масъул бек.

² Кўкалдош — бир онани эмган болалар.

— Камина ҳам айтмоқчи эдимки, амирзодамнинг шер-панжаликлари подшоҳ отангизга тортганлигингиздан нишонадир!

Мазидбек гапни моҳирлик билан бурганини сезиб Бобур кулиб кўйди. Унинг майин сарғиш тукли пешонасида, юкори лабиниңг устида тер резалари йилтирарди.

— Кун исиди, амирзодам. Ёз рамазони тинкани қуриштур. Ифторгача толиқиб қолмасинлар. Энди бориб, салкинда му-толаа қилсинлар. Камина Андижон қўрғонини мудофаага тайёрлаш билан банд бўлурмен.

Бобур мулозимлари билан машқ майдонидан чиқаётгани-да кўнглида янги бир истак уйғониб, кўзлари шўх йилтиради. У отини тўхтатиб, орқасига ўгирилди ва жийрон кашқа от минган навкарни ёнига чақирди. Навкар ёндашганда, кўлини чўзиб, отиниңг эгарини силжитиб кўрди. Эгар маҳкам урилган эди. Бобур навкарга эллик қадамча нарига боришни, отдан тушиб, жиловидан секин етаклаб кетаверишни буюрди.

Мулозимлар орасида энг эътиборлиси Бобурниң ораси билан бир онани эмиб ўсган ўн етти ёшлик Нуён Кўкалдош эди. Мазидбек йўқлигида Бобурни эҳтиёт қилиш Нуёнга топширилган эди. Нуён Бобурниң нима қилмоқчи эканини фаҳмлаб, безовталанди:

— Амирзодам, ҳозиргина бир машқдан чиқдингиз. Бошқа мушкул машқларни эртага қолдириңг.

— Хўп, мушқули эртага қолсин, ҳозир осонини кўрай-лик,— кулиб деди Бобур.

Навкар айтилган жойга бориб отдан тушди ва жийрон кашқасини секин етаклади. Бобур бўз отни чоптириб бориб, навкарга етганда оёқларини узангидан бўшатди, камчини тишига олди. Бўз от жийрон кашқа билан жипсе келган заҳоти Бобур бўй чўзиб, нариги отниңг эгаридан икки қўллаб ушлади-ю, бор кучи билан эгардан-эгарга сакради.

Бироқ навкарниңг оти сакраш зарбидан чўчиб, ҳуркиб кетди. Бобурниңг хипча гавдаси бир лаҳза ҳавода муаллақ бўлиб қолди, кейин пастга тушиб кетди. Оёқлари ерга «тап» этиб урилди. Аммо у қўлларини эгардан бўшатмади — бўшатса ёмон йиқилишини сезиб, жон-жаҳди билан ёпишди. Билак-лари чиндан ҳам кучли экан, шундай огирликка бардош берди. Фақат навкар отини тўхтатиб олгунча Бобурниңг оёқлари ерни тирпаб судралиб борди-ю, бежирим ипак салласи бошдан учиб кетди.

Нуён Кўкалдош ёрдамга етиб келганда Бобур ўзини ўнглаб оёқда турар, бироқ ранги жуда оқариб кетган эди. Нуён отдан сакраб тушди ва Бобурга салласини олиб бермоқчи бўлди. Аммо Бобур туироққа тушган саллага қарагиси ҳам келмади.

Қамчи ҳамон тишида эди, уни қўлига олди, навкар етаклаб келган бўз отга индамай минди. Сўнг отига қамчи босиб, чорбоғ дарахтлари орасидан от чоптириб кетди.

Нўён унинг кетидан ваҳима билан тикилганича қолди. Ҳаммаёқ дов-дарахт, ариқ. Отлиқлар юрадиган катта йўл чорбоғнинг нариги четидан ўтади. Бобур эса тўғрига кетган тор сўқмоқдан, қалин дарахтлар орасидан елдай учиб бораётди! От ариқдан сакраб ўтаётганда Бобурнинг боши ариқ бўйида ўсган ўрикнинг катта бир шохига уриладиган эди. Аммо у отнинг бўйинини қучоқлаб, настга шундай эгилдики, ўрик подалари орқасини ишкалаб ўтди. Пишган ўриклардан бир қанчаси узилиб, ариқдаги сувга «чўлп-чўлп» этиб тушди.

— Сен нега отни маҳкам тутмадинг, авбош! — деб Нўён навкарни сўқди. — Ҳаммамиз амирзоданинг қаҳрига қолдик! Биздан хафа бўлиб кетдилар!

Бобур боғ тўридаги муҳташам кўшк олдига бориб, отини тўхтатди. Хизматкорларидан бири шошилиб келиб отнинг жиловидан олар экан, Бобурнинг ёлғиз ва бош яланг қайтганидан таажжубга тушди. Кўшкда Бобурнинг бувиси Эсон Давлат бегим уни кутиб ўтирган бўлса керак. Агар ҳозир у Бобурнинг қай аҳволда қайтганини кўрса-ю, нималар бўлганини билса, мулозимлар ҳам, навкарлар ҳам жазо олиши аниқ. Чунки подшоҳ ҳазратлари Бобурни кўз қорачигидай асрашни Эсон Давлат бегимга топшириб, чорбоғ ва қасрни ҳамма хизматкорлари билан унинг ихтиёрига бериб қўйган.

Мулозим ва навкарлар кўрқа-писа кўшкка яқинлашаётганларида мрамар ҳовуздан беридаги беҳи шохига қантариб қўйилган бўз отга кўзлари тушди. Бобур ҳовуз бўйидаги тиллақори шийпонга кирганини сезишиб, шу ерда секин отдан тушдилар. Нўён Кўкалдош Бобурнинг салласини чангдан тозалаб, қўлида авайлаб олиб келмоқда эди. Шу пайт шийпон ичидан бошига бўрк кийган Бобур чиқди. Оти ҳурккан навкар ўзини Бобурнинг оёғи тагига ташлаб, узр сўрашга чоғланди.

Нўён Кўкалдош саллани нодир совғага ўхшатиб авайлаб кўтариб келаётгани Бобурга бирдан жуда кулгили туюлди. Ундан қаҳрли дашном кутиб бош эгиб турганлар тўсатдан кулги товушини эшитиб, ҳайрат билан бош кўтардилар. Бобур болаларча завқ билан гавдасини орқага ташлаб, хандон уриб кулар эди. Нўён Кўкалдош ҳам қўлидаги саллага энди бошқача кўз билан қаради ва кулиб юборди. Бошқалар ҳам елкаларидан тоғ қулаб тушгандай яйраб кулар ва жилмаяр эди. Бобур кулгидан тўхтаб, оти ҳурккан навкарга юзланди:

— Сизда айб йўқ эди...

Навкар ундан катта бир инъом олгандай астойдил миннатдор бўлиб таъзим қилди. Бобур Нўёнга тайинлади:

— Катта онам билмасинлар.

— Муддаомиз ўзи шу, амирзодам.— кулди Нуён ва бошқа мулозимларга сирдошларча кўз қисиб қўйди.

Шундай пайтда Кўкалдош ва тенгдошлар ўзларини тахт ворисига хизмат қилиб юрган ёш мулозимлар деб эмас, унинг сирларига шерик бўлган яқин дўстлар деб билишар ва бундан кўнгиллари ўсиб, Бобурга меҳрлари ошар эди.

Кўшкдан чиқиб келган савдар Бобур қаршисида қўл қовуштириб, ичкарида мударрис уни кутиб ўтирганини айтди. Бобур бугун шариат илмидан дарс олиши кераклигини эслади ва тенгдошларидан истар-истамас ажралиб, кўшкка йўналди.

Эшиклари нафис ўймакорликлар билан безанган, ичидаги олтин-кумуш буюмлар кўзини қамаштирадиган кўшкда ҳозир Бобурни фақат битта хона ўзига тортар эди. Мударриснинг кутиб ўтирганига қарамай, Бобур яхши кўрган китоблари қўйилган шу хонага бурилди. Бахмал ва чарм муқовалар ичида саҳифаларга битилган сатрларда улуғ шоирларнинг отан нафаслари сезилиб тургандай бўлади. Бобур Фирдавсийдан, Саъдийдан минглаб байтларни ёд билади. Ҳозир у китоблари орасидан «Хамса»ни олар экан, узоқ Ҳиротда яшаётган Алишер Навоийни хаёл кўзи билан кўриб тургандай бўлди. Ҳиротда таълим олиб келган андижонлик меъмор мулла Фазлиддин мана шу кўшк ва мрамар ҳовузли тиллакори шийпонни қурган пайтларида ёш Бобурга Навоий ҳақида жуда кўп ажойиб ҳикоялар айтиб берган эди. Меъмор Ҳиротдан Алишер Навоийнинг Беҳзод чизган расмидан яхши бир нусха кўчиртириб келган эди. Бобур ҳам Навоийга ихлосманд эканини сезган меъмор унга мана шу расмни инъом қилган эди. Бобур «Фарҳод ва Ширин» достони қатидан шу расмни олди-ю, шариат илмига оид дафтариининг ичига солди. Сўнг мударрис ўтирган хонага чиқди.

Оппоқ соқоли кўкрагини қоплаб ётган, катта оқ салла ўраган қошлари ўсиқ кекса мударрис дархона тўрида, банорас кўрпача устида ўлтириб, қуръондан қироат билан суралар ўқиғач, форс тилида фикҳ¹ илмининг қонунларини тушунтиришга киришди. Бобур араб-форс тилларини яхши ўрганган, қуръон сураларининг кўлини ёд билар, маъносини ҳам тушунар эди, фикҳ илмининг баъзи нуқталарига қизиқар ҳам эди-ю, аммо ҳозир шу дақиқаларда унинг кўз олдидан Сухроб ва Фарҳодларнинг қахрамонона ишлари сурон солиб ўтмоқа эди. Чорбоғдаги машқлар пайтида танасига сиғмай авжланиб кетган шўх, бебош бир куч ҳали ҳам қалбини жупбинга келтириб турибди.

¹ Ф и қ ҳ — мусулмон қонунишунослиги.

Унга ёд бўлиб қолган сеvimли байтлар гоҳ туркий, гоҳ форсий оҳангларда мударрис қироатини ёриб ўтиб, хаёлида жаранглаб эшитила бошлади:

«Коши ёсиниму дейин, кузи қаросиниму дейин?»
«Эи мардонн жаҳон марди биёмуз!»

Ёд бўлиб қолган бу сатрлар хаёлидан ўтаётганда, Бобур дафтари орасига солинган суратни мударрисга кўрсатмасликка уриниб секин олди. Кўзларидан илҳом ва меҳр ёғилаётган Навоий узун қора чакмон кийган, ингичка ҳассага суялган. Унинг бутун киффаси яхшилик нстаб келган ҳар бир кишига катта яхшиликлар қила олишдан далолат беради. Бобур суратга қараб туриб ўзича сўради: Улуғ амир, насиб қилса, хузурингизга борсам, йўлимда Аҳраману аждаҳо учраса, Фарҳодингиздай ҳаммасини енгиб ўтсам, ўшаида сиз менга... шеърят тилемиши очувчи қалит берурмисиз? »

Мударрис қироат билан уктираётган дарслари беҳуда кетаётганини бирдан сезиб қолди, секин ўрнидан турди-да, Бобурнинг ёнига келди. Бобур суратни яширишга улгуролмади.

— Одам сурати?!— шидат билан сўради мударрис.— Сиз қуръони шарифдан сабоқ эшитиш ўрнига, шарият қатъияи маи этган сураткашлик билан машғулмисиз, мирзом?

— Мударрис жаноблари, бу суратни мен чизган эмасмен. Буни менга Ҳиротдин келтирмишлар. Бу улуғ зот — Амир Алишер.

Мударрис Навоийни шоир деб эшитган, асарларини ҳали ўқимаган эди.

— Одам суратини тарқатмоқ — шайтону лашининг иши! Қани бу суратни менга беринг, мирзом! Беринг!

Мударриснинг қаҳрли важоҳати суратни йиртиб ташлашдан ҳам тоймаслигини кўрсатар эди. Шунинг учун Бобур суратни бермай туриб олди. Мударриснинг газаби келди-ю, аммо тахт ворисига каттиқ гапиришдан қўрқди. Бобурдан хафа бўлиб, Эсон Давлат бегимга шикоят қилгани кетди.

Эллик беш ёшлардаги салобатли кампир сидирга оқ атлас кўйлагини шитирлатиб дарсхонага кириб келаётганда Бобур дарҳол ўрнидан туриб, бувисига салом берди. Эсон Давлат бегим суратни қўлига олди ва Навоий тасвирига беихтиёр қизқиқиб:

«Мардликни жаҳон мардларидан ўрган».

— Юзларида фаришталари бор зот эканлар,— деб қўйди. Сўнг ҳарир даканасининг бир чети билан юзини мударрисдан тўсиб, унга ярим ўтирилган ҳолда деди:— Мударрис жаноблари, бу сурат Ҳиротда шарият пешволарининг руҳеатлари билан чизилган-ку.

— Мени маъзур тутинг, ҳазрат хоним,— деди эшик олдида ковоқ солиб ерга қараб турган мударрис,— аммо Ҳиротда шарият қонунлари бузилмишдир. Шналар таъсирида чизилган бу сурат бизнинг пок сунний мазҳабимизга мутлақо тўғри келмайди. Мен тахт ворисини огоҳ қилмоқчиманки, бизга Муҳаммад алайҳиссалом васият қилган чин мусулмонлик алҳол Хуросонда эмас, Мовароуннаҳрдадир!

Эсон Давлат бегим мударрис билан мазҳаблар тўғрисида баҳслашиб ўтиришни истамасди. Бобурга юзланиб:

— Мударрис жаноблари бир жиҳатдан ҳақлар,— деди,— фикҳ дарсида сурат томошаси ўринсиз, азизим. Таъгри иноят қилса, сиз ҳукмдор бўлиб юрт сўрагайсиз. Шунинг учун фикҳ қонунларини бошидан-охиригача билиб олинг. Суратни мен олиб кетай.

Бобур суратни бувиесидан бир нафасга сўраб олди-ю, авайлаб китоб орасига солиб берди.

— Эҳтиёт қилингиз, сизга орзуёимни топширдим,— деди.

Эсон Давлат бегим певарасининг сўзларини ёктириб деди:

— Балки Алишербекни Андижонга таклиф қилурсиз.

— Келурмиканлар?— кўзлари ёниб сўради Бобур.

— Самарқандга келганлар-ку, Фарғона водийсининг таърифи оламга машҳур. Илож топсалар, албатта келурлар. Алишербек ниҳоятда пок, авлиётабиат одам, деб эшитганмиз. Ўзлари келсалар, мударрис жанобларига ҳам манзур бўлишлари шубҳасиз!

Мударриснинг энди сал чехраси очилди. Қадини тиклаб:

— Шояд шундай бўлса!— деб қўйди.

Эсон Давлат бегим уларни усталик билан яраштирганидан мамнун бўлиб дарехонадан чиқди.

2

Кун қиёмига келиб, пешин намози ўқилгандан кейин кўшкнинг ич-таши жимжит бўлиб қолди. Рўзанинг азоби энди билина бошлаган, ёз кунида чанқаб ҳолсизланган одамлар кунни қандай кеч қилишни билмай бестоқат бўлишар эди. Қошона эгалари салқин хоналарда жимгина ётиб, уйқу билан жон сақлашни одат қилганлар.

Бобур ҳам бугунги сабоқларини тугатиб, ўз хонасида ёнбошлаб ётибди. Бироқ бояги ширин орзулар ҳамон хаёлини

тўқинлантириб, кўзига уйқу қўндирмайди. У қоғоз-қалам олиб, шеър ёзмоқчи бўлди. Лекин ҳозир унинг хаёлига ёд бўлиб қолган машҳур байтлардан бошқа шеър келмас эди. Шунда у иккинчи бир дафтарни олди-ю, Фарғона водийси хақида билганларини оддий наср тариқасида ёза бошлади: «Гирдо-гирди тоғлар, ови қуши кўп. Оқ кийикни Аҳси чўлида кўрганбиз. Марғилон ёвуғида ҳам бор». Бобур Фарғона водийсида нимаки гўзаллик кўрган бўлса, ҳаммасини ёзгиси келар эди. Кейин Ҳиротга Амир Алишернинг хузурига борганда бу ёзувлари жуда керак бўладиганга ўхшарди.

У ёзувга берилиб кетиб, кўшк олдиғача чоғиб келган отнинг душурини эшитмади. Бирдан жимжит кўшкнинг аллақайси хонасида аёл кишининг ўртаниб йиғлагани эшитилди. Бобур чўчиб бошини кўтарди. Йиғи товуши Эсон Давлат бегимнинг хоналари томондан келмоқда эди. Бобур ўрнидан сакраб турди, такрор эшитилган аламли йиғидан эти жунжикиб, бувисининг хонасига қараб югурди.

Эшик ланг очик. Эсон Давлат бегимнинг рўмоли бошидан тушиб кетган. У қизи Қутлуғ Нигорхоним юборган хатни очиб ўқимоқчи бўлади, аммо ёшли кўзлари ҳеч нарсаги кўрмайди.

Аҳсидан ўлим хабарини олиб келган Қосимбек деворга елкаси билан мажолсиз суяниб, оёқларида зўрға турибди. У саксон чақиримлик йўлни отда дам олмай босиб ўтган ва кириқларигача чанга ботган эди.

Ҳозиргина гулдай нафис туйғулар ичида юрган Бобурга ўлим хабари шу гул орасидан чиққан илон бўлиб туюлди. У Қосимбекдан сескангандай ранги ўчиб, бирдан орқага тиеарилди. Қосимбек эса унга иштилди, Бобур қаршисида тиз чўкиб, бўғиқ ва илтимоскорона овоз билан гапира бошлади:

— Мирзом!.. Тангри сизга қувват берсин! Энди бизнинг пушти-паноҳимиз ўзингизсиз! Икки тарафимизни ёғий босган. Волидангиз тайинлаб юбордилар. Дарҳол Андижон кўрғонига бориб, бекларни тўпламоқ керак!

Эсон Давлат бегим қайғуга берилиб йиғлаб ўтирадиган пайт эмаслигини энди сизди. Қосимбекни оёққа турғизди-да:

— Садоқатингиздан миннатдоримиз,— деди.— Сиз Бобур мирзо билан бирга отланинг! Биз ҳам энди чорбоғдан кўрғонга кўчамиз.

Мудҳиш хабар Бобурни жимжит қилиб қўйди. У карахт бир аҳволда кийинди, отига минди. Шу пайт унинг кўзига яшнаб турган дарахтлар, суви тўла мармар ҳовуз алланечук мунғайиб тургандай кўринди. Буларнинг ҳаммасини отаси бинно қияган эди. Энди у одам бу жойларга ҳеч қачон келмайди. Ана у нашватиларнинг кўчатини Умаршайх мирзонинг ўзи ўтказдирган эди. Ҳозир шулар мева солган, ҳадемай пишади.

Аммо уларни эктирган одам энди ҳеч вақт бу мевалардан татиб кўролмади.

Чорбоғдан чиқиб, тош йўлдан бораётганларида Бобур яна отасини эслади. Бу йўлга отаси тўшатган тошлар ҳам турибди. Узоқда кўринган баланд кўрғонни ҳам отаси қурдирган эди. Ҳаммаси бутун, ҳаммаси бор. Фақат унинг ўзи йўқ. Бобур энди отасини умрбод кўролмаслигини бутун вужуди билан ҳис қилди-ю, аччиқ жудолик туйғуси бирдан унинг борлигини тўлдириб, кўзларидан ёқасига ёш бўлиб томди.

Олдинда сув тўлдирилган чоҳ ва ўн бир паҳсалик баланд девор билан ўралган Андижон кўрғони кўринди. Улар Мирзо дарвозасига яқинлашганларида ичкаридан беш-олти киши от чоштириб чиқди. Олдинда самаи от миниб келаётган қисик кўзли мўғултахлит бек — Бобурнинг онасига қариношчилиги бўлган Шерим тоғойи эди. У Бобурнинг юзида оғир мусибат аломатини кўрди-ю, отдан сакраб тушди, кўзига ёш келмаса ҳам ҳўнграб:

— Мен ишонмаган эдим, амирзодам! — деди. — Пушти-па-ноҳимиздан айрилганимиз ростми? Оҳ, бевафо дунё!

— Кимдан эшитдингиз? — сўради Қосимбек. — Бу хабар ҳозирча сир тутилмоғи керак эди!

Шеримбек ёқасини ушлаб:

— Тағриининг қудратини қарапки, — деди, — бир алоқачи кабутарим осмонда учиб юриб бирдан йўқ бўлиб қолди. «Ким уни тушириб олди?» — деб том устига чиқдим. Анчадан кейин кабутар олдимга келиб қўнди. Қанотининг тагида бир қағоз кўринди. Олиб қарасам — мана шу қайғули хабар! Ким ёзган? Осмонда фаришталар ёзиб юбордим, билмадим!

Шеримбек Бобурнинг эгарига бир қўлини қўйиб, юзини унга яқинлаштирди-да, паст товуш билан.

— Мирзом, кўрғонга кирмангиз, хатарли, — деди.

Бу сўзларни Қосимбек ҳам эшитди. Умаршайх мирзо тирклигида дурустроқ лавозим ололмай кўнгли чўкиб юрган Шеримбек энди Бобур мирзога бошқалардан олдинроқ меҳру оқибат кўрсатиб, унинг ишончини қозонмоқчи ва каттароқ мартабага эришмоқчи эди. Қосимбек буни сезиб Бобурга осойишта гапирди:

— Амирзодам, ортиқча таҳликага ўрин йўқ. Тезроқ кўрғонга кириб, содиқ бекларни тўплайлик.

Шеримбек от устидаги Қосимбек билан ерда туриб сўзлашишни ўзига эп кўрмади. Шошиб отига минди-да, шиддат билан деди:

— Сиз ҳали аҳволни билмайсиз, жаноб Қосимбек! Содиқ бекларингиз Хўжаидни ёғийга тонширди! Исфарани тонширди! Марғилоини тонширди!

— Марғилонни?!— есканиб сўради Бобур.— Качон?

— Ҳозир хабар келди! Ёғий мўри малахдай ёпирилиб Қувага яқинлашди! Энди навбат Андижонга. Содиқ беклар Андижонга қўшиб Мирзомни ҳам ёғийга берсинларми? Йўк! Мен тирик бўлсам, бунга йўл қўймаймен!

Оғир мусибат устига қўшилган бу шум хабарлар Бобурни жуда эсанкиратиб қўйди. Ўзи куни билан рўза тутиб, дармони кетиб борар, ниҳоятда қаттиқ чанкаганлигидан тили танглайига ёпишиб қолгандек туюлар эди. Унинг ташна кўзлари қўрғон девори тагидаги хандакка тўлдирилган қорамтир сувга тушди. Туриб қолган шу қора сув ҳам унга алланечук жозибали кўринди. У қуруқлашган лабларини намсиз тили билан ялаб қўйди.

Шеримбек дадил бориб, Бобур минган бўз отнинг олтин безакли юганидан олди:

— Мен содиқ тоғойингизмен, Мирзом, ижозат беринг, сизни бу хагарлардан узоққа олиб кетай!

Бобур Шеримбек айтаётган хатарларни ҳозир унча ўйламас ва аниқ ҳис қилмас эди. Аммо унинг кайғудан эзилган кўнгли ҳам, ташналикдан қийналаётган тани ҳам кўз олдидаги бекик ва дим қўрғондан кўра, узоқдаги дарахтзорларни, кенг, очиқ жойларни афзал кўрарди. Шунинг учун Шеримбек унинг отини орқага бураётганда Бобур қаршилиқ қилмади. Қосимбек саросима бўлиб:

— Мирзом, волидангизнинг тайинлаганлари бошқа эди!— деди.

— Волидаларни бу ердаги аҳволни билмаганлар!— деб Бобурнинг ўрнига Шеримбек жавоб қилди. Аммо Қосимбек унинг гапига қулоқ солмай Бобурга ёндашди:

— Хоним ҳазратлари бугун дафн маросимини ўтказиб эртага Андижонга келурлар. Улуғ онангиз ҳам чорбоғдан қўрғонга кўчмоқчи эдилар. Улар сизни қаердан топулар?

Бобур энди сал хаёлини йиғиб, Шеримбекдан сўради:

— Қаёққа бормоқчимиз?

Шеримбек Қосимбекка эшиттирмасликка тиршиб, Бобурнинг қулоғиги шивирлади:

— Олатоғ томонларга. Ўшга. Балки Ўзгантга.

Бобур буни Қосимбекдан сир тутишни истамай, секин унга айтди:

— Ўш йўлида бўлурмиз. Онамга хабар беринг.

— Мен аввал қўрғондаги беклар билан сўзлашай, амирзодам! Уларнинг кайфиятини билай!

— Ундан кўра, Хўжа Абдуллага учранг.

— Бу амрингизни дарҳол бажо келтирурмен!

Қосимбек отини қўрғон дарвозаси томонга бурди. Бобур

эса ёнидаги элликка яқин отлик билан қўрғондан узоқлашиб кета бошлади.

3

Қўрғон ичидан дарвозахопаннинг томига чиқиб олган япасқи бир навкар девор кунгураси орасидан уларни кузатиб турган эди. Қосимбек Мирзо дарвозасидан шитоб билан кираётганда бу навкар ҳам томдан секин тушди-ю, девор олдига боғлаб қўйилган отни миниб, хўжайини Аҳмад Танбал кутиб турган жойга қараб кетди.

Мевалари ғарқ пишган катта боғнинг тўрида мармар гумбазлик ҳаммом бор эди. Боғ эгаси Ёқуббек ёзнинг иссиқ кунларида шу ҳаммомнинг меҳмонхонага ўхшатиб безатилган салқин бир хонасида дам олар эди. Асл гиламлар тўшалган бу хонанинг тўрида ҳозир Аҳмад Танбал ўтирибди. У кумуш билан безатилган қимиз қадидан жийдагули пиёлага кимиз қўйиб, сипқорди. Сўнг сарғиш мўйловши кафти билан артар экан:

— Тангрим мени кечирсин, бугун рўзани буздим,— деди. — Ёйўлда ташналикдан тилим танглайимга ёпишиб қолди. Хушимдан кетиб отдан йиқиладиган ҳолатга келдим.

— Бугун сизга раво,— деди Ёқуббек. Зарураст — маъзураст. Мушкул ишга бел боғлабсиз. Агар кушойиши корингизни бериб, тахт Жаҳонгир мирзога ўтса, сиз унинг энг ишонган раҳнамоси бўлурсиз.

Аҳмад Танбал бу нурли истиқболни кўз олдига келтириб, бир энтиқди. Олдинги тишларидан иккитаси тушиб кетган семиз Ёқуббек унга синовчан назар билан қараб турарди. Ёқуббекнинг нигоҳида «Менинг бу хатарли ишга нечун бош қўшаётганимни унутмасмикансен?» деган маъно бор эди. Аҳмад Танбал сергакланди:

— Бек жаноблари, сиз билан биз асли мўғул¹ уруғиданмиз. Барлосларнинг Фарғона вилоятида шунча вақт ҳукм сурганлари етар. Энди навбат бизники. Мен сизни мўғул бекларининг энг улуғи деб билурмен. Тангри омад бериб, агар мен тахт ворисига раҳнамо бўлсам, ўшанда ҳам менга сиз раҳнамолик қилгайсиз!

— Иншоолло! — деб Ёқуббек мамнун юз билан калта соқодини силаб қўйди. — Қани, Аҳмадбек, чанқоқ босилгандан сўнг очлик билинадир. Яхна гўштдин тотининг.

Аҳмад Танбал чинни лагандаги гўштга энди қўл узатганда эшик секин очилди. Аҳмад Танбал лаганини бир четга суриб, эшикка қадалиб қаради. Бояги япасқи навкар хўжайинининг

¹ Бу ерда гап ўзбеклашган мўғуллар ҳақида боради.

тинчини бузгани учун узр сўрагандай бўсагадан нарида туриб, таъзим қилди:

— Бек жаноблари, севинчи беринг! — деди.— Бобур мирзо кўрғонга кирмай қайтиб кетдилар.

— Шеримбек билан биргами?

— Айни шундай!

Аҳмад Танбал учун бу чиндан ҳам қувончли хабар эди. Чарм ҳамёнидан битта олтин танга олиб, бўсага олдига ташлади. Япаски навқар тангани шоша-пиша олиб, икки букилиб раҳмат айтди. Сўнг Аҳмад Танбалнинг ишораси билан эшикни секин ёпиб, орқага чекинди.

Ахсидан Андижонга келиб тўғри Ёқуббекникига тушган Аҳмад Танбал подшоҳнинг ўлими ҳақидаги хабарни энг аввал Шерим тоғойига етказдирган эди. Унинг ҳовлиқма феълини кўзгатиб, ўзи ианада қолиш учун имзосиз хатни кабутар ёрдамида осмондан туширтирган эди.

— Маслаҳатингиз билан тузилган режа шарофатли чиқди! — деди Аҳмад Танбал уй эгасига мамнун кўз ташлаб.

— Ҳа, Шеримбек энди жиянини хавф-хатардан яхшилаб «халос қилур». Унинг энг нуфузли бекига айланиш учун Олатогдан ҳам ошур.

— Энди биз Бобурнинг хатардан кўрқиб қочганини халойиқнинг қулоғига етказмоғимиз керак. Бобур шундай пайтда ота юрти Андижонни ташлаб кетганини халқ билсин, ундан ихлоси қайтсин. Ана ундан сўнг Жаҳонгир мирзонинг тахтга ўтиришига ҳеч бир монелик қолмас.

Ёқуббек соқолини тутамига олиб, бир лаҳза ўйланиб турди-ю:

— Овоза тарқатишнинг энг афзал жойи, бозор,— деди.

— Менинг савдогар мижозларим бор.

— Аммо овоза биздан чиққанини ҳеч ким билмаслиги зарур!

— Хотиржам бўлсинлар, жаноб Аҳмадбек. Сир сақлашга қодирмиз...

* * *

Андижон аҳолиси душман қўшинлари яқинлашиб келаётганини эшитиб, шу кунларда жуда хавфсираб юрар эди. Шунинг устига «Подшоҳ жардан йиқилиб ўлганмиш, шаҳарни бугун ёғий босар эмиш, Бобур мирзо кўрқиб қочганмиш», деган овоза тарқалди. Андижон расталаридаги ва тимнинг тагидаги дўконлар савдо энг қизиқ турган пайтда бирин-кетин ёпила бошлади. Ҳалиги овозанинг қаердан чиққанини ҳеч ким аниқ билмас эди-ю, лекин халойиқ унга бир-биридан ваҳимали тафсилотлар қўшар эди. Ниҳоят, «Ахсини ҳам ёғий бос-

ганмиш, ёғий подшоһи жардан ташлаб ўлдирганмиш», деган гаплар ҳам пайдо бўлди. Халойиқ орасида юрадиган хуфялар даҳшатли мишмишларни шаҳар ҳокими — доруғага етказиш учун аркка томон пошилдилар.

Бу орада Қосимбек Бобур мирзонинг устози Хўжа Абдуллани уйидан қидириб топган, улар икковлашиб аркдаги беклар олдига чиқишган эди. Хўжа Абдулла ҳам, беклар ҳам подшоҳнинг ўлиmidан мутлақо беҳабар эдилар. Бу хабарни Қосимбекдан эшитганларидан кейин уруш хатари кўзларига янада таҳликали кўринди, ёмон ўзгаришлар бўлишини сезишиб, саросима бўлиб қолишди. Шунинг устига бозорда даллол бўлиб юрадиган ишончли бир хуфя келиб, хушук овозалардан ҳаммаёқ тўнолон бўлиб кетганини айтиб берди-ю, Узун Ҳасан помли новча доруға эсанкираб қолди.

— Биздан омад кетди, жаноблар!— деди йўғламсираб.— Ташқарида ганим. Ичқарида тўнолон. Бобур мирзо кўрғонга кирмай кетганлари бежиз эмас!

— Биз ҳам жон сақлаш учун ҳар қаёнга тарқаб қочсакмикин?— киноя билан сўради Хўжа Абдулла.

Ўзи ҳам, соқол-мўйлови ҳам қон-қора Хўжа Абдулла катта олим бўлишидан ташқари, Андижон бекларининг энг нуфузли ири ҳисобланар эди. Бобур мирзо ҳам уни ўзига муришд сапаб қўл берган эди. Шунинг учун Узун Ҳасан Хўжа Абдулланинг киноясига қарши кескин жавоб бера олмади.

— Ирим, Бобур мирзо узоклашмасдан қайтариш зарур!— деди Қосимбек.

— Бобур мирзонинг кўнгиллари менга аён,— деди Хўжа Абдулла.— У олий зот кўрқиб қочган эмаслар. Бекларнинг садоқатини билмоқ учун шундай қилганлар. Бозордаги овоза — фитнанинг белгиси. Агар фитна бўлмаса, подшоҳнинг қазо қилганини биздан олдин бозордагилар қандай билмишлар?

Узун Ҳасан ўзининг ақли етмаган бу мантиқли фикрга тап берди. Бобурнинг кўнгилида нима борлигини Хўжа Абдулла шу ерда туриб билганига қойил бўлди. Хўжа Абдулла унинг кўзига чинакам авлиё бўлиб кўринди:

— Иримга ҳаммаси аён бўлган экан!— деди у чуқур эътиқод билан.— Энди ирим нима десалар биз шунга шаймиз!

— Менга аён бўлгани шуки,— деди Хўжа Абдулла овозини пасайтириб,— агар бир тан-бир жон бўлиб, Бобур мирзога хизмат қилсак, ҳаммамиз омон қолурмиз, ҳеч қайсимизнинг бир мўйимиз ҳам бўлмагай!

Хўжа Абдулланинг қомил ишонч билан айтган бу сўзлари Узун Ҳасанни бир оз таҳликага солди. Агар иш Хўжа Абдулла айтгандай бўлиб чиқса-ю, Бобур мирзо подшоҳ бўлса... унда Узун Ҳасаннинг бутунги иккиланишлари

қандай оқибатга олиб келади? Унинг рақиблари бу икки-ланишларни бўлажак подшоҳга айтиб, доруғалик амалини тортиб олишлари мумкин эмасми? Йўқ, Узун Ҳасан бунга йўл қўймаслиги керак:

— Пирим, менга фотиҳа беринг, Бобур мирзонинг хузурларига мен ўзим борай. Бекларнинг номидан садоқат изхор қилиб, қўрғонга таклиф этай!

— Ниятингиз таҳсинга сазовор, жаноб Ҳасанбек. Аммо сиз доруғасиз. Сиз аввал шаҳардаги ғулуни бартараф қилинг, фитнанинг уясини топинг, ана унда Бобур мирзонинг иноятларига сазовор бўлғайсиз

— Яна каромат қилдингиз, пирим! Биз зудлик билан бу ишга киришурмиз!

* * *

Ёз офтоби еру кўкни шундай қиздирмоқдаки, от туёқларидан кўтарилган чанг юзга аланга тилларидек тегади. Ҳаво дим. «Ғир» этган шамол йўқ. Тунроғи билқиллаб ётган тор кўчадан ўтаётганларида Бобурни тер босди. У бениҳоя чанқаганлигидан оғзи тахир бўлиб кетган эди. Кеча шу пайтларда Андижонсой бўйида салқинлаб ётгани эсига тушди. Бундан бир неча соат олдинги хаёти, чорбоғнинг мусаффо хавоси, зилол сувли ҳовуз, салқин кўшк, беташвиш дамлар — ҳаммаси бирдан узоқ ўтмишга айланган эди. Назарида, шиддатли бир қуюн уни ўша масъуд хаётдан юлиб олиб, аллақаяқларга чирпирак қилиб учуриб кетаётибди. От туёқларидан кўтарилган чанг унга мана шу қуюннинг чангидек туюлади. Уни отасидан жудо қилган, пушти-паноҳидан айириб, хавф-хатарлар комига тортган машъум бир куч гўё мана шу қуюннинг кучи эди. Уни қўриқлаб бораётган эллик чоғли отлиқлар ҳам Бобурга мана шу қуюн ичида юргандай хира кўринарди. Рўза тутиб куни бўйи туз тотмаганлигидан унинг боши айланмоқда эди. Атрофидаги отлиқлар тўғри юриб бораётган бўлсалар ҳам Бобурнинг назарида уларнинг ҳаммасини ўша қуюн чирмаб айлантираётгандай бўларди.

Ўзгант йўли билан бориб Намозгоҳга етганларида узоқда қорли тоғлар кўринди. Бобур тоғ салқинини кўзи билан хис қилгандай бўлди ва ўша ерга тезроқ етиб боргиси келиб, отининг биқинига ниқтади. Қакроқ лабларини қийинлик билан очиб Шеримбекка:

— Тезроқ!— деди.

Шеримбек эса орқага ўгирилиб қараб:

— Чопар бор!— деди.— Тўхтайлик.

Андижон беклари юборган чопар Хўжа Абдулланинг қўли билан ёзилган мактубни Бобурга топширди. Бобур ўрам қилиб юборилган мактубнинг ипак боғичини узиб, ёнида турган Нўён Кўкалдошга берди:

— Ўқинг.

Мактубда Андижон бекларининг Бобурга садоқат билдирганлари айтилган эди. Сўз орасида ёмон овозалар тарқалаётгани, номаълум фитначилар «Бобур мирзо қўрқиб қочди», деган тухматни тарқатиб, бунга элли ишонтирмоқчи бўлаётгани айтилган эди.

— Мен сизни ана ўша фитначилардан эҳтиёт қилган эдим, амирзодам!— деди Шеримбек Бобурга.— Ҳозир вазият ёмон. Қўрғон — игвонинг уяси. Қўрғонга қайтманг, амирзодам! Содик беклар бўлса кетишгиздан келсинлар!

«Ота юртини ташлаб қўрқиб қочди» — бу овоза оғиздан-оғизга ўтиб шаҳарма-шаҳар, қишлоқма-қишлоқ тарқаб кетиши мумкин!

— Йўқ!— деди Бобур отини орқага буриб.— Мен қочмоқчи эмасмен!

— Амирзодам, бу ҳаммаси игво!

— Мен бунинг игволигини исбот қилурмен! Қайтинг ҳаммангиз. Қўрғонга қайтинг!

Бобур орқага бурган отининг юганини бўшатди-ю, сарисига қамчи урди. От чопиб бораётганда кўкрагига шамол тегиб, ўзини бир оз енгил сездди. Бояги даҳшатли қуюн энди ундан орқада — изма-из елиб келаётган навкар ва савдарлар орасида қолиб кетгандай бўлди.

Улар офтоб уфққа яқинлашган пайтда Андижон қўрғонига кириб келдилар. Кечкурун гавжум бўладиган кўчалар ҳозир алланечук жимжит. Дўконлар ёпиқ. Ҳаммаёқ хувиллаган. Бутун шаҳар хавф-хатардан қўрқиб, биқиниб турганга ўхшарди.

Шеримбек олдинда бораётган Бобурни эҳтиёт қилмоқчи бўлиб, навкарларига «қуршаб боринг» ишорасини қилди. Ўзи эса Бобурнинг олд томонига ўта бошлади. Атрофини отликлар ўраб ола бошлаганда Бобур яна қуюннинг ичига тушиб қолгандай бўғилди. Кўз ўнгида яна отлар, одамлар чирпирак бўлиб айланишга тушди. Бобур ютоқиб олдинга интилди, отини қамчилаб, навкарлар қуршовини ёриб чиққанда юзига шабада тегиб, хиёл енгиллашди. Шеримбек яна олдинга интилиб, Бобурга ёндашмоқчи бўлганда Нўён Кўкалдош унинг жиловидан маҳкам ушлади:

— Бек жаноблари, қўйинг, амирзодам олдинда борсинлар. Фуқаро тахт ворисини кўрсин, кўнгли таскин топсин. Ана,

түйшүктөрдөн муралаб турган одамлар игвогарларнинг гапи ёлгонлигига амин бўлсинлар!

— Фитначилар бирор тешикдан амирзодамни ўқласалар-чи?

— Ниятни яхши қилинг!

Бобур бошлиқ отликлар аркка яқинлашганларида улкан дарвозанинг ҳар икки тавақаси ланг очилди. Хўжа Абдулла ва бир тўда беклар, мулозимлар Бобурга пешвоз чиқдилар. Бобур отдан тушиб устози билан кўришар экан, бирдан кўнгли юмшаб, кўзларига ёш қуйилиб келди. Хўжа Абдуллани ўчган, лаблари титраётган Бобурни бағрига босиб, тасалли бергиси келди, аммо беклар ва навкарлар олдида тахт ворисини қучоқлаш одобсизлик саналишини ўйлаб, ўзини тутди. У ҳам кўзига ёш олиб:

— Қулфатда қолдик, амирзодам, мусибатда қолдик!— деди.— Энди бизнинг пушти-папоҳимиз ўзингизсиз!

Мазидбек аъёнлар даврасидан бир-икки қадам олдинга чиқди. Ўзининг Бобурга бек атка эканини билдириб қўйгиси келиб, Хўжа Абдулланинг танини оғзидан олди:

— Амирзодам, ҳамма беклар сизга содиқ хизмат қилишга тайёрдурлар!

Бобур тўнлашиб турган бекларга кўз ташлаган эди, улар ҳаммаси Мазидбекнинг ганини тасдиқлаб, қўллари кўкраклариди, таъзим адо қилишди. Бобур товуши титраб:

— Миннатдормен,— деди.

У яна отланиб арк дарвозасидан кираётганда орқадан Ёқуббек ҳам етиб келиб, беклар даврасига қўшилди. У Бобур қайтганини эшитган заҳоти ҳар қандай шубҳадан холи бўлиш учун дарҳол отланиб, садоқат изҳор қилишга шошилган эди. Хўжа Абдулла ўнгда, Мазидбек чапда юриб, Бобурни арк тўридаги қишлоқ қасрга бошлаб келдилар.

Илгари пойтахт Андижондалигида тахт мана шу қасрга ўрнатилган эди. Кейин пойтахт Ахсига кўчирилгач, устунлари ўймакорликлар билан безатилган мрамар зинапояли бу қаср аввалги ҳашаматидан маҳрум бўлиб, кўрimsизлашиб қолган эди. Бугун Бобур келишидан олдин Хўжа Абдулланинг фармойиши билан қасрнинг зинапояларига яна пояндоз тушалди. Илгари тахт қўйилган шаҳнишинга туркман гиламлари ва кимхоб кўрпачалар солиниб, махсус жой ҳозирланди.

Бобур бинафшаранг пояндозга қадам қўйганда қуруқшаб кетган томоғини ҳўлламоқчи бўлиб ютинди. Аммо оғзида нам йўқлигидан томоғини алланарса қириб ўтгандай бўлди. Бўлажак подшоҳга хизмат қилиш учун тўнланган бекларнинг ҳеч қайсиси Бобурга ҳозир бир қўлтумгина сув кераклигини сезмас эди. Бирда-ярим сезганлари ҳам шунча одамнинг олдида

ёш подшоҳнинг рўзасини очириш мусулмончиликка тўғри келмайди, деб бундай ишни қилишдан қўрқишар эди.

Хамма ўлтиргач, Хўжа Абдулла қуръон ўқиб, Ахсида бугун дафн этилган Умаршайх мирзонинг арвоҳига бағишлади. Бир неча киши:

— Илоҳо жойлари жаннатдан бўлсин! — деб қўйди. Яна бир неча киши Бобурга юзланиб кўнгил сўради.

— Муҳтарам беклар, давлатхоҳлар! — деб гап бошлади Хўжа Абдулла. — Уруш ташвиши бўлмаганда биз аввал мотам маросимини ўтказган бўлу эдик. Эшитишимизча, Ахсида ҳазрати олийни ҳурматларига яраша маърака ўтказиб қабрга қўйганлар. Андижонга ёғий яқин келиб қолган шу оғир кунда бизнинг аввалин машваратимиз давлатни янги подшоҳга топширмақ хусусида бўлгани маъқул

Мазидбекдан нарироқда семиз Ёқуббек ўтирган эди. У Хўжа Абдулланинг сўзларини ҳаммадан олдин илиб кетди:

— Доно тадбирни ўртага солдингиз, пирим. Бандангизнинг фикрича, Заҳириддин Муҳаммад Бобур мирзони қопуний подшоҳ атаб, муборак номларини хутбага қўшиб ўқитмақ керак!

Бобур «ялт» этиб Ёқуббекка қаради. Унинг овозидаги майинлик, юзидаги ҳаяжон, ҳатто олд тишлари тушиб кетган оғзининг кемшиклиги Бобурга алланечук ёқимли туюлди. Ёқуббекнинг энг нуфузли ва қайсар мўғул бекларидан эканлигини ҳамма биларди. Фақат унинг бундан бир неча соат олдин Бобурга қарши фитна уюштириб юргани ўтирганлар учун сир эди. Энди Ёқуббек мана шу сирни яхшироқ бекитиш учун Бобурга ҳаммадан ортиқ садоқат билдирмоқда эди. Унинг шу сир очилиб қолишидан изтиробга тушиб, дардли ва ҳаяжонли қўзлар билан Бобурга қараши, ундан нажот кутгандай бўлиб ҳаяжонланиши ўзи қийналиб ўтирган Бобурга ғалати таъсир қилди. Ёқуббек биринчи бўлиб Бобурни подшоҳ деб атагани ёш ўспириннинг ўртаниб турган қалбига гўё сарин бир шабада бўлиб тегди. Қачондир бир вақт тахтга чиқиш ва шу юрган ҳамма бекларга бош бўлиб, голибона жанглар қилиш Бобурнинг энг кучли орзуларидан эди. Ёқуббекдан кейин гапирган беклар ҳам бирин-кетин Бобурни подшоҳ деб тан олар эканлар, унинг мана шу орзуси булут орасидан чиққан тўлин ойдай чарақлаб юзага чиқди-ю, кўнглини бирдан ёриштириб юборди. Бошига тушган мусибат ҳам, ичини куйдираётган ташналик ҳам хаёлидан узоқлашди.

Шу пайт эшикдан шаҳар доруғаси Узун Ҳасан таъзим қилиб кирди.

— Амирзодам! — деди у энтикиб. — Қулингизни афв этинг, сизни кутиб ололмадим. Мен Андижонда номуносиб гаплар

таркатган фитначиларни овлаш билан банд эдим. Алхөл бир фитначи арбобни тутиб келтирдим.

Бобур беихтиёр олдинга интилиб:

— Қайси арбоб?— деди.— Ким у? Келтиринг!

— Бажонидил, амирзодам!— деб Узун Ҳасан шошилиб орқасига қайтди.

Ҳамма кўзлар очиқ эшикка қадалди. Ёқуббекнинг ранги «қув» ўчди. Наҳогки Аҳмад Танбал қўлга тушган бўлса? Унда сир очилади. Ёқуббек саросима кўзлар билан дарчани қидириб тонди. Дарча у ўтирган жойдан анча узоқ. Дарчадан нарида аркнинг ўн паҳсалик баланд девори бор. Йўқ, бу ердан кочиб кутулиб бўлмайди! Ёқуббекни титроқ босди..

Шу пайт эшикдан нарида йўғон бир овоз:

— Қўлимни ечинг, мен гуноҳкор эмасмен!— дегани эшитилди. Товушидан Аҳмад Танбалга ўхшамайди.

Оқ шоҳи яқтақ кийган йўғон гавдалик бўйдор кишини икки навкар икки томонидан маҳкам тутиб олиб кирди.

— Э, бу — Дарвеш гов-қу!— деди Ёқуббек бирдан енгил тортиб.

Андижон миробларининг бошлиғи бўлган бу одам гардани жуда гўштдор бўлганлиги учун хўкизга ўхшаб бўйинини бир оз олдинга эгиб юрар, шунинг учун орқаворатдан уни «гов», деб аташар эди. Андижон қўрғонига тўққиз ариқ сув кирса ҳам, боғ-роғларнинг қўилигидан ёз ойларида сув етишмайди, амалдорлар оддий фуқаронинг навбатини ҳам олишга интилишарди. Шундай пайтларда Дарвеш гов қўпинча фуқаронинг томонини олар, бекларга навбати келмагунча сув бермас эди. «Бек бўлсанг, ўзингга, худонинг олдида ҳамма бандаси баробар!»— деб тап тортмай гапирганини кўп одам эшитган. Шу сабабли беклар Дарвеш говни ёмон кўришар, айниқса доруға Узун Ҳасан қўпдан бери унга кек сақлаб юрарди.

Қўли боғлоғлиқ Дарвеш гов Бобурга ва ундан берироқда ўтирган Хўжа Абдуллага бош эгиб, таъзим қилди-ю:

— Адолат қилинг, амирзодам!— деди.— Мен фитначи эмасмен, устод! Бозорда бир япаски навкар менга айтди. «Подшоҳ Аҳсида маст бўлиб жардан йиқилиб ўлибдир. Бобур мирзо ёғийдан қўрқиб Олатоғ томонга кочибдир», деди.

Бобурнинг гаши келиб:

— Бўхтон бу!— деди.

— Бўхтонлигини мен кейин билдим, амирзодам, мени афв қилинг!— деб Дарвеш гов бир-икки қадам берига келиб, қўли орқасига боғланган ҳолича тиз чўкди: — Тухматлигига бу ерда муборак юзингизни кўриб амин бўлдим. Аммо бозорда халойиқ ваҳимага тушиб тўс-тўполон бўлиб қочганда ўзимни

йўқотиб қўйдим. Бир одамни тўхтатиб, «шундоқ гапларни эшитдим, нахотки рост бўлса?» деб сўраётганимда доруға жанобларининг хуфялари гапимни эшитиб турган эканлар...

— Йўқ, сен гап сўраш баҳонаси билан бу қабиҳ овозани тарқатиб юрганингда қўлга тушдинг!— деди Узун Ҳасан.

— Каломуллони беринг, қасам ичамен!

— Каломуллони ҳам хор қилмоқчи бу қасамхўр!— деди Ёқуббек Бобурга юзланиб:— Амирзодам, агар бу мардак садоқатли кулингиз бўлганда ёмон овоза тарқатган ўша навқарни қўлидан тутиб доруғага тошширмасмиди? Ваҳолонки, бу ўзи ўша овозани бошқаларга айтган, яъни иғво тарқатган. Буни ҳозир ўз тилидан ҳам эшитдик!

Дарвеш гов хангу манг бўлиб:

— Ё алҳазар!— деди.

Ёқуббек Бобурга боягидек мулойим кўз ташлаб, кемшик оғзини содиқ бир табассум билан очди:

— Амирзодам, сизнинг раҳматлик отангиз Дарвеш говни миробларга сардор қилиб қўйган эдилар. Отангизнинг инояти билан шундай мартабага эришган бу гов энди ҳазрати олийни муқаддас рамазон ойида мает бўлиб йиқилган деса-я! Бу қандай ноинсофлик!

Бобурнинг ёш қалби бу машъум иғвога қарши ғазаб туйғусига тўлиб бормоқда эди. «Алдаш учун бола яхши!»— ўйланди Ёқуббек умид билан. Иғво тарқатган бу одам ўзининг айбини жони-дили билан Дарвеш говга ағдариб, Бобурни бунга ишонтиришга бутун кучини сарфламоқда эди. Бу ишда Ёқуббек ёлғиз эмас эди, бекларнинг кўпчилиги Дарвеш говни айбдор деб билмоқда эдилар.

— Иғво тарқатганини ўзи бўйнига олди!— деди Ёқуббек.

— Тилидан тутилмишдир, жазосини бериш даркор!— деб Али Дўстбек номли бадқовоқ кўса бир киши Ёқуббекнинг тарафини олди.

Ўйчан ўтирган Қосимбек боя Шеримбек тоғойининг имзосиз хат келтирган кабутар ҳақидаги гапини эслади-ю:

— Балки яна тафтиш ўтказиш лозимдир?— деди.

Унга Мазидбек эътироз қилди:

— Ортиқча тафтишларга фурсат қани? Ёғий Марғилонни олиб, Андижонга бостириб келур. Қонли уруш пайтида элни ваҳимага туширган, подшоҳнинг мартабасига раҳна солмоқчи бўлган иғвогарларга раҳм қилинмайдир!

— Сиёсат учун майдонда ясоққа етказиш керак, токи бошқаларга ибрат бўлсин!— деди Узун Ҳасан.

«Ясоққа етказиш»— халойиқ олдида бошини кесин деган гап эди.

Дарвеш говнинг юзига ўлим шарпаси соя солиб ўтгандай

бўлди. У тиззаси билан юриб Бобурга яқинлашар экан, йиғлаб ялтижо қилди:

— Амирзодам, мен иғвогар эмасмен! Мен иғвогарларнинг қурбонимен! Менга раҳм қилинг! Бешта ёш болам бор! Ноумид қилманг, амирзодам!

Дарвеш гов, йўгон гавдаси силкиниб, ўкириб, йиғлар экан, қўли боғлиқ бўлгани учун юзини яширолмас, кўз ёшлари мош-гуруч соқолига томчилаб оқиб тушар эди.

Шундай катта ёшли одамнинг бунчалик куюниб йиғлагани Бобурнинг қалбида кўпириб турган газабни бирдан босди. Унинг Дарвеш говга раҳми келди-ю, устози Хўжа Абдулладан «шу бечоранинг қонидан кечинг!»— деб бир гап кутди.

Бироқ Хўжа Абдулла оғиз очгунча бўлмай, яна Ёқуббек гапирди:

— Бешта боласи бор одам тилини тийиб юрса бўлмасмиди!

— Э, бу гов ўзи хаддидан ошган!— деди Узун Ҳасан.

— Бўлмаса, подшоҳ ҳақида иғво қилганларнинг гапини эшитган ҳамона оғзига урмасмиди! Ёки у ҳаромимакларни бизга тутиб бермасмиди!

Бир-бирини инкор қилувчи бу гаплар Бобурнинг хаёллари-ни чалкаштириб юборди. Вужудини ўртаётган тапшалик янги бир куч билан қайтиб келди. Юзлар, деворлар, гиламлар бир-бирига қўшилиб, чаплашиб, чир-чир айлана бошлади. Дарвеш говнинг йиғлаб гапирган сўзлари гўё узоқдан эшитилди:

— Амирзодам! Адолат қилинг! Мен отангизнинг содиқ раиятлариданмен! Сиз ёшсиз, беғуборсиз. Сиз ҳали бу бекларни билмайсиз! Буларнинг менда кеки бор! Бекларга инонманг, амирзодам! Халқдан сўранг! Мени эл-улус билади! Раият билади!

Али Дўстбек қўлини миробга паҳса қилиб:

— Эшитдингизми, амирзодам?— деди.— Бу говнинг ичи қоралигини кўрдингизми?

Ёқуббек Бобур томонга таъзим билан эгилиб, боягидай меҳрибон товуш билан тушунтирди:

— Бу гов эл-улусни бекларга қарши қўзғамоқчи, амирзодам. Ёғий ҳужуми пайтида барият билан раиятнинг¹ орасига нифоқ солмоқчи!

— Нияти бузуқлиги шундан ҳам аён!— деди Узун Ҳасан ва навкарларга қараб буюрди.— Бас, олиб чиқ!

Бояги икки навкар Дарвеш говни икки қўлтиғидан олиб, ўрнидан турғизди-да, куч билан эшиқдан олиб чиқа бошлади. Энди Бобурдан ҳам умидини узган банди:

¹ Барият — бек ва аъёллар. Раият — фуқаро.

— Мен бегуноҳмей!— деб қичқирди.— Беш боламнинг уволи уради сен бекларни! Менинг бегуноҳ қоним тутади ҳаммангни!

Бу қарғиш Бобурнинг қалбига ўткир тигдай қадалди. Унинг қўл-оёқлари титраб, ўтирган жойида кўзи тина бошлади. Назарида, бояги қуюн аввалгидан баттар хуруж қилар, уни мана шу одамларга қўшиб чирмаб айлантирар эди. Атроф кўзига чапг-тўзон орасида қолиб кетгандай хира кўринар эди. У ўтирган жойида йиқилиб кетмаслик учун икки қўлини икки ёнига тиради.

Дарвеш говнинг қарғишидан ғазаби ошган беклар энди унинг ўлдирилишини яна ҳам қаттиқ туриб талаб қилдилар:

— Бу кўршамак ясоққа етмагунча элдаги ваҳима босилмайди!

— Сиёсат учун битта ифвогарнинг бошини кесмоқ зарур!

— Ясоқ!

— Ясоқ!

Бобурнинг кўз олдидан бояги одамнинг соқолига оқиб тушган кўз ёшлари кетмас, қулоғи тагида унинг аламли қичқириғи ҳамон жаранглаб турарди. Шу тирик одам мурдага айланиши керак, Бобур бунга фармон бериши керак. Нечун? Беклар у одамни гуноҳкор деб, Бобурни ишонтиргани учунми?

Балки бу беклар чиндан ҳам Бобурни алдаётгандир? Балки мана шунақа беклар Ахсида Умаршайх мирзони жардан итариб юбориб ўлдиргандирлар? Балки булар эрта-индин Бобурнинг жонига ҳам қасд қилишар?

Бирдан Бобурнинг беғам юрган даври эсига тушди. Кечагина у тенгдош ўртоқлари билан от чоштириб ўйнаб юрмаганмиди? Алишер Навоийнинг расмига тикилиб мусаффо ёшлик хаёлларига берилгани қачон эди? Орадан бир неча йил ўтганга ўхшайди. Ҳолбуки, шу бугун эрталаб, шу бугун чошгоҳда унинг ҳаёти қуёшли осмондай тиниқ ва соф эди-ку. Бу қора булутлар унинг атрофига қаёқдан ёпирилиб келди? «Ясоқ!»— деб қичқираётган ҳар дарғазаб бек Бобурдан қуёшни тўсиб олган бир қора булутга ўхшарди. Бобурни чирмаб айлантираётган даҳшатли қуюн мана шу қора булутларнинг шамоли эмасмикан? Наҳотки бу булутлар доим тожу тахт билан бирга юрса-ю, Дарвеш говга ўхшаганларнинг қонига шунчалик ташна бўлса?! Боя Бобурга худди булутлар орасидан сузиб чиққан тўлин ойдаи гўзал кўринган тожу тахт энди ой тутилган тундай ваҳимали тусга кирди. Бобур номаълум хавф-хатардан сесканиб, Хўжа Абдуллага ёрдам сўрагандай қаради:

— Устод!

Хўжа Абдулла унга томон сурилиб:

— Амирзодам, бардам бўлинг,— деди.

— Не қилай, айтинг!..— шивирлади Бобур.

— Хукм чиқаринг! Беклар ясоққа етсин деб талаб қилмоқдалар.

— Сиз-чи, устод?

Агар Хўжа Абдулла, ўтирганларга қарши чиқиб, Дарвеш говни ёкласа, шунча амал-тақал билан бошлари зўрға қовушган беклар яна пароканда бўлиб кетишлари аниқ эди.

— Амирзодам,— шивирлади Хўжа Абдулла,— подшоҳлик удумига биноан хатарли уруш пайтида тождорлар шаънига номуносиб гап айтган одам жиноятчи ҳисобланур! Дарвеш гов яна бу ерда ҳам тилини тиймай чатоқ қилди. Барча бекларни ёмонлаб, қарғаб, оловга мой сенди! Энди сиз... битта Дарвеш говни деб барча беклардан воз кечолмагайсиз. Вазият таҳликали... Спёсат учун говни ясоққа етказмоқдан бошқа илож йўқ!

* * *

Эртаси куни пешинда Андижон аркининг қаршисидаги жазо майдонида ноғоралар чалинди. Тўпланган халойиқнинг кўзи олдида Дарвеш гов, ёмон овоза тарқатишда айбланиб, боши кесилди.

Ёқуббек Аҳмад Таибални япасқи навқари билан бирга ўша куни кечаси Аҳсига яшириқча жўнатиб юборган эди. Икки орадаги сир сирлигича қолди.

Душман Марғилонни олиб, Андижонга таҳдид солмоқда эди. Хўжа Абдулла бошлиқ элчилар Бобурнинг номидан Самарқанд подшосининг Марғилондан беридаги қароргоҳига бориб, сулҳ тузишни таклиф қилдилар.

— Сиз билан уруш бошлаган инингиз Умаршайх мирзо жардан йиқилиб шунқор бўлди!¹ Бобур мирзони фарзанд ўрнида кўргайсиз! Ахир у зот сизга куёв бўлиш орзусидалар! Сизни бош ҳукмдоримиз, деб тан олурлар! Ўлпон тўлагаймиз! Урушни тўхтатинг, ҳазратим!

Хўжа Абдулланинг бу таклифига самарқандлик беклар қаттиқ қарши чиқдилар. Улар Андижон ва Аҳсини босиб, талаб, катта-катта ўлжа олиш умидида эдилар. Сулҳ уларни мана шу ўлжалардан маҳрум қилар, ўлпонни подшоҳнинг бир ўзи олар эди.

— Шунча жойдан қон кечиб, жон бериб-жон олиб келиб, энди едик деганда қуруқ кайтамызми?— деди Муҳаммад тархон номли бек.

¹ Вафот этди маъносида.

— Сулҳ тузманг, ҳазратим!

— Қаттиқ туринг! — дейишди бошқа беклар ҳам.

Султон Аҳмад мирзо бекларнинг раъйини қайтаролмайдиган заиф тождорлардан эди. Хўжа Абдулла бошлиқ элчилар ундан рад жавоби олиб қайгдилар.

Энди аввалгидан баттар қирғин бўлишини сезган бек ва навкарлар Андижон кўрғонига кириб бекина бошладилар.

ҚУВА

ЖАСОРАТНИНГ ЖАЗОСИ

1

Ўтган кунни отланиб Андижонга кетган мулла Фазлиддин бугун қаттиқ изтироб ичида яна Қувага қайтди.

У Бобурнинг отаси ўрнига ҳукмдор бўлганини эшитиб, ундан ҳимоя сўраш ниятида аркка борган эди. Агар унинг ҳузурига кирса ноумид қайтмаслигига ишонар эди. Чунки мулла Фазлиддин чорбоғда кўшк қурган пайтларда Бобур билан кўн ҳамсухбат бўлган, унинг зеҳни ўткир, шонртабиат, зукко ўспирин эканини сезиб, Алишер Навоий суратини ҳадя қилган эди. Энди мулла Фазлиддин бўйин йўғон беклардан кўрган ёмонликларини айтиб берса, Бобур уни ҳимоясиз ташлаб қўймаслиги керак эди. Лекин арк дарвозаси олдида ўша доруға Узун Ҳасан турган экан.

— Бобур мирзонинг ҳузурига кирмоқ учун махсус рухсат керак, — деб унинг йўлини тўсди.

— Рухсатни ким берур, жаноб доруға?

— Эшик оға Ёқуббек жаноблари!.. Ана, ўзлари ичкаридан чиқмоқдалар!..

Ўнтача навкар қуршовида ичкаридан отлиқ чиқиб келаётган Ёқуббек фақат биринчи вазир даражасидаги эшик оғалар тақадиган энли олтин камарини белига тақиб олган эди. Пули катта бу бек Андижон мудофаасига ҳаммадан кўн маблағ ажратган эди. Унинг навкарлари ҳам бошқа бекларникидан кўнроқ эди, ўзи ҳам Бобурга ихлоси зўрлигини ҳар ишда намойиш қилиб, туну кун тинмас эди. У биринчи кунёқ Бобурга ўзини содиқ кўрсатгани устига бу ҳаммаси қўшилиб, ахири соҳиб ихтиёр эшик оға бўлиб олган эди. Бунини энди билган мулла Фазлиддин хиёл саросима бўлди. Лекин ўзини дадил тутишга тиришиб, отлиқ келаётган Ёқуббекнинг қаршисидан чиқди:

— Жаноб эшик оға, ижозат беринг, камини Бобур мирзо ҳузурларига кирай!

Ёқуббек отининг жиловини тортиб, хиёл тўхтади-ю, қўлини кўксига қўйиб турган мулла Фазлиддинга тепадан кинояли назар ташлади:

— Кириб не қилмоқчисиз?

— Арзим бор... Меъморлик санъатига оид...

— Ҳозир ёш подшоҳимизга меъморлар эмас, мамлакат му-
дофаасига ярайдиган навкарлар керак! Уруш тугагандан сўнг
келинг!

Ёқуббек: «Гап тамом!» — дегандек қилиб, отини елдир-
ганича ўтиб кетди. Мулла Фазлиддин бир лаҳза қаққайиб
туриб қолди. Бир вақт Узун Ҳасаннинг:

— Жаноб меъмор, тавочилар навкарликка одам олмоқда-
лар, истасангиз бориб навкар бўлинг! — деган кинояси уни
ўзига келтирди.

— Ўлмасак ҳали меъмор керак бўладиган кунларга ҳам
етишурмиз! — деди мулла Фазлиддин доруғага нафратли на-
зар ташлаб.

Энди унинг Бобур ҳузурига киролмаслиги аниқ. Ёқуббек
билан Узун Ҳасаннинг ихтиёрига ўтган қалъада қолиш эса
жуда хатарли. Дарвеш говнинг ўлимига шу беклар сабаб
бўлганини мулла Фазлиддин эшитган эди. Ҳозир унинг учун
сал бехатарроқ жой — Қувадаги опасининг уйи эди...

Мулла Фазлиддин хуфтон пайти ҳовлига кириб келса,
поччаси билан опаси ёв яқинлашаётганини эшитиб ваҳимага
тушиб ўтиришган экан.

Қувасойдан нарида — Каркидон адиридаги ёв илгорлари
ёққан гулханлар милт-милт қилмоқда эди.

— Мулла Фазлиддин, ёғий келса пўлат сандиғингизни
гинч қўймас, — деди поччаси. — Буни тезроқ яширинг.

— Бўш ўрангиз борми, почча?

— Бор. Ана, бедахонада.

— Тоҳир қани?

— Маҳмуд билан кўприкка қараб кетди. Билмадим, не
иши бор? Сўрасам, айтмади.

Мулла Фазлиддин поччасининг ёрдамида пўлат сандиқни
яна қопга солиб, бедахонадаги бўш ўрага тушириб қўй-
ди-ю, ўранинг оғзини тахталар билан бекитди. Кейин бу
тахталар устига беда боғлариши баланд қилиб тахлаб таш-
лади.

* * *

Осмонни яна қуюқ булут қоплаган. Бирда-ярим ёмғир
томчилаб қўяди. Қува кўчалари жимжит. Ёв яқинлигини
сезган одамлар уй-уйига бекиниб олган. Аҳён-аҳёнда итлар
хургани эшитилмаса, бутун Қува кўчиб кетганга ўхшарди.
Қувасой устидан ўтган ёғоч кўприк ҳам кимсасиз. Элчилар

ёмон хабар билан қайтгандан сўнг, кўприкдаги соқчилар кўрғонга қочиб кетишган...

Тун яримлаганда шу кўприкка қараб кетадиган йўл четида уч-тўртта қора кўринди. Йўл бўйидаги дарвозанинг бир тавақаси секин очилди-ю, ундан катта чўва кўтарган пакана одам чиқди.

Тоҳир шивирлаб сўради:

— Чақмоқ билан тутантириқни ҳам олдингми?

— Олдим.

Пакана йигитнинг кийимларидан зиғир ёғининг хиди келди — унинг касби жувозкаш.

Тоҳир юзига ёмғир томчиллаганини сезиб осмонга қаради. Булут қуюқлашиб, юлдузлар кўринмай қолган.

«Жала қуйса олов ёнмай бало бўлармикин? — ўйланди у. — Кўприкнинг ёғочлари ҳам ҳўл бўлиб ивиб ётгандир».

— Маҳмуд, мен битта болта олдим. Энди яна битта болта билан икки кишилик катта арра керак. Сен дурадгорсен, асбобларинг тахт.

— Аррани нима қиласен?

— Керак! Умрзоқ, сен ҳам бирга бор. Дарров олиб чиқишлар.

Икки йигит бир тор кўчага кириб кетишди-ю, анчадан кейин айтилган нарсаларни олиб келшди. Кейин ҳаммалари деворнинг зехи билан юриб олдинма-кетин кўприкка яқинлашишди.

Тоҳир кўприкда қоровул йўқлигини боя аниқлаган эди. Андижон кўшини орқага чекиниб, кўрғонга кириб кетган, бостириб келаётган ёв буни яхши билар, шунинг учун Қувадай жойларда ҳеч қандай хавф-хатар бўлишини кутмас эди.

Тоҳир кўприкдан берироқда — қорайиб турган катта бир дарахтнинг тагида ҳамроҳларини тўхтатди:

— Ўзларингдан қолар гап йўқ. Беклар билан навкарлар бизни ёғиннинг оёғи остига ташлаб кетди. «Ўзинг учун ўл етим», деган гап бор. Худо кушойиши қоримизни берса, ҳаммамиз уй ичимиз билан бир балодан халос бўламиз. Мабодо, ишимиз ўнгидан келмаса... Битта-яримтамыз қўлга тушадиган бўлсак...

— Ўшада ҳам мард бўлиш керак, — деди Маҳмуд. — Олт ичайлик: кимки ёғинга сир берса, онаси хотини бўлсин!

— Омин!

— Омин!

Ҳаммалари юзларига фотиҳа тортишди-ю, бирин-кетин кўприкка чиқишди. Тоҳирнинг мўлжали қирқ-эллик қадам ичкарироққа бориб, кўприкнинг ўртасидан ўт кўйиш эди.

Аммо улар илгарилаган сари атрофлари очилиб, ўзларини химоясиз сеза бошлашди. Сувнинг очик сатҳи соҳилга нисбатан ёруғроқ эди. Кўприк ёв қўшинлари қаршисида нишон тахтасига ўхшаб тургандек ваҳимали туюларди.

Бир вақт дурадгор йигитнинг қўлидаги катта арра эгилиб, юшқа пўлати Тоҳирнинг болтасига тегиб кетди. Унинг жаранги қоронғида шундай кескин эшитилдики, йигитлар сесканиб тўхташди. Атрофга кулоқ солиб, бир лаҳза котиб туришди. Қурбақалар бир текис қурилламоқда эди.

— Тоҳир, кўп нарига бормаёлик! — деб шивирлади Маҳмуд.— Келиб қолса қочиб қутулишни ҳам ўйланглар.

— Нарёқдан келадими? Умрзоқни ўша ёққа қоровул қилиб қўямиз. Қўркманглар, ёғий узоқда.

Шу пайт ёмғир савалай бошлади. Энди узоқдаги гулханлар ҳам кўздан йўқолди. Ёв уларни кўриб қолиш эҳтимоли бутунлай бартараф бўлганини сезиб, Тоҳир ичида суюниб қўйди.

Кўприк хийла узун бўлганлиги учун уч-тўрт жойида тагидан қўйилган зўр сеноя тиргаклари бор эди. Тоҳир кўприкнинг қанотидан пастга эгилиб қараб, шу тиргаклардан бирини мўлжалга олди-ю, тўхтади. Умрзоқ кўприкнинг нариги четида қоровул бўлиб туриш учун кетди. Қолганлар кўприк ёғочларининг осонроқ ёниши мумкин бўлган жойларидан танлаб, болта билан пайраҳа кўчиришди, сўнг чўвадаги ёгдан сепишди. Уч кишилашиб чакмоқни тошга уриб, тутани¹ ёмғирдан бекитиб, роса уринганларидан кейин, ниҳоят, аччиқ пахта тутани димоғларига ўрилди. Ўт ёқишга эпчилроқ бўлган жувозкаш йигит тутани пуфлаб-пуфлаб чўғ қилди. Тоҳир чакмонининг тагидан қўлтиғига қисиб олиб келган қуруқ похолни шу чўққа тутди.

Похолнинг заиф олови зигир ёғи сепилган пайраҳаларга илашиб энди сал кўтарилай деганда, шамол қайириб ураётган ёмғир томчилари «жиз-жиз» этиб тегди-ю, ўчириб қўйди.

— Ёнмайдиган сирқинди мой экан! — деди Маҳмуд жувозкаш йигитга таъна қилиб.

— Ёмғир ўчирди-ку! Шу мойни топиб чиққанамга ҳам жон де!

— Бас!— ипишида Тоҳир жувозкаш йигитга.— Тутани ўчирмай тур!

Тоҳир иккита белбоғни бир-бирига улаб, бир четини белига боғлаб, кўприкнинг тагига осилиб тушди. Тиргакларнинг нам тегмаган жойларидан пайраҳа кўчириб олиб, ёғ сепиб,

¹ Т у т а — чакмоқ учқунидан ёниши кулай бўлган пахта ши.

минг азоб билан энди олов олдираётганда шамолнинг кучли бир экинни ёнаётган пайраҳаларни сувга учириб туширди.

Тоҳир кўприкка қайтиб чиқди-ю, болтани қўлига олиб, ғазаб билан кўприк қанотларини уриб синдира бошлади: — Мана ёнмасанг! Мана ёнмасанг! Мана! Мана!

Жувозкаш йигит иккинчи болтани қўлига олиб, кўприкнинг нариги қанотини синдиришга тушди.

— Тоҳир, бу ишларингдан нима фойда? — деди Маҳмуд.— Ундан кўра болтани менга бер. Мана бу миҳланган ёғочларини кўчириб ташлайлик.

Ҳансираган Тоҳир Маҳмуднинг олдига келди. Қоронғида миҳ кўринмаса ҳам касби дурадгор бўлган Маҳмуд ёғочнинг миҳ қокилган жойини тусмоглаб топди. Тоҳир иккаласи кўприкка кўндаланг қўйиб миҳланган тахтасимон бир ёғочни кўчириб олишди. Аммо иккинчи ёғочни кўчириш жуда қийин бўлди.

— Айтмоқчи, арра бор-ку? — деди Маҳмуд.

Бир четда ётган аррани Тоҳир пайпаслаб топди. Икки йигит унинг икки дастасидан олиб, кўприк ёғочларини арралашга тушишди.

— Шошма! — деди Тоҳир.— Бу ердаги беш-ўнта ёғочни арралаб ташлаганимиз билан ҳеч иш чиқмайди.

— Нега чиқмасин? От-арава ўтолмайдиган қиламиз!

— Бирорта устани олиб келиб, кўприкни тузатиб, ўтиб кетаверса-чи?

— Фойдаси йўқ ишга уннадик чамаси-да! — деди жувозкаш йигит умидсизланиб.

— Йўқ, биз кўприкни бўйига эмас, энига қараб арралашимиз керак.

— Энига қўйилган ёғочлар жувозкундадай йўғон-ку. Арралаб бўладими?

— Бўлади!

Тўрт киши-навбатма-навбат арра тортиб, кўприкнинг кўндалангига тўсин қилиб қўйилган йўғон ва қаттиқ ёғочни арралаётганда қора терга ботиб кетишди. Илқ ёмғир ҳали ҳам савалаб турар, уларнинг юзлари ва баданларида оққан тер ёмғир сувига қўшилиб кийимларини шалаббо қилган эди. Йигитларнинг мақсади кўприкни икки томондан ушлаб турган ўқёғочларни арралаб, уни бир-икки жойидан узиб ташлаш эди. Аммо улар кўприкнинг ҳар икки томонидаги йўғон ўқёғочларни арралаб қирқишди ҳамки, кўприк улар кутгандай узилиб тушмади. Уни яна қандайдир миҳлар, бир-бирига тишлашиб қўйилган болорлар ва «белбоғ» ёғочлар маҳкам ушлаб турарди. Тоҳир билан Маҳмуд аррани қўйиб, яна болтани қўл-

га олишди, қоронғида тими́рскиланиб, болорларга тишлатилган қавс михлардан беш-олтитасини топишди ва кўчириб ташлашди. Шундан кейин кўприкнинг аллақаери қирсиллади-ю, аммо ўзи аввалгидай тураверди.

— Бўлди! — деди Маҳмуд мадорсизланиб. — Қўлимиздан келмайдиган ишга уннабмиз!

— Падарига лаънат! — деб, Тоҳир қўлидаги болта билан яна кўприк қанотларини қарсиллатиб синдира кетди. Шу пайт кўприкнинг нариги четидан улар қоровул қўйган йигит чопиб келди:

— Қўй, бас! Мунча қарсиллатма! Нариги адирдан ёғий келаётганга ўхшайди.

— А! Кўрдингми?

— Товушларини эшитдим. «Отлан!», «Сафлан!» — деб бақириб-чақирганлари қулоғимга чалинди!

— Бўлмаса ҳозир бостириб келади! — деб жувозкаш қочишга чоғланди.

— Аррангни ол, бу ерда ҳеч нарсани қолдирманглар! — деб Тоҳир ёнмаган пайраҳаларни, ёғоч синиқларини сувга отди.

Беш йигит муваффақиятсизликка учрагандай руҳлари тушиб, уйларига тарқаганларида тонг ёрниша бошлаган эди.

2

Сахарликни еб йўлга тушган ёв қўшинининг олдинги тўпи кўприкка чиқа бошлаганда тонг қоронғиси ҳали тарқалмаган эди. Ёмғир тоғларда қаттиқ қуяётганлиги учун Қува-сойнинг суви тобора кўтарилиб бормоқда эди. Олдинда келаётган отлик чигдовуллар унча кўп эмас эди, шунинг учун кўприқдан сийрак саф билан ўтиб кетишди.

Аммо улардан кейин келаётган сафлар жуда қалин эди. Ҳар бир бекнинг навкарлари ўзларига қарашли юкларни туя қўшилган оғир араваларга ортиб келмоқда эдилар.

Чуғурчукдай беҳисоб қўшин отлари, туялари, аравалари билан бирга ёмғирли тонгда қоп-қора селга ўхшаб кўприкни лиммо-лим тўлдириб кела бошлади.

Кўприкнинг ўртасида бояги йигитлар михларни суғуриб, тўсинларини арралаб кетган жой бунчалик оғир юкка бардош бериши амримаҳол эди. Бунинг устига, худди ўша жойда бир чўбир отнинг икки олдинги оёғи михи кўчирилган ёғочларнинг ёриғига тушиб кетди. От ўмрови билан йиқилиб тушиб, оёғини сугуриб ололмай типирчилай бошлади. Эгарда ўтирган навкар отнинг бошидан ошиб, бошқа отларнинг оёғи тагига учиб тушди. Ҳозир беҳисоб туёқлар остида қолиб янчилишини сизди-ю,

дод солиб қичқирди. Ҳамроҳлари бехтиёр жиловларини тортишди. Баъзи отлар қўрқиб орқага тисарилиб кетди.

Орқадагилар эса ҳеч нарсадан беҳабар ёпирилиб келмоқда эди. Бир лаҳзада кўприкнинг шу жойи ҳаддан ташқари тикилинч бўлиб кетди. Арра ва болта зарбаларидан ночорлашган кўприк ёғочлари тўсатдан қарсиллаб синди. Тиқин бўлиб ётган ўнлаб отлар, одамлар кўприк ёғочларига қўшилиб сувга қулаб тушди. Тошиб турган сойнинг суви қулаб тушганларни лопиллатиб оқизиб кетди.

Кўприк устида қолганлар жонҳолатда орқага бурилиб, қочмоқчи бўлишди. Аммо орқадан ҳамон отлиқлар, аравалар, туялар кўчқидай бостириб келмоқда эди. Олдинда нима ҳодиса бўлганидан беҳабар подшоҳ энг яқин беқлари билан сойнинг нариги четида туриб, қўшинини кўприкка томон йўналтирмоқда эди. Лекин кўприк ўртасидан кўтарилган қий-чув, тўполон тобора зўрайиб борарди. Ваҳимага тушган қўшин бирдан ўзини орқага ташлади, аммо ур-сур тўполонда кўприкка сиғмай, отуловлари билан сувга тутдай тўкила бошлади.

Кўприк қанотларининг анча жойи синдириб ташлангани уларнинг қулаб тушишини осонлаштиради. Тартиби бузилган аравалар бир-бирини итариб, кўприкнинг бутун турган қанотларини ҳам синдириб қуламоқда эди. Баъзи навкарлар йўлида учраган тирик жоннинг ҳаммасини қамчилаб ўтмоқда бўлса, баъзи беқлар қилич ялағочлаб, тўполоини тиг билан босмоқчи бўлишади. Аммо гиж-гиж бўлиб, қурт-қумурсқадай қайнаб ётган қўшин кўприкка шундай тикилиб қолган эдики, унга на қамчи кор қилар эди, на қилич. Туялар бўқиради. Одамлар қичқиради. Талвасага тушган оломон тиг кўтарган беқларнинг ўзини от-улови билан суриб бориб, кўприкдан ағанатиб юборади.

Подшоҳ билан бирга қирғоқда турган хос навкарлар сувда оқиб бораётганларни қутқаришга фармон олдилар. Улар қамишларни шалдиратиб, сувга яқин қолганларида ўзлари ҳам балчиққа ботиб кета бошлади. Кейин орқада қолганлари арқон ташлаб уларнинг уч-тўрттасини зўрға қутқариб олди. Бошқаларини қамишзор балчиқ қаърига тортиб кетди.

Сувга қулаб тушганларнинг чўккани чўкиб ўлди. Сузишни биладиганлари эса отларнинг бўйнига ёпишиб қамишзор қирғоққа чиқай деганда балчиққа ботди. Сассиқ ботқоқлик аждаҳога айланиб одамни ҳам, отни ҳам оёғидан пастга тортар эди. Отлар жон аччиғида силтаниб кишнар, одамлар қамишларга қўллари тилиниб дод солар, аммо улар талваса қилганлари сари балчиққа чуқурроқ ботиб, юз азоблар билан жон беришар эди.

Ўртаси синиб тушган кўприкнинг устида — ағдарилган

аравалар, йиқилиб ётган от ва туялар орасида талай навкарларнинг эзгиланган жасадлари қолди. Ёвнинг шу бир-икки соат ичида кўрган талафоти уруш бошлангандан бери кўрган ҳамма талафотларидан кўпроқ ва дахшатлироқ эди. Яна бу фалокатнинг сабабини ҳеч ким билмас эди. Шунча одамнинг мислсиз кийноқларда жон берганини кўрган жангчилар мағлубиятга учрагандан баттар эсанкираб, руҳсизланиб қолдилар.

3

Қуваликлар тонг ёришгандан кун ёйилгунча бўлиб ўтган бу фалокатни нариги қирғоқдаги девор ва томлардан мўралаб кўриб турар эдилар. Уларнинг баъзиси «ёғий баттар бўлсин», деб шодланса, баъзиси не-не йиғитларнинг сувга оқиб, балчиққа ботиб, минг азоблар билан ўлаётганидан ачинарди. Тоҳир кечаси ўртоқлари билан қилган ишларини боя Фазлиддин тоғасига «уддасидан чиқолмадик», деган маънода маъюсланиб айтиб берган эди. Кейин юз берган ҳодисани томга чиқиб кўрган мулла Фазлиддин нарвондан тез пастга тушди-ю, Тоҳирни бир четга имлаб чақириб олди:

— Ўртоқларингга айт! Ҳаммаларинг тезроқ беркининглар!

— Нечун, мулла тоға?

— Кўприк арраланган жойидан синганга ўхшайди. Агар кўприкка ўт қўйиб юборганларингда ҳам бунчалик талафот бўлмас эди. Чунки ёғий кўприкнинг ёнган жойини тузатмагунча устига черик чиқармас эди. Улар ғафлатда қолиб балога йўлиққан! Агар қилган ишларингни билиб қолса, ҳаммамизни қириб ташлашлари аниқ!

— Ёғий ҳали нарёқда-ку?

— Чиғдовуллари бу ёкка ўтган экан, мен кўрдим. Гапни кўпайтирмай тезроқ яширин. Тўқайга чиқиб кетинглар. Тез!

Тоғаси астойдил хавотир бўлаётганини сезган Тоҳир бошқа эътироз қилмади-ю, ўртоқларига секин хабар бериб чиқди:

— Арқон билан ўроқ олинглар. Ким сўраса, ўтинга борамиз, денглар. Лекин хўрак икки-уч кунлик бўлсин.

Беш йиғит одамларнинг кўзиға ташланмасликка тиришиб кишлоқдан якка-якка чиқишди-ю, тўқай ичида учрашишди.

Кўприк синамасидан олдин бериги томонга ўтиб қолган чиғдовуллар Қуванинг кадхудосини топиб, унинг ёрдамида дурадгор усталарни кўприк тузатишга ҳайдаб чиқди. Нарёқда қолган навкарлар арқон ташлаб, ёғоч ташиб, уларга кўмаклаша бошлашди.

Кўприк тузатишга чиққанларнинг орасида Тоҳирнинг отаси ҳам бор эди. У кечаси ўғлининг қаёққадир бориб, сахар пайтида чарчаб қайтганини сезган эди. Дурадгорлардан бири ёғочнинг арраланган жойини Тоҳирнинг отасига кўрсатиб, ўз

шубҳасини айтмоқчи бўлганда, уста бунинг олдини олиб лабини тишлади:

— Дамингизни чиқарманг,— деб шивирлади.— Агар ёғий бирор гумонингизга ишонса, бутун Қувага ўт кўяди. Ҳаммамизни қиличдан ўтказди!

— Гапингиз ҳақ!

Шундан кейин бу тўғрида ҳеч оғиз очмади. Икки кун деганда кўприк наридан-бери тузатилди-ю, ёвнинг отлиқ аскарлари битта-иккитадан бўлиб, эҳтиёт билан ўтишди. Ниҳоят, подшоҳ ҳам мулозимлари билан кўприкдан ўтиб, Қувада тўхтамасдан йўлида давом этди.

Ёвнинг араваларга ортилган оғир юклари ва туя карвонлари кўприкдан нарида қолиб кетди. Шунга қараганда ёвнинг режаларида қандайдир бир ўзгариш юз берган эди.

Тўқайда яшириниб юрган Тоҳир Робиядан хавотирда эди. Ота-онаси қизни қўлларидан келганича авайлаб, яшириб юрганларини билса ҳам, ёвнинг ҳамон Қува атрофида ўралашиб юргани жуда таҳликали эди. Учинчи кун йигитларнинг хўраклари ҳам тугади. Аҳвол қандай бўлаётганини билиш ва хўрак ғамлаб келиш учун Тоҳир ўзи борадиган бўлди. У кечки пайт бир боғ қамишни орқалаб секин ҳовлиларга яқинлашди. Дарвоза занжир экан, қўлининг учини тикиб, занжирни туширди. Мулла Фазлиддин бостирманинг олдида араванинг гилдираklarини кўздан кечираётган эди. Қамиш кўтариб кирган Тоҳирни кўриб унга қараб чопди:

— Сулҳ муборак, жияним! Сулҳ!

— Уруш тугадими?

— Худога шукр, тугади.

Тоҳир елкасидан қамишни ерга ташлаб юборди. Тоғаси уни бағрига босиб, қулоғига шивирлади:

— Жасоратларинг бекор кетмади, жияним! Самарқанд подшоҳининг ўзи сулҳ таклиф қилган эмиш! Кўприкдаги талафот ёғийнинг белини синдирган экан!

Мулла Фазлиддин елкасига энсиз жияк тикилган кифтаки кўйлак кийган эди. Тоҳир энгагини жиякнинг боғичига босиб ва қутилмаган шодликнинг зўридан ўпкаси тўлиб:

— Хайрият! — дея олди, холос.

Мулла Фазлиддин унинг залварли елкасини силаб паст товуш билан:

— Аломат бўлди,— деди.— Не-не бекларнинг қўлидан келмаган халоскорлик сендек бечорахол йигитларнинг қўлидан келгани аломат бўлди! Ўзинг ўроқчи деҳқон, бир ўртоғинг дурадгор, бири қосиб, яна бири... ким эди?

— Ҳувозкан.

— Ҳа, жувозкаш! — деб мулла Фазлиддин завқланиб кулди-ю, жиянини кучоғидан бўшатиб, унинг юзига тикилди:— Киборлар сендекларни «қора халқ», деб писанд қилмайдилар. Аммо бугун шу «қора халқ»нинг жасорати билан уруш балосидан халос бўлганларини билсалар эди!

— Лекин мунчалик бўлишини биз ўзимиз ҳам билмаган эдик, мулла тоға. Бир чеккаси, сизнинг келиб қолганингиз яхши бўлди. Сиз бўлмаганингизда бу иш меннинг хаёлимга ҳам келмас эди.

— Шундайми, а, жияним? Агар шундай бўлса меннинг бошимни сен кўкка етказдинг!

Мулла Фазлиддин нуқул овозини насайгириб, қандайдир хавф сезиб гапирмоқда эди.

— Мулла тоға, Қувада ҳали ҳам ёғий борми? — деди Тоҳир.

— Ҳа, ёғий ўтиб тамом бўлганича йўқ. Подшоҳлари Андижондан бир ёғоч¹ берида сулҳ тузиб орқага қайтган эмиш. Черигининг бир қисми кўлриқдан нарига ўтиб кетганини, ўзим кўрдим. Аммо қолган-қутганлари эди қайтса керак. Эҳтиёт шарт, жияним, уйга кир.

Тоҳир уст-бошига илашган қамиш баргларини қоқиб уйга кираётганда кўшини ҳовлидан аёл кишининг алласи эшитилди.

Тоҳир Робияни эслади-ю, юраги бир орзиқди. Сулҳ тузилганини эшитганмикин? Тоҳир уни жуда соғинган эди. Қани энди пложи бўлса-ю, ҳозир девор ошиб, кўшни ҳовлига ўтса. Робияга уруш қандай даф бўлганини айтиб бериб, унинг қувонганини кўрса! Лекин қаллиқлик одоби бунга йўл бермас, Тоҳир Робия билан фақат яшириқча учрашар эди.

Тоҳир энди уйга кириб, онасини сулҳ билан муборакбод қилаётган эди, кўчада бирдан итлар асабий ҳуриб, от дупури эшитила бошлади. Тоҳир шошилиб дарчадан ҳовлига қаради. Айвондан настда турган мулла Фазлиддин унга ўтинхонани кўрсатиб:

— Бу ёққа чиқ! — деб шиншиди.— Бекин!

Тоҳир белига тақилган ханжарни сопидаи ушлаб, айвон орқали ўтинхонага чошиб ўтди ва қамиш боғларининг орасига яширинди.

Дарвоза тавақалари шахт билан очилди. Эгарларининг қошига ёй осилган, бошларига дубулға кийган, кенг чолворлари этикларининг қўнжини ёпиб турган отлиқ аскарлар ҳовлига кираётиб атрофга алаанг-жалаанг кўз югуртириб чиқди. Улардан иккитаси битта қора отга мингашиб олган эди.

¹ Бир ёғоч — тахминан ўн оятти чақирим.

Дубулғасининг учига яшил матодан байроқча қадалган понсод бостирмада турган яйдоқ отни кўрди-ю, мингашиб келаётганларга қараб:

— Ана у сеники! — деди.

Хабашдай қорайиб кетган ўсиқ мўйловли йигит қора отнинг сағрисидан сакраб тушди-ю, бостирмага қараб югурди. Қолган йигитлар понсоднинг ишораси билан уйга кириб, янгироқ кигизми, гиламми, бўхчами ҳаммасини ҳовлига кўтариб чиқа бошлади.

Айвоннинг устунига суяниб жим турган мулла Фазлиддин буларни «Кўприк воқеасидан хабар топиб Тоҳирларни қидириб келганми?» — деб қаттиқ кўркқан эди. Энди буларнинг баднафе талончилар эканини кўриб нафрати келди. Отдан тушмай ҳовли ўртасида турган понсодга қараб:

— Меҳмон, инсоф ҳам даркор! — деди.— Подшоҳларимиз сулҳ тузганларидан кейин бунчалик талон-тороғ қилиш мусулмончиликка тўғри келармикин?

Бостирмада мулла Фазлиддиннинг отини аллақачон ўзиники қилиб унга эгар ураётган қора йигит:

— Сулҳ, омон-омон! — деб, бу сўзларни масхаралагандай қилиб айтди.

Бошқа бир йигит бўхчани титкилаб, ундан бир жуфт атлас топди-да, понсодга узатиб:

— Моли амон!¹ — деди.

Понсод атласни олиб хуржунга солар экан, мулла Фазлиддинга зуғум қилиб, самарқандча талаффуз билан гапира бошлади:

— Олмишта отимиз ўлат бўлиб ўлди. Бизга касофатларинг урди. Сен бунда савори юргину мани йигитим Самарқандга пиёда кетсунми? Икки киши бир отга мингашиб кирганини кўрдингми?

— Кўрдим. Агар аравага қўшилган шу чўбир от йигитингизни Самарқандга кўтариб боролса, майли, олинг. Лекин аёлларнинг бўхчасини кавлаш сиздек олижаноб понсодга жоизмикин?

— Бизнинг аёлларимиз Фарғона атласидан савғо келтиринг деб тайин қилган. Биз шунча жойдан овора бўлиб келиб, энди бесавғо қайтайлукми? Инсоф шуми?!

Понсод сўнгги сўзни алам билан айтганига қараганда, урушнинг ғалабасиз тугганидан жуда норози эди. Бу одамлар, урушдан катта ўлжалар олиш умидида ойлаб-йиллаб қон кечиб, ҳамма азоб-укубатларга бардош бериб юрар эдилар. Агар Андижон ва Ахси каби бой шаҳарлар босиб олинса,

¹ Моли амон — урушдан тўланадиган товоп.

жангчиларнинг ҳар бири ўлжадор бўлиши шубҳасиз эди. Бироқ Қувадаги талафотдан кейин дарҳол сулҳ тузилди. Андижондан ярашиш учун чиққанлар Самарқанд подшоҳига олтин-кумуш совғалар, қимматбаҳо сарунолар, бир неча юз чопқир от ва туялар инъом қилдилар. Бу инъомлар подшоҳнинг ичкилари, мулозимлари, беклари ва бошқа яқинларидан ортмай қолди. Мана бу понсодга ўхшаган жангчилар эса ўлжасиз қолди.

Шунинг аламига улар орқага қайтишда йўлларида учраган қишлоқларни тинтиб, ўлжа қидиришга тушган эди.

Улардан бештаси ҳозир Робияларнинг ҳовлисига ҳам бос-тириб кирган эди. Ўтишхонанинг бир девори Робияларнинг ҳовлисига туташ бўлгани учун Тоҳир кўшни ҳовлида ҳам тўнолон кўтарилганини эшитиб қолди.

Кеча эҳтиётни қилиб ичкарида бекиниб ўтирган Робия уруш тугаганини эшитган сўнг ҳовлига сизир соғишга чиққан эди. Сизирга бузоқни қўйиб, уни йдириш билан андармон бўлди-да, ҳовлиларига отлик аскарлар кириб келганини кеч сезд.

Аяси оғилхонага чопиб кирди.

— Вой, ўлай, сен шу ердამидинг?

— Нима бўлди, ая?

— Ёғий! Тўхта! Ҳовлига чикма!.. Ана у тўйнуқдан сомонхонага ўт!

Ўлжа от қидириб юрган навкарларнинг иккитаси дарҳол оғилхонага кирдию, унинг тўридаги тўйнуқдан нарёққа ошиб ўтаётган қизни кўриб қолди. Қисик кўзли қипчоқ йигит ёнидагига қараб:

— Сулув қизга ўхшайди! — деди.

— От жўқ экан-да,— деди шериги афсусланиб.

— Жаҳини қиз отдан ҳам қиймат бўлади. Жур, олиб чигайиқ. Самарқандга олиб бориб Фозилбекка сотамиз!

Сизирнинг панасида турган она бу даҳшатли сўзларнинг маъносини тушунди-ю, чопиб бориб тўйнуқнинг оғзини гавдаси билан бекитди.

— Мусулмон бўлсаларинг қизимга тегманглар! Мени ўлдирсаларинг ўлдириглар! Қизимга яқинлашманглар! Бировнинг омишати! Бировга фотиҳа бўлган!

Бу сўзлар қисик кўзли йигитнинг назарида қизнинг қийматини яна ҳам оширгандай бўлди. У кампирни қўлидан бир силтаб, охурга қараб улоқтирди. Кампир охурга боши билан урилиб чинқирди-ю, хушидан кетди.

Қипчоқ йигит тўйнуқдан сомонхонага ўтганда Робия сомонхонанинг эшигидан қочиб ҳовлига чикди. Шунда иккинчи йигит қаршисидан чопиб чиқиб уни тутиб олди. Ичкаридан

қисік кўзлігі етиб келди. Қиз уларнинг қўлидан чиқиб кетмоқчи бўлиб балиқдай патиллар эди. Учинчи бир йигит эгаридан қоп олиб қопнинг оғзини очганича уларга яқинлаша бошлади. Қиз ҳозир бошига қоп кийдирилишини сизди-ю, бор овози билан дод солиб қичқира бошлади.

Тоҳир шу вақтгача тишини-тишига қўйиб, уйларида бўлаётган талон-тороғга чидаб ўтирган эди. Аммо Робиянинг чинқириғини эшитгандан кейин кўзига ҳеч нарса кўринмай қолди. Ўтинхонадан чоғиб чиқди-да, кўшни ховлининг деворига тирмашди. Деворнинг сувоқларини кўчириб, нарёққа ошиб тушар экан, шунча кундан бери уни хавотирга солиб юрган энг ёмон бахсизлик у кутгандан ҳам даҳшатлироқ бир тарзда рўй бераётганини кўрди. Бири Робияни оёқларидан ушлаб олган, иккинчиси унинг қўлларини белига қўшиб маҳкам қисиб турган ва учинчиси қизнинг бошига қоп кийдирмоқчи бўлаётган йигитлар Тоҳирнинг баданига ҳам заҳарли илон бўлиб ёпишаётгандай туюлди. Тоҳир қичқириб юборди. Ховлида бир йигит отларни жиловидан тутиб турибди. Яна бири қўлида узун найзаси билан от устида ўтирибди. Ҳаммасининг белида қиличи, ёнида ўқ-ёйи. Тоҳир бир ўзи буларга бас келоладими, йўқми, буни ўйлаб ўтирадиган аҳволда эмас. Робияга ёпишган илонларга тезроқ тиғ уришдан бошқа ўйи ҳам, истағи ҳам йўқ. У югуриб бораётиб ханжарини қишидан сугурди.

Найза кўтарган отлик:

— Тўхта! Тўхта! — деб унинг кетидан от солди. Тоҳир икки сакраб мўлжаллаган жойига етиб борди. Робияни оёғидан қучоқлаб олган қисік кўзли йигитнинг биқинига ханжар урди. Ханжар сопиғача ботиб кетгани, қисік кўзли йигит инграб Робиянинг оёқларини қўйиб юборгани эсида. Тоҳир ханжарни тортиб олаётганида ўзининг елкасига ғарчиллаб санчилган найза зарбидан гандираклаб кетди. Унинг ханжар тутган қўллари даҳшатли бир оғриқдан бўшашди. От устидан унга найза санчган йигит найзасининг узун сопидан тортиб суғуриб олаётганда Тоҳирнинг елкасидан — қўйлаги билан бирга кесилган баданидан қон тизиллаб отилиб кетди. У ўзи қулатган қисік кўзли йигитнинг устига йиқилар экан, Робиянинг қосасидан ўйноқлаб чиққан ваҳима тўла кўзини кўрди. Қизнинг:

— Вой, Тоҳир оғам! — деб қичқиргани узоқлардан келган шарнадай зўрға эшитилди. Сўнг бу ҳам зулмат қаърига шўнғиб йўқ бўлди.

Тоҳир қонига беланганича қолди-ю, Робияни Самарқанд томоғга олиб кеттиди.

НАЖОТ ҚАЙДА?

1

Балаид қоятошлар билан текис воҳалар бир-бирига галати тарзда киришиб кетган Ўш атрофлари бир неча кундан бери жуда серҳаракат. Андижондан туяларга ортиб келинган ҳашаматли чодирлар Буратоғ¹ этагидан оқиб ўтадиган Жаннатариқ бўйига ўрнатилди. Оқбурасой бўйларида ҳам, Чилмаҳрам тоғининг этакларидаги кўкаламзорларда ҳам юзлаб чодирлар ва ўтовлар пайдо бўлди. Тоғдан ҳайдаб тушилган думбали кўйлар сўйилди, кабоб кўраларида арчанинг пистоқи кўмири чўғлатилди, дошқозонларда гўшт қайнай бошлади.

Бугун Ўшга Бобур мирзо бошлиқ ҳамма аркони давлатларининг келиши кутилмоқда.

Мулла Фазлиддин ёш подшоҳнинг амри билан Буратоғнинг чиқиш қийин бўлган хушманзара бир қоятоши устига кичкина ҳужра қурган. Бобур мирзо бултур шу ишни унга топширгандан кейин Самарқандга қўшин тортиб келган ва Ўшга мана энди йўли тушмоқда эди. Мулла Фазлиддин савдарлар билан пастга тушиб, ҳужрага ярашадиган гилам ва зарбоф кўрпачаларни ўзи ташлади. Тик, сирғанчиқ қоятошга чиқиб ўрганмаган савдарлар жиҳозларни олиб келаётганда жуда қийналиб қолишди. Қашқарча кумуш обдаста кўтариб келаётган семиз офтобачи ҳар ўн қадамда бир тўхтаб қоларди. Мулла Фазлиддин унинг қўлидан обдастасини олиб, ўзини суяб чиқди.

Савдарбоши айвонининг сангфарш қилинган зиналарига гулдор пояндоз тўшатган эди, мулла Фазлиддин илтимос қилиб, уни олдириб ташлади. Чунки зиналарга ишлатилган рангли тошлар ҳар қандай пояндоздан қимматроқ ва гўзалроқ эди.

Тоғ қиррасида турган ҳужрадан бутун Ўш шаҳри ва унинг атрофлари кафтдагидек аниқ кўринар эди. Ҳали ҳам нафасини ростлаб ололмай хансираб ўтирган офтобачи пастга тикилиб қаради-ю, ўрнидан сакраб турди:

¹ Буратоғ баъзи маъбаларда Боратоғ ҳам деб аталади. Бироқ «Оқ Бурасой» каби асли «бура» сўзидан олинган бўлиши керак. Туркий тилларда португалининг энг улқани «бура» ёки «буғра» деб аталади. Бу тоғ чиндан ҳам текис жойда чўк тушиб ётган улқан португалига ўхшаб кетади. (Автор.)

— Ана, келдилар!

Мулла Фазлиддин айвон четига бориб, пастга кўз югуртирди.

Оқ отлиқ Бобур мирзо юздан ортиқ беклари ва хос навкарлари билан Жавзо масжидидан ўтиб, тоғ этагига яқинлашиб қолган эди. Улар ҳаммаси Жаннатариқ бўйига ўрнатилган боргоҳ¹ ва хиргоҳ² олдида тўхтадилар. Ичи заррин шакл, усти қимматбаҳо майин мовут билан қопланган бу чодирларнинг зарҳал чилвирлари кумуш қозикларга боғланган эди. Чодирларда дам олиш ва катта зиёфатлар бериш учун ҳамма тайёрликлар кўриб қўйилганини мулла Фазлиддин билар эди. «Энди бугун Бобур мирзо ўша ерда дам олсалар керак, бизнинг хужрага балки эртага чиқарлар»,— деган ўй билан ишини секин давом эттирди. Аммо орадан бир соат ўтар-ўтмас пастдан серсоқол кўрчибоши тўртта соқчиси билан ҳансираб чиқиб келди:

— Ҳозир бу ерга олий зотлар қадам ранжида қилурлар. Тахтиравон қаерда?

Савдарбоши мулла Фазлиддинга ёрдам сўрагандай қилиб қаради. Зира беқасамдан юпқа тўн кийган мулла Фазлиддин кўрчибоши қаршисида қўл қовуштириб:

— Маъзур тутинг, жаноби бек,— деди.

— Хўш?

Мулла Фазлиддин шу хужрани қуришда гиштларни замбилга солиб кўтартириб чиқмоқчи бўлган, аммо иложини тополмаган эди. Чунки бу тик қояга одам фақат битта-битта бўлиб, гоҳо қўли билан қояга суяниб чиқиши мумкин эди. Тахтиравонни эса тўрт киши тўрт томонидан кўтаради, унинг ичида подшоҳ ёки маликалар ўтиради.

— Биз тажриба этиб кўрдик, бу қояга тахтиравон кўтариб чиқиш мумкин эмас,— деди мулла Фазлиддин.

Кўрчибоши уч томони девордай тик қоятош бўлган, фақат бир томонидан ёлғиз одам зўрға ўтиб келадиган тоққа дуруст-роқ қаради-ю, тахтиравон ишлатиш фикридан қайтди. Савдарбошига хўмрайиб:

— Бу ерда ортиқча одам бўлмасин!— деб буюрди.

Хужра атрофидаги саҳн торроқ бўлса ҳам қоянинг шимол томонида — уйдаи баланд тошлар ортида кичкина майдонча бор эди. Соқчилардан иккитаси офтобачи ва савдарбоши

¹ Боргоҳ — подшоҳнинг хос чодир.

² Хиргоҳ — подшоҳнинг тахти қўйиладиган ва қабул маросимлари ўтказиладиган чодир.

билан бирга ўша ёққа ўтиб туришди. Бошқа савдарлар настга тушиб кетишди. Қўрчибоши мулла Фазлиддинга қараб:

— Жаноби меъмор, сиз йўлни яхши билурсиз, подшоҳга пешвоз чиқинг.— деб буюрди. Қоидага биноан қўрчибошининг ўзи ҳам настга қайтиб тушиб, подшоҳ билан бирга чиқиши керак эди. Аммо бу тоққа икки қайта устма-уст тушиб чиқиш бениҳоя қийин. Буни сезган ўрта яшар қўрчибоши иккита соқчини мулла Фазлиддинга қўшиб настга тушириб юборди-ю, ўзи хужра ёнидаги силлиқ тош курсига ўтириб, терлаб кетган йўғон бўйинларини арта бошлади.

Мулла Фазлиддин Буратоққа ҳар кун ичча қайтадан тушиб-чиқиб ўрганиб қолган. Унинг оёғидаги ихчам мўккиси тошдан-тошга снгил ўтиб боради. Аммо кўнгли нотинч. Ҳозир подшоҳ ва унинг беқларига дуч келиши кераклиги, улар билан муомала қилишнинг қийинлиги қалбига таҳлика солади.

Бобур мирзо ва унинг одамлари тоғнинг кунчиқиш томонидан отлиқ айланиб ўтиб, қоятошга жанубдан яқинлашдилар-да, мазоратдан юқорироқда отдан туша бошладилар. Шунда мулла Фазлиддин бек ва навкарларга қўшилмай алоҳида тўп бўлиб келаётган аёлларни кўриб қолди. Ювош қора отда ўтирган ва ошқоқ кийинган ўрта яшар аёл — Бобурнинг онаси Қутлуғ Нигор хоним эди. Гулибодом рангли шўх, ўйноқи отда қирмизи ипак қабо¹ кийган Хонзода бегим келмоқда эди. Мулла Фазлиддин уни шўх от устида чавандоз йигитлардай яхши ўтирганидан ҳам таниди-ю, вужуди бирдан қизиб кетгандай бўлди. Кўнглидаги бояги безовталиқ устига оловли бир ҳаяжон қўшилиб, юраги қинидан чиққудай хаприқиб кетди. Мулла Фазлиддин ўзида бирдан юз берган бу ўзгаришни бировга сездириб қўйишдан қўрқиб, подшоҳни кутиб олаётган мулозимларнинг панасига ўтди-да, бош эгиб, қўл қовуштириб турди. Шунда тиззалари ҳам қалтираётганини сезиб, «Худоё ўзинг шарманда қилма!» — деган сўзларни дилидан ўтказди.

2

Бобур мирзонинг онаси Хонзода бегим мулла Фазлиддинни кўндан бери ҳайратга солиб келади. Бундан тўрт йил муқаддам мулла Фазлиддин Ҳиротдан келиб, Умаршайх мирзонинг Андижондаги чорбоғида кўшк қура бошлаган кезларида

¹ Аслзода аёллар киядиган узун енгил устки кийим. Камзулга ўхшаш.

Хонзода бегим ўн олти ёшда эди. Аслзода қизлар орасида энг кўхлиги бўлган Хонзода бегим бир марта эркакча кийиниб, от миниб, инисининг ўсмир мулозимлари билан чавгон¹ ўйнаган. Мулла Фазлиддин буни кўриб бир хайратга тушган эди. Орадан икки йил ўтгач, мулла Фазлиддин Андижон аркидаги тўрхонанинг баъзи нақшларини янгилаш учун чақирилди. Шунда ўн саккиз ёшли Хонзода бегимни равонда канизлар орасида ситор чалиб ўтирган пайтида яна бир кўрди-ю, ўз кўзларига зўрға ишонди. Чунки бир вақтлар йиғитча кийиниб чавгон ўйнаган ўша қиз энди ситорда шунчалик нафис, шунчалик майин куй чалар, унинг ўзи ҳам шу қадар нафосатга тўлиб ўтирар эдики, мулла Фазлиддин беихтиёр унинг сеҳрига берилиб, галати бўлиб кетди.

Кейин мулла Фазлиддин деворга хомаки нақш чизаётганда Хонзода бегим унинг олдига келиб, ишини қизиқиб томоша қила бошлади. Мулла Фазлиддиннинг қўлидаги паргор² хаяжонидан ерга тушиб кетди.

— Ажойиб нақш чизган эдингиз, кўзим тегдим, мавлово? — деди Хонзода бегим айбни ўзига олгандай бўлиб.

Мулла Фазлиддин паргорни ердан кўтарар экан:

— Йўқ, аксинча, бегим, сизнинг назарингиз тушган нақш янада яхшироқ чизилгай!

— Мен эшитдимки, мавлоно мусаввир ҳам эмишлар.

— Аслида меъморлар мусаввирлик санъатидан хабардор бўлмақлари даркор.

— Ундоқ бўлса менинг суратимни чизиб кўринг!

Кутилмаган бу таклифдан чўчиган мулла Фазлиддин атрофга аланглаб қаради. Тўрхонада бошқа ҳеч ким йўқ. Шундай бўлса ҳам овозини пасайтириб деди:

— Бажонидил чизар эдим... Фақат...

— Хавотир олманг, мавлоно, мен сир сақлашга қодирмен!

— Агар мен чизган сурат нариги дунёда жон талаб қилса, қайдан тонурмен, бегим?

Мулла Фазлиддин бу сўзлар билан шарият сурат чизишни ман этганини, агар қўлга тушса жонни хавф остида қолишини айтмоқчи эди. Хонзода бегим унинг очиқ айтолмаган фикрини тушунди-ю, жилмайди:

— Агар суратим учун сиздан жон талаб қилсалар, менга айтинг, мен ўз жонимни бергаймен!

... Мулла Фазлиддин пўлат сандиқда яшириб юрган суратни мана шу гаплардан кейин чизишга журъат этган эди.

¹ Чавгон — ҳозирги хоккей ўйишига ўхшайди. Фақат очиқ майдонда от миниб ўйналади.

² Паргор — циркуль.

Шундан кейинги тўполонларда у Хонзода бегимни узоқ вақт учратолмай юрди.

Ниҳоят, бултур кузда мана шу Буратокқа Хонзода бегимнинг ўзи келиб қолди. Бобур Самарқандга кетишда ўз онаем ва эгачисига «Ўндаги хужрадан хабар олурсизлар», деб таъинлаб қўйган экан. Мезон ойида Ўшга меҳмон бўлиб келган Хонзода бегим битта канизи билан Буратокқа чиқди. Мулла Фазлиддин ўша пайтда ёлғиз шогирди билан ишламоқда эди. Ҳар битта гишти, ёғочни, ҳар бир кўза сувни пастдан олиб чиққунларича тинкалари қуриб кетарди. Мармар йўниб сангорлик қилишга сангарош йўқ. Сирланган қошин олишга пул йўқ. Бу ҳаммаси мулла Фазлидинни жуда қийнаб қўйган. Лекин бу мушкулотларни Хонзода бегимга қандоқ айтади? Бегимнинг марварид қадалган ипак тоқиси¹дан тортиб учи қайрилган қизил этикчасигача бутун борлиғи шундай нафис кўринар, бу самовий гўзаллик олдида тош ва гишдан гап очиб жуда эриш туюларди. Бироқ Хонзода бегим мулла Фазлидиндан бўлажак хужранинг режаси чизилган тархни сўраб олди. Қоғозга қараб туриб:

— Гумбазини қошин билан безатмоқчи бўлибсиз, қошинингиз етарликми? — деди.

Мулла Фазлидин энди дардини айтишга мажбур бўлди. Бу қиз меъморлик санъатидан ҳам хабардор экан, анчагина китоб мутолаа қилган экан.

— Бобур мирзо зафар билан қайтсалар, худо раҳмати отамнинг ўша орзуларини рўёбга чиқарурлар,— деди.— Ўшанда яна ўзингиз бош бўлурсиз, мавлоно!

Дунёда ҳали ҳеч бир товуш мулла Фазлидинга бунчалик ёқимли туюлмаган эди. Хонзода бегим ҳар гал уни «мавлоно», деб улуғлаш билан гўё порлоқ бир истиқбол ваъда қилгандай бўларди. Подвоҳ оиласидан меъморчилик санъатини шунчалик биладиган, қадрлайдиган иттифоқдош топилгани мулла Фазлидиннинг кўнгилини кўтарибгина қолмай, қалбида ғалати бир завқ ва дадиллик уйғотди.

У сирпанчиқ қоятошга кўтарилишдан кўра тушиш қийинлигини билар эди. Шунинг учун, Хонзода бегимни пастга кўзатиб туша бошлади. Халқ «қилқўприк» деб ном қўйган тор ва хатарли тош сўқмоқдан ўтаётганларида Хонзода бегимнинг оёғидаги таги силлиқ чармдан тикилган этиги тойиб кетди. Хонзода бегим мувозанатини йўқотиб, ёнида бораётган канизига қўл чўзди. Аммо каниз ҳам зўрға келаётган эди, иккови баробар чайқалиб кетди. Каниз қўрқиб чинқириб юборди. Улар пастдаги чақир тошларга йиқилиб тушадиган бўл-

¹ Тоқис — чўққисмон заифона бош кийим.

ганда мулла Фазлиддин олдинга сакраб ўтиб, икковини икки қўли билан кучоқлаб тутиб қолди. Ёшгина каниз кўрққанидан мулла Фазлиддиннинг елкасига ёпишиб олди. Қийикдай чаққон Хонзода бегим йигитнинг елкасидан тутиб, ўзини тез ўнглади ва унга секин раҳмат айтди. Шу пайт мулла Фазлиддин ўз юзида Хонзода бегимнинг илиқ нафасини ҳис қилди. Қизнинг юзидами, лабларидами, гул атрига ўхшамайдиган, аммо ундан ҳам ёқимлироқ, сирлироқ бир ҳид бор эди. Мулла Фазлиддин шу ҳидни олди-ю, Хонзода бегимнинг шоҳ қизи эканлигини гўё унутди. Қизнинг салқин, юмшоқ қўлидан ушлаб нарёғи текис кетган сўқмоққа чикқунларича қўйиб юбормади. Беш-ўн кадамлик масофада оддий меъмор билан малика орасидаги фарқ гўё йўқолиб кетди, улар бир-бирларига фақат забардаст йигиту гўзал қиз бўлиб туюлдилар.

Лекин ундан нарида яна канизлар, жиловдорлар, савдарлар орага тушиб, Хонзода бегимни қуршаб олиб кетдилар. Мулла Фазлиддин ғалати бир туш кўриб уйғонган одамдай хайратланиб қолаверди.

Эртаси куни Хонзода бегим ёрдамга юборган иккига поргул йигит мулла Фазлиддинга керакли юкларни пастдан ташиб чиқа бошлади. Орадан бир ҳафта ўтгач, туяга ортилган кошинлар ҳам етиб келди. Хонзода бегим юбортирган ҳар бир нарсада мулла Фазлиддин унинг ўзини кўргандай бўларди. Пўлат сандиқдаги суратни оқшомлари ёлғиз қолганда қўлига олиб узоқ-узоқ тикиларди. Қиз сирғаниб кетган мана шу тоғнинг тошларидан Хонзода бегимнинг ўшандаги илиқ нафаси ва сирли ҳиди ҳамон келиб турганга ўхшарди. «Наҳотки бу муҳаббат бўлса? — дерди мулла Фазлиддин ўзига-ўзи. — Йўқ, зинҳор! Мендаги туйғу — беғараз илоҳий бир меҳрнинг нишонаси, холос. Бошқача бўлиши мумкин эмас!»

Ҳозир яна Хонзода бегим яқинлашиб келаётганини кўриб, саросимага тушиб қолган мулла Фазлиддин ўзининг мана шу эътиқолида маҳкам туришга тиришар ва аёллар томондан нигоҳини олиб қочарди.

3

Бобур мирзо отдан тушганда бўйи ўсиб, катта йигитларга тенглашиб қолгани билинди. Қадам олиши ҳам хийла салмоқли. Тахтга ўтирганидан бери ўтган сўнгги уч йил уни жуда тез улгайтирган, кўз қарашлари кўнни кўрган одамларникидай вазмин. Фақат хишча қомаги ва ҳали унча тўлишмаган елкалари эди ўн беш ёшга кирганини эслатиб турарди.

Аммо тоққа чиқишда Бобурнинг ўсмирлиги жуда иш берди. У ҳаммадан олдинда тошдан-тошга енгил кўтарилиб борар,

гоҳ онасига, гоҳ опасига юкоридан қўл чўзиб ёрдамлашиб қўярди.

Беклар ва мулозимларнинг қўпчилиги пастда қолишди. Йўл тор, хужра кичкина бўлганлиги учун ҳозир биринчи навбатда подшоҳ оиласи ва Бобурга энг яқин киши бўлган эшик оға Қосимбек чиқишмоқда эди. Кавчин уруғидан чиққан Қосимбек тўладан келган барваста киши эди, тоғнинг ярмига чиққунча нафаси бўғилиб, кийналиб қолди. Бобур буни кўриб, текисроқ бир тош устида тўхтади. Қосимбек ҳам тўхтаб, орқада келаётган мулла Фазлиддинга юзланди:

— Жаноби меъмор, бу тошлардан зинапоя тарашлаш хотираларига келмабдир-да.

Мулла Фазлиддин пастроқда тўхтаб қўл қовуштирди-ю, енгил бир таъзим билан жавоб берди:

— Агар зоти олий амр берсалар, зинапоя тарашлаш имкони бор.

Қосимбек юқорига юз ўтириб, Бобурга савол назари билан қаради. Бобур кулимсираб:

— Ажабо! — деди энди йўғонлаша бошлаган ўемир овози билан.— Тоғ чўққисига ҳам зинапоя билан чиқурларми?

Соддароқ одам бўлган Қосимбек таклифи ўринсиз чиққанини сизди-ю, иззат-нафсага бормай, гаши кулгига бурди:

— Амирзодам лутф қилдилар. Каминани бу терлаб-ҳансирашлардан зинапоя ҳам қутқаролмас эди.

Энди Қутлуғ Нигор хоним ҳам кулди:

— Қосимбек жаноблари ҳақдир. От-улов ўтолмайдиган бу чўққиларга шоҳ ҳам пиёда чиқур, малика ҳам!

— Ҳатто, хонзодалар ҳам! — деб Бобур онасига қараб шўх кулимсиради.

Шунақа ҳазил-хузуллар билан хужрага етиб бордилар. Нилий гумбазли жажжи бино кўклам қуёшида шундай нафис жилланиб кўриндики, Бобурнинг дили бирдан равшан тортиб кетди.

Атрофдаги табиатнинг гўзаллиги, баҳор ва тоғлар айвонга ишлатилган нақшларни, гумбаздаги қошиқлар рангини алланечук жуда очиб кўрсатар эди.

Қосимбек Бобурни, унинг онаси ва онасини тавозе билан ичкарига кузатиб қўйди-ю, ўзи мармар зинапоя олдида қўл қовуштирганича қолди. У аёллар бор жойга подшоҳдан ишора бўлмагунча кирмас эди.

Мулла Фазлиддин Қосимбекдан берироққа — айвон тагига келиб турди.

Хужра эшиги ёнғоқ ёғочидан ўймакор қилиб, зар билан ишланган эди. Бобур гўзал ўймакорликларга, девор ва шифт безакларига бир-бир кўз ташлаб чиқди-да, хужранинг эшигини очди. Онаси билан онасига йўл бериб, кейин ўзи ичкарига кирди.

Хужранинг ичи қоронғи бўлмаса ҳам қондага биноан фарб томонидаги меҳробга шам ёқиб қўйилган эди. Кундузги ёруғлик қаршисида кўзга зўрға ташланаётган шам ёғдуси ён-веридаги гулгун нақшларга тушиб, элас-элас жил-валапарди.

Бу ҳаммаси Бобурда ғалати бир завқ уйғотди. У шам ёнидаги тўқ-қизил нақшларни Хонзода бегимга кўрсатиб:

— Ислими гулхан шуми? — деб сўради.

Хонзода бегим бир укасига, бир нақшга қаради-ю, шўх жилмайди:

— Бир қошиқ қонимдан кечсангиз айтурмен.

Бобур ҳам қулимсераб:

— Кечдим, айтингиз.— деди.

Хонзода бегим ўннга қайрилиб, эшик тепасидаги қиз-қизил нақшларни кўрсатди.

— Ислими гулхан мана бу. Сиз нақши долани бунга ўхшатмишсиз, амирзодам.

Хонзода бегим кўрсатган нақшлар ҳақиқатан қиз-қизил олов тилларини эслатар, унинг эшик тепасига нақшланиши ҳам бежиз эмас эди. «Келувчига эргашган бало-қазони олов олиб қолади»,— деган қадимий эътиқод ва келин-куёвни эшик олдига ёқилган оловдан айлантчириб олиб ўтиш одатлари Бобурнинг эсига тушди. У онасига тап берган каби қараб:

— Сиз ҳақсиз, мен саҳв қилибмен.— деди.

Шунда Қутлуғ Нигор хоним гап қўшди:

— Бобур мирзонинг саҳвлари узрлик. Чунки бу хужрада нақши лола ҳам худди гулхандек ёниб кўринур!

Онасининг лутф қилиб айтган сўзлари Бобурнинг хужрадан олган завқини яна бир даражада оширди.

Учовлари айвонга қайтиб чиқар эканлар, наstdа турган мулла Фазлиддин Бобурнинг чеҳраси очилиб кетганини кўрди. Бобур зинапоя олдида турган Қосимбекка-қараб:

— Буратоққа жуда муносиб! — деб қўйди.

Буратоғни Бобур ёшлигидан яхши кўрар эди. Текис водийнинг ўртасига тушган бу баланд тоғ одамларни ҳайратлантириш учун яратилганга ўхшарди. Гўё у улкан тоғнинг бир парчасини илохий бир куч шундай кўтариб олиб келгану томоша учун сайхон жойга чиройли қилиб ўрнатиб кетган. Мана шундай тоққа муносиб бўлиш хужра учун жуда катта

шараф эканини сезган Қосимбек бир четда қўл қовуштириб, сукут сақлаб турган меъморни чақирди.

Бобур подшоҳ бўлгандан бери ўз кўнглидан чиқариб қурдирган биринчи иморати жуда кичик бўлса ҳам унга азиз ва ганимат туюлди. Бу хужра тоғ қиррасида шундай жозоба билан, узоқ вақт туршияни истаб, меъморга савол назари билан қаради:

— Тоғда қор-ёмғирлар кўп бўлур. Хужра узоқ вақтга бардош берурмикин?

Айвонда турган Қутлуғ Ингор хоним билан Хонзода бегим ҳам меъморга кўз тикишди. Мулла Фазлиддин ҳаяжонланганидан тиззалари букилиб-букилиб кетмоқда эди. У қўлини таъзим билан кўксига қўйиб:

— Иншоолло, бардош берур,— деди. Қосимбек унинг гапини тасдиқлаб:

— Ҳа, қирқ-эллик йил яхши турур,— деб қўйди.

«Қирқ-эллик» йил деган сўзлар мулла Фазлиддинга озор бергани унинг Қосимбекка қисқа бир кўз ташлаб қўйганидан сезилди. Шу пайт мулла Фазлиддин ўз юзига кимнингдир майини нигоҳи тушганини ҳис қилди. Бошини кўтарса, Хонзода бегим юзига ёпилган юпқа оқ ҳарир парда орқали мулла Фазлиддинга қараб турибди. Мулла Фазлиддиннинг бутун вужуди олов сели ичида қолгандай бўлди. У ҳозир сирини фож бўлиши мумкинлигини сезиб, яна таъзимга бош эгди. Шунда Хонзода бегим Бобурга изох берди:

— Амирзодам, худо хоҳласа, бу хужра кўп авлодларни кўргай. Қаранг, қор-ёмғир тегадиган жойлари сангкорлик қилинган. Пойдевори қоятошга маҳкам ўрнатилган. Мулла Фазлиддиннинг маҳоратлари балаид — Ҳирот билан Самарқанд меъморларидан таълим олмишлар.

Мулла Фазлиддин Хонзода бегимнинг мақтовини ишга оид оддий гаилардек қабул қилмаса, кўнглидаги нозик ҳисларни ездириб қўйса, ўн жонидан бири ҳам омон қолмаслигини сезди. Ахир жўн бир меъморнинг шоҳ қизига муҳаббати подшоҳ онасига ҳам, унинг бекларига ҳам ҳақоратдай туюлиши мумкин!

Ҳайриятки, ҳукмдорлар олдида ҳаяжонга тушиши ва таъзим қилиши одат тусига кириб қолган. Мулла Фазлиддин Хонзода бегимнинг илиқ сўзларига жавобан яна бир таъзим қилди-да, ерга қараб, худди қилчнинг тиғи устидан юриб бораётгандай эҳтиёт бўлиб гапира бошлади:

— Ҳазрати олийга арзим шулки, Самарқандда Улуғбек мадрасасининг деворлари учун қандай ганчу гилмоя, ёшту кошини ишлатилган бўлса, бу хужранинг деворларига ҳам фақир шуларни ишлатмишмен. Худодан умидим бор: Бобур мир-

зоининг муборак номларига мансуб бу хужра асрлар давомида мустаҳкам турур!

Бобур бу сўзлардан таъсирланиб:

— Айтганингиз келсин;— деди.— Хужра биз истаганимиздан ҳам яхши!

Қосимбек «қирқ-эллик йил турар», деб хужранинг умрини қисқа қилиб қўйганидан энди хижолат бўлди. Хужрадан нарида харсангтош ортида буйруқ кутиб турган савдарбошига бир қараб олди-да, кейин меъморга ўгирилди:

— Офарин сизга, мулла Фазлиддин!

Бобур Қосимбекнинг гапини тўғрилаб:

— Мавлоно Фазлиддин! — деди.

Шу билан меъморга муътабар мавлонолик уивони берилгандай бўлди. Қосимбек подшоҳнинг олдида бир неча марта устма-уст саҳв қилганини бир ҳаракат билан тўғрилагиси келди-ю, савдарбошига буюрди:

— Мавлонога тўн келтирилсин!

Савдарбоши саросима бўлиб настга қаради. Мукофот учун олиб юриладиган тўнлар тоғ этагидаги чодирларда қолган эди. Қосимбек буни сезди-ю, ўзининг эғнидаги янги кимхоб тўнни ечмоқчи бўлиб:

— Мирзо ҳазратлари, ижозат бering! — деди. Бобур унинг жўмардлигига тан бергандек жилмайиб бош ирғади.

Қосимбек зар ёқали кимхоб тўнини ечиб, мулла Фазлиддиннинг елкасига ташлади.

— Мавлонога биздан битта от анжоми билан инъом қилинсин,— қўшимча қилди Бобур.

Мулла Фазлиддин таъзимга эгилиб миннатдорчилик билдирар экан, бир неча кишининг:

— Муборак! Муборак! — деган сўзларини эшитди.

Бу сўзларнинг орасида энг ёқимлиси — Хонзода бегимнинг муборакбоди бўлди. Мавлоно Фазлиддин унга иккинчи марта қарашга журъат этолмай ерга кўз тикиб турган бўлса ҳам, шу дақиқаларда ўзини бахтиёр сезар эди.

¹ Чиндан ҳам ўндаги бу хужра тўрт юз эллик йилдан ортиқ умр кўрди. Асрлар ўтиши билан унинг гумбазидаги қошинлар кўчиб тушди, ичидаги нақшлари ўчиб кетиб, қайтадан қумсувоқ қилинди, бировлар рангдор мрамларни кўчириб кетиб, ничоқларига даста қилдиришди. Хужранинг ўзини эса тамагир шайхлар «Сулаймон пайгамбар томопидан қурилган қадамжо», деб эълон қилдилар. Оми одамларнинг анчасини бунга ишонтириб, кўн йиллар давомида мўмай назр-ниёз ундирдилар. Совет олимлари тарихий ҳақиқатни тиклаб, бу хужрани ён Бобур қурдирганини айтиб чиқдилар, унинг пештоқига буни билдирадиган ёдгорлик лавҳа осиб қўйдилар. Аммо ўжар шайхлар бу ерни «тахти Сулаймон» деб аташда давом этдилар. Шундан сўнг орага бошқа англашилмовчиликлар ҳам кўшилиб, бу хужра 1963 йилда бузиб ташланди. Ҳозир фақат пойдевори бутун турибди.

Кечки пайт ҳужрада Бобурнинг ёлғиз ўзи қолди. Қосимбек керакли одамларга «ҳужра — мирзо хазратларининг хилватгоҳлари бўлди, кечаси ҳам ўша жойда тунамоқлари мумкин», деб билдириб қўйди. Қўрчилар Бобурнинг кўзига ташланмасликка тиришиб, ҳужранинг орқа томонида қўриқчилик қила бошладилар.

Доимо қўнчилиқнинг диққат марказида бўлиш ва подшоҳнинг ҳар бир гани, ҳар бир ҳаракати кимнингдир тақдирига таъсир қилишини унутмай ҳаминша зийрак ва эҳтиёткор туриш Бобурни жуда сиқилтирар эди. Ёш тапаси эркин бўлишни, оддий тенгдошлари каби очик-сочик яйраб юршни қўмасар эди. Ҳозир у ҳужра ичкарасига тўшалган бекасам кўрпачалар устига чиқиб бошига ёстиқ қўймасдан бирпас чалқанча ётди. Кейин ағанаб юзтубан бўлди-да, энгагини кафғига тираб, девордаги нақшларга тикилди. Қуни бўйи отда юриб толиққан бўлса ҳам дам олиб ётгиси келмас эди. Ўрнидан сакраб туриб бир-икки марта қулочини ёзиб керишди, эснади. Сўнг айвонга чиқди-да яна атрофини томоша қила бошлади.

Тўрт томонинг ҳаммаси баҳор нафосатига тўла. Ҳаво мусаффо бўлгани учун пастда ёқилаётган оловнинг тутуни ҳам одатдагидан тинчроқ кўринади. Охири қорли тоғлар билан тутшиб кетган водийнинг кўз илғаган ҳамма жойи кўкаламзор. Бир ёғида Ўзгант, бир ёғида Марғилон, узоқларда Исфара, Хўжанд, Қосон ва Аҳси — бу ўрчин¹ларнинг ҳаммасида боғ-роғлар чаман бўлиб гуллаганини Бобур гўё хаёл кўзи билан кўриб турибди. Улугвор тоғлар афсонавий қалъа деворларидек атрофини ўраб турган бу гўзал водий ҳозир аввалгидан хийла осуда. Уруш тугаганига икки йилдан ошди.

Бундай тинч, масъуд дамларда уни қоғоз-қалам ўзига тортарди. Савдарлар ҳужрага олти оёқлик миз² келтириб қўйинган. Бобур миз ёнига бекасам кўрпача устига ўтириб «Вақонъ» деб атаган хотира дафтарини очди. Сўнгги ёзувлари — ўзи яқинда кўрган Қонибодом ва Исфара ҳақида эди. Энди бу ёзувларини давом эттириб, Ўш тўғрисида бита бошлади: «*Ўш қасобаси Андижондан тўрт йиғоч йўлдир... Бора тоғнинг тумшугида тарих тўққиз юз иккида³ мен бир айвонлик ҳужра солдим. Бу ҳужра бисёр яхши воқеъ бўлибдур. Тамом шаҳар ва маҳалла оёғ остидадур.*»

¹ Ўрчин — ҳозирги «район» тушунчасига тўғри келади.

² Миз — олти оёқлик столча.

³ Милодий 1497 йил.

Бобур ўзининг бинафшаси, долалари, оқар сувлари, оқ мавжли кизил тошлари ҳақида ҳам берилиб ёзаётган эди. бирдан Қосимбек эшик оғзида пайдо бўлди:

— Амирзодам, хаёлингизни бўлсам маъзур тутинг. Бухородан — Султон Али мирзодан мактуб келмишдир!

Бобурдан шпора бўлгач, Қосимбек ичкарига кириб, ўрам қилинган олтин боғичли мактубни Бобурга узатди. Бобур мактубни очиб ўқиди ю:

— Султон Али мирзо бизни Самарқанд юршига чорлабдир,— деди.

— Битим тузган эдингиз-да, амирзодам. Сафарга чиқмоқ керак.

— Ошиқманг, бек. Аввал онам ҳазратларининг ризолигини олайлик.

Бобур ҳар муҳим ишда онасидан маслаҳат сўраши Қосимбекка унча ёқмас эди. Чунки аёллар жангу жадалдан жуда безган эдилар. Жанговар беклар эса урушсиз юрса қилчлари занглаб қоладигандек бетокат бўлишади.

Қосимбек Қутлуғ Нигор хонимнинг чодирига Бобур билан бирга тушиб борди.

Хонзода бегим ҳам онасининг ҳузурда ўтирган экан. Улар Бобур учун дастурхон ёздириб, чинни лаганда қабоб келтирдилар. Қабобдан сўнг қимиз ичилди. Қосимбек мўйловига теккан қимиз юқини кафти билан артиб сўз бошлади:

— Амирзодам Султон Али мирзо билан иттифок тузганлар. Бу ердан черик тортиб бормоққа сўз берганимиз.

— Тангрим бизни фараҳли қунларга стказди,— деди Қутлуғ Нигор хоним. — Энди шунинг ғанимат билайлик, жаноб Қосимбек. Султон Али мирзо ўз оғаси Бойсунқур мирзо билан Самарқанд тахтини талашурлар. Бобур мирзо улардан балад турмоқлари керак. Тангрига шукур, амирзодамнинг Андижонда ўз тахлари бор.

Қосимбек бу сўзларга тезда жавоб тополмай тарадудланиб қолди. Шунда Хонзода бегим гапга аралашди:

— Амирзодам, Самарқанд юршининг сарфу харожатига Андижонда саройлар, мадрасалар қурсангиз бўлур. Андижон ҳам Самарқанддек сайқали рўйи замиш бўлса, номингиз Улуғбек мирзонинг помидек шўхрат қозонса — биз мувтипарларингизнинг орзумиз шу!

Бобур ҳазиломуз кулимеиради:

— Мен аввал Самарқанд сайқалини бир кўрмоқчимен. Ибрат олсак, ундан сўнг олурмиз.

Қосимбек Бобурнинг сўзларини ёқтириб:

— Лутф қилдингиз, амирзодам! — деб қўйди.

— Лекин амирзодам Самарқандни ёшликларида кўрганлар,— деб эътироз қилди Қутлуг Нигор хоним.

— Беш ёшимда кўрганим ёдимда унча қоямабдир.

Хонзода бегим кулди:

— Бултур Самарқанд азимати билан кетиб бизни кўп соғинтирган эдингиз-ку?

Бобур бултурги муваффақиятсиз юришини эслаб, жиддийлашди:

— Рост, бултур тўрт ой Самарқанд атрофини кездик. Аммо шаҳар дарбозалари биз учун бирон марта очилмади. Биз бобокалонимизнинг пойтахтини кўришга муносиб эмас эмшимиз!

Бобур бу сўзларни шундай куюниб, алами келганини яширолмайд лаблари титраб айтдики, унинг ҳали ҳам жуда ёш экашлиги бирдан билиниб қолди. Ҳолбуки, у Самарқандга қўшни тортиб борган, агар шаҳарга кирса тахтга ўтириши керак эди. Тўғри, Бойсунқур мирзо ҳам темурийлар авлодидан эди, яна тағин Бобурдан беш ёш катта эди, демак, тахтда ўлтириши қонуний эди. Бироқ Андижон беклари Бойсунқур мирзодан юз хил камчилик топиб, уни ҳаминша ёмонлаб гапиришар ва Самарқанд тахтига фақат Бобурни муносиб кўришар эди. Бойсунқур мирзо буни билганлиги учун Бобурни Самарқандга йўлатмас эди. Мабодо, Бобур шаҳарга қўшинсиз шунчайин пойтахтни кўриш учун кирадиган бўлса, Бойсунқур мирзо уни туттириб, йўқ қилиб юбориши мумкин эди. Чунки орадаги тахт талашини ва бекларнинг адовати уларни бир-бирларига душман қилиб қўйган эди.

Қутлуг Нигор хоним эиди ўн беш ёшга кирган ўғлининг бу талашлар ва адоватларга аралашмасдан, ўз мулкида осойишта ҳукм суришини истарди. У Бобурнинг аламдан ўзгариб кетган юзига оналарча қайиниб қаради-ю, унга жони дилини бергиси келиб гапирди:

— Бобуржон, сўзимга ишонинг, бу беш кунлик дунё сизнинг куюнишингизга арзимайдир!

Опаси ўғлини подшоҳ бўлмасидан олдинги номи билан атаб, меҳри товланиб гапиргани Бобурга жуда ёқимли туюлди. Бир лаҳза у ўзини меҳрибон бир онанинг беғам, беташвиш бўғалоқ ўғлидек сездю, елкасидаги катта юк ерга тушгандек енгил тортди.

— Вақти соати келур. Самарқанд орзусига ҳам етишурсиз,— деб давом этди Қутлуг Нигор хоним.— Бироқ ҳозир раият осойишта умр кўришга муштоқ. Қаноғингиз остида Қосимбекдек тадбиркор амиру умаронгиз бор. Мана шу ўшдаги хужрани қурган меъмордек ҳунариешалар сизнинг хизматингизда. Энди онангиз сиздан илтимос қилур; Самарқанд муҳо-

рабасини беш-олти йилга кечиктирсангиз. Барчамизга бош бўлиб, водийни обод қилсангиз, Андижонда, Марғилолда; Ўшда катта обидалар қурсангиз!

Қутлуғ Нигор хоним подшоҳ ўғлига кўпдан бери бунчалик жиддий, бунчалик қатъий илтимос билан мурожаат қилмаган эди. Қосимбек ерга қараб сукутга кетди. Бобур ҳам бир лаҳза дастурхон четида олтин жомда кизғиш кўришаётган кимизга кўз тикиб жим қолди. Умумий сукунатда Хонзода бегимнинг нафис, тиниқ овози эшитилди:

— Амирзодам, сиз Навоийнинг дostonларини ёд билурсиз. Фарход қандай ажиб бинолар қурганини бир эсланг. Мен бир мунглик эгачингиз доим орзу қилурмен: сиз ҳам Фарходдек бунёдкор бўлингиз! Дунёда бундан улуг, бундан савобли иш йўқ!

Бобур Ўшда ўзи курдирган кичик бир хужрадан бугун қапчалик завқ олганини эслади-ю, онаси билан онасининг тилакларини қўллаб-қувватлагиси келди. Аммо у бундай муҳим давлат ишларини бир ўзи ҳал қилолмастлигини ҳам билар эди. Бобур Қосимбекка кўмак сўраган каби қараб:

— Чораси топиладимики? — деди.

Гап Самарқанд юришини қолдириши ҳақида эканини Қосимбек сазди. Асли ҳарбий одам бўлган ва жуда кўп жангу жадалларда қатнашган Қосимбек Бобур истаган чора топилмастлигини ич-ичидан сезиб турарди. Чунки Самарқанд юриши ҳамма нуфузли бекларнинг машваратида маъқулланган, тайёрлик ишлари аллақачон бошлаб юборилган. Катта бир тўсиқдан ўтиш учун бутун кучи билан сакраётган отин бирдан тўхтатиб бўлмайдди, мабодо зўр билан тўхтатилганда ҳам от йиқилиши, чавандозини ерга улоқтириши мумкин. Қосимбек буни очик айтишга журъат этолмади-ю, қўлини кўксига кўйиб:

— Амирзодам, қулингиз чора топишдан ожизман,— деди. Бу жавоб Бобурга оғир ботди.

— Онамнинг илтимосларини рад этайликми?

Бобур бу сўзларини шундай зарда қилиб айтдики, Қосимбек унинг ҳозир онаси ва онаси айтган ишларни қилгиси келиб турганини аниқ сазди. Сўнг у Бобурнинг кечагина Самарқанд юришига тарафдор бўлиб, жангларда қатнашиш иштиёқида ёниб айтган сўзларини эслади-ю, ичида гижиниб кўйди. Бобурдаги бу ўзгарувчанликни Қосимбек ёшлик гўрлигидан кўрар, хусусан, бундай мураккаб давлат ишларида аёлларнинг ганига кириши катта бир заифлик белгиси деб биларди. Аммо Қосимбек Қутлуғ Нигор хоним билан ҳам ҳисоблаишига мажбур, чунки ёш подшоҳга онасининг таъсири кучли эканини ўз кўзи билан кўрмоқда эди.

— Хоним хазратларининг илтимослари менга тожи сар бўлдиш.— деди Қосимбек чўккалаб ўтирган кўйича бош эгиб.— Қулишгиз айтмоқчименким, бундай муҳим ишда барча нуфузли бекларнинг ризолигини олмасак бўлмас.

Подшоҳ оиласи Қосимбекка алоқида эхтиром билдирганда унинг номига «амирлар амири» деган унвошни қўшиб айтар эди. Ҳозир ҳам Қутлуғ Нигор хоним:

— Жаноби амирул умаро.— деди унга.— Сиз бошқа бекларнинг ризолигини олишда Бобур мирзога кўмак берурми-сиз?

— Ҳоним билан! Аммо бекларнинг баъзи андешаларидан фақир хабардормен. Густохлик саналмаса айтай.

— Айтишгиз.— деди Бобур.

Қосимбек ерга қараб, бир лахза ўй сурди, хали оқ тушмаган ғайир қўнғиртоб соқолининг учлари сакарлот чакмани¹нинг заррин ёқасига тегиб, қайрилди. Ниҳоят Қосимбек бошини кўтариб Бобурга қаради-ю, Самарқанддаги улуг обидалар улкан бир давлатнинг кучи ва бутун вилоятларнинг штироқи билан қурилганини, ҳозир ўша яғона давлат парчаланиб кетганини, Фарғона қатта водий бўлса ҳам, аммо Мовароуннахрнинг фақат бир қисми эканини гашира бошлади. Унинг нима демоқчи эканини сезган Хонзода бегим истеҳзоли жилмайиб сўради:

— Жаноби амирул умаро, Андижонда обидалар қуришга кучимиз етмайди, демоқчимисиз?

— Олий пасаб бегим, сиз Самарқанддек улуг шаҳар қуриш ҳақида сўз очдингиз. Беклар айтурларки, улуг шаҳар бунёд этмоқ учун яша ўша улуг давлатни тикламоқ керак. Бутун вилоятларнинг кучини бир жойга йиғмоқ керак. Ҳозирги парокандалик улуг қурилишлар қилишга имкон бермагай.

Қосимбекнинг бу гаплари Бобурга жуда мантиқли туюлди. У онасига қараб бундан ҳам мантиқлироқ бир сўз кутди.

— Жаноб Қосимбек улуг обидаларни фақат Амир Темурдек соҳибқиронларгина қурган эмас,— деди Қутлуғ Нигор хоним.— Ҳиротда Алишербек Ихлосия, Унсия отлик бинолар қурмишлар. Бобур мирзонинг ҳокимиятлари Алишербекнинг ҳокимиятларича эмасми? Ахир Алишербек бир тождорнинг мусоҳиби² бўлсалар, Бобур мирзо мустақил давлатнинг подшоҳлар-ку!

Қутлуғ Нигор хонимнинг бу сўзлари Бобурнинг қалбида чўкиб ётган энг ўтли ыстақларнинг юзага қалқитиб чиқаргандай бўлди. Унинг ёшлик эхтироси билан қалбига тугиб юр-

¹ Сакарлот чакман — тўя жунидан қилинган сийил, қимматбаҳо чакмон.

² Мусоҳиби — яқин суҳбатдоши, дўсти.

ган энг кучли орзуси — жангларда катта галабаларга эришиб ёки ажойиб шеърлар, дostonлар ёзиб эл оғзига тушиш, сўнг Навоийдек улуғ одамларга танилиш ва уларнинг махсус эътиборларига сазовор бўлиш эди. Етти ой овора бўлиб Самарқандни ололмаи келганидан кейин жангларда катта галабаларга эришиш хали ушалмайдиган бир орзу эканига унинг кўзи етиб қолди. Улуғ шоир бўлиш орзуси хам қўл етмас бир баландликда учиб юрган бахт қушига ўхшайди. Бобур уни тутишга хали кучи етмаслигини сезади. Аммо хозир онаси Навоий қурган иморатларни тилга олиши билан Бобурни ўша ўтти орзусига етказадиган бошқа бир йўл «ялт» этиб кўзига кўришиб кетди. Навоий қурган Ихлосия ва Унсияларнинг шухрати оғиздан-оғизга ўтиб, Фаргона водийсига етиб келган экан, энди бу ерда ўн беш ёшлик подшоҳ ўшанақа обидалар қурдирса, овозаси Хиротга хам етиб бормасмикин? Кейин, эҳтимол, Навоий хам буни эшитар. Бобурнинг кимлигини сўраб билар, уни орқаворатдан таниб қолар. Кейин балки Бобур Хиротга борар ёки Навоий ўзи бу томонларга келишни ихтиёр қилар. Навоий Хусайн Бойқароннинг саройидан бешиб юрганини Бобур хам эшитган эди. Балки улуғ шоир Хуросондан Фаргона водийсига келиб, ёш Бобурга мураббий бўлар. Ўйи шу ерга етганда Бобур жуда хаяжонланиб кетди. Кўзлари ёниб, Қосимбекка қаради-ю:

— Онам хақлар,— деди.— Бекларни кўндирмоқ керак!

Бобурнинг сўнгги сўзи фармондек эшитилди-ю. Қутлуғ Нигор хоним билан Хонзода бегимнинг чехралари очилиб кетди. Улар, «Қосимбек энди енгилди», деб ўйладилар. Аммо улкан гавдали Қосимбек ўзининг кенг елкалари ортида зўр беклар турганини хис қилгандай ҳамон таслим бўлмас эди.

— Амирзодам, фармойишингизни адо эттишдан олдин бекларнинг яна бир андешасини айтишга рухсат этишг.

Бобур истар-истамае бон иргаб, рухсат берган бўлди. Қосимбек лабларини ёниб турган узун қўнғир мўйловини қўли билан икки ёнга сурди-да, кулимеираб Хонзода бегимга қаради:

— Бегим, сиз амирзодамни Фарҳодга яхши қиёс қилдингиз. Бекларимиз замон Фарҳоднинг хизматида бўлишдан ифтихор қилурлар. Бизнинг орзуйимиз — Фарҳодимизни ўз Ширшларига етказишдир. Аммо,— деб Қосимбек бирдан жиддийлашди,— маълумингизким, бизнинг Ширин бугун Самарқандда ёғий қуршовида асира каби изтироб чекмоқдалар.

Бобурнинг юзига нафис қизиллик югурди. У уялганини сездиргани келмай, бошини эгди-ю, ўз тиззаларига кўз тикди.

Қосимбек жуда мушкул ва позик бир гапни қўзғаган эди. Бобур беш ёшлигида унга Самарқанд подшоеси Султон Аҳмад

мирзонинг ўртагча қизи Ойиша бегимни унаштириб қўйинган эди. Ҳозир шу қиз ўн уч ёшга кирган. Бобур уни яқин йилларда кўрган эмас, аммо кўрганлар ҳаммаси Ойиша бегимнинг гунчадек гўзаллигини мақтаб келганини эшитган. Ўша гўзал қизча Бобурни ўз нажоткорини кутгандай кутади, буни ҳам Бобурга келиб айтувчилар бор. Бобур ҳам ўзининг маликасига қахрамонликлар кўрсатиб этишини истаydi. У Ойиша бегимнинг ўзини эслолмаса ҳам беш ёшида Султон Аҳмад мирзога узатилган термизлик гўзал бир келинчакни яқиндан кўргани ёдида.

«Бет очар» деган одатга биноан, ёш келинчакнинг юзидagi пардасини пок нафасли ёш бола очиши керак эди. Ўша кунларда Қутлуғ Нигор хоним беш ёшли жажжи ўғли Бобурни Самарқандга тўйга олиб борган эди. Султон Аҳмад мирзонинг ўғли йўқ эди, Бобурга подшоҳ оиласи ҳавас билан қарар эди. Шунинг учун қайвонилар «янги тушган келин ҳам мана шу шердек ўгил кўрсинлар», дейишиб, бет очишга Бобурни муносиб топдилар. Бу ҳодисанинг кўп тафсилотлари Бобурнинг хотирасида қолмаган. Аммо олтин қўшиб тўқилган ҳарир оқ пардани келинчакнинг юзидан олганда бутун борлигини ниҳоятда ёқимли бир туйғу чулғаб олгани ҳеч эсидан чиқмайди. Бу — гўзаллик туйғуси эканини у энди билади. Термизлик келинчак ақли шоширадиган даражада кўҳли бўлганига беш яшар боланинг фаҳми етмаган бўлса ҳам, аммо гўдак қалби афсонавий бир жозибадан тўлқинлангани ёдида қолган. Шунинг учун ҳозир унга Самарқанддаги қайлигининг ҳуснини мақтаганларида, ўша келинчак эсига тушади. Бошқа тафсилотлар ўқиган китобларидаги гўзаллар тасвиридан олиб қўшилади. Бобур Самарқанддаги қайлигини ўсмирларча бир софлик билан ғойибона севади. Мана шу севгилиси бугун Бобурнинг душманлари асоратида экан, у Андижонда бамайлихотир юра оладими?

— Жаноб Қосимбек, — деди Қутлуғ Нигор хоним, — келинимизнинг тақдири бизни ҳам изтиробга солур. Биз оналаридан илтимос қилиб китобат юборган эдикки, Ойиша бегимни Тошкентга эгачилари Робия бегим ҳузурига жўнатсинлар. Эҳтимол, шу илтимосимиз бажо келтирилгандир?

Қосимбек маъюс бош эгиб:

— Афсус, хоним ҳазратлари, афсус! — деди. — Қулингиз Самарқанддаги хуфялардан келган бир хабарни амирзодамга кўрсатишдан тортинган эдим. Сизларни ҳам хавотирлантirmoқчи эмас эдим...

— Нима хабар? Тинчликми? — хавотирлашиб сўради Бобурнинг онаси.

— Ойиша бегим оналари-ю, опалари билан бирга Тош-

келтирди. Биринчи кетмоқчи бўлганларида, Бойсунқур, мирзо бидиб қолиб, монелик қилмишдир. Ёғийлик мақомида дурушт гаплар айтмишдир. Уйлари атрофига одам қўймишлар. Ҳовлиларидан чиқармас эмишлар. Асиралар энди бутун нажотни Андижондан кутар эмишлар!

Сўнги сўзлар Бобурнинг бутун вужудини зиркиратиб ўтди. Унинг қалбига қўпол гапириб, бечорани асирадек азоблаётган Бойсунқур мирзо шундай газабини келтирдикки, эртагаёқ унинг устига қўшин тортиб, бостириб бориш ва қайлигини асоратдан қутқариш истаги Бобурнинг қалбидаги бошқа ҳамма истакларини босиб кета бошлади.

Хонзода бегим укасидаги ўзгаришни сезиб:

— Амирзодам, илоҳо асирларни қутқариш сизга тезроқ насиб бўлсин! — деди. — Аммо нажотни фақат жангу жадал келтирурмикин? Заифа эгачингизнинг эътиқоди шулки, қон тўкилса, адоват кучаяр. Бойсунқур мирзо асираларга баттар ўчакишур. Нажот урушда эмас, амирзодам, нажот — сулҳда!

Бегим ҳаяжонланиб айтган бу сўзлар Бобурнинг кўнглида кўзгаган бояги газабини анча насайтирди. «Сулҳ» сўзи қалбига илқ туюлди.

Хоним дарҳол қизнинг гагини қувватлаб, ўғлига юзланди:

— Бойсунқур мирзога элчи юборингиз, амирзодам! Орадаги адоватни йўқотингиз!

— Бойсунқур мирзо зўравонлик қилсин! Мен мўминларча бош эгиб элчи юборай!

Бобур бу гапларни айтар экан, унинг зўрликка зўрлик, зарбга зарб билан жавоб бериш истаги нақадар кучли эканлиги ҳаммага сезилди. Қосимбек ундаги бу истакни қўллаб-қувватлашга тушди:

— Хоним ҳазратлари, ҳозирги замонда зўравонликка мўминлик мутлақо рост келмас. Зўрлар орасида зўр бўлмоқ керак! Алҳол, Шайбонийхон Самарқандга шимолдан кўз тикмишдир. Ҳисор ҳукмдори Хисравшоҳ илож топса, Самарқандга жанубдан чанг солғусидир. Бойсунқур мирзо — ношуд тождор. Пойтахтни эртаги-кечми бой бергай. Агар Бобур мирзо Самарқандни тезроқ эгалламасалар, боболаридан қолган салтанат бегона сулола илқига ўтиб кетгусидир. Худо кўрсатмасин, агар Шайбонийхонми, Хисравшоҳми — бироитаси Самарқандни забт этса, куч, қудрати ошиб, тез қида Андижон устига ҳам қўшин тортиб келгусидир...

— Ахир барча теурийлар бирлашиб иттифоқ тузсалар бўлмасми? — деди Нигор хоним куюниб.

— Барча теурийларнинг пароканда кучларини йигиб бирлаштирмоқ учун ҳам қудрат керак. Истеъдод керак! Бойсунқур мирзога ўхшаганларда на униси бор, на буниси.

Мовароуннахрдаги темурийлар орасида энг сохибистеъод, сохибқудрат сиймо — Бобур мирзодирлар. Шунинг учун биз жонимизни амирзодам қўзлаган улуг мақсадлар йўлига тикканмиз. Иншоолло, Самарқандни бу йил забт этсак, хавфхатарлар бартараф бўлмай. Ана ундан кейин чинакам осуда давр келур, ҳар қанча бинолар қурсак осои бўлур.

Хонзода бегим Қосимбекка тикилиб сўради:

— Хуллас, волидан мухтарамамизнинг илтимослари рад этилурми?

Қосимбек қўлини кўксига қўйиб, бош эгди:

— Қўлингизнинг густохлигини афв этинг, бегим, мен амирзодамнинг ижозатлари билан дилимда бориши сўзладим.

Бобур аросатда қолиб қийналар эди. Онаси шунчалик ишонтириб айтган ҳақли илтимосларни рад этинга унинг тили ҳам бормас, кўнгли ҳам чоимас эди. Аммо Қосимбек унинг қалбида шундай тугёили хислар қўзғадикн, улардан қутулишининг ҳам иложи кўринмай қолди. Агар у Самарқанддан воз кечса, париги зўравонлар пойтахтни олиши, кейин Андижонга бостириб келиши муқаррар экани унга ҳозир жуда аниқ сезилмоқда эди. Бутун Мовароуннахрда уруш гирдобидан қочиб қутуладиган бироя вилоят кўзига кўринмас. Бобур қашиқирлар қуршовига тушиб қолгандек безовталанар эди. Онасининг: «Сулҳ тузинг, бинкор бўлинг!» — дегани «кийикдай беозор яшанг» дегани эди. Лекин Бобур йирткичлар орасида кийик бўлиб қун кўролмаслигини ич-ичидан ҳис қилар, шунинг учун атрофини қуршаб келаётган бўрилар билан шер бўлиб олишишни истар эди. Буни сезиб турган Қосимбек мунозарани ортиқ чўзиб ўтиргиси келмади.

— Амирзодам, бугун отлик сайрга чиқмоқчи эдингиз, хоним ҳазратларининг таклифларини барча беклар билан кенгашиб кўрурмиз. Оқшом хиргоҳда машварат ўтказайлик.

Хонзода бегим онасига «ялт» этиб қаради-ю, «Ҳозир биргина Қосимбекка ўтказа олмаган таклифларимизни кейин барча бекларга қандоқ ўтказурмиз?» — демоқчи бўлди. Қутлуғ Нигор хоним Бобурга яна нималарнидир айтмоқчи бўлиб огиз жуфтлади. Аммо Бобур Қосимбекка қараб:

— Машварат эртага чақирилсин, яхшироқ ўйлаб кўрайлик.— деди-да, ўрнидан турди. Сўнг Қосимбек бошлиқ мулозимлари билан отлик сайрга чиқиб кетди.

5

Ўшнинг жанубидаги кенг текисликлар, тўлқинсимон қир ва адирлар турли-туман дала гуллари билан безанган. Сап-сарик қоқилар, кўк-қизғиш нахўтақлар, нафармон эрбахолар ораси-

да узоқдан кип-кизил гиламга ўхшаб кўзга ташланадиган — кийғос очилган долакизғалдоқлар эди.

Бобур олисдаги қорли тоғларга қараб борар экан, тиззага чиқадиغان юмшоқ кўкат устида отлар ҳам майин қадам ташлаб бораётганини сезарди. Баҳор нафосати ҳозир унинг кўзини эркалаётган бўлса ҳам, аммо дилига таъсир қилолмас эди. Бояги мушкул зиддиятлар ҳали ҳам хаёлини банд қилиб, кўнглида тугун бўлиб турибди. Бобур бу чигал тугунларни ўзи ечолмаслигини сезади. Бу тугунларни у естагандай ечиб бера оладиган доно одам бормикни? Унинг эсинга устози Хўжа Абдулла тушди. Бетоб бўлиб ўшга бирга келолмаган Хўжа Абдулла ҳам Бобурнинг Самарқандга қўшин тортиб боришига тарафдор эди. «Мовароуннаҳрдаги парокандаликни тугатиб, қудратли давлат тузмагунча катта орзуларимиз рўёбга чиқмагай!» — деган сўзларини Бобур устозидан ҳам кўп эшитган. Аммо бунинг учун яна урушини керак. Урушга эса онаси қарши. Ким ҳақ? Бобур бу саволга жавоб тополмайди.

Отлиқлар узун бир тепаликка кўтарилганларида Қосимбек тоғ томонни кўрсатиб:

— Сурувлар бу қадар кўп? — деб таажжуб билдирди.

Бобур у кўрсатган томонга кўз югуртирди. Қир ва адирларнинг ҳар биридан бир нечтадан сурувлар ёпирилиб туриб келмоқда эди. Хўжа Калон деган йиғирма беш ёшли қопқора бек қўлини пешонасига соябон қилиб қун ботиши томонга қаради-ю:

— Ў-ҳў-ў! — деди. — Бу томонда ундан ҳам кўп!

— Қунчиқини томонда ҳам бор!

Сурувлар ғуж-ғуж бўлиб келаётганига қараганда ёйилиб юрган қўйлар эмас. Ана, тўғридаги қирлар ортидан яна икки сурув чиқиб келди. Сўнг узоқдаги адирлар орасидан биринкетини уч тавила йилқи отилиб чиқдию, бериги томонга қараб селдай бостириб кела бошлади. Чап томонда яна уч-тўрт тавила йилқи кўришди.

Йилқилар ҳам, қўй сурувлари ҳам узоқдаги қорли тоғлардан ўшга қараб келмоқда эдилар. Ниҳоят, тоғ томондан тизилиб туриб келаётган отлиқ аскарлар кўринди.

Шунда Бобур тоғларга қўй ва йилқи ундирини учун уч юз аскар билан чопқинга кетган Аҳмад Таибалини эслади. Қосимбек қувониб:

— Азаматларнинг ўлжаси жуда улур-ку! — деди.

Хўжа Калон ҳам ҳаяжонланиб:

— Беадад! — деб хитоб қилди. — Баҳодирона ўлжа!

Одатга биноан, бу беҳисоб қўй ва йилқиларнинг бешдан бири подшоҳ ихтиёрига ўтар, қолган тўрт қисми ҳамма бек

ва мулозимларга тақсимланар эди. Шуни билган беклар гўё осмондан тушаётган бу катта бойликка қараб севинчларини яширолмас эдилар.

Бобур отини тоғдан келаётган аскарлар томонга буриб, жиловини бўшатди. Бедов от қушдай учиб бора бошлади. Бошқалар ҳам Бобурнинг кетидан от чоптириб кетдилар. Бир қир ўтиб, иккинчисига кўтарилганларида, наригилар ҳам буларни кўриб, бурилиб кела бошладилар. Бобур баланд бир жойда отини тўхтатди.

Аскарларнинг олдида келаётган Аҳмад Таибал зирхли кийимда эди. Елкаси ва кўкрагини ёпиб турган жибанинг темири офтобда йилтирарди. Унинг бўйига ёй ўқи теккан, ярадор жойини яшил мато билан боғлаб олган эди. Ўзи озиб, мўғулча ёпоқларининг суяклари яна ҳам бўртиб чиққан. У Бобурдан эллик қадамча нарида отдан тушиб, қўл ковуштириб келди-да, ер ўпиб юкунди:

— Мирзо ҳазратларига ёғийлик мақомида бўлган чаграклар ўлпон тўлашдан бош тортганлари учун ўн олти минг кўйлари, икки ярим минг йилқилари жарима тарзида тортиб олиб келинди?

— Чопқин талафотсиз бўлдимми?

— Мирзо ҳазратлари, бизнинг уч йигитимиз ҳалок бўлди, ўн киши яраланди. Аммо биз ёғийлардан бунинг қасдини олдик!

Аҳмад Таибал олдинги сафда турган йигитларидан бирига ишора қилди. Айиқтахлит, қўпол бир йигит эгарининг устида дўмпайиб турган хуржунни олди-да, подшоҳга яқинлашди. Олачадан тикилган хуржуннинг ҳаммаси қон эди. Айиқтахлит йигит Аҳмад Таибалнинг ишораси билан хуржуннинг ҳар икки кўзини тўлдирган нарсани ерга ағдарди. Ўп-ўн бешта одам калласи кўкатлар ва долақизғалдоқлар устига юмалаб тушди. Бобур каллаларни кўрган заҳоти: «Чаграклар ҳам бизнинг одамларга ўхшар экан-ку!» — деган ўйдан эти жунжикиб кетди. Чорвадор туркий қабила бўлган чаграклар ҳам Бобурнинг ватандошлари эканлигига, ҳаммалари бир эл, бир улусданлигига унинг ишонғиси келмас эди. Чунки чаграклар унинг ҳукмига бўйсунмас, юборган кишиларини қўлда қилич билан қарши олишарди. Мана энди ўзлари қиличнинг тигидан ўтиб, бошлари оёқ остида ағанаб ётибди. Бу жонсиз бошлардан бирининг соқоли йўқ, кўк-сарғиш юзи силлиққина, мўйлови энди чиқа бошлаган. Бобур унинг ўн етти-ўн саккиз ёшли йигит бўлганини найқади-ю, энгаги тагидан кесилган гўшт аралаш қонли бўйинга қараб, кўнгли бирдан беҳузур бўлди. Ёрдам сўрагандай, ўнг томонида турган Қосимбекка қаради.

Султон Аҳмад Таибал ҳам, унинг отлич аскарлари ҳам Бобурдан мақтов ва мукофот кутмоқда эдилар. Ун олти минг куй, икки ярим минг йилки ҳазилакам бойлик эмас эди. Уч йигит ўлган бўлса, уларнинг қасдига ўн беш-йигиртмата ёғийнинг бошини кесиб келиш ҳам шу турганларнинг одатига биноан мардона иш ҳисобланар, буни тақдирламаслик эса адолатсизлик саналар эди.

Қосимбек Бобурнинг юзи оқариб кетганини кўриб ҳайрон бўлди. Унинг фикрича, кесик каллалар Бобурга бунчалик таъсир қилмаслиги керак эди. Бултур Самарқанд урушида ёш подшоҳ бундай бошларни кўн кўрган эди. Одатда «фалончи юзта ёғийни ўлдирибди», деб қуруқ мактасалар унча ишонарли бўлмайди, чунки озгина ишни кўп қилиб кўрсатиб, лоф урадиган бек ва навкарлар ҳам бор. Жапгчининг хизмати ишонарли бўлиши учун ўлдирилган душманларининг бошини кесиб келиб ҳисоб бериш эскидан одат тусига кирган.

— Амирзодам,— деб шивирлади Қосимбек.— Қулингиз сўзлайинми?

Бобур тасдиқ маъносида бош ирғади. Қосимбек юзини Бобурга яқинроқ келтириб, яна эшитилар-эшитилмас қилиб сўради:

— Мукофотига қилич берсак... Розимисиз?

Бобурнинг яроғбардори олиб юрган тиглар орасида олтин дастали катта бағдодий қилич бор эди, Бобур бир-икки марта таққанда жуда огир туюлган эди. Бобурнинг нигоҳи шу қиличда тўхтаганини кўрган Қосимбек, «тушундим», дегандек бош ирғади.

— Султон Аҳмад жаноблари,— деб овозини кўтариб гапирди Қосимбек.— Сиз баҳодирона зафар билан қайтганингиз Мирзо ҳазратларини беҳад шод қилди. Сиз Бобур мирзога нечоғлиқ содиқ эканлигингизни яна бир бор исбот этдингиз. Бутун мавкаб¹ бугун сизларни олқишлағай! Ўшдаги қароргоҳда бу оқшом сизларнинг шарафингизга тантанали зиёфат берилур, ҳамма йигитларингиз шоҳона инъомлар олурлар. Ҳозир Мирзо ҳазратлари Султон Аҳмад жанобларига олтин дасталик шамшири хос инъом этдилар!

Қосимбек бағдодий қилични яроғбардордан олди-ю, ерга таъзим қилиб турган Султон Аҳмадга узатди. Султон Аҳмад тиз чўкиб қилични қинидан тўрт эликча чиқарди-да, пўлатидан ўнди, сўнг овози ҳаяжондан титраб деди:

— Мирзо ҳазратлари, ўлгунимча бу марҳаматингизни унутмасмен! То умрим охирича сизга содиқ хизматда бўл-гаймен!

¹ М а в к а б — подшоҳ ва унинг барча аъёлари, яқинлари.

Шу кунн оқшом Ўш қалъасининг мишораларни устида, шаҳар атрофига тикилган юзлаб чодир ва ўтовлар олдида қарнайлар, накоралар чалишди, машъаллар ёқилиб, катта тантаналар бошланди. Минг-минг қўй ва йилқиларни инъом тариқасида текнига оладиган барча беклар, навкарлар ва мулозимлар бугун астойдил шодланмоқда эдилар. Подшоҳнинг ҳашаматли хиргоҳида оқшом қабул маросими ва базм бўлди. Созандалар энг қувноқ куйларини чалишди, хофизлар энг яхши ашулаларини айтишди.

Бобур хиргоҳ тўрида тўртта олтин зина билан чиқиланган баланд шохсуна устида ёлғиз ўлтирибди. Бугун унинг ўнг томонидан ўрни олган энг нуфузли беклари орасида Аҳмад Таибал ҳам найдо бўлган. У қувдузги зирҳли кийимлар ўрнига зарбоф тўп ва симоби салла кийган, подшоҳ инъом қилган олтин сопли қиличчи кумуш камарга тақиб олган. Ҳамма уни мукофот билан муборакбод қилади. Табиркларнинг барчасидан ёқимлиси — боя хиргоҳга кирганда уни Қутлуғ Нигор хоним муборакбод қилгани бўлди. Подшоҳнинг онаси билан эгачиси ҳозир катта дастурхоннинг нариги томонида Аҳмад Таибалга ярим ўтирилган ҳолда ўтириб, созандаларнинг куйига қўлоқ солишяпти. Аҳмад Таибал ҳар замонда уларга кўз қирини ташлаб қўяди. Хонзода бегимнинг нафис қадди-қомати, ҳафткор¹ ипак матодан кийган камалакдай товланувчи қабоси Аҳмад Таибалга бугун ҳар қачонгидан ҳам жозибали кўринади.

Ёш подшоҳнинг базмларида ичкилик ичилмас. Бобур ҳали майини оғзига ҳам олган эмас эди. Қосимбек ҳам ичкиликни ёмон кўрар ва уни базмларга йўлатмас эди. Лекин Умаршайх мирзо даврида май ичиб ўрганган бошқа беклар мана шундай базмларда Бобурдан яшириб чет-четда ичиб олишар эди.

Али Дўстбек деган қотма, кўсанамо бир бек орқада шарбат кўтариб турган шарбатчига сирли кўз қисди-ю, Аҳмад Таибални кўрсатди. Шарбатчи маъноли кулимсираб Аҳмад Таибалга яқинлашди ва кумуш кўзачадан чинни пиёлага тўлдириб кўкимтир «шарбат» қўйиб берди. Аҳмад Таибал пиёлани қўлига олар экан, димоғига ўткир май ҳиди урилди.

— Олинг, бек, илоҳим Самарқандда бундан ҳам улуғ зафарларга муяссар бўлишг! — деди Али Дўстбек.

Аҳмад Таибал мишнатдорона бош ирғаб, майини сипқарди-ю, кейин дастурхондаги тандирқабобга қўл чўзди.

— Мана энди Самарқанду Бухорони олгунча етадиган захирамиз бор! — деди ширакайф Дўстбек. — Муҳорабани тезлатмоқ керак.

¹ Ҳафткор — етти хил ранг.

Аҳмад Танбалнинг ўнг томонида Узун Ҳасан ўтирган эди. Туриб юрганда жуда повча кўринадиган бу озғин одам ўтирганда гўё қатлашиб, кичкина бўлиб қолар эди.

— Шайбонийхон Дашти Қипчоқдан Самарқандга бўйин чўзармиш,— деди Узун Ҳасан.

— Тушини сувга айтсин! Самарқанд бизники бўлур! — деди майдан бадани қизий бошлаган Аҳмад Танбал овозини хиёл кўтариб.

Унинг бу сўзлари Бобурнинг қулоғига ҳам чалинди. Бугун тоғдан ҳайдаб тушилган беҳисоб қўй ва йилқилар сарой аҳлининг Самарқандга юриш қилиш иштиёқини яна ҳам ошириб юборгани Бобурга тобора аниқ сезилмоқда эди. Илгарги ҳам уларнинг бу иштиёқларига қарши бориш кийин эди. Аммо ҳозир бек ва навқарларнинг Самарқандга иштилиши — тоғ дарёсининг юқоридан настга қараб отилишига ўхшарди. Бу дарёни орқага қайтариш ҳеч кимнинг қўлидан келмасди...

6

Оқин сувли жўшқин Бурасой Ўш қалъасининг тош ётқизилган пойдеворида бош уриб, кўнириб ўтади. Соининг ўнг бетидagi сердарахт маҳаллада мавлоно Фазлиддин бултурдан бери истиқомат қилаётган пешайвонлик мўъжиз бир уй бор. Унинг олдидаги беш-олтита нок ва беҳи дарахтлари ҳозир ошпоқ бўлиб гуллаб турипти. Ҳовлининг четидagi бостирмага иккита от боғлаб қўйилган. Бериги ёқдаги оёқлари узун тўриқ қашқа оти анжомлари билан Бобур мирзо инъом этган эди. Мавлоно Фазлиддин подшоҳнинг хос меъмор қилиб тайинланган, унга яхшигина улуфа¹ белгиланган эди. Бунинг ҳаммасидан мавлоно Фазлиддин ўзида йўқ хурсанд бўлиб юрган эди. Бироқ кейин баъзи бир нохуш хабарларини эшитиб, кўнгли ғаш торта бошлади.

Мавлоно Фазлиддин Андижонда қурмоқчи бўлган катта иморатларини шу бу йил ёздаёқ бошлаш орзусида эди. Бобур мирзо кўрсатган марҳаматлар бу орзунинг рўёбга чиқишига йўл очгандай бўлган эди. Ҳатто Бобур мирзонинг ўзи уни боргоҳда қабул қилиб, қанақа мадраса, қандай хонақоҳ ва кутубхоналар қуриш ҳақида гаплашган, мавлононинг бу ҳақдаги таклифларини маъқуллаган, «Хонзода бегим биз йўғимизда мутасадди бўлурлар, режаларини бутун тафсилотлари билан тузиб, бегимга кўрсатурсиз», деган эди. Иш

¹ У л у ф а — маош ва турар жой.

устида яна Хонзода бегим билан! учрашганини ўйлаганда, мавлононинг қалбида кўрқув аралани ширини бир халжон кўзгалар эди.

Бирок Бобур яқинда яна Самарқандга қўшни тортиб бормоқчи эканлиги, давлатнинг бутун кучи шунга кетиб, қурилишлар номаълум вақтга кечиктирилиши маълум бўлди. Агар Бобур Самарқандни ололмай, урушда енгилса, унда мавлононинг барча орзулари ўз-ўзидан пучга чиқади. Агар Бобур Самарқандни олса, табиий, ўша ерда подшоҳ бўлиб қолади. Кейин у Фаргона водийсида катта қурилишлар қиладими, йўқми? Одатда, подшоҳлар қаерни пойтахт қилсалар, ўша ер кўпроқ обод бўлади. Андижон яна пойтахт бўлиши гумон. Демак, мавлононинг бу ерда қилмоқчи бўлган ишлари, барча режалари қум устига қурилгандай омонат.

Ҳозир айвонда эски ҳандаса ва риёзиёт китобларини титқилаб, керакли бир жадвални ахтараётган мавлоно мана шу нарсаларни ўйлаб, таъби тирриқ бўлмоқда эди.

Бир пайт дарвоза устма-уст тақиллади. Бостирмада отларнинг тагини тозалаётган кекса хизматкор ёғоч курагини деворга суяб қўйиб, дарвозага қараб ўтди. Бирпасдан еўиг хизматкор айвоннинг олдига қайтиб келди-ю:

— Мавлоно, бир кимса хузурингизга кирмоқчи.

— Ким?

— Кийини увада, ўзи баҳайбат бир йигит. «Жиянлари бўламан», деди, аммо мен сиздан берухсат киргазмадим.

— Жияним? Шошманг-чи! — деб, мавлоно ўрнидан турди. Яланг оёғига чарм кавуш кийиб, ярим очик дарвозанинг олдига борди.

Олача тўни ҳам, оёғидаги чанг босган чориги ҳам йиртилиб кетган повча бир йигит кўзлари ялтираб, қулимсираб унга қараб юрди. Қадам олишни, қарашни жуда таниш. Йигит:

— Мулла тоға! — деб кучоқ очганда мавлоно унинг овозини таниди-ю:

— Тоҳир! Тоҳиржон! — деб у билан кучоқлашиб кетди. — Шунча ўлимлардан омон қолган жияним, сени зўрға таниб-мен. Бу қадар ўзгариб кетибсен! Юзингга не бўлди?

— Э, сўраманг, мулла тоға...

— Майли, юр, аввал дамнингни ол. Кейин айтиб берурсен...

Улар айвонга чиқар эканлар, мавлоно Фазлиддин бундан салкам уч йил олдин Қувасой бўйида бўлиб ўтган қонли воқеаларни яна бир эслади. Ўшанда Тоҳирга найза санчган самарқандлик босқинчи уни ўлдирганига шубҳа қилмай кетган эди. Ораси ёлғиз ўглининг қонига беланиб, жонсизланиб ётганини кўриб, уни «ўлди» деб ўйлаган ва шайтонлаб йиқилган эди, бечора она шу ётганича қайтиб туролмай,

эртаси кунн вафот этди. Тоҳир эса отаси топиб келган табиблар ва дору дармонлар таъсирида уч кундан кейин хушига келди. Найза ўпканинг бир четини кесиб ўтган бўлса ҳам юрак ва жигар каби нозик аъзоларга тегмаган. Тоҳирнинг ёшлиғи ва бақувватлиғи устун келиб, аста-секин тузалиб кетган эди. Қўни-қўшнилар: «Тоҳирга келган ўлимни онаси ўзига олди-ю, бу тирик қолди», дейишарди. Мавлоно Фазлиддин ўшанда онасининг қирқини ўтқазиб келганича қайтиб Қувага бормаган эди.

— Отанг қалай, бардамми? — сўради мулла Фазлиддин Тоҳирни юқорига таклиф қилиб.

Тоҳир чанг босган чориғи билан кўрпачага чиқшидан ибто қилди-ю, пойгаҳдаги шолча устига ўлтирди:

— Отам сизга салом айтиб юбордилар. Мен бир йилча қишлоқда бўлмадим... Қариндошлар «чолнинг иссиқ-совуғидан хабар олиб турсин» деб бир бева кампирни олиб берибдилар... Онам раҳматли эсимга тушди-ю, уйда тургим келмади.

Фақат онасининг мусибати эмас, босқинчилар боғлаб олиб кетаётганларида Тоҳирдан нажот кутиб кичқирган Робия ҳам унинг хаёлидан нари кетмайди. Қизнинг ўшандаги нидоси ҳали ҳам Тоҳирнинг қулоғига эшитилиб тургандай бўлади. У бурноғи йили Самарқандгача пиёда бориб келди, йўлларда ўроқчилик қилиб, карвонларга қўшилиб юриб, иложи бўлган жойдан Робияни қидирди, «синглим эди, Султон Аҳмад мирзонинг навкарлари олиб қочиб кетган эди», деб сўроқлади. Аммо ҳеч қаердан дарагини тополмади.

Султон Аҳмад мирзо ўша йилиёқ ўлиб, қўшини тарқаб кетган, бир йил давомида Самарқанд тахтида икки марта подшоҳ алмашинган, кўп тўполоилар бўлиб, ит эгасини танимайдиган аҳволга келган эди. Жиззахлик бир киши Тошкент томонларга чўрилар кўн сотилганини айтиб қолди. Бултур кузда Тоҳир пиёда Тошкентгача борди, яна ҳар жойларда мардикорлик билан кун ўтқазиб Робияни сўроқлади, аммо ҳеч натижа чиқмади. Замона нотинч, юрт алғов-далғов, ҳаёт ҳамма жойда худди лойқалатилган дарёга ўхшаб оқади. Робияни топиш — лойқа дарёга тушиб кетган гавҳарни топишдек қийин эканини Тоҳир ич-ичидан сезар эди-ю, бари бир умидини узолмас эди. Мавлоно Фазлиддин Тоҳирнинг гапларидан шуни пайкаб:

— Жияним, сен ўша бечора қизни ҳали ҳам унутолмай икки йил излаганинг — жуда ажойиб бир дилинг борлигидан далолат берур. Мен сенинг садоқатингга тан бердим! Аммо сен энди ўзингга ҳам жабр қилмаслигинг керак. У қиз тақдирда борини кўргай. Агар тирик бўлса, балки... биров унга

уйлангандир. Балки фарзандлик ҳам бўлгандир. Ахир уч йил уни тек қўйишлари мумкинми? Сен ўзинг бир ўйлаб кўргин...

— Мен бунинг ҳаммасини аллақачон кўнглимдан ўтказганмен, мулла тоға... Фақат мен у қизнинг олдида ўз гуноҳимни ювмоқчимен, холос.

— Қайси гуноҳингини?

— Ўшаюда Робияни Андижонга қочирмоқчи бўлганларидан мен Қувада олиб қолганмен. Агар Андижонга кетганда бу фалокатлар бўлмас экан.

— Сен нима бўлишини қайдан билибсен, жияним?

— Ҳар қалай, мен уни тошиб, шу гуноҳимни ювмагунимча тинччёлмайман. Робия, сиз айтгандек, уйлик-жойлик бўлиб, тинчиб кетган бўлса, унда... майли... Тақдирга тан бёрурмен. Агар хали ҳам нажот излаб, мени кутиб юрган бўлса-чи? Ахир мен уни унутолмай юрибмен-ку? Унга ҳам мен керак бўлсам-чи?

Мавлоно Фазлиддин бош чайқаб:

— Дил дардига даво йўқ экан-да.— деди ва мавзунини ўзгартирди:— Йўқлаб келибсен, энди моҳмон бўл. Қанин дастурхонга қара...

Тоға-жиян бирга ўлтириб ширчой ичдилар. Кейин мулла Фазлиддин Тохирнинг кийим-бошларига яна бир кўз югуртирди-ю:

— Жияним, тоғанг ҳозир хийла бадавлат,— деди қўйнига қўл солиб, боғичи попукли қора чарм ҳамён олди. У ҳамённи очиб, жиянига бир нечта олтин таўга олиб бермоқчи эди. Ҳамён тезда очилавермагач, мавлоно уни очмасдан жиянига узатди.— Ма, ўшининг расталарига чик, бугун жума, мол кўн, ўзингга керакли кийим-кечак ол.

Тохир ҳамёнини олмай туриб деди:

— Йўқ, мулла тоға, менга ўзингиз санаб, қарз беринг.

— Ҳа, хўн, қарз! Ўзинг керагича ол, пулдор бўлганингда қайтарурсен.

— Ундай бўлса, майли.

Тохир ҳамёнини қўйнига солиб чиқиб кетганича пешин кечроқ оёғига янги аскарый этик, бошига мугулча бўрк кийиб, чакмонга ўхшаш дагал юнгли дагалани елкасига ташлаб келди. Унинг қўлида қини эскириб кетган арзон бир қилич ҳам бор эди. Мавлоно Фазлиддин хайрон бўлиб:

— Нечун бундай кийимлар олдинг? — деди.— Қилични не қилурсен?

— Мулла тоға, ёлғиз саргардон бўлиб юриш меннинг жонимга тегди. Энди Самарқандга Бобур мирзонинг қўшини билан бирга бормоқчимен.

— Сарбоз бўлибми?

— Ҳа, тавочилар аскарликка одам олаётган эмишлар...

Жияни ўша ҳам шу шият билан келганини мавлоно Фазлиддин энди сездю, ундаи каттиқ ранжиди.

— Жияни бўлибсен, Тохир! Ҳамма урушдан қочса, сен бу аждаҳоннинг қомига ўз ихтиёринг билан бормоқчисен! Бир марта найза еб, ўлимдан қолганинг озмиди?

— Мулла тоға, ундаи кейин мен яна неча ўлимлардан қолганимни сиз билмайсиз. Тошкентда бир мўғул беги бечора касибнинг қизини зўравонлик билан тортиб олмоқчи бўлганда мен чидаб туrolмадим. Орага тушганим учун мана, юзимда ўша бекнинг ханжаридан чандиклар қолди.

— Замона зўриқилигини ҳали ҳам билмайсенси?

— Билганим учун мен ўшандай зўрлар билан зўр қўшинининг сафида туриб олишмоқчимен, мулла тоға. Мен кўп юртларни кўрдим, турли одамлар билан бирга шўлаб, бирга юрдим. Бобур мирзонинг табиати покиза, қўнгли тийрак эканини кўп одам билар экан. «Атрофдаги подшоҳлардан яхшилик чиқмаса ҳам Бобур мирзодан бир ёруғлик чиқар», деб умид қиламен.

Мавлоно Фазлиддин ерга қараб:

— Қайдам.— деди.— Бобур мирзо ҳали ёшлар. Мен ҳам шу зотга умид боғлаган эдим... Лекин яна уруш, қон... Ҳаммамиз тун зулматидай интиҳосиз бир қоронғилик ичида юрибмиз. Мамлакат пароканда, золим тождорлар қон устига қон тўқурлар. Бобур мирзонинг атрофидаги беклар ҳам раҳм-шафқатни унутмишлар. Мухит шундоқ ғаддор бўлгач, сен ҳам ёмон беклар хизматида юриб, ўзингга ўхшаш жабрдийда заҳматқашларнинг қушандасига айланмасмикинсан, жияним?

— Ишонинг, мулла тоға, мен ёмон бекларнинг зулмига иложим борича қарши тургаймен!

— Бобур мирзо ҳукмдор бўла туриб даф қилолмаган адолатсизликларни сен нечун даф қилурсен?

— Балки Бобур мирзонинг мендек навқарлари бўлмагани учун даф қилолмагандирлар? Балки у зотга мен керакдурмен, мулла тоға! Мен ўзим учун шундан маъқул йўл тополмадим. Ёлғиз яшашимнинг маъноси қолмади. Не қилай?

Мавлоно Фазлиддин жиянининг юзига тикилиб қаради-ю, уни шиятидан қайтариб бўлмаслигини сездю. Тохир бундан уч йил олдин Қувасой қўпригини бузиб, ёв қўшинига катта талафот келтирган пайтларда тарих дарёсининг қудратли оқимига тортилмаганиди? Энди умрбод ўша оқимдан чиқолмасдан, тарихий воқеаларнинг ичида юришга маҳкум этилганмики? Ҳар қалай, жиянининг сўнгги гаплари мавлонони ўйлангириб қўйди. У бирпас жим тургач:

— Тавочига учрадингми? — деди.

— Учрадим. «Отинг йўқ экан, ниёда қўшинга оламиз»; деди. Мен ниёда юриб ўрганиб қолганмен, мулла тоға.

— Аммо жангда энг кўн талафот ниёдалар орасида бўлур, буни билурсенми?

— Майли-да, қирк йил қирғин бўлса ҳам ажали етган ўлгай.

— Бас!

Мулла Фазлиддин бу ҳақда бошқа гаплашмади. Эрталаб понуштадан кейин хизматкорига айтиб, бостирмада турган ҳар иккала отни ҳам эгарлатди. Тоҳирга оёқлари узун жийрон отни кўрсатиб:

— Сен мана шуни мин,— деди.— Мен сенинг ниёда аскар бўлишингни ўзимга муносиб кўрмасмен.

Мулла Фазлиддин ўзи Бобур инъом қилган тўриқ қашқани минди. Сўнг икковлари Бобурнинг қароргоҳига отлиқ йўл олдилар.

Одатдагидай, Бобур ҳузурига кириш учун эшик оғадан рухсат олиш керак. Тоға-жиян саккиз бурчакли улкан оқ ўтовдан берирокда отлиқ келаётган Қосимбекни кўрдилар ва унинг ҳурматига отдан тушиб кўл ковуштирдилар.

— Жаноби амирул умаро, жияним ҳам Бобур мирзога содиқ хизмат қилиш орзусида келди,— деди мавлоно Фазлиддин.— Ижозат берсангиз, амирзоданинг ҳузурига кирсак.

— Амирзодам ҳозир беҳад банддир, мавлоно. Балки илтимосингизни менга айтурсиз?..

— Жияним Тоҳир... амирзодамнинг хос навкарлари қаторига олиншини ўтиниб сўрамоқчи эдим.

Қосимбек Тоҳирнинг барваста гавдасига ва юзидаги чандиққа қаради-ю:

— Йигит, аскарний хизматда бўлганмисен? — деди.

Қосимбекнинг «сенсираб» гапиргани Тоҳирга унча ёқмади. Лоқайд товуш билан:

— Ҳали бўлган эмасмен,— деди.

Мавлоно Фазлиддин орага тушди:

— Жаноби амирул умаро, жиянимиз асли деҳқон бўлса ҳам, лекин табиатида жанговарлик бор. Эсингизда бўлса, Қуванинг кўпригида ёғийларимиз жуда катта талафот кўриб, ўзлари сулҳ таклиф қилган эдилар. Ўшанда бизга галаба келтирган азамат йигитларнинг бири — мана шу Тоҳир!..

— Галаба келтирган?! — ишонқирамай сўради Қосимбек.— Қандай қилиб?

Мавлоно Фазлиддин Қувада ўз кўзи билан кўрган воқеаларни Қосимбекка қисқача сўзлаб берди. Унинг ҳикоясига қараганда, жанговар беклар ва навкарлар энлай олмаган

ёвнинг беллиги «ядангоёклар» сиқдирган бўлиб чиқарди. Қосимбек бунга ишониши келмади.

« — Қувада галабани тангрим ўзи бизга ишом қилган, мавлоно! — деди Қосимбек.

« Бу гапга қарши чиқиб бўлмас эди.

— Албатта, буларнинг кўнглига шу ишни худо ўзи солган. Лекин ўшандаги жасорати учун ёғийлар Тоҳирга найза санчиб, уни оғир ярадор қилдилар. Жияшим нақ бир ўлимдан қолди, жапоб Қосимбек!

— Шундоқми? — деб Қосимбек энди Тоҳирга илиқроқ назар билан қаради. — Самарқанддаги ёғийларимизда қасдинг борми, йиғит?

— Ҳа, ўчим бор.

Қосимбек кетида сукут сақлаб турган тавочига ўгирилди:

— Бу йиғитни Чилмаҳрам тоғи этагида аскарний машқ ўтказаяётган навкарлар қаторига қўшинг? — Сўнг у мулла Фазлиддинга изох берди. — Жиянингизнинг машқи етилсин, харбий муомалани ўргансин. Ундаи сўнг амирзодам лозим кўрсалар, хос навкарлари қаторига олурлар.

Тоҳир мавлоно Фазлиддин билан кучоқлашиб хайрлашдида, отига минди ва тавочининг кетидан Чилмаҳрам тоғига қараб йўл олди.

7

Бекларнинг машваратида Самарқанд юришини рамазон ойида бошлашга, тайёрлик ишларининг асосий қисмини ўшнинг ўзидаёқ битириб кетишга қарор қилинди.

Бобур онасининг сўзини ерда қолдирганидан хижолат бўлиб, Қутлуғ Нигор хонимнинг кўзига ташиламасликка тиришарди. Сафар тайёргарликларидан бўшаган пайтларда ўз чодирда ёлғиз ўтириб китоб ўқирди.

Бугун намоздигар кечроқ Бобур «Вақонъ»¹ номли дафтарга отасининг ўлими ҳақида ёзаётган эди, ясовул кириб, Қутлуғ Нигор хоним билан Али Дўстбекнинг чодирга киришига ижозат сўраётганларини айтди. Бобур дафтариини ёпиб, онасини эшик олдида қарши олди ва тўрға ўтказди.

Қутлуғ Нигор хонимнинг ранги хиёл ўчган. Ушнинг вешонасидан юқорида — сочининг фарқ очилган жойида Бобур бир тутам оқарган соч толаларини кўрди. Энди қирқ ёшга кирган онаизор камширлардек одми кийинар ва қаддини эгиброк

¹ «Вақонъ» — «Чиндан юз берган воқеалар» демакдир «Бобуринома» энг аввал шундай деб аталган

юрар эди. Бобур онасига алтанчук раҳми келиб, паст товуш билан гапирди:

— Онажон, сўзим ерда қолди, деб куюнманг. Насиб бўлса, Самарқанддан қайтганда ҳамма айтганларингизни қилурмен.

— Худонинг хоҳиши шундай бўлса, биз бандалар қаноат қилгаймиз. Илоҳо яхши ниятларингизга етинг, шоҳ ўғлим!

Али Дўстбек бақувват қўлларини фотиҳа учун очиб:

— Илоҳи омин! — деди.

Сўнг катта-катта панжаларини қон-қора силлиқ юзига, соқолсиз узун пиягига суртди.

Юзи мўғулча бўртган бу чайир кўса одам Бобурнинг бувиси Эсон Давлат бегимга амакивачча бўлади, Шу сабабли ўз помига «тоғойн» деган сўзни унвондек қўшиб айтади ва Қутлуғ Нигор хонимга акаларча меҳрибончилик кўрсатиб юради. Ҳозир ҳам кўрпачалар устига ўтирганларидан кейин Али Дўстбек Қутлуғ Нигор хонимга «Гапни очайми?» — дегандай бир қараб олди. Ховим тасдиқ маъносига бош ир-гагач. Али Дўстбек томоқ қириб, сипорини билан сўз бош-лади:

— Амирзодам, волидангиз икковимиз нозик бир муаммода сизнинг маслаҳатингизни олгани келдик. Муҳтарама эгачингиз Хонзода бегим ҳозир йиғирма ёшдалар. Айни узатиладиган пайтлари. Бегим ой деса ойдек, кун деса кундек, оқилаю фозиладирлар. Шу вақтгача муносиб куёв учрамай доғда эдик. Волидангиз ҳам, тоғойингиз ҳам вақт ўтиб кетаётганидан изтиробда эдик.

— Яна бир-икки йил уйда ўлтириб қолса, «қари қиз» деб кулурлар, — деди Қутлуғ Нигор хоним.

Опасининг тақдирига онд бунақа гапларни Бобур илгарилари ҳам эшитган эди. Аммо бугун Дўстбекнинг гапларига қараганда, қандайдир куёв топилганга ўхшарди. Бобур шуни билгиси келиб, ўсемирларча қизиқиш билан сўради:

— Ким бизга почча бўлмоқчи?

Рўйирост берилган бу савол, Дўстбекни шошириб қўйди. У яна гапни айлантирди.

— Сиздек олий зотга «муносиб почча бўлурмен», деб ҳеч ким журъат қилиб айтолмас. Аммо умароларингиз орасида аслзода беклар бор. Чунончи, Султон Аҳмадбек. Йиғирма беш ёшга кирган норғул йиғит. Чоққунга бориб, баҳодирона зафар билан қайтди. Беклар орасида обрўси баланд. Ёшида уч забардаст иниси бор. Уч юз навқари билан ҳаммаси сизга то ўлгунча содиқ хизмат қилмоқчилар.

Бобур ҳали онла нималигини, куёв-келини қандай бўлишини билмаса ҳам, опаси Хонзода бегимни Аҳмад Тамбалнинг

ёнига қўйиб тасаввур қилди-ю, икковини бир-бирига тўғри келтиролмади. Сўнг онасига қараб:

— Сиз розимисиз? — деди.

Қутлуғ Нигор хоним оғир тин олиб:

— Начора! — деди.— Хонзода бегим тождор, тахтдор куёвларга муносиб қиз. Аммо ҳозирги нотинч замонада қани биз истаган куёв? Биз тоғойингиз билан суриштириб билдик. Султон Аҳмадбекнинг авлод-аждоди аслзодалардан экан. Бобокалонлари Жўжихон, Чингизхонларга қон-қариндош бўлган султонлар экан. Ҳозир Тилба Султон номлик оғаси Тошкентда тоғойингиз Маҳмудхонда соҳибихтиёр эшик оға экан. Энди бу Аҳмадбек куёв бўлса, орага оғаси тушиб, тоғойингиз Маҳмудхон билан сизни яқинлаштирармикин? Шундай нуфузли бек сизга куёв бўлиб, бутун уруғлари-ю, навкарлари билан қанотингиз тагига кирса, ишингизнинг ривожини яхшироқ бўлурмикин?

— Шубҳасиз, шундай бўлур! — деди Дўстбек чуқур эътиқод билан.

Бобур нима дейишини билмай елка қисди: ёш ўемир ўзидан катта онасини кимга эрга бериш ҳақида ўйлашдан ҳам тортинар эди. Аммо онаси ва тоғаси бу ишни унинг подшоҳлик ҳукми билан амалга оширишни истардилар.

— Бегимнинг ўзлари учун ҳам яхши бўлур,— деб давом этди Дўстбек.— Агар бошқа бир юртдаги тождорга тушсалар, оналаридан йироқда бўлурлар, амирзодамдай суюкли иниларининг ҳимояларидан узоқлашурлар.

— Ха, ундан кўра ёнгинамда бўлгани афзал,— деди Қутлуғ Нигор хоним.— Хонзода менинг тўнғич қизим, маслаҳатгўйим, Аҳмадбекка берсак, кўз ўнгимда менинг ёлғизлигимни билинтирмай юрур.

Бобур бу борада ўзи билмайдиган кўп нарсаларни онаси яхши билишини ўйлади-ю:

— Онам рози бўлсалар, бўлди,— деди.

Дўстбек қувониб кетди:

— Ҳақ гапирдйингиз, амирзодам, жуда хақ! Она рози — худо рози, деб бежиз айтмаганлар!

Қутлуғ Нигор хоним ҳамон хомуш эди. Бобур бунинг сабабини сезгандай бўлиб:

— Бегимнинг ўзлари нечук? — деб сўради.

Қутлуғ Нигор хоним оғир тин олиб:

— Бегим рози эмаслар,— деди.— Эшитиб кўп йиғладилар.

— Бундай пайтларда йиғлаш қизларнинг азалий одати,— деб кулиб қўйди Дўстбек.

— Аммо Хонзода бегимнинг аҳволидан мен хавотирдамен,

амирзодам,— деди Қутлуғ Нигор хоним.— «Ўзимни ўлдирармен», деган сўзларини эшитиб қолдим.

— Наҳот? — деди Бобур ҳам бирдан хавотирга тушиб.

— Эгачингиз сизни жондан азиз кўрурлар, Мирзо ҳазратлари, сўзингизни икки қилмаслар,— деди Дўстбек.— Волидан муҳтарамангиз билан иккаламиз сиздан илтимос қилгани келдик. Хонзода бегимни ҳузурингизга чорлаб насихат қилинг. Давлатингизнинг маънаатлари учун эгачингиз ризолик бермоқлари керак. Султон Аҳмадбек орага одам қўйган. Бутун уруғлари билан сизнинг марҳаматингизга мухтабир. Рад жавоби уларни сиздан... совитиб қўйиши мумкин. Сўнгра, агар Хонзода бегим ризо бўлмай, яна уч-тўрт йил уйда ўлтириб қолсалар. «куёв топилмабдир, қари қиз бўлибдир», деб ёғийларингиз маломат қилурлар. Бундай гаплар подшоҳ онасининг шаънига мутлақо тўғри келмас. Агар Хонзода бегим сизга яхшилик истасалар, ризо бўлмоқлари керак. Буни энди бегимга фақат сиз тушунтирурсиз, Мирзо ҳазратлари!

Бобур бошини чапгаллаб бир лаҳза жим қолди. Бундай позик, бундай чпгал ишга умрида биринчи дуч келиши. Бегона бўлса ҳам бир сари эди, гаплашиши осонроқ бўларди. Ўзининг жонажон опаси. Бобур Хонзода бегим билан бу тўғриларда гапиринишдан ҳам ийманарди. Лекин бу ёқда онаси мушкул аҳволга тушиб, ёрдам кутиб ўтирибди. Бу ёқда онаси жонига қасд қилмоқчи эмиш.

— Майли,— деди Бобур онасига маъюс кўз ташларкан,— бегим келсинлар, ўзим бир сўзлашай.

Қутлуғ Нигор хоним тез ўрнидан кўзгалиб:

— Ҳозир... ҳозир бориб айттириб юборурмен,— деди ва чодир эшигига йўналди.

Дўстбек йирик тишларини очиб мамнун кулимсиради-ю, чодирдан орқаси билан юриб чиқа бошлади. Эшик олдида таъзим қилди-да:

— Амирзодам, сиз шоҳсиз, сизнинг ҳукмингиз вожиб,— деб Бобурни дадилроқ бўлишга ундаб кетди.

* * *

Бобур қатор шамлари лишиллаб ёнаётган иккита олтин қандил оралиғида садаф билан безатилган бежирим мизга кўкрагини тираб китоб варақлаб ўлтирганда Хонзода бегим чодир эшигидан секин кириб келди. Эғинда сидирға сарик атлас қўйлак. Ҳазин товуш билан саломлашиб, Бобур таклиф қилган зарбоф кўрпача устига хасталардек бўшаниб ўлтирди. Унинг қовоқлари шишинқираганини кўрган Бобур:

— Мунча ғамгинсиз, бегим? — деди.

— Амирзодам, мен ҳузурингизга нажот излаб келдим!

Хонзода бегимнинг сўлғин юзига кўзларидан ёш сирғалиб тушди. Бобур яқиндагиша ййраб-яшнаб юрган опасини ҳозир бу аҳволда кўриб, юрагини бир нарса тимдалиб ўтди. Онаси унинг зиммасига юклаб кетган вазифа қанчалик мушкул эканини у энди астойдил ҳис қилди. Тақдир унинг бошига солаётган мушкулотлар озмиди, устига бу ҳам кўшилди? Бобур куюниб гапира бошлади:

— Мен ўзим бу фалакнинг дастидан нажот излаймен, бегим. Ечилмас муаммолар бири устига бири кўшилур. Шу аснода паҳотки сиз ҳам менинг мушкулларимни кўпайтирмақчи бўлурсиз?

Хонзода бегим укасининг ўзи чиндан ҳам ёрдамга муҳтожлигини, ёшига номуносиб ишлар уни жуда қийнаб юрганини сезди-ю, кўзини тез артди. Боягидан тетикроқ оҳанг билан гапира бошлади:

— Амирзодам, мен бир гап эшитдим. Ростмикин?

— Қайси гап?

— Аҳмад Танбал тоғдан бир хуржун одам калласини олиб тушганмиш...

Бобур ўтган куни кўрган кесик каллаларни, хусусан, ҳали соқоли ўсиб улгурмаган ёш йигитнинг гўшти чиқиб ётган қонли бўйинни эслади-ю, бирдан сесканиб тушди.

— Жанг ўлимсиз бўлмас,— деб Бобур гўё ўзини-ўзи босмақчи бўлди.— Ёғий ҳам бизникиларни ўлдирмишдир. Бу — эски одат. Сиз буни унутинг, бегим.

— Бунисини унутсам, омилиги, жоҳиллиги бор. Мен умримни фозил киши билан ўтказиш орзусида эдим. Аҳмад Танбал қўли қон, бераҳм одам. Амирзодам, паҳотки сиз мени унга муносиб кўрурсиз?

— Сизга муносиб йигит, балки етти иқлимда ҳам йўқдир. Аммо... сабабларини одам айтгандирлар... Мен ҳам... мажбурмен!

Хонзода бегим қандилда линиллаб ёнаётган шамларга қараб туриб, Аҳмад Танбални кўз олдига келтирди-ю, ўша бадқовоқ йигит билан бир ёстиққа бош қўйишини ўйлаб, эти жунжикиб кетди:

— Мен бу бекдан кўркамен!

— Биз бор эканмиз, сиз ҳеч кимдан кўркманг, бегим. Мен сизга заррача зулм ўтказишларига йўл қўймасмен.

— Мени маъзур тутинг, амирзодам. Аммо эгачингизни хоҳламаган одамига зўрлаб узатсалар, шунинг ўзи катта бир золимлик бўлмамайми?

Бу мантиқли сўзлар Бобурни доводиратиб қўйди:

— Золимлик... Ҳа, фалакнинг ўзи золим! Мен ҳам ҳар куни суймаган одамларим билан муомала қилурмен. Хоҳлама-

ган ишларимга мени аралаштирурлар. Давлат манфаатларини ўйлаб ўзимни-ўзим мажбур қилурмен. Бошқа иложим йўқ!

Бобур ўз ёшига ярашмайдиган бу сўзларни қанчалик қийналиб айтаётган бўлса, кўнглига ёқмайдиган, аммо муҳит, вазият талаби билан мажбуран адо этадиган ишларни унда ҳам ортиқ азоблар билан қилиши сезилиб турарди. Бобур бу мушкул аҳволдан чиқишнинг йўлини тополмай ич-ичидан эзилиб юрганни Хонзода бегим энди пайқайди-ю, укасига раҳми келди. Бобурнинг подшоҳлигини унутиб, уни кичиклигида эркалатиб суйган пайтларини эслади.

— Бобуржон,— деди.— сиз ёлғиз ишим, пушти-паноҳим-сиз, мен сиз учун жонимни ҳам аямаймен! Агар сизга чшдан ҳам шу зарур деб ишонсам, ҳозирги гапингизга ҳам ризо бўлур эдим. Лекин мен сизнинг кўйрақ кўнглингизни билурмен. Агар мен умрбод бебахт бўлиб қолсам, кейин сиз ҳозиргидан ортиқроқ изтироб чекурсиз!

— Худо хоҳласа, бебахт бўлмасиз.

— Кўнглим сезиб турибдир, агар шу одамга тушсам, бебахт ўтурмен. Бобуржон, эгачингизнинг сўзига ҳам ишонинг. «Давлат манфаатлари» деб ўзингизни кўп эзманг. Сиз билан биз учун ҳам бу умр ғанимат. Ўз кўнглимизга ҳам ишонимиз керак! Кўнглил тоза бўлса, кишини алдамайдир!

Хонзода бегим шундай бир самимият билан ёниб гапирмоқда эдики, унинг қалбидаги олов гўё Бобурнинг қалбига ҳам ўтди. Шафқатсиз беклар муҳити ва подшоҳлик мажбуриятлари ёш Бобурнинг қалбини қаҳратон қишини музларидай сиқиб ётар эди. Хонзода бегим эса ўзининг оловли нафаси билан гўё шу музларни эритар. Бобурнинг қалбига баҳор майишлиги, ёшлик эркинлиги яна қайтиб келаётгандай, эти жимир-жимир қиларди. Хонзода бегим яна кўзларига ёш олди:

— Бобуржон, сизнинг дилингиз беғубор, сиз подир истейдодли фидокор йиғитсиз! Бу беклар ўз манфаатларини ҳам «давлат манфаатлари» деб кўрсатишга ўрганиб қолганлар. Булар сизнинг ёшлигингиздан фойдаланурлар. Аммо сиз сўймаган ишни «давлат манфаатлари учун» деб қилдирмоқчи бўлганларида кўнглингизга ҳам бир қулоқ солиниг. Энг маҳрам дўстингиз — сизнинг мусаффо қалбингиздир. Сиз бу дўстингизга ишонинг, жоним!

Хонзода бегим ўтирган кўйича укасига қўл чўзиб, йини аралаш илтижо қилди:

— Мен сизнинг пок қалбингиздан адолат излаймен! Қалбингиз нима буюрса, сиз менга шунини буюринг! Мен розимен!

Бобур сакраб ўрнидан турди-ю, опасининг қўлларидан олиб, уни ўрнидан тургазди:

— Йиғламанг, бас! — деди. Аммо Бобурнинг ўзи ҳам

қўнгли эриб, кўз ёшини зўрға тутиб тұрарди.— Сиз менга барча бекларимдан яқинроқсиз. Бир туғишган ягона эгачимсиз. Сиз туфайли не оғирлик келса, майли, кўрай! Хотиржам бўлинг! Токи бормен, суймаган одамингизга узаттирмасмен!

Хонзода бегим азбаройи қувонганидан укасини маҳкам қучиб, пешонасидан, кўзларидан ўчди.

САМАРҚАНД

ЗАФАР ВА КУЛФАТ

I

Бобурнинг қўшини Самарқандни бутун ёз ва куз бўйи камал қилди. Бойсунқур мирзо етти ой шаҳар дарвозаларини беркитиб ётди-ю, ахири очлик ва танқисликка бардош беролмай, совуқ қиш кечаларидан бирида яқин одамлари билан Самарқанддан яширннча чиқиб, Ҳисор томонга кочди.

Шаҳарда қолган беклар бундан хабар топганларидан кейин қалъа дарвозаларини очтирдилар. Бобурнинг уч мингга яқин қуролли кишилари зафар қўйини чалиб, қўш нақоралар ва қарнайлар садоси остида шаҳарга кира бошладилар.

Бобур беш яшарлигида кўрганлари яхши эсида қолмаган экан. Самарқанднинг ҳар ер-ҳар еридан мовий тоғлар каби қўкка бўй чўзиб турган улуғвор гумбазларнинг қайсиси Улуғбек мадрасасиники эканини, қайсиси Бибиҳоним мадрасасига мансублигини ёнида бораётган Қосимбекдан сўраб билди. Фақат арқка яқинлашганда чап томонда кўринган улкан обиданинг Гўри Амир эканини жангчининг дубулғасига ўхшаш гумбазнинг афсонавий гўзал тарам-тарамларидан таниди. Қанча даврлар ўтса ҳам, бўёқлари худди бугун сурилгандай яп-янги турган бу ажойиб бинолар, уларнинг тантанавор кўриниши ва офтобда ғалати товланиши Бобурнинг қалбидаги зафар завқига яна завқ қўшарди.

Арқ жойлашган баландликка кўтарилаётганларида Бобур ўнгу сўлда кўринган айвонли уйлар ва ҳовлиларга кўз ташлади-ю, бирдан ўзининг асира қаллиғи Ойиша бегимни эслади. Ажаб эмаски, бегим мана шу уйлардан бирида дарча тирқишидан ғолибларга қараб турган бўлса. У бечора энди барча азоб-уқубатлардан қутулиб, Самарқанд қизлари орасида энг мўътабари бўлишини, ҳамма уни «ёш подшоҳимизнинг қаллиғи», деб эъозлашини билармикин?

Бобур отини Қосимбекнинг отига яқинлаштириб, паст овоз билан сўради:

— Асирлардан хабар олишга одам тайинландими?

Қосимбек бу саводнинг яширини маъносига тезда тушунолмади:

— Амирзодам, қайси асирларни айтурсиз?

Бобур отаси тенгли Қосимбекнинг олдида қаллиғини тилга олишдан уялар эди. У алланечук ийманиб қовоғини солганидан Қосимбек гап нимадалигини фаҳмлади-ю:

— Ха, асирларми? — деб, Бобур айтолмаган сўзни ўзи айтди. — Бу ишга Нуён Кўкалдошни тайин этганмен. Аввало Султон Аҳмад мирзонинг фарзандларидан хабар олишур. Қулинигиз айтганмен. Кечкурун Нуён сизга ахборот берур.

Арк ичига кирдилар. Бу ердаги энг улкан ва салобатли бино — тўрт қаватли Кўксарой эди. Кўксаройда жуда кўп фожиналар бўлган, талай шахзодалар шу ерда ўлдирилган. Шунинг учун Самарқанднинг сўнгги тождорлари Кўксаройда турмас эдилар, фақат машхур Кўктош устига чиқиб, таитана билан тахтга ўтириш маросимини ўтказар эдилар. Бобур ҳам арkning ўнг томонида жойлашган Бўстонсаройга тушди.

Оқшом Бўстонсаройда қандиллар ёндирилганда Бобур ўтирган хонаи хосга Нуён Кўкалдош кириб келди. Зар билан нақшланган бу хона ҳозир жуда совуқ эди. Улар шққови пустинларини ва телпақларини ечмасдан кўрпача устида ўтириб гаплаша бошладилар.

Нуён Кўкалдошнинг овозида илиқ бир ҳаяжон сезилди. Бобур подшоҳ бўлганидан бери улуғ беклар атрофини ўраб олиб, Нуён Кўкалдошдай тенгдошлари анча четга чиқиб қолган эди. Бугун оралари яна илгаригидай яқин бўлиб қолганидан қувонган Нуён тўлқинланиб сўзлай бошлади:

— Амирзодамнинг номларидан олтин билагузуклар, асл матолар, субҳони уриклар¹, лавзиналар² олиб бордик. Улуғ холагиз Меҳр Нигор хоним пешвоз чиқдилар...

Бобур ўз онасини эслади. Меҳр Нигор хоним — Қутлуғ Нигор хонимнинг туғишган онаси ва Султон Аҳмад мирзонинг катта хогини эди. Ойиша бегимнинг онаси ёшлигида ўлиб кетган, уни фарзандсиз Меҳр Нигор хоним тарбиялаб ўстирган, ҳозир ҳам унга она ўрнида ғамхўрлик қилар эди. Шунинг учун Меҳр Нигор хоним Бобурга ҳам хола-ю, ҳам бўлажак қайнона эди.

— Озиб кетибдилар, — деб давом этди Нуён. — Ошликдан³ жуда қийналмишлар. «Қаҳатчилик бўлиб, пулга ондиқ

¹ Субҳони урик — дааги ўрига мағиз солинган ўрик.

² Лавзина — бодом қўшиб ишланган ширинлик.

³ Ошлиқ — бу ерда дон, ун маъносида.

тошлмади қолди», дейдилар. «Зогора понга ҳам зер» бўлди, деб ййглаб юбордилар. Утин-чўплари ҳам йўқ экан. «Совукда дийдираб ўлтирибмиз», дейдилар.

— Бойсуқур мирзо шу қадар поинсофлик қилибдирми, а?!

— Мирзонинг ўзи ҳам охириги пайтларда қорни тўйиб таом емаган бўлса керак, амирзодам. Етти ой қамалда ётиш осонми? Кўчаларда очдан ўлган одамларнинг ўликлари ётибди. Фақир у бечоралар очдан ўлмаслик учун эшак гўштини, ит гўштини сийшгача етиб бормишлар... Биз бундан беҳабар эканмиз. Дарҳол қайтиб келиб, Қосимбек қавчинга учрадим. Бир арава ун, гуруч, бир арава ўтин, ўнга қўй олдик. Кейин ҳаммасини яна ўзим элтиб тоширдим. Шуида мени ичкари уйга таклиф қилдилар.

Нўён Кўкалдош сирли кулимеираб, бир лаҳза тараддулланиб турди. Бобур унинг ҳозир Ойиша бегим ҳақида ганирмоқчи эканини сезиб сабрсизланди:

Сўзланг, Нўён, сўзланг!

— Тиллақори уйда Ойиша бегим юзларига оқ инак нарда ёйиб қаршимдан чиқдилар... — Нўён бир тўхтаб олди. Ойиша бегим унинг кўзига жуда кичкина, порасида ўсмир қизчадек кўринган эди. У буни Бобурга айтишга журъат этмади. — Жуда нозик кўриндилар. «Хуш келибсиз», дедилар. Овозлари шундай майин, шундай соф.

Бобур Андижондан Ойиша бегимни ўйлаб келиб, энди кўришолмаслиги, кўришса одатга хилоф иш қилиб, маломатга қолиши, балки сабрсизлик қилган қаби қиз томони ҳам ранжитиши унга бедаво бир дард бўлиб туюлди.

Нўён Кўкалдош бу дардга дори тошмоқчига ўкшаб қўйишга қўл солади-ю, жажжигина оқ инак халтача олди.

— Ойиша бегимнинг помидан сизга буни Мекр Нигор хоним бериб юбордилар.

Бобур халтачани қўлига олганда ичида ҳеч нарса йўқдай туюлди. Бегимнинг очиб халтачани қафсига соқиб олган қанчалар икки дона гавҳар тўйди. Ҳар бири... аммо хўйла салмоғи бор. Жил... фис ва улугвор.

— Сиртига ҳам қаранг, — деди Нўён.

Нозик муночоқлар билан безатилган халтачанинг сиртига каштага ўхшатиб тикилган чиройли инак ёзуви Бобур энди кўрди. «Нажоткоримизга» деган биргина сўз унга бутун бир мухаббатномадек ширин туюлди. Ойиша бегим бу инак ёзуви олдиндан тика бошлаган бўлса керак. Акс ҳолда Нўён борган захоти тикиб улгурмас эди. Демак, у Бобурнинг нажот келтирилишига ишонган!

— Аммирзодам, кўлишгиздаги гавҳарларнинг тарихини эшиттинг,— деб давом этди Нўён.— Булар Султон Аҳмад мирзонинг саллаларига қадалган асл гавҳарлардан экан. Унинг мунгликлари тилак билдирдиларки, Султон Аҳмад мирзонинг шу гавҳарлари сиз билан бирга яна Самарқанд тахтига чиқсини, сизнинг азиз бошишгизда юз йил безавол норлаб турсин!

Султон Аҳмад мирзо тилга олинганда Бобурнинг кўнгли бир хира тортди. Аммо унинг кўлидаги гавҳарлар шундай мусаффо товланар эдики, уларда порлаган гўзал нур қайлиғининг кўзларидан нишона бериб турганга ўхшарди.

— Майли, мунгликлар тилагандек бўлсин! — деди Бобур Нўёнга.

Сўнг секин қарсақ чалиб, дасторпечни чақиртирди.

Дасторпеч бу гавҳарларни Бобурнинг тантанали маросимларда ўрайдиган салласига қадаб қўйди.

Шу оқшом Бобур ғойибона меҳр қўйган қаллиғини кўргиси келиб, ғазал ёза бошлади:

Жамолнинг васфини, эй ой, неча элдан эшитгаймен
Не қун бўлгай висолингга мени дил хафта етгаймен?

2

Қиш чилласи авжида. Изгиришли еллар эсади. Қўлоёқларига кишан солинган, кийимлари йиртиқ маҳбуслар Самарқанднинг Регистон майдонида совукдан калтираб шаҳар қозисининг ҳукмини тинглайдилар.

Ишончли амалдорларнинг аниқлашларига қараганда, булар Бобур мирзога хиёнат қилганлар — қамал пайтида унга махфий одам юбориб, «кечаси келишлар, дарвозани очиб берурмиз», деганлар. Бобурнинг бир даста ботир навкарлари Ғори Ошиқон олдидан қалъага ошиб ўтганда, хиёнатчилар уларни душманларига тутиб берганлар.

— Биз эмас! Тутиб берганлар қочиб кетмишлар! — йиғламоираб қичқирди маҳбуслардан бири.

Аммо унинг сўзига ҳеч ким эътибор бермади. Фармони олинга бинван жаллод уларнинг кўлларини орқаларига боғлаб, маҳсуе чуқур олдига чуққалагиб қўйди-да, бўғизларига халжар тортди. Қатл этилганларнинг иссиқ қони майдоннинг тошларига сачраб, совукда ховур чиқариб буғланар эди.

Кечаси бўралаб ётқан қор буinning ҳаммасини бекитиб, бор-

диқни опноқ қилиб кетди. Эртаси куни тушдан кейин ҳаво юмшаб, гумбазларнинг қорлари эриб туша бошлади.

Пешини намозидан кейин Бобур мирзо отланиб Самарқанд расталарини айлаишга чиқди. Ёнида эшик оға Қосимбек, Аҳмад Таибал ва Хонқули деган яна бир бек орқароқда навкарлар билан келишмоқда. Шаҳарнинг қаериди нима борлигини яхши биладиган самарқандлик кекса шоир Жавҳарий уларга йўл кўрсатиб, олдинда боряпти.

Улуғбек қурдирган улкан гумбазли хонақодаи ўтганларидан кейин Жавҳарий қунчиқиш томондаги кўчани кўрсатди.

— Амир Алишер Самарқандга келганларида мана шу кўчадан кўп ўтар эдилар. Мазкур кўчанинг охирида Алишербекнинг устозлари фақиҳ Абдуллайс истиқомат қилур эди. Уйлари ҳали ҳам бор.

— Сиз Мир Алишернинг суҳбатларида бўлганмисиз? — сўради Бобур.

— Ҳа, ёшимиз Алишербек билан теги эди, аммо фақир у зотни устоз ўрнида кўрур эдим, мудом ашъорларимни ўқиб бериб, маслаҳат олур эдим. Унутмаган эканлар, «Мажолисун нафос» номли китобларида фақирни ҳам тилга олмишлар.

Соқоллари опноқ, қошларига ҳам оқ тушган Жавҳарий ҳозир Бобурнинг ҳавасини келтирди. Қани у ҳам Навоийнинг назари тушган шоирлардан бўлса! Аммо Бобур ҳали машқ шеърлар ёзишдан нарига ўтган эмас, уларни бировга кўрсатишга уялади. Шундай бўлса ҳам катта шоир бўлиш орзусини ҳеч тарк этмайди. Мана шу орзунинг таъсирида бугун Бобур ўзига йўл кўрсатувчиликка Самарқанднинг машҳур бекларини эмас, Навоийни кўрган муътабар шоирни таклиф қилган эди.

Жавҳарий уларни новвойлар маҳалласига бошлади. Кўчалар алланечук ҳувиллаган. Босилмаган қор отларнинг тиззасига чиқади. Соя жойларда изгирин юзни ялаб ўтса ҳам, офтоб тушиб турган паҳса деворлар ва том бўғотлари эриган қордан ҳўл бўлиб борар эди.

Бобур томларга қаради. Бирортаси куралмаган. Том кураётган биронта одам кўринмайди. Новвойлик растасига келсалар, қатор дўконларнинг ҳаммаси ёниқ. Бобурнинг таажжуби ортиб, Жавҳарийга қаради:

— Мавлоно, новвойлар кўчиб кетганмилар?

— Мирзо ҳазратлари уч ойдирки, растага нон чиқмайди. Чунки ун йўқ. Қамалда кўп новвойлар очдан ўлиб кетди. Одамлар ҳолдан тойган. Томга чиқиб қор курашга ҳам мадорлари йўқ.

Бобур бунга сабабчи бўлган одамдек ўнғайсизланиб Қосимбекка қаради. Қосимбек эса шоирга кесатиброқ гапирди:

— Новвойларнинг тирш қолганлари ҳам бобур мавлоно?

— Албатта, бор. Лекин ёрдамга муҳтож. Қани энди амирзодам буюреалару новвойларга ун берилса. Расталар яна очилса, Самарқанднинг машҳур поиларидан одамлар тўйиб еса.

Бобур Жавҳарийнинг айтганини қилмоқчи бўлаётганини сезиб, Қосимбек бунинг олдини олишга интилди:

— Амирзодам, бизда ҳам ошлиқ оз қолди. Қўшинга заҳира керак. Расталарга ҳозир ун беролмасмиз. Балки кейинроқ...

Кекса шоир Бобурга умид билан қараб турибди... Шу пайт унинг қора мовут чакмоними, хиёл эгик елкасими, калта қирқилган соқолими, нимасидир Бобурга Навоийнинг Беҳзод чизган расмини эслатди. Бобур мавлонони поумид қилса, Навоийнинг умидини ҳам оқлодмайдигандай бўлди. У Қосимбекка буйруқ оҳангида гапирди:

— Биз уни расталарга эмас, новвойларга бермоғимиз керак. Ишончли бир киши назорат қилсин, новвойлар нон ёниб, бизнинг номимиздан очларга тарқатсинлар. Беш-олти қоп ун билан қўшин заҳирасиз қолмас. Жиззахга юборилган карвон эрта-шудин ошлиқ олиб қайтгуси!

— Саховатингизга офарин. Мирзо ҳазратлари!— деб Бобурнинг сўзларига фақат Жавҳарий қувонч билдирди.

Семиз тўриқ айгирининг жилзевидан тортиб турган Аҳмад Танбал мавлонога қараб пўнғиллади:

— Амирзодам Бойсуқурдан қолган очларнинг қайси бирига ошлиқ етказсинлар? Биз буларни боқишга келдикми?

Аҳмад Танбал, «амирзодам» деб, гўё Бобурга жон куйдириб гапирган бўлса ҳам, аслида Бобурнинг ҳозирги буйруғидан норозилиги сезилиб турарди.

Аҳмад Танбал Ушда Хонзода бегимга одам қўйиб ниятига етолмаганидан бери Бобурга қарши адовати аввалгидан ун хисса ортиқ бир қуч билан хуруж қилмоқда эди.

— Жаноб Аҳмадбек,— деди Бобур.— Биз Самарқандни боқиш учун келмаган бўлсак, талаш учун ҳам келган эмасмиз!

Танбал кеча заргарларни талатганини эслаб, кўзлари бир бежо бўлди. Аммо ўзини осойишта кўрсатиб:

— Сўзингиз тўғри, Мирзо ҳазратлари,— деди.— Бироқ шунча жангу жадал билан олган шаҳримиздан озгина ўлкадор бўлишга наҳотки ҳаққимиз йўқ? Ахир ғолибларнинг ўлжа олиши ота-боболаримиздан қолган русум-ку!

Танбалнинг гани навкарлар орасида турган Хонқулибекка жуда ёқиб тушгани унинг қулимсираб бош ирғаганидан билинди. Кўпчилик навкарлар ҳам Аҳмад Танбални ҳақ деб билар

эди. Самарқанддан дуруст ўлжа ололмаган бекларнинг барчаси норози бўлиб юргани маълум эди.

Шу топда Бобур ўзини икки ўт орасида қолгандай сизди. Беклару навқарларнинг кунлига қарай деса, бу ёқда раият очарчиликдан ўлапти. Раиятни очлик чапғалидан қутқазай деса, беклару навқарлар: «Булар нега бизнинг насибамизга шерик бўлади?» — деб дод солади.

Бобур Қосимбекка умид билан кўз тикди-ю:

— Очарчиликка фақат Бойсуңқур мирзо сабабчими? — деди. — Агар биз шаҳарни етти ой камал қилмасак, бу бахтсизлик бўлмаслиги мумкин эди-ку!

Қосимбек Бобурнинг Таибал қаршисида яккалашиб қолишини истамади-ю, мунозарани тезроқ тугатишга тиришди:

— Амирзодамнинг сўзлари қулингизга сари тож бўлсин! Эртагаёқ поввойларга ун бериб, очларга нон ёптириб тарқатишни мен ўз зиммамга олурмен!

Бобур Қосимбекка миннатдорона кўз ташлаб:

— Гап тамом, — деди. Сўнг Жавҳарийга юзланди. — Қани энди саҳҳофлар растасига ўтайлик.

Жавҳарий уларни қинғир-қийшиқ бир кўчага бошлар экан, Аҳмад Таибал, қовоқ-тумшуги осилиб, Бобурнинг кетидан эргашди. Кенг бир саҳнга чиқдилар. Ёниқ турган саҳҳофлик дўконлари кўришди. Икки дўкон оралиғидаги икки тавақалик дарвоза ичидан аввал қаандайдир шовқин эшитилди, сўнг оёқ яланг, бош яланг бир кампир дод солиб чиқди:

— Вой боламни ўлдирган худонинг ўзи ўлсин! Оч қолиб шишиб ўлсин!

Кампирнинг кетидан ўрта яшар озгин бир эркак югуриб чиқди-ю, отлиқларни кўриб, кўркқанидан бир лаҳза ағрайиб туриб қолди. Кампир ҳамон бор овози билан бақириб худони қарғарди:

— Худонинг ўзи қамалда қолиб ўлсин! Илоё менинг боламдай очдан ўлсин! Ўлсин!!!

Жавҳарий отини эркак киши томонга буриб:

— Мулла Қутбиддин нима бўлди? — деб сўради.

Мулла Қутбиддин энди ҳушини йиғиб, кампирга қараб чойди. Озгингина мадорсиз кампирни судраб ҳовлига олиб кириб кетди-да, эптикиб қайтиб чиқди. Қўл қовуштириб отлиқлар томонга келар экан:

— Афв этгайсизлар, — деди. — Оғамнинг заифаси фарзанд доғидан телба бўлиб қолди. Бечоранинг ўғилчаси очликдан кунжара сган экан, шишиб ўлди.

¹ Саҳҳоф — муқовачи. Китоб савдоси билан саҳҳофлар шуғулланган.

Огир сукунатда Бобурнинг:

— Яна бу шўрликлардан ўлжа олмоқчи бўлурлар! — деган кинояли сўзлари эшитилди-ю. Аҳмад Таибал билан Хонқулибекка ўқдай тегди.

Мулла Қутбиддин Самарқанднинг таниқли саҳхофларидан эди. Мавлоно ким келганини саҳхофга секин айтди. Мулла Қутбиддин кўндан бери очилмаган дўконини шоша-пиша очди. Бобур отдан тушиб, мавлоно билан бирга дўконга кирди. Мулла Қутбиддин бисотида бор энг нодир китобларни бир-бир олиб, чапларини артиб, Бобурга кўрсата бошлади. Қимматбаҳо зарҳал муковалар ичда Маҳмуд Кошғарий, Абдурахмон Жомий...Шарафиддин Али Яздийнинг Бехзод суратлари билан безанган «Зафарнома»...Абдураззоқ Самарқандий...Ҳа, мана, Навоийнинг «Мезоқул авзон». Бу китобни Бобур кўндан бери сўроқлаб юрган эди. У олтинга тошилмайдиган ажойиб китобларнинг кўплигини кўриб, афеонавий хазинага кириб қолгандай хаяжонланар, нуқул:

— Яна не бор? Яна? — деб сўрарди.

Мулла Қутбиддин ҳам бири-биридан ноёб китобларни унинг олдига қалаштириб ташлади. Машҳур хаттоғлар катта пуллар эвазига кўчирган, ҳар бир варағига нафис безаклар ишланган бу қўлёзма китобларнинг ҳар бири бир наъча минг динар туршини Бобурнинг ёнида турган Қосимбек ҳам билар эди. У Самарқанд хазинаси ишишийдан эканини, Андижондан олиб келинган олтинлари эса кўнга бормаслигини ўйлаб қараб турарди. Ниҳоят, Бобур ажратиб олган китоблар ўндан ошганда, Қосимбек секин ишишиди:

— Амирзодам, ҳозир хизоначи йўқ...

Китоблардан бошқа нарсани унутган Бобур Қосимбекнинг шамасини тушунмади.

— Хизоначини юборурмиз,— деди ва танилаган китобларни саҳхофга кўрсатди:— Ҳаммасини ҳисоблаб қўйинг. Китобдор билан хизоначи пулини тўлаб олиб кетурлар.

Мулла Қутбиддин қўл қовуштириб:

— Бош устига! — деди-ю, аммо унинг ниманидир айтолмай тараддудланаётгани Бобурга сезилди.

— Не тилагингиз бор, мулло? Айтинг, тортинманг. Китобларингиз бебаҳо!

Бобур бу китоблар учун молу дунёсини аямайдигандай кўришди. Саҳхоф дадилланиб:

— Мирзо ҳазратлари,— деди.— Ҳозир пулга ошлиқ тошилмайди. Болаларим «нон» деб йиглаб, ҳар кунни юракбағримни эзурлар. Агар иложи бўлса, озгина ун...

Бобурнинг кўз олдига бояги телба каминир келди-ю,

сахҳофанинг муҳтималигини оқдироқ сезмагани учун ўзидан койинди. Қосимбековнинг новвойлик растасидаги эътирозлари эсга тушиб, унга ҳеч нима демади. Яна бекларнинг жинини кўзгамастлик учун сахҳофга керакли нарсани сарой ошпазидан бериб юборишни кўнглига тугди. Саҳҳофга наслтовуш билан: — Ғам чекманг, — деди. — Тилагингиз амалга ошур. Хайр!

Бобур ташқарига чиқди. Аҳмад Тапбал ҳамон отидан тушмай ўйнайиб турар эди.

Шу кунни шомда китобларни олиб кетишга келган китобдор ва савдарлар сахҳофга сўраган нуқтани беришди-ю, унинг уйига бир қон ун ва битта семиз кўй тушириб кетишди.

Эртаси кунни новвойлик растасига Қосимбековнинг навкарлари бир арава ун олиб келганликлари, қор тагида совиб ётган таңдирларга ўт қаланиб, иссиқ нон ҳиди атрофга таралгани, отлик жарчилар подшо помидан очларга нон улаштирилишини эълон қилгани ҳамманинг қўлоғига бориб етди. Новвойлик растасига келиб, хушбўй бугдой пошининг таъмидан кўзи чарақлаб очилаётган очлар Бобурдан печоғлик мамнуи бўлсалар, тамағир бек ва навкарлар: «Бизнинг оғзимиздан олиб, авбошларга берди!» — деб, ёш подшоҳдан шувчалик норози эдилар. Самарқанддаги очлик ва танқисликдан безган бир қисм жангчилар Андижонга қайтиб кетишга нитила бошладилар.

3

Таңдирдан узилган нонларни қонга солиб чиқиб очларга улашаётган навкарлардан бири — Тоҳир эди. Аввал у ҳам: «Менга найза санчиб, ошанинг ўлимига сабаб бўлган ёғийларга хизмат қилгани келганими мен?!» — деб аччиқланди-ю, лекин у вада қийинлик бўйишлари келтиришга бўлиб қолган оч ўсмирларга, чолларга, аёлларга кўзи тушганидан кейин ҳовури босилди. Ичкаридан ола қонда иссиқ нон кўтариб чиқар экан: «Балки бу аёлларнинг орасида Робия ҳам бордир?» — деб ўйланди. — «Ёки Робияни кўрган билганлар учраб қолар?»

Тоҳирнинг бошида тулки телпак, эғнида почанўстин, сўнгги ойларда мудом отлик юриб, кадам олиши хийла ўзгарган. Узашига ўрганиб кетган оёқлари ерда аввалгидай равои одимлай олмайди. Аммо қўллари чавандозча бир чаққонлик билан қонга тез тушиб-чиқади.

Кўзлари дўқ очлар Тоҳирнинг ўзини эмас, нон улашаёт-

ган қўлларини кўришади, холос. Уларнинг кўзи, имилаб, кичик-кичик қадам ташлаб жуда секин ҳаракат қилишади. Йўлларида кичкина арққ ёки дўғлик учраб қолса, ўтолмай тўхтаб қолишади. Бақувватроқлари суяб, кўмаклашиб ўтказиб қўйишади.

Тоҳир одамларнинг ҳар бирини синчиклаб кўздан кечирилади. Наҳотки уларнинг орасида Робияни кўрган-билган бирорта одам бўлмаса?

Ана, бир аёл тўн ёпишиб, ярим ўгирилиб турибди. Тоҳир унинг ёнидаги кампирга қараб:

— Холалар, ораларингда андижонлик ёки қувалик аёллар борми? — деб сўради.

Кампир тожикча талаффуз билан:

— Уидоқалар йўқ, айланай,— деди.

Тоҳир юзлаб марта айтган сўзларини такрорлаб:

— Синглимин излаб юрибмисен,— деди.— Султон Аҳмад мирзонинг аскарлари Кувадан олиб қочиб кетганига тўрт йил бўлди.

— Бечора! — деб қўйди кампирнинг ёнидаги аёл.

Нарироқда нонга кўз тикиб турган бир киши сабрсизланиб йўталди. Тоҳир нон улашишда давом этар экан, ўттиз беш ёшлардаги, сийрак малла мўйловли новча бир кишининг қаршисида тўхтади.

— Сиз илгари навқар бўлганмисиз?

Юзи шишиқираган бу одам хавотирли товуш билан:

— Ҳа,— деди.

— Қачон?

— Кўп жил бўлди.

— Андижонга борганмисиз?

— Жўқ... берирогидан қайтқанмиз.

Бу одамнинг талаффузи ўшанда Робияни қонга солиб олиб кетган «жўқ»чи йиғитларни эслатди-ю, Тоҳирнинг вужуди қалтираб кетди. Эҳтимол, бу ўша босқинчиларнинг биридир?

Тоҳир орқасига ўгирилиб, новвойхона томонда турган шеринини чақирди. Қоннинг тагида қолган нонларни унга берди-ю; малла мўйловли кишини биллагидан олиб бир четга бошлади. У одам кўрқувдан бўшашиб, каловланиб, тўхтаб қолди:

— Укажон, мен бир бечора одамман! Мени қўйиб жубаринг! Нонга келиб эдим... Нонга!..

Тоҳир калаванинг учини шу одам топиб бериши мумкинлигини сезиб, мулойимроқ гапиринга тиришди.

— Нон оласиз. Сизга кўпроқ нон берамен. Менга рости айтинг. Султон Аҳмад мирзода навқар бўлганмисиз?

— Бўганмен.

— Андижондан беридаги Қуванинг кўпригидан ўтган-мисиз?

— Қайси кўприк? Синиб кетиб, бизни хароб қилган кўприкма?

— Худди ўзи!— деди Тоҳир ғазаб аралаш қувонч билан. Мана, ўша босқинчи! Тоҳир унга ҳозир ханжар урса бир аламдан чиқар эди. Аммо Робия нима бўлади? Буни ўлдирса, Робияни кимдан сўроқлаб тонади?

Тоҳир малла мўйловли йигитни ёқасидан олиб қаҳр билан силкитди:

— Робия қани? Айт тезроқ!

Очликдан дармони кетиб, зўрға юрган йигит Тоҳирнинг силталашидан тўкилиб, парчаланиб кетадиганга ўхшарди. У нафаси ичига тушиб:

— Қа-қайси Рокия? — деди.

— Рокия эмас, Робия! У қизни Қувадан олиб қочиб қаёққа олиб бордиларинг? Ҳозир қаерда? Ростини айтманг, калангни оламен! Айт!

— Ука! Укажон! Мен Робия деган қизни кўрганам жўқ. Ўлдирсанг, майли, ўлдир, лекин мендан бекорга гумон-сиррама, ўшанда мен қиз обқочадиган аҳволда эмас эдим. Туғушган укам кўприкдан жигилиб, сувга оғиб ўлди. Қамишларнинг орасидан уч кун кидириб ўлигини тополмадим. Балчиқ жутиб кетган экан.

Тоҳир ўша кўприкни ўзи бузганини эслади, малла мўйловли йигитнинг кўзлари ёшланганини кўрди-ю, унинг ёқасини қўйиб юборди.

Робияни қонга солаётган «жўқ»чи йигитлардан бири иккинчисини «Жуман» деб атагани Тоҳирнинг ёдида қолган эди. У қаршисида кўзлари мўлтираб турган одамга тикилиб:

— Отинг нима? — деди.

— Отим Мамат.

— Маматми ё Жуманми?

— Ука, ишонмасангиз, мана шу маҳалланинг одамларини чақириб сўранг. Отим Маматлигини ҳамма билади. Ўзим кўнчи косибман.

Тоҳир ўзича ўйланди: «Агар укаси Қувада балчиққа ботиб ўлган бўлса, бу ҳам меннинг гирибонимдан олишга ҳаққи бор!» Шу ўй таъсирида Тоҳир жаҳлидан тушди. Маматга яна «сиз» лаб гапира бошлади:

— Жуманин билармидингиз?

Мамат пешонасини ушлаб, ниманидир эшлашга тиришди:

— Тўхтаг, тўхтаг, Жуман маймоқ деганимиз булар эди. Шериклари билан ўша ёқдан иккита қиз обқочиб келган деб эшитиб эдим.

— Самарқандга олиб келганми?

— Қизларини? Бунисени билмадим. Ҳратенанинг нарёнида Оқсув деган сой бор. Оқсувга жетганимизда подшомиз ўлиб қолди. Ҳшанда бир алғов-далғов бошланди, мана ҳалигача босилмайди. Навкарлик ҳам жонимга тегди, бўшаб кетдим.

— Жуман маймоқ ҳозир қаерда?

— Билмадим-ов. Уч-тўрт жылдан бери кўрган эмасман. Баттарин жигит эди, ўлиб кетдима ё бошқа подшоининг хизматига ўтиб кетдима. Подшо ҳам кўп-қу. Тошкентда Махмудхон дегани. Туркистонда Шайбонийхон дегани, Ҳисорда яна бирови.

— Бу подшоларининг уруш-жанжаллари бошларидан қолсин! — деди Тоҳир кўюниб. — Сиз бир қосиб бўлсангиз, Мен бир дехқон эдим. Келиб-келиб биздай захматқашларини бир-биримизга дунман қилиб қўйган замонанинг уйи куйсин!

Мамат Тоҳирининг ханжар изи қолган юзига энди ботишиброқ қаради:

— У қиз қимшигиз бўлар эди, ука? Синглишигизмиди?

— Қўзимнинг оқу қароси эди!

Мамат гап нимадалигини фаҳмлаб, Тоҳирга хиёл ҳайратланиб тикилди. Сўнг унинг армон тўла кўзларини кўриб, бу йигитга ўзини аллаичук яқин сизди ва унга таъзалли бергисен келди:

— Ҳудо хоҳласа товилади! Менинг таниш-билшларим кўп, ука. Сўроқлайман. Хотинимга айтаман. Аёллардан суриштиради.

Маматнинг астойдил ёрдам бермоқчи эканини сезган Тоҳир уни енидан олди-ю:

— Бу ёққа юринг, — деди. Маматни поввойхонанинг йўлагига олиб кирди-да, ичкаридан тўртта нон олиб чиқди.

— Олинг! Сиз бу ерга нонга келган эдингиз.

Мамат нонларини титроқ қўллари билан олиб, қўйнига тикди. Иссиқ буғдой нонининг ҳиди ва тафтидан оғир-оғир нафас олиб, устма-уст ютинди. У ҳар қанча оч бўлса ҳам Тоҳирининг олдида дарҳол нон қавшашдан ўзини тутди. Фақат нонининг ҳидидан маст бўлгандай эзмаланиб гапира бошлади:

— Нондай азиз бўлинг, ука. Биз кўрган қунларини ҳеч кўрмапмиз! Кўлдан берганга қуш тўймас. Ҳотиб жесап бу нон икки қунга ҳам жетмайди. Лекин мен шуницг кучи билан қишлоғимга жетиб оламан. Ана у товнинг орқасида оға-нииларим бор. Биз ўзбекнинг қўянқулоқ уругиданмиз. Қишлоғимга жетиб борсам, бир-икки қон ғалла товиб келаман. Лекин бўш қон тикка турмас экан, ука. Битта чўбир отим бор эди, қузда сўйиб жиб қўйдик. Пиёда кетай десам, оч одам товда жигилиб совуқда қотиб ўламан деб кўрқдим. Мана энди кўрқмасам бўлади...

— Мен сизни қасрдан товамен? — деди Тоҳир унинг аввалги ваъдасини эслатиб.

— Кўнчилик гузарда уйим бор. Мамат полвои десангиз, ҳамма билади. Бир вақтлар полвои эдик, ука. Мана энди гавдамизни зўрга кўтариб журибмиз.

— Десангизда бўлсин, кизнинг оти Робия.

Мамат полвои бу номни бир-икки такрорлаб хотирасига жойлагач:

— Агар хабари чиқса, сизни қасрдан товаман? — деди.

— Қосимбекнинг навқаримен. Отим Тоҳир.

Хўн, Тоҳирбек, мен сизни қидириб товамен. Бизнинг одамлар сизга жамаилик қилган бўлса, сиз менга жахшилик қилдингиз. Бу жахшичилигини албатта қайтараман. Хайр!

Тоҳир унинг орқасидан қараб қолди. Қувада укасининг балчиққа ботиб ўлганига мен сабабчи бўлганимни билса нима қиларкин? — деб ўйланди.

Мамат эса нарироққа бориб шоша-пиша қўйинга қўл тикди-ю, пестик вондан бир бурда узиб олиб, тез оғзига солди.

4

Андижонлик бек ва навқарлар «Самарқандни олсак ҳамма мушкулларимиз осон бўлади», деб ўйлаган эдилар. Бироқ энг катта ишқалликлар Самарқанд олингандан кейин бошланди. Учининг кишилик қўшинининг беш-олти минг от-улови бор. Қаҳратон қишда қамалдан абгор бўлиб чиққан шаҳарда на очларни тўйдириб бўлади, на қўшинга озиқ-овқат етказиб бўлади, на отларни сэм-хашак билан таъминлаб бўлади. Шаҳар дарвозалари очилган, бу ёғи Ўратенагача, бу ёғи Қаршигача барча томонларга туя қарвонлари жўнатилган, бозор ва расталарни тирилтириш учун турли чоралар кўриляётган бўлса ҳам пойтахтда ҳаёт ҳали-бери изга тушадиганга ўхшамас эди. Самарқанд сўнгги йилларда кўн марта қўлдан-қўлга ўтиб, даҳшатли талон-торождлардан кашшоқланиб қолган эди.

— Бу мушкуллар кўз очиб-юмгунча ўтиб кетгай,— деб, машваратларда Бобурнинг устози Хўжа Абдулла андижонлик бекларни сабр-қаноатга чақирар эди:— Баҳор яқин, вишиқчиликка етсак, оғир қунларни кўрмагандек бўлиб кетурмиз. Таққисликлар ўтур, аммо бу ёғи Қаршию Шаҳрисабзгача, у ёғи Ўшу Ўзгангача — шундай улўф мамлакат қолур. Таиғрим бизга шундай катта кишварни шоят қилгани учун, биз Самарқанддай оламшумул доруссалтанага муяссар бўлганимиз учун шукроналар айтмоғимиз керак. Бобур мирзонинг орзулари шудким, Мавароуннаҳр яна Улўгбек давридаги каби

бирлашса, пойтахт аслига қайтса, ҳамма вилоятлар ҳам-жиҳату обод бўлса: Амирзодамнинг бу орзулари сизу бизнинг муқаддас мақсадимиздир. Илоҳи омин, парвардигори олам бизни бу мақсадимизга ҳам етказсин!

Бу гаплар Хонқулибек ва Аҳмад Таибалга ўхшаган бекларнинг гашига тегса ҳам улар машваратга тўпланган бошиқа беклар қатори:

— Илоҳи омин! — дейишиб, юзларига фотиҳа торгандилар. Четдан қараган одам буни яқдиллик белгиси деб ўйлайди.

Аммо беклар машваратдан янги бир вазифани зиммаларига олиб, уй-уйларига тарқалганларидан кейин килватда иккита-учтадан бўлиб олиб, гийбатга тушиб кетишади:

— Хулласи калом, Бобур мирзонингиз Улуғбекдек улуғ одам бўлмоқчи эканлар-да, Аҳмадбек? — сўрайди Хонқулибек истехзо қилиб.

Улар бахмал кўрна ёнилган иссиқ сандалнинг икки четида ўтириб кечки таомни бирга смоқда эдилар. Аҳмад Таибал қазидан бир нарра олиб, киноя билан кулди:

— Ҳа, Бобур мирзонингиз улуғ одам бўлишлари учун яна биргина нарса етмай турганмиш..

— Ҳўш?

— Бугун машваратда айтдилар ку! Самарқанд деҳқонлари очарчиликда уруғлик донларини еб қўйган эмишлар. Биз Қаршига карвон юбориб олиб келган донларимизни деҳқонларга қарз берур эмишимиз.

— Дард устига чиққон!

— Илож қанча, Хонқулибек! Ёш подшоҳимиз улуғ бўлишлари учун ҳаммасига чидасиз. Яна бу кишим Самарқандга қуёвлар, қайлиқлари бор. Домод раиятга ўзларини яхши кўрсатмоқлари зарур. Бу ҳам етмагандай, ёш подшоҳимиз ҳар ҳафтада шоирларни тўплаб мушоира ўтказмоқдалар.

— Шоир ҳам бўлмоқчилар шекилли-да!

— Ҳа, бизнинг насибамизга қасқдаги шоирларни ҳам шерик қилганлари ана шу сабабдан! Хазинадаги олтинларни созуриб, қатор-қатор қимматбаҳо китоблар олишлари ҳам ана шундан!

Хонқулибек соқолини гижимлаб:

— Этак силкиб Андижонга кетай десам, рухсат бермайдир. — деди. — Тангри ҳақки, Бобурингиздан тўйдим, Аҳмадбек! Аҳмад Таибал заҳарханда қилиб кулди-да, ўрнидан туриб эшикни зичлаб ёнди. Жойига келиб ўтиргач:

— Хонқулибек, — деб товущини насайтириб ганира бош-

лади,—беклар бўлмаса, подшоҳларнинг ижидан ҳеч иш келмайди. Навкарнинг кўпчилиги бизники. Жангни биз қилдик. Азобни биз тортдик. Энди бундай муте бўлиб, ёш йигитчадан руҳсат сўраб ўтирмоғимиз не керак?

— Ганингиз рост! — шивирлади Хонқулибек. — Подшо бўлса ўзига! Руҳсат бермаса бермасни, мен бари бир кетурмен!

— Мен ҳам бу ерда хор бўлиб юрмоқчи эмасмен. Омон бўлсам, подшоҳ тошидур. Ахсида Жаҳонгир мирзо бор. Бухорода Султон Али мирзо бор. Буларнинг уруғи кўп. Ҳаммасига сизу биздек беклар керак. Сизга менинг маслаҳатим — Андижонда кўп турманг. Илққа тушиб қолурсиз.

— Ахсига борайми?

— Ҳа, Ахсида Узун Ҳасанга учранг. Сизни Жаҳонгир мирзонинг хизматига олур.

— Олурмикин? Балки Жаҳонгир мирзо Бобурга қарши борадими?

— Сизу биздай беклари кўнайса борур! Жаҳонгир мирзо Андижон тахтига ишқибоз...

...Икки бек шу кунги ганини бир жойга қўйдилару эртаси кунги кечаси Аҳмад Таибалнинг ишончли одамлари Феруза дарвозасида соқчилик қилаётган пайтда Хонқулибек элликгача навқари билан секин шу дарвозадан чиқиб кочди. Орадан бир ҳафта ўтгач, Аҳмад Таибалнинг ўзи Зоминга қарвойни кўзатиб бориш баҳонаси билан навқарларини эргаштириб кетди-да, Самарқандга қайтмай, тўғри Ахсига йўл олди. Шундан кейин шаҳардан ташқарига зарур иш билан юборилган бек ва навқарларнинг қайтиб келмаслик ҳоллари тобора кўпая бошлади. Кечалари қалъа деворларидан ошиб тушиб қочаётганлар бунинг устига қўшилди. Қишининг охирига бориб Самарқандга Бобур билан келган бек ва навқарларнинг ярми ҳам қолмади. Одами жуда сийраклашиб қолган Бобур кетганларни қайтариб келиш учун энг содиқ беклардан бирини Андижонга юборди. Бироқ орадан йиғирма кун ўтгач, бу бекни Аҳмад Таибал ва унинг тарафдорлари Андижон билан Ахси оралиғида тутиб олиб ўлдирганлиги ҳақида хабар келди. Фарғона водийсида ёмон бир фитна бошланганига энди шубҳа йўқ эди.

Фитначи бекларнинг бир қанчаси Хўжа Абдуллага қўл бериб, унга мурид бўлганликлари маълум эди. Бобур Қосимбек билан маслаҳатлашиб, охири Хўжа Абдуллани Андижонга юборди. Бобур тахтга ўтирган кезларда Хўжа Абдулланинг ганига кирган Узун Ҳасан ва бошқа фитначи беклар бу гал унинг насихатларини ваъдаларига мутлақо қулоқ солмадилар.

Ниҳоят, **фитначилар** Андижонга ҳужум қилдилар. Хўжа Абдулла бошлиқ содиқ беклар шаҳар дарвозаларини беркитиб, қамалда қолдилар.

* * *

Бу мудҳиш хабар Самарқандга келганда Бобур қаттиқ бетоб бўлиб, Бўстон саройининг иккинчи қаватидаги хобгоҳда иситмалаб ётган эди. Андижондан келган чопар ўрам қилиб сўрғичланган мактубни ясовулга кўрсатди-ю, аммо бермади:

— Ҳазрати хоним «амирзоданинг ўз иликларига беринг», деб буюрганлар!

Бобур ҳар куни неча қайта «Андижондан чопар борми?» — деб сўрар эди. Ясовул чопарни дарҳол юқорига бошлади.

Хобгоҳ эшиги олдида уларни Бобурнинг шахсий табиби бўлган кичик жуссали мўйсафид тўхтатди:

— Бу китобатни аввал Қосимбек ўқимоқлари керак. Агар хушxabар бўлса, кейин амирзодамга берурсиз.

— Оналари буюрганлар, устодлари Хўжа Абдулла ҳам тайинлагацлар, амирзодамнинг ўзлари ўқимоқлари керак.

— Ёмон хабар Мирзо хазратларини хароб қилиши мумкин! — деди табиб куюниб. — Асли ўзлари тумовлаб тузалиш арафасида эдилар. Ташвиш устига изтироб, изтироб устига кулфат, ҳаммаси қўшилди-ю, муолажани охирига етказмай туриб кетдилар. Мана бугун узликиб аҳволлари оғирлашиб ётибдилар!

— Андижон хавф остида. Агар тезроқ билдирмасак, кейин кеч бўлур, биздан норози бўлурлар!

— Йўқ, мен ҳозир ижозат бермайдирмен!

— Жаноби табиб...

— Йўқ, йўқ!

Бу баҳс ичкарида ётган Бобурнинг қулоғига чалинди. У баланд товуш билан:

— Чопар бўлса кирсин! — деб буюргандан кейин, табиб чопарга йўл берди.

Бобур катта танобий хонанинг тўрида ердан бир газча баланд қилиб солинган нарқу тўшакда ётган эди. Чопар тўшакдан анча берида юкунди-да, тиззасида сирғалиб бориб, мактубни Бобурга икки қўллаб узатди.

Иситманинг зўридан бўғриқиб ётган Бобур ёнбошга туриб, мактубни титроқ қўллари билан очди. Ичма-ич иккита хат. Бирида Хўжа Абдулланинг имзоси. Бирини Қутлуғ Ни-

гор хоним ёзган. Улар лажови ҳам Андижоннинг даҳшатлиги аҳвол, қамал тафсилотлари ҳақида ёзишган. Бобурдан бошқа пажоткорлари йўқлигини айтишиб, тезроқ етиб келишини илтижо қилишган эди.

Андижон қуршовда! Фитначи беклар Андижон тахтига Жаҳонгир мирзони ўтказмоқчилар. Аҳмад таибалини лашкарбоши қилишиб, Бобурдан ота юртини тортиб олмоқчилар! Бобур уларни бунчаликка боради, деб ҳеч ўйламаган эди. Тўсатдан унинг устидан бир челақ совук сув қуйилгандай бўлди-ю, аъзойи бадани музлаб, бўшашиб, боши ёстиққа «шилқ» этиб тушди. Тамом!

Таибал билан Жаҳонгир ғалаба қилса, уларнинг томонига қочиб ўтувчилар яна қўпаяди. Бобур ким билан қолади? Балки ҳозир ҳам Таибал томонга қочиб ўтаётганлар бордир? Балки Қосимбекнинг ўзи ҳам... Қутилмаганда хаёлига келган бу ўйдан Бобур шундай даҳшатга тушдики, бутун кучини тўплаб, ўрнидан санчиб турди:

— Қосимбек қани??!

— Ҳозир келурлар, одам юбордик.— деди табиб муллоим товуш билан.— Амирзодам, ётнинг, сизга ором керак!

Бобурнинг хаста хаёлида бирдан қилич тутган Таибал гавдаланди. Бобур бу қиличчи таниди. Ўшда Таибал шу қиличчи ўлиб, «то ўлгунимча содиқ қулишгизман», деган эди. Таибал ўша қиличчи ҳозир гўё Бобурнинг боши устидан ўйната бошлади... Таибалнинг оёғи остида тоғдан хуржунга солиб келинган қаллалар юмалаб ётипти. Уларнинг бири танишга ўхшади. Қутлуг Нигор хонимнинг боши... Бобур алаҳсираб кўз олдига келтирган бу қўрқинчли хаёл уни гўё тўшакдан отиб юборди. У гилам устидан ички кийимда оёқ яланг турганича:

— Шамширчи беринг! — деб қичқирди.— Менга шамширчи беринг!

Табиб уни маҳкам қучоқлаб олди:

— Амирзодам, хастасиз, ётмоғингиз керак... Амирзодам!— Табиб Бобурни гўё Таибалнинг қиличига тутиб бермоқда эди. Бобур унинг қучоғидан юлқиниб чиқиб, эшикка интилди:

— От келтиринг! Мен Андижонга борамен! Шамшир қани? Бекларга хабар беринг! Тезроқ тайёрлансинлар!

Табиб унинг кетидан югурди. Дасторпеч Бобурнинг ким-хоб тўнини олиб бориб елкасига ёпди, оёғига кавушини берди. Бобур кавушнинг бир пойини кийди-ю, иккинчисини кийишга тоқати етмади. Унинг боши гир-гир айланар, ҳаво етишмай, нафаси қисилар эди. Кўз олдига ҳамон ўша қонли қилич ва кесик қаллалар.

— Хонн! — деди у Танбалга қарата. — Қонхўр!
Бобур айвон эшигига қараб чоңди. Лекин эшик олдида
гандираклаб йиқилди. Табиб билан дасторич унн беҳуш
аҳволда тушакка кўтариб келиб ётқизишди.

Сўнг у ярим кечага бориб сал ҳушига келди. Кўзини
очиб, оғзига пахтадан сув томизаётган табибни кўрди. На-
зарида, тили шишиб, шундай катта бўлиб кетган, эдики,
бутун танасини тоғдай босиб ётарди. Бобур кўзини очга-
нини сезиб, Қосимбек уннинг тепасига келди:

— Хайрият-е!.. Амирзодам, бизни мунча кўрқитдингиз?
Бобур кўзлари мўлтираб шмадир демоқчи бўлди, аммо
беҳад оғирлашиб кетган тилини қимирлатолмади.

— Энди яхшимисиз, амирзодам?

Бобур жим. Қарайди-ю, гапиролмайди. Уннинг тилдан
қолганини сезган Қосимбек кўзидан тирқираб чиққан ёшни
кўрсатмаслик учун юзини четга бурди.

АНДИЖОН.

УВОЛ БЎЛГАН ОРЗУЛАР

1

Тун қоронғиси устига осмонни қуюқ булут қоплади-ю,
қалъа ичини зулмат босиб кетди. Андижон кўчалари таҳ-
лиқали бир сукутга чўмган. Жимжит кечада арк дарво-
засининг гийқиллаб очилгани узоқларга эшитилди. Дарвоза-
хонадан тушган хира ёруғда аркдан чиқиб келаётган бир
тўп қуролли отликлар кўришди. Олдинда эркакча тўн ва бўрк
кийган, белига камар боғлаб, ханжар осган Хонзода бегим.
Уннинг навкарлари орасида келаётган мавлою Фазлидин
ҳам тўннинг устидан ҳарбийча камар боғлаб, белига қилч
тақиб олган.

Самарқанддан қайтган чопар Бобурнинг ҳаёт билан ўлим
орасида беҳуш бўлиб ётганини айтиб бергандан кейин қалъа
ҳимоячиларининг бир қисми фитначилар томонга қочиб ўтиб
кетди. Қўрғон деворларининг ҳар бир газини кўриклаб турши-
га одам етишмай қолди. Қоронғи тунда душманининг деворга
нарвон қўйиб, ошиб тушиш хавфи кучайди. Ун олти ёшида
шўхлик билан йигитча кийиниб, чавгон ўйнаб юрган Хонзода
бегим энди чинакамга қуроллашиб, ҳаёт-мамолари қил усти-
да турган қалъа ҳимоячиларига қумаққа боряпти.

Қуюқ қоронғиликда отларнинг тақалари кўча тошларига
урилиб учқун чиқаради. Ҳаводан ёмғир ҳиди келади, майин

шабада эсади. Мавлоно Фазлиддин баҳор кирганини, қалъа ичидаги боғчаларда ўрик ва бодом гуллаганини эслади ва атрофига ситчиқлаб қаради, аммо биронта оқарган нарса кўзига чалшмади. Тун бутун борлиққа қон-қора гарда тортиб қўйган эди.

Мавлоно Фазлиддин мана шу шаҳарда қурмоқчи бўлган мадраса ва сарой тарҳини Хонзода бегимга кўрсатиб, унинг мақтовини эшитган ёруғ кунларини эслади-ю, юрагини армон гижимлаб ўтди. Бобур Самарқандни олгани ҳақида хабар келгандан кейин мавлоно Фазлиддин орзусини энди амалга ошишига астойдил ишонган эди. Хонзода бегим ҳам уни бир неча марта ўз хузурига чақириб, бўлажак қурилушларга қасрдан ўрин ташлаш ва тайёрлик ишларини қандай бошлаш ҳақида узоқ-узоқ гаплашган эди.

Арқдан чиққан отлиқтар қоронғида тўсмаю билан қалъанинг Мирзо дарвозаси томонга борар эканлар, мавлоно Фазлиддин олдинда хомуш кетаётган Хонзода бегимнинг ўша суҳбатлар пайтидаги маъсум ва шод киффасини эслай бошлади.

Одатда Хонзода бегим уни қаизлари билан истиқомат қиладиган олти хоналик сиркор уйининг ташқи бўлмасида қабул қилар эди. Бегим эркаклар билан гаплашганда махсус ишланган инак парданинг ортида ўлтиради. Лойиҳанинг баъзи жойларини сўз билан изохлаш мушкул бўлиб қолса, Хонзода бегим орадаги пардани очиб:

— Қани, гумбаз билан мишорлар орасида целар бўлур? — деб сўрайди.

Улар иккови икки томондан қоғоз устига элганганлариди ҳоҳ нафаслари бир-бирлариникига кўшилиб кетгандай бўлади. Мавлоно Фазлиддин ўшда, қоятон устида биринчи марта бошидан кечирган ажойиб туйғу яна борлигини маст қилади. У шундан бошқа нарса ҳақида гап очинга кўрқади, атрофларида юрадиган қаизларга ҳаяжонини сездирмасликка тиришади. Қутлуғ Нигор хоним дуч келиб қолса, эгилиб таъзим қилиш билан кўзини ундан яширади. Бироқ сўнгги марта учрашганларида Хонзода бегимнинг ўзи тўсатдан:

— Мавлоно, нечун шу ёнғача уйланмагансиз? — деб сўраб қолди.

Қиз асязодаларга ҳос бир назокат билан ўзини эркин тутиб кулимсираётган бўлса ҳам кўзининг ҳаёдан ялтиляб кетганини мавлоно Фазлиддин пайқади. Мавлоно сирини очилиб қолишидан кўрқиб, ҳазил билан қутулмоқчи бўлди:

— Бегим, фақир дунёдан тоқ ўтмоқчимен.

— Менга ўхшабми?

— Йўқ, бегимнинг тоқ ўтишларига ақлим бовар қиямай-дир.

— Не сабабдан?

— Ахир сиз... бу дунёда... не-не шахзодалар, аслзодалар бор.

— Бўлса бордир. Аммо мавлоно ўзлари билган шахзода-ю аслзодаларнинг қайси бирига... мени муносиб кўрурлар?

— Агар бўлса, фақат Фарҳодни сизга муносиб кўрур эдим.

— Нечун фақат Фарҳодни?

Мавлоно жавоб тополмай тараддудланган эди, Хонзода бегим яна савол берди:

— Фарҳод ҳам сиздек меъмор у бинокор бўлгани учундир?

— Бундай дейишга фақирнинг ҳаддиди етмайди.

Мавлоно маънос бўлиб айтган бу сўзлар Хонзода бегимни ҳам маънослаштириб қўйди. У оғир тин олди-да:

— Худойим мени нега шоҳ кизи қилиб яратди экан? — деди. — Мен ҳам фақир бир киз бўлсам, бахтимни топишим балки осонроқ бўлур эди...

Мавлоно Фазлиддин бегимнинг бу сўзларини ҳар элаганда кўнгли бир даража кўтарилади. Демак, Хонзода бегим унинг муҳаббат дардини билади. Биладигина эмас, балки ўз қалбида унга ҳамдардлик ҳам сезади. Шоҳ кизи билан оддий меъмор орасидаги тоғдай фарқлар бегимни ҳам эзди. Агар Хонзода бегим унга астойдил кўнгли берса, мавлоно бу тўсиқларни енгиб ўтиши мумкин эмасми-кан? Ўшда қурган кичик бир хужраси учун Бобур мирзо уни шунчалик эъзозлаган эди. Энди агар бу водийда катта обидалар қурса, мавлононинг обрўси баъзи аслзодаларникидан кам бўлмаслиги мумкин. Бобур тағти йиғит, опасини яхши кўради. Балки уларга марҳамат кўрсатар. Бундан қатъи назар, мавлононинг меҳрига Хонзода бегимнинг қарши эмаслиги, у билан учрашиб туришга майли борлиги — мана шунинг ўзи ҳам мавлононинг қалбини ҳароратли, ёруғ туйғуларга тўлдириб юар эди.

Бироқ Андижон қамалда қолгандан кейин мавлононинг орзу-умидларини мана шу тун каби қоронғи зулмат ўз қаърига тортиб кетди. Барча лойиҳалари керакениз қоғозга айланди. Мавлоно Фазлиддин урушин ҳам, навкарликни ҳам бутун вужуди билан ёмон кўрар эди. Бироқ бугун аркка бориб Самарқанддан келган ёмон хабарни эшитди ва Хонзода бегимнинг қуролланиб чиқаётганини кўрди-ю, лоқайд қараб туролмади. Бу мушкул вазиятда титраб-қалтираб, тақдир зарбасини кутиб ўтиргандан кўра, қурол билан ҳимояга чиқини яхшироқ эканини сезиб, умрида биринчи марта белига қилч тақди. Мана, ҳозир ваҳимали қоронғиликда сув

қуйгандай жимиб ётган шаҳарни оралаб борар экан, бир неча қадам олдинда Хонзода бегим ҳам кетаётгани, мавлоно уш шу навкарлар қатори ҳимоя қилиши мумкинлиги қўнглига бир қадар таскин берарди.

Улар Мирзо дарвозасига яқинлашганларида қалъа ташқарисидан бирдан қарнай ва нақора чалинган. юзлаб навкарларнинг қичқириқлари эшитилди. Хонзода бегим орқага ўгирилиб:

— Ёғий дарвозани очмоқчи! — деди-ю, отининг бошини қўйди. Бошқалар унинг кетидан от чоптиришди.

Ёғининг бир қисм кучлари Мирзо дарвозаси қаршисидан ғавғо қўтариб, қалъага ёғиб турган ўқлар отаётган пайтда бошқа бир гуруҳ навкарлар қалъанинг пана томонига нарвон қўйиб, секин чиқиб келмоқда эдилар. Девор шинакларидан бирида ўтирган қоровул йигит буни сезиб қолди-ю, дарвозахона тепасида машъала ёруғида одамларга иш буюриб турган Хўжа Абдуллага қичқирди:

— Пирим, ёғийлар бу ёқда нарвон қўйиб чиқмоқдалар! Нарвон!!

Хонзода бегим навкарлари билан ўша қоровул турган жойга бориб отдан тушди. Навкарлардан бири машъала ёқди. Унинг ёруғида деворга чиқиладиган зинапоя қўришди. Мавлоно Фазлиддин девор тепасидаги хатарга Хонзода бегим ҳаммадан аввал рўбарў бўлишдан қўрқди-ю, зинапояга биричи бўлиб қадам қўйди. Шинакка етганларида бегимнинг қўлидаги машъаласини олди:

— Эҳтиёт бўлинг, бегим, ёғийга қўршманг!

Деворга ташқаридан қўйилган кенг нарвонларнинг учлари хиёл чиқиб турар эди. Ёрдамчилар етиб келганидан дадилланган бояги қоровул йигит нарвонлардан бирини икки қўллаб итариб, ағдариб ташлаётган пайтда пастдан зарб билан отилган ёй ўқи унинг қўкрагига қадалди. Бечора йигитни ушлаб қолишга улгуролмадилар — нарвон билан бирга қалъадан ташқарига учиб кетди.

Шинак атрофига қиррали тошлар тайёрлаб қўйилган эди. Хонзода бегим шу тошлардан бирини икки қўллаб олди-ю, пастга отди. Бошқа навкарлар ҳам нарвон қўйилган жойнинг пастини мўлжаллаб тош ота бошлади. Пастда эшитилган дод-войлар ва ниграшларга қараганда, бу тошлар мўлжалга теғмоқда эди.

Шу пайт қалъанинг нариги четида — Хақан дарвозаси томонда қўшқарнайларнинг ғат-ғати, табл ва нақора товушлари, аллакимларнинг ғолибона қичқириқлари эшитилди. Мавлоно Фазлиддин шовқин келаётган томонга қулоқ солиб ту-

риб кўрқиб кетди. Бу галги ғавго шаҳар ичида кутарила-
моқда эди.

— Бегим, қулоқ солинг! Ёғий қалъага кирганими?

Шаҳар ичидан бу томонга ёпирилиб келаётган шовқин-
дан Хонзода бегим ҳам сесканиб кетди. Пастдан Нуён
Кукалдош жон-жаҳди билан қичқирди:

— Бегим, хиёнатчилар Хакан дарвозасини ёғийга очиб
бермишлар. Тезроқ аркка қайтинг! Аркка!

Нуён от чоптирганча Мирзо дарвозаси томонга ўтиб кет-
ди. Хонзода бегим зинапоядан пастга чошиб тушар экан,
мавлони Фазлиддин қўлидаги машъала билан унинг пзидан
югурди. Отга мишганларидан кейин Хонзода бегим:

— Машъалини ташланг!— деб буюрди.

Машъала мавлонони ёв ўкига ишпон қилиб бериши
мумкин эди. Мавлоно Фазлиддин ёниб турган машъалани
ерга ташлади-ю, бегим билан бирга аркка қараб от чоп-
тириб кетди.

Аммо улар аркка яқинлашганларида бир неча юз отлик-
лар олдиларидан қирқиб чиқдилар ва дарвоза йўлини тў-
сиб қўйдилар. Қуролли отликлар орасида машъала кутар-
ган навкарлар ҳам бор эди. Машъала ёруғида белига олтин
камар боғлаган, дубулға ва жиба кийган Аҳмад Танбал кў-
ринди-ю, мавлоно Фазлиддиннинг борлиги музлаб кетгандай
бўлди. Танбалнинг қўшини Хонзода бегимни ва унинг нав-
карларини дарҳол қуршовга олиш. Аҳмад Танбал ёнидаги
навкарга шўх товуш билан гапирди:

— Машъалани яқинроқ тут! Не, Хонзода бегиммилар?
Кўзларимга ишпонмаймен! Бегим, бу не хол? Нечун мардона
кийим кийибсиз?

— Номардлар қўнайиб кетгани учун мардона кийиндим!
Танбал бу истехзони ўзига олгиси келмай кулди:

— Қўрғонда мардлар қолмаган бўлса, мана, биз келдик,
бегим!

Танбалнинг кетида турган Узун Ҳасан бу гапни ёкти-
риб хахолади. Машъала ёруғи беклар орасида аяичли қў-
лимсираб турган кўсанамо Али Дўстбекка тушди. Бобур
Айдижонни мана шу одамга ишониб тошириб кетган эди.
Али Дўстбек эса Бобурни ўлим тўшағида ётишти, деб эши-
тиб ундан умидини узган эди. Боя Танбалнинг қўшини
Мирзо дарвозасининг олдида журттага ғавго кутарган, де-
ворга парвон қўйиб чиқмоқчи бўлганлар ҳам ҳимоячиларни
атайлаб чалғитган эди. Аҳмад Танбал билан тил бириктирган
Али Дўстбек бугун мана шу тўполон пайтида қалъанинг
нариги четидаги Хакан дарвозасини ёвга секингина очиб бер-
ган эди. Хонзода бегим бунинг энди фаҳмлади-ю, Дўстбек билан

Аҳмад Тапбалга нафрати ошиб, жирканиб кўз ташлади:
— Сизларми мардлар?! Сизлар учун мардлик билан хонликнинг фарқи қолмадими?! Кечагина Бобур мирзога содиқмиз, деб қасамёд этганлар бугун унга шунчалар ёмонлик қилмоқдасиз! Мен амнман: эртага сиз Жаҳонгир мирзога ҳам хиёнат қилурсиз!

Аҳмад Тапбал қиличининг сопини чангаллаб:

— Ҳаддингиздан ошманг, бегим! — деди. — Бобур мирзо адолатсизлик қилди. Самарқанд олингандан кейин Андижон Жаҳонгир мирзога берилмоғи керак эди. Бобур мирзо бермади! Биз адолат учун жанг қилиб, мана бугун ғалабага эришдик! Аммо сиз шарму ҳаёни унутиб, нечун бизни бунчалик ҳақорат қилмоқдасиз? Шоҳ қизига ярашмайдиган бу қилиқни сизга ким ўргатди? Ёнингиздаги муллоча ўргатдими?!

Аҳмад Тапбалнинг ғазабли кўзлари мавлоно Фазлиддинга қадалди. Мавлоно Фазлиддин ҳам унинг кўзларига кўзини қадаб гапирди:

— Бегим шарму ҳаёдан сизу бизга сабоқ беришга қодирлар! Бегимнинг ҳақ сўзларини фақат қаллоблар ҳақорат деб тушунурлар!

— Ким қаллоб? — деб Аҳмад Тапбал қиличини суғуриб, мавлонога қараб от чоптирди. Шунда Хонзода бегим отини ниқтаб унинг йўлини тўсиб чиқди:

— Илму ҳунар аҳлига тиг тортиш уят!

Икковининг отлари бир-бирига урилиб, айқашиб кетди. Аҳмад Тапбал қиличини ҳавода ўйнатар экан:

— Бегим, бу муялочани маъшуқалардек ҳимоя қилишлари уят эмасми? — деди. — Биз махфийлардан эшитган эдик, аммо лойиқа чизиш баҳонаси билан у муллоча бегимни нечоғлик ром қилганини билмас эканмиз!

Кўпчилик олдида Аҳмад Тапбал Хонзода бегимнинг номига доғ туширмоқчи бўлгани Хонзода бегимни шунчалик ғазаблантирдики, у белидан ханжарини суғурди:

— Мени бадном қилолмайсен, аламзада хони! — деб, бор кучи билан Тапбалнинг кўкрагига тиг урди. Ханжар Аҳмад Тапбалнинг рўни тегдан кийган зирҳли жабасига тегди да, жаранглаб, сирғаниб кетди. Аҳмад Тапбал қиличини Хонзода бегимнинг тепасида сермади. Қилич зарбидан Хонзода бегимнинг бошидаги бўрки учиб кетди-ю, узун сочлари ёйилиб елкасига тушди.

Шу пайт орқадан ўн тўрт ёшли Жаҳонгир мирзо бир тўп мулозимлари билан келиб қолди. Буни кўрган Дўстбек Аҳмад Тапбални огоҳлантирди:

— Аҳмадбек жаноблари, бас, бўлди!

Хонзода бегим ўгай бўлса ҳам ҳар қалай, Жаҳонгир мирзонинг

опаси эди, шох қўзини қўнчиликнинг олдига қўйиб қўйди. Иккинчи йўл кўймади. Аҳмад Таибал Жаҳонгир мирзо томонга отини бурди ва ўзини окламоқчи бўлиб, гаширди:

— Бу қандай хол, амирзодам? Нахотки эгачингиз сизга қарши қурол кўтариб чиқса? Ёнларидаги фитначи меъмор эгачингизни йўлдан урмиш, амирзодам!

— Мавлоно Фазлиддин сиздек хиёнатчи беқдан минг ҳисса софдил, минг ҳисса олижаноб! — деди Хонзода бегим. — Мавлононинг меъморлик санъати Андижоннинг ифтихори бўлиши мумкин эди. Аммо сиздек қонхўрлар унинг орзуларини увол қилдингиз! Илоҳим шу орзуларнинг уволи тўтени сизни!

Хонзода бегим сўнгги еўзларини йиглаб айтди-ю, отини қамчилаб, арк дарвозасига қараб итилди. Бироқ дарвозани девордек тўсиб турган навкарлар унга йўл бермадилар. Бегим ёшли кўзлар билан орқага — мавлоно Фазлиддинга ўғирилиб қаради.

Мавлоно Фазлиддин белини пайнаслаб, қилчининг сонини тоғди-да, уни кишидан укувсизлик билан суғуриб олиб, Хонзода бегимнинг йўлини тўсган навкарларга қараб итилди. Аммо Аҳмад таибалнинг отлик навкарлари мавлоно Фазлиддиннинг йўлини тўсиб чиқдилар. Иккитаси мавлоно мишган отни жиловидан ушлаб тўхтатди. Бирини оғир чўқмор билан мавлононинг биласига уриб, қилчинни қўлидан тунтириб юборди.

Бу орада Жаҳонгир мирзонинг шораси билан нариги навкарлар Хонзода бегимга йўл берган эдилар. Бегим ёлғиз ўзи арк дарвозасидан от қўйиб ўтар экан, яна орқага ўғирилиб қаради. Навкарлар яна девордек бўлиб, дарвоза йўлини тўсиб олган эдилар. Мавлоно Фазлиддин ёв қўлида қолганини сезган бегим ўкириб йшлади.

Унинг йиғиненга фақат дарвозахона шифти бўғиқ бир нидо билан жавоб берди, холос.

Таибалнинг одамлари мавлоно Фазлиддинни отдан тортиб туширдилар ва қўлини орқасига боғлаб, илёда хайдаб кетдилар.

2

Чўқмор зарбидан жароҳатланган биласи қаттиқ оғриётганини мавлоно Фазлиддин қоронғи бир хибсхонада ёлғиз ўзи қолганда сизди. Уни Андижоннинг Чақаридаги тош истехком ичига, ўлим жазаосини кутадиған махбуслар хужрасига қамлаб, экингини ташқаридан қулфлаб олдилар. Бу билан ҳам қаноат қилмай эшик олдиға иккита соқчи қўйиб қўйдилар. Боя арк дарвозаси олдида Аҳмад Таибал билан Жаҳонгир

мирзонинг ўзаро гапларидан мавлоно Фазлиддин шунини аниқ сездики, унинг шох қизига тама қилишда ва олий зотларга беадабона муносабатда бўлишда айблаб, эртага тошбўрон қилиб ўлдиртирмоқчилар. Шу билан Аҳмад Таибал Хонзода бегимни ҳам бадном қилиб, бир аламдан чиқса керак. Бобур ва унинг тарафдорлари халқ орасида ёмонотлиқ бўлишларидан Жаҳонگیر мирзо ва унинг онаси Фотима Султон бегим ҳам маифаатдор эдилар, бу билан улар Андижон тахтини паригилардан тортиб олиб тўғри иш қилганларини неботлагандай бўлардилар.

Рутубатли зах хужрада коронғиликка тикилиб ўтирган мавлоно Фазлиддин орқасига боғланган қўлларини белига босиб, биллагининг оғригини тўхтатмоқчи бўлар, лекин оғриқ насайини ўришга тобора зўраяр эди. Бу ҳали биргина чўкморининг зарби...Эртага унинг устига дўлдай ёғиладиган тошларнинг оғриғи қанчалик дахшатли бўларкин? Мавлоно буни кўз олдига келтирганда эти жунжиқиб, ўридан туриб кетди. Гўё у ҳозир хиёхонада эмас, бир-бирига қараб қулаётган икки тоғнинг оралиғида турибди-ю, энди ҳар икки томондан учиб тушган қоятошлар унинг эзиб мажақлаши керак. Мавлоно бу балодан қутулмоқчи бўлгандай эшикка томон интилди. Елкасини ёйиқ эшикка уриб, жон-жаҳди билан қичқирди:

— Очинг! Очинг дейман! Очинг!

Қутилмаган бу қичқириқдан чўчиб тушган бир соқчи қаҳр билан сўради:

— Жини урдими? Не гап?

— Илкимини очинглар! Жоним керак бўлса эртага олурсиз! Илким жароҳатланган! Ечиб қўйинглар!

Соқчилар бу ерда пойлоқчи бўлиб ўтирганларидан жуда асабий эдилар. Чунки ҳозир бошқа ғолиблар Бобур тарафдорларининг молу мулкларини талон-тороғ қилиб бойимокда эди. Тун ярмидан оққан бўлса ҳам Андижоннинг кўчалари ва ховлиларидан отларнинг дупури, итларининг вапигиллаши, аёлларнинг дод-войни, бемаҳал қўзғатилган сивир ва қўйларнинг маъраши эшитилмоқда эди. Бу ерда қолган соқчилар қанчалик қўн ўлжалардан маҳрум бўлаётганларини мана шу товушлардан пайкаб, ич-этларини еб ўтирар эдилар. Бунинг устига махбуснинг асабий гаплари қўшилиб, уларнинг жаҳлини чиқарди. Хириллаган овозга қараганда ёши анчага бориб қолган бир соқчи:

— Илки жароҳатланган эмиш-а! — деди. — Эртага асфаласофилдинга кетадиган хароми, бугун илкимини ўйлаб нима қиласен?

Эшик ортидаги махбуснинг нафрат билан:

— Жаллодлар! — дегани эшитилди.

Хириллоқ соқчи ўрнидан сапчиб туриб дўқ қилди:

— Жим ёт, ўлакса! Ҳозир кириб, бир жароҳатнингги ўнга етказамен!

«Қандай кунларга қолдим? — деди мавлоно ўзига ўзи. — Одамзод шунчалик шафқатсизми?» Ўлим шунчалик нақд экан, бугун мана бу махлуқлардаг гап эшитиб, эртага тошбўронда хор бўлиб ўлгандан кўра, Танбал билан олишиб, қўлида қилчи билан жон бергани яхши эмасмиди? Боя Хонзода бегимнинг олдида мавлоно шунга қодир эди-ку! Нега тақдир уни шундан ҳам маҳрум қилди?

Ташқарида от тақасининг ҳовли тошларига урилиб қарсиллагани эшитилди.

— Ким келди? Тўхта!

Ҳовлига кириб келган уч отяқдан бири:

— Хўжа Абдулла, мавлоно қози ёш подшоҳнинг фармойиши билан келдилар! — деди.

Келганлар бири-кетингидан тушдилар. Икки соқчи узун найзаларини уларга тўғриладилар:

— Фармойишни аввал ўнбошига кўрсатмоқ керак! — деди хириллоқ соқчи.

Унинг тепасида хирагина фонус ёниб турар эди. Малла чакман кийган Хўжа Абдулла соқчиларнинг найзасига қараб келар экан:

— Ўнбошини тошолмадик! — деди. — Нечун бу ерда сизлардан бошқа ҳеч ким йўқ?

Ёшроқ соқчи аламли товуш билан:

— Бошқалар ўлжанинг кетидан қувиб кетгандир да, — деди.

Хўжа Абдулла қўлида ўрам қилинган қоғоз билан икки соқчининг найзалари қаршисига келиб:

— Ундай бўлса фармойишни сиз бажармогингиз керак, — деди. — Оянг, ўқинг!

Наринги икки навкар отларини девор тагидаги устунга боғлаб, ўзлари Хўжа Абдулланинг кетидан келмоқда эдилар.

— Сизлар ўша жойда тўхтагиз! — деди хириллоқ соқчи. Навкарлар тўхташди. Хириллоқ соқчи найзасини кўтариб, Хўжа Абдуллага йўл берди, сўнг унинг қўлидаги қоғозни очиб кўрди. Қимматбаҳо қоғоздаги қисқагина ёзув тагига шоҳона муҳр босилган эди. Хириллоқ соқчи муҳрни чирок ёруғига солиб кўрди, аммо ўқиёлмади. У чаласавод эди.

— Қани, сен ўқи-чи, — деб ёшроқ соқчига берди. Бироқ униси бутунлай саводсиз эди. Қоғозни қўлида айлантириб, Хўжа Абдуллага қаради:

— Пирим, бу қанақа фармойиши?

— Бу ерда ётган нобакор жуда хатарли махбус. Уни аркка олиб кетмоғимиз керак.

Орқада турган навкарлардан бири қўшимча қилди:

— Мавлоно қози аркда у харомини сўроқ қилмоқлари зарур!

Хўжа Абдулла Андижоннинг энг машхур қозиси ва жуда кўп муътабар одамларнинг пири эканини соқчилар ҳам билар эдилар. Улар Хўжа Абдуллани бир кўришдаёқ таниган эдилару, аммо унинг Бобур тарафида туриб жанг қилганини эслаб иккиланар эдилар.

— Бу ўзи Жаҳонгир мирзонинг фармойишларими? — сўради хириллоқ соқчи.

— Шубҳалансангиз, ўқиб кўришг!

— Махкам сақланглар, деб буюрган эдилар-да, пири.

— Махкам сақлаганларинг шуми? Юзбоши қани? Нечун фақат икковлөн қолмишсиз? Бу нобакорнинг тарафдорлари кўплашиб хужум қилса қандоқ қилурсиз? Йўқ, буни тезроқ аркка олиб кетмоқ зарур! Эшикни очинг!

Ёш соқчи кексасига қараб: «Бу қози ҳам энди Жаҳонгир мирзо томонига ўтибди-да, бўлмаса бунчалик жон қуйди-рармиди?» — демоқчи бўлди. Бироқ униси ҳамон иккиланарди:

— Биз кейин не деймиз?

— Сиз икковингиз ҳозир биз билан бирга кетурсиз! — деди Хўжа Абдулла. — Буни кўплашиб кўриқлаб бўлмасак, олдириб қўйишимиз мумкин!

Шундан кейин хириллоқ соқчи ҳам бўшашди. Найзасиний деворга тираб қўйиб, эшикни очди. У ичкарига қадам қўйиши билан Хўжа Абдулланинг ҳамроҳларидан бири ёш соқчининг бошига қора бир нарсани ёпиб, ўзини ерга ағнатди. Иккинчи навкар хириллоқ соқчининг бошидаги дубулғасига чуқмор билан қарсиллатиб уриб, уни ичкарига қулатди-да, устидан босиб тушди.

Хўжа Абдулла ҳамроҳларига шивирлади:

— Ўлдирманглар, уволларига қолмайлик!

— Ўлдирмасак кейин булар сизни тутиб берурлар!

Мавлоно Фазлиддин жияни Тоҳирининг овозини таниб:

— Жияним! Тоҳиржон! — деб кичқирди.

Қора парда ичида талваса қилаётган ёш йиғит эса:

— Пирим, шафқат қилинг! — деди. — Пирим! Сизга зинҳор ёмонлик қилмаймиз! Қутқаринг, пири!

— Бас! — деб шивирлади Хўжа Абдулла Тоҳирга. — Оёқ-қўлларини боғласаларинг бўлди!

Мавлоно Фазлиддин Тоҳир билан Хўжа Абдуллага томон отилди:

— Устод!.. Жияним!.. Нажоткорларим!..

Тоҳир наригиларнинг қўл-оёғини боғлаш билан овора эди.

— Мавлоно Фазлиддин, қансиз? — деди Хўжа Абдулла.

Хўжа Абдулла мавлонони бағрига босар экан, унинг қўли боғлиқ эканини сизди-ю, қучоғидан қўймай эшикдан ташқарига олиб чиқди. Фоиус ёруғида белидан ханжарини олиб, мавлононинг қўли боғланган ола чилвирни кесиб ташлади.

Тоҳир шериги билан нариги икки соқчини ичкарига қамаб, эшикни кулфлади-да, тоғасининг қучоғига отилди.

— Жияним, худо сени қайдан етказди?

— Боя Самарқанддан чопар бўлиб келдим!

— Бобур мирзо соғмилар?

— Ҳа, тузалиб қолдилар. Ёрдамга етиб келмоқчилар!

— Андижон қўлдан кетганини билурларми?

— Ҳали билмайдилар-да!..

Хўжа Абдулла уларга шипшиди:

— Энди жим!

Тоҳир тоғасини отига мингаштириб олди. Чақардан секин чиқиб, қалъанинг овлоқ бир четига қараб кетдилар. Ғолиблар ҳовлиларда ҳамон талон-тороғ билан банд эдилар. Тўртовлон уч отда қалъа деворининг тагига кетдилар. Энди ҳамма химоячилар тарқаб кетиб, девор атрофи ҳувиллаб қолган эди.

— Маъна шу ерда ошиб ўтишга қулай жой бор,— деди Хўжа Абдулла.

Ҳаммалари отдан тушдилар. Тоҳирнинг шериги хуржунидан ўрам қилнган арқон олди. Тўртовлон махсус зинапоядан девор теңасига чиққанларида Хўжа Абдулла мавлоно Фазлиддинга ёндашди:

— Мавлоно сизни дарвозадан отлиқ чиқариш хатарли. Таниб қолурлар.

— Миннатдормен, устод!

Хўжа Абдулла қўйнидан бир нарса олиб, мавлононинг қўлига тутқазди. Бу — ичи олтинга тўла оғиргина чарм ҳамён эди.

— Буни сизга хоним ҳазратлари бериб юбордилар,— деди Хўжа Абдулла.

— Воқсадан хоним ҳазратлари ҳам хабар топдиларми?

— Ҳазрат хоним йиглаб мендан илтимос қилдилар. Аҳмад Танбал сиз орқали бегиму хонимларни шармисор қилмоқчи экан. Аммо биз тирик бўлсак, Бобур мирзо-

нинг оиласига ҳам, муборок номига ҳам доғ тушурмагаймиз!

Мавлоно ҳамёини олиб қўйини чўнтагига солар экан:

— Мен тўғри Бобур мирзонинг хузурларига йўл олур-мен!— деди.

— Мавлоно,— деди Хўжа Абдулла маънос товуш билан.— Биз хошим ҳазратлари билан сизга бошқа бир маслаҳат бермоқчи эдик:

Лидижонда араб тилини Хўжа Абдуллагачалик яхши биладиган одам йўқ эди. Бир вақтлар мавлоно Фазлиддин ҳам шу одамдан араб тилидан сабоқ олган эди ва шундан бери уш устод деб атар эди:

— Қандай маслаҳат бўлса бош устига, устод!

— Самарқандга Тоҳирбек борурлар.

— Мен тоғамни бирга олиб кетсам-чи? — деди Тоҳир.

— Йўқ, Тоҳирбек, сиз чопарсиз. Балки Бобур мирзо Самарқандни ташлаб чиққандирлар... Мавлоно, сизнинг ноёб истеъдодингиз бор. Сиз ўзингизни эҳтиёт қилмоғингиз керак. Мовароуннаҳрдаги бу фаторатлар¹ хали-бери босилмаса керак. Мавлоно, сиз бир вақтлар Ҳиротга кетини фикрингиз борлигини айтган эдингиз. Энди шу фикрни амалга оширадиган пайт келди.

Ҳиротга бир марта бориб келган мавлоно Фазлиддин ногинач ўлкалардан ойлар давомида юриб ўтиладиган беҳад машаққатли йўллارни кўз олдига келтирди-ю, юрагини ғам босди. Ҳароҳатли қўлининг оғриғи боя эсидан чиққан экан, энди бу оғриқ янги бир куч билан қайтиб келди. Мавлоно оғриётган биллагини чапгаллаб:

— Мен ватаним қандай тарк этай, ширим? — деди.

— Ҳозир Алишер Навоий яшаб турган Хуросон ҳам бизга ватан эмасми, мавлоно?

— Ватан, албатта... Аммо мен... балки қайтиб келолмамен. Қулбамда китобларим, лойиҳаларим қолган, Тоҳир жиян!..

— Ҳозирроқ қайтиб бориб, барчасини яширтириб қўюрмен, хотиржам бўлинг, мулла тоға!

Мавлоно Фазлиддин Хонзода бегимни энди умрбод кўролмаслигини олдиндан сезаётгандай юраги увушди. Хўжа Абдулла билан Қутлуғ Нигор хошим уш Ҳиротга жўнатаётганларининг бир сабаби мавлоно билан Хонзода бегим орасидаги нозик муносабат ва шунга оид пасту балавд гаплар эди.

Мавлоно Ҳиротга кетини билан Хонзода бегим атрофида бўлаётган гаплар тезроқ босилиши мумкин эди. Мавлоно шунини ўйлади-ю:

¹ Ф а т о р а т - алфв-далгов.

— Майли, устод, — деди. — Мен Бобур мирзоининг номиярини пок тутиш учун ҳар ишга тайёрмен. Аммо бир илтимос: хоним ҳазратларига айтинг, ёлгон овозаларга ишонмасинлар. Хонзода бегим ҳалолу покизаликда беназирлар!

— Сиз ҳам шундайсиз, мавлоно, мен билурмен. Биз буйга ишонмаганмизда, жонимизни гаровга қўйиб, бояги соқчиларни алдаб юрмас эдик. Мен умримда шундай ишлар қилурмен, деб ҳеч ўйламаган эдим. Мана, Тоҳирбек менга далда берди. Аммо ёғийларининг ғаламислиги ҳам кишини мажбур қилар экан!

— Сизлар менга янгидан жон ато қилдиларингиз, устод! Энди ўзингиз ҳам эҳтиёт бўлинг! Жияним, сен ҳам!..

— Рост, пирим ҳам Андижондан узоқроқ кетсалар, бежавотир бўлур эдик! — деди Тоҳир.

— Ҳаммамиз кетсак, хониму бегимларга ким мадад берур? — деди Хўжа Абдулла. — Шўрлик муштинарлар ҳозир мени кутиб ўтирган бўлсалар керак.

Осмоининг шарқ томонидан бир нарчаси хиёл оқариб келямоқда эди. Мавлоно Фазлидин шунга кўриб, арқонни белига боғлай бошлади.

— Насиб бўлса ҳали яна кўришурмиз, мулла тоға!

— Тоҳир, жияним, менинг тарҳларим... чизган суратларим йўқолиб кетмасин. Сен ҳарбий одамсен, асрашинг қийин. Шунинг учун иложи бўлса ҳаммасини Хонзода бегимга бергин.

— Бажонидия!

— Мен бу илтимосингизни Хонзода бегимга ҳам етказурмен! — деди Хўжа Абдулла.

Улар кучоқлашиб хайрлашдилар. Сўнг мавлонони белига боғланган арқон ёрдамида ўн бир газли девордан пастга туширдилар.

Мавлоно тонг ёришганда Қуванинг йўлига чиқиб олди.

Аммо кўрган ичида қолган Хўжа Абдулла эртаси куни чошгоҳ пайтида Хақан дарвозасининг яқинида турадиган бир муридининг ховлисида яширилиб ўтирганга Аҳмад Таибалининг одамлари уни кўнра туширидилар. Чакарда қўли боғлиқ ётган соқчилар каттиқ сиқув остида мавлоно Фазлидинни ким озод қилганини Аҳмад Таибалга айтган эдилар.

Аҳмад Таибал Хўжа Абдулла тутилган жойга от чоптириб келганда кўчани одам тутиб кетган эди. Қўли орқасига боғланган кўйлакчан Хўжа Абдулла қуроли навқарлар қўршовида секин юриб бормоқда эди. Унинг оёқларидан мадор кетган, ранги ўчган. Оқ саяласи ва кўйлагининг оқлиги ўсиқ соқолини одатдагидан қорароқ кўрсатар эди.

Ҳалойиқ Аҳмад Таибалга йўл бериб четланди. Хўжа

Абдуллани ҳайдаб бораётганлар тўхтадилар. Аҳмад, Таибал ҳам отини жиловидан тортиб тўхтатди:

— Ҳа, алдамчи пир! — деди. — Бизга шунча ёғинликлар қилганингиз озмиди, энди соқчиларни алдаб, ҳаромни муллочани ҳам қочирибсиз!

— Мен бир бегуноҳ хунариешани адолатсиз ўлимдан кутқардим, холос!

— Соқчиларга ёлғон муҳрлар кўрсатишга уялмадингизми, алдамчи пир?

Ўнлаб кўзлар Хўжа Абдуллага тикилди. Агар Хўжа Абдулла Таибалдан кўриб, саросимага тушса, ўзини йўқотиб қўйса, гуноҳи бўйнига тушгандай кўриниши мумкин эди. Шунини уйлаб, Хўжа Абдулла иложи борича дадил гапиришга тиришди:

— Мен соқчиларга Бобур мирзонинг муҳрларини кўрсатдим. Чунки Бобур мирзони Андижоннинг ягона подшоҳи деб билурмен!

— Сен, имонсиз, муридларингни яна алдамоқдасен! Бобур мирзо Самарқандда вафот этган. Ҳозир тожу тахт Жаҳонгир мирзоиники!

— Мусулмонлар, бу гапга ишонманг! Алҳамдулиллоҳ. Бобур мирзо тириклар! Андижонга яна келурлар!

— Ёлғон! Халойиқ, сиздек муридларини алдаб юрган, айбини яширмақ учун ифлос бир ҳаромини биздан қочирган бу имонсиз пир тошбўрон қилиб ўлдирилиши керак! Тош отинг бунга! Савобталаб бўлсангиз тош отинг!

Аҳмад Таибал эгар устидан улоқчиларга ўхшаб настга энгашди-ю, узун қўли билан ердан муштдай бир тошни олди. Сўнг қаддини тиклаб, тошни Хўжа Абдуллага қараб отди. Хўжа Абдулланинг кенг кўкрагига «тўп» этиб теккан тош оқ кўйлақда чангли из қолдириб, ерга юмалаб тушди. Оғриқдан Хўжа Абдулланинг кўзлари ёшланди, нафаси қайтди. Навкарлардан баъзи бирлари ҳам ерга энгашиб тош қидираётганини кўрган Хўжа Абдулла нафаси титраб:

— Мусулмонлар! — деди ва ҳамон жим турган халойиққа тикилди. Уларнинг орасида йигирма беш ёшлардаги гардани йўғон бир йигитни кўрди-ю, бир вақтлар ёлғон овоза тарқатишда айбланиб ўлдирилган мироб Дарвеш говни эслади. Бу йигит ўша миробнинг ўғли эди. Хўжа Абдулла ўшанда ёш Бобурга бир оғиз: «Буни қатл эттирманг!» — деса, эҳтимол мироб ҳали тирик юрар эди. Хўжа Абдулла ўшанда Аҳмад Таибалга ўхшаш бекларнинг кўнглига қараб Дарвеш говни кутқариб қололмагани энди қалбида армон кўзгади. Ҳозир ўзи ҳам ўша миробнинг аҳволига тушди-ку! Нечун ўшанда лоқайдлик қилди? Миробнинг ўғли отасининг

қасди учун Хўжа Абдуллага тош ётса, балки ҳақли бўлар!.. Лекин беғуноҳ меъморни қутқариб, ўзи балога қолаётган Хўжа Абдуллага ҳеч ким тош отмади.

— Муеулмонлар! — куюйиб такрорлади Хўжа Абдулла. — Мен адолат йўлида жон беришдан қўрқмаймен! Адолат ким томонда — шунинг бир ўйлаб қўринглар. Ининин оғага душман қилганлар кимлар? Яхшиларга бахиллиги келиб, пойишга болта ураётганлар кимлар? Бу қора кунларин бошимизга солганлар кимлар?!

— Сен ўзинг! — деб кичқирди Аҳмад Танбал.

— Мен Бобур мирзога кичиклигидан илм ўргатдим, лисон ўргатдим, мен уни одил подшоҳ бўлишга ундадим. Мовороуннаҳр яна бирлашенину юрт ички урушлардан қутулени. дедим. Бобур мирзо мардона ишлар қилиб, Самарқанд билан Андижонни бирлаштирганда мен эзгу орзуларимга етгандай суюнган эдим. Хайхот, мамлакат яна парчаланди. Юрт вайрон бўлди! Халойиқ, агар мени ўлдириш билан мушкулнингиз осон бўлса, майли, ўлдиришг!

— Тошбўрон қилинг! — буюрди Аҳмад Танбал халойиққа.

Одамлар тўшнинг орқароғидан йиғламосираган товуш эшитилди:

— Шайхулислом фатво бермагунча тошбўрон қилишга ҳаққимиз йўқ!

Кекса бир киши:

— Пирнинг қарғишидан қўрқамиз! — деди.

Навқарлар ҳам қўлларидаги тошларини Хўжа Абдуллага отишга журъат этолмай, Аҳмад Танбалга қарадилар. Аҳмад Танбал юзбошига буюрди:

— Ундай бўлса, қиличингни ол, калласини кес! Бўйинига тиг ур!

Барзангидай қон-қора ўрта яшар юзбоши кумуш сопли қиличини қинидан имиллаброқ суғурди. Хўжа Абдулла унга тикилиб, паст товуш билан деди:

— Мирбадалбек, хушёр бўлинг, менинг қоним етти пуштингизга сачрайди!

Халойиқ орасидан қўрқув аралаш нидо эшитилди:

— Пирнинг қони тутади ҳаммамизни!

Юзбошининг қўлидаги қиличи қалтирай бошлади У Аҳмад Танбалга қараб ялинди:

— Ўтинамен, бу ишдан мени озод қилинг!

Аҳмад Танбал унга ғазаб қилиб елкасига камчи урди.

— Сени юзбошилиқдан озод қилурмен, қўрқоқ!

Аҳмад Танбал бошқа навқарларига буюрди:

— Бу имонсизни дарвозахонага ҳайдаг! Халойиқ шу ерда қолсин! Ким бизга эргашса қилич билан чопинг! Аяманг!

Навкарларнинг бир қисми Хўжа Абдуллани дарвоза-хонага ҳайдаб кетди. Қолган навкарлар халойиқнинг йўлини тўсиб, Хўжа Абдулланинг кетидан боргани қўймади.

Орадан ярим соат ўтгандан кейин Аҳмад Танбал одамлари билан арқка томон от чоптириб қайтиб кетди. Шундан сўнг дарвозахонага борган одамлар Хўжа Абдулланинг шифтдаги йўғон тўсинга осиб ўлдирилганини кўрдилар. Марҳумнинг оқ салласи оёғи тагида чувалиб ётарди, бўйи эса тириклик пайтидагидан хийла узайган эди. Одамлар уни дордан секин тушириб олдилар. Кафан ўрнига салласига ўраб, шаҳидлардек кўмдилар.

3

Устма-уст ёққан баҳор ёмғирлари йўлларни балчиқ қилиб юборган. Андижонда юз берган ваҳшатлар хабарини тезроқ Самарқандга етказиш учун лой сачратиб, от чоптириб бораётган Тоҳир энди Қувага яқинлашди. Агар Бобур мирзо тузалган бўлса-ю, Андижонга ишониб, Самарқандни ташлаб чиқса, аҳвол ҳозиргидан баттар бўлиши мумкин. Тоҳир шунини ўйлаб, тагидаги бедовни қистайди. Аммо от қанчалик зўр ва чопқир бўлмасин, тиззага чиқадиغان лой унинг йўлини боғлайди, тинкасини қуритади. Чопиб келаётган от балчиққа йиқилиб тушади-ю, қайтиб туролмасдан, бурнидан қон келиб, жон беради. Тоҳир уни йўл устида қолдириб, эгар-юганларини олади-ю, Қувадан бошқа от топади. Аммо бир кун юрмасдан бу от ҳам ҳолдан кетиб йиқилади. Нарёқда Хўжанд, Жиззах — яна ўн кунлик йўл... Тоҳир осмонда учиб бораётган қушларга ҳавас ва армон билан қарайди.

* * *

Бироқ Тоҳир қуш бўлиб учганда ҳам энди Бобурни Самарқанддан тополмас эди. Бобур хасталик тўшагидан турган заҳоти онаси ва устозини қутқаришга шошилиб, Самарқандни аллақачон ташлаб чиққан эди. Унга келган ахборотларга биноан, Андижон қамали ҳали узоқ давом этиши керак эди. Андижонда бир йилга етарли заҳира бор эди. Шунчалик абгорлиги билан Самарқанд етти ойлик қамалга чидаганда ўн икки минг қўйи бор Андижон қўргони Хўжа Абдулладай довьюрак одам раҳбарлигида ҳали беш-олти ой «қилт» этмай туриши шубҳасиз туюларди. Шу тўғи билан мингга яқин одамларнинг ҳаммасини Самарқанддан олиб чиқиб келаётган Бобур Булунғур ва

Халифия¹ қишлоқларидан ўтиб, Сангзор дарёсига яқинлашиб қолган эди.

Оғир хасталиқдан яқинда турган Бобур яна узлиқиб қоямаслиги учун уни тўрт оглиқ маҳофага ўтқазганлар, тагига юмшоқ парқулар солганлар. Маҳофанинг эшик ва деразаларига осилган қизғиш инак пардалар йўлнинг ўнқир-чўнқирларида аланга тилларидай муттасил силкиниб ўйнаб боради. Пар ёстикқа ёнбошлаб ўтирган Бобур ҳар замонда бир ўрнидан қўзғалиб, маҳофанинг орқа томонидаги пардани кўтаради-ю, узоқларга тикилиб қарайди.

Унинг қўшинидан беш-олти чақирим орқада яна бир маҳофа келмоқда эди. Бир талай отлиқлар қўриқлаб бораётган бу кўркам маҳофада Бобурнинг ҳоласи Меҳр Нигор хоним ва қайлиғи Ойиша бегим сафар қилмоқдалар. Бобур Самарқандни ташлаб кетмоқчи эканидан Бухородаги Султон Али мирзо аллақачон хабар топган ва пойтахтни дарҳол эгаллаш учун Шаҳрисабзга келиб шайланиб турар эди. Бобур ўз рақиби Султон Али мирзодан яхшилик кутмас ва қайлиғини унинг қўли остида қолдиргиси келмас эди. Бир вақтлар Бойсунқур мирзодан қаттиқ жабр кўрган Меҳр Нигор хоним ва Ойиша бегимлар ҳам эндиги хавф-хатарлардан тезроқ қутулгилари келар эди. Ҳозир улар учун энг беҳатар жой — Тошкент эди. Тошкент хони Маҳмудхон — Меҳр Нигор хонимнинг акаси, Ойиша бегимнинг опаси Розия Султон бегим ҳам Тошкентга, Маҳмудхонга тушган. Тошкент йўли Жиззахгача Андижон йўли билан бир. Мана шу сабабларга кўра Бобур ҳоласи ва қайлиғини бутун одамлари-ю, кўч-кўронлари билан бирга қўриқлаб олиб кетмоқда эди. Фақат урф-одатни бузмаслик учун куёв билан қайлиқ орасида беш-олти чақиримлик масофа қолдириб, икки тўп бўлиб бормоқда эдилар. Кечкурун Сангзордан ўтиб, кўм-кўк адирларда тунаш учун тўхта-гаиларида ҳам ўша масофани сақлаб, икки жойга чодир ва ўтов тикдилар.

Ёнбағирларда лолалар очилган. Ҳаво ниҳоятда ёқимли. Бобур майин кўкат устига қадам қўйганда ўзини хийла енгил сизди.

Самарқанддан чиқаётганда вужудини зилдай босиб ётган ғам-ғуссалар энди аста-секин тарқаб кетаётгандай туюлди. Пойтахтни шунча машаққатлар билан олиб, охири ўз ихтиёри билан бошқага қолдириб кетиши унга сўнгги йилларда қилган барча ҳаракатларини беҳуда кўрсатиб, таъбини тирриқ қилган эди. Ҳозир мана бу кўклам адир-

¹ Ҳозирги Ғаллаорол яқинидаги қадимий қишлоқ.

ларда яйраб нафас олар экан, у онаси ва устозини қутқариш ниятида кетаётганини, бунда бир олижаноблик борлигини, қайлигини асоратдан қўриқлаб олиб бораётгани ҳам мардликдан эканини ўйлади-ю, кўнгли бир қадар таскин топди.

Темур дарвозаси деб аталган улуғвор тангидан ўтганларидан кейин Бобур маҳофанинг эшигини очиб, мирохўр¹ни чақиртирди.

Мирохўр маҳофага жипс келганда:

— Б-б-бўз о-о-отимни кел-т-т-тиринг, — деб буюрди.

У соғайиб кетгандай кўринса ҳам, аммо ҳали тилида ўша оғир хасталикнинг асорати бор эди. Унинг дудукланиб гапиришидан хавотирланган Қосимбек:

— Амирзодам, от нечук керак? — деди. — Минмоқчиларми?

Бобур яна тили тутилиши мумкинлигини сезиб, тасдиқ маъносида сўзсиз бош ирғади-ю, мирохўрга «айтганимни қилинг!» — дегандек қаради.

Маҳофа юриб бормоқда эди. Мирохўр:

— Бош устига! — деб отга кетди.

Қосимбек орқароқда келаётган табибни чақиртирди. Қалта оқ соқоли ўша жиккак табиб маҳофага ёндашиб, Бобурдан ҳали яна уч-тўрт кун от минмасликни илтимос қилди. Аммо Бобур ўзини яхши ҳис қилмоқда эди:

— Б-б-ир-пас отл-лик юрай!

— Тилингиздан калолат кетмагунча сабр қилинг, амирзодам!

Эгар жабдуқларидаги олтин безаклари қуёш нурида ялт-ялт қилаётган бўз отни жиловдор етаклаб келди.

Қосимбек унга:

— Қайт! — деди-ю, Бобурга маҳофада тишчгина кетаверишни маслаҳат берди.

У билан табиб Бобурнинг яна узликиб қолишидан астойдил кўрқмоқда эдилар. Аммо Бобур отни орқага етаклаб кетаётган жиловдорга кулиб қаради-ю:

— Йў-йўк, отни к-келл-тиринг! — деди.

Сўнг Қосимбекка ҳам кулимсираб гапирди.

— Х-ха-во-отир олм-мангиз!

Жиловдор отни яна маҳофа олдига етаклаб келди. Маҳофа тўхтади. Бобур унинг зинасига оёқ қўйиб, бўз отнинг эгаридан олди-ю, бир сакраб отга минди. Жиловдор бундан

¹ Мирохўр «амири охур» дегани. М и р о х ў р — подшоҳ отбоқарларининг бошлиғи.

завқи келиб жилмайди ва жиловнинг учини Бобурнинг қўлига тутқазди.

Қосимбек Бобурни ортдан синчиклаб кузатиб боради, агар унинг беҳол бўлгани сезилса дарҳол ёрдамга етмоқчи бўлади.

Аммо Жиззахга етиб бордилар ҳамки, от устидаги Бобурнинг беҳол бўлгани сезилмади.

Кичиклигидан от миниб суяги қотган чавандоз сўнги кунларда сувориликни жуда соғинган эди. Маҳофанинг юмшоқ нарқулари унга хасталик тўнагини эслатарди. Тагидаги бўз отниг шўх қадам олиши ва соғлом бир қудрат билан ўйноқлаши эса Бобурнинг аъзоларида анчадан бери мудраб ётган ёшлик кучларини уйғотгандай бўларди. У отлиқ юрган сари бадани яйраб, баҳри-дили очилиб борарди.

Жиззахдан наридаги кўкалам адирларга ўтиб тунаш учун тўхтадилар ва икки жойга чодир тикдилар. Бобурнинг бугун отлиқ юргани ва ўзини жуда соғлом сезаётгани ҳақидаги хабар холаси билан қайлиғига ҳам етиб борган эди.

Меҳр Нигор хонимнинг куёвга хола, аини чоқда, қизга она экани совға-салом юбориш ва борди-келди қилиш учун қулай эди. Намозшом пайтида Меҳр Нигор хонимнинг эшик оғаси Бобур мирзога совға олиб келди: чиройли зарбоф тўн, олтин камар, кумуш дастали қимматбаҳо қамчи. Тўн — Бобурнинг тузалиш шодиёнаси. Камар — «куёвнинг бели яна ҳам бақувват бўлсин», деган тилакни билдиради. Қамчи — бугун Бобур отлиқ юргани туфайлимикин? Ёки «Подшоҳ отини қамчилаб, тезроқ Андижонга етсину ёғийларни саваласин!» деган маъноси ҳам бормикин? Нима бўлганда ҳам Бобур бу совғалардан жуда таъсирланиб кетди.

Эртага улар хайрлашишлари керак. Тошкент йўли нимолга бурилиб кетади. Бобур томонидан ҳам совға юборилиши лозим. Бироқ аёлларга ёқадиган қимматбаҳо матолару тақинчоқларни улар қаердан топишади? Ҳаммалари эркаклар. Қўнган жойлари ҳам чўл. Қосимбек шуни Бобурга айтиб:

— Кумуш лаганларда олтин пул юбора қолсакмикин? — деди.

Бобур эса шу лаган ва олтинларни бугун бўш қолган маҳофага солиб юборишни таклиф қилди.

— Маҳофа ҳам совға бўлсинми? Балки эртага ўзингиз маҳофада юрурсиз, амирзодам?

— Ху-худо хоҳл-ласа, юр-масмен. 3-заифалар юрсинлар.

Сўнги гапни Бобур буйруқ оҳангида айтди, шунинг учун Қосимбек бошқа эътироз қилолмади.

Эртаси кун и эрталаб икки мухташам махофа кўч ортилган туялару аравадари билан бирга шимол томонга бурилиб, Мирзачўл орқали Тошкентга йўл олди.

Бобур ўз кўшинидан юз кишини кўриқчиликка ажратган эди, улар ҳам махофалар билан бирга узоқлашиб кета бошладилар.

Андижон йўлидан четроқда катта бир қоровултепа кўринди. Бобур ёлғиз ўзи шу тенанинг устига от кўйиб чиқди-да, эгардан тушди. Отининг жимовидан тутганича чексиз чўлда тобора кичрайиб бораётган махофаларга анча вақт тикилиб турди. Гуё у шу туришда қаллиғи билан хайрлашди, унга ўз эҳтиромини билдириб, оқ йўл тилаган бўлди.

Бобур юз кун Самарқандда туриб Ойиша бегим билан бирор марта юзма-юз кўришган эмас. Бунга урф-одат ҳам йўл бермади, ёшлик ҳаёси ҳам монелик қилди. Кўксаройда ёза бошлаган ғазалининг «Не кун бўлғай висолингга мени дил хаста етгаймен» деган сатри эсига тушди. Сўнг от устида кун бўйи йўл юриб бораётиб хаёлан ўша ғазалини давом эттирди:

Муяссар бўлмаса бошимни кўймоқлик оёғига,
Бошимни олиб, эй Бобур, оёқ етгунча кетгаймен.

Кечкурун тунаш учун Қўштегирмон деган жойда тўхтаганларида Бобур бу сатрларни қоғозга ёзиб кўйди. Ғазал — шу сатрлар билан тугалланиши керак. Лекин ўртада яна уч-тўртта байт бўлиши керак. Уларни кейинчалик хотиржамроқ пайтда топмоқчи бўлди.

* * *

Андижонда бўлган воқеалар даҳшати Тоҳир қиёфасига кириб Бобурга тобора яқинлашиб келмоқда эди.

Бобур одамлари билан Новдан ўтганда Тоҳир Кўқондан ўтиб, Ходарвиш чўлига кирди. Бобур чўлларда олти марта тунаб, еттинчи кун кечки пайт Хўжандга етганда қора оти лойга беланган, ўзи таниб бўлмас даражада қорайиб, озиб кетган Тоҳир унинг қаршисидан чиқди.

Бобур ҳамма бек ва навкарлари билан келаётганини кўрган Тоҳир отдан ўзини ерга ташлаб, дод солиб йиғлаб гаширди:

— Нечун Самарқандни ташлаб келдингиз, амирзодам?!
Бобур Андижон қўлдан кетганини эшитди-ю, назарида,

бутун борлиқ зилзила ичида қолди; еру кўк чайқалиб, силкиниб кетди. Чапда ялтираб кўринган Сирдарё қирғоқларидан тошиб чиқа бошлагандай туюлди.

Дарёдан нарида Хўжанд тоғлари. Бу ердан Андижон нақадар узоқ! Самарқанд нақадар узоқ! Ўғай тақдир Бобурни бу ерга гўё алдаб олиб келгану бирваракайига Самарқанддан ҳам, Андижондан ҳам маҳрум қилган! Энди унинг ора йўлда муаллақ бўлиб қолганини Андижондаги Аҳмад Танбал ҳам, Самарқанддаги Султон Али мирзо ҳам, Туркистондаги Шайбонийхон ҳам гўё узоқдан кўриб турар эдилару «Боладай алданибди!» — деб қаҳ-қаҳ уриб кулар эдилар. Уларнинг кулгилари атрофдаги тоғлардан аке садо бўлиб қайтаётгандай туюлар эди.

Тоҳир Али Дўстбекнинг хиёнат қилиб, дарвозани кечаси очиб берганини, Хўжа Абдулла эса Бобурга садоқати туфайли шу дарвозахонага осиб ўлдирилганини айтганда Бобур ортиқ бардош қилолмай өтига қамчи босди. Қаёққа кетаётганини ўзи ҳам билмас эди. Чанқаган от уни дарёнинг жар бўлиб ётган баланд қирғоғига олиб келди. Бирдан Бобур Аҳсида жар қулашидан ҳалок бўлган отасини эслади. Назарида у турган замин ҳам ҳозир қулаб тушмоқда эди. Бобур отини орқага бурди. Лекин орқадаги пасту баланд ерлар ҳам жаханнам қаърига қулаб тушаётгандай лопиллаб кўринди.

Бобур отининг бўйнидан қучоқлади-ю, елкалари силкина-силкина йиғлаб юборди.

Қосимбек билан табиб чол унинг ёнига келдилар. Қосимбек қайғу тўла товуш билан йиғламсираб гапирди:
— Амирзодам, ҳаммамиз ҳам хонавайрон бўлдик. Менинг молу мулкимни талатибдилар. Ўғлим оғир ярадор эмиш...

Бобур бошини кўтарди. Кўз ёшидан юзи нам. Табиб унинг елкасини силади.

— Амирзодам, шукур, онангиз, эгачингиз саломат эканлар. Кўп куюнманг, бошингиз омон бўлса, давлат топилур... Ўзингизни эҳтиёт қилинг, яна хасталаниб қолманг!

Бобур дарвозахонага осилган устозини эслади-ю, кўзига яна ёш қуйилиб келди:

— Пийрим, мени кимларга ташлаб кетдингиз? Шундай одамни осиб ўлдирсалар?! Мен устозим учун қасос олмағим керак! Қасос!

Ўртаниб гапирётган Бобурнинг тили тутилмаётганидан табиб чол ҳайратга тушиб, унга тикилиб қолди.

— Охирги нафасим қолгунча олишурмен!

Бобурнинг юзи қаҳру ғазабдан бир оқариб, бир қизариб кетаётган бўлса ҳам сўзлари равон эди. Самарқандда Бобурни тилдан қолдирган касаллик — ғоят кучли бир руҳий

ларзанинг оқибати эди. Энди ундан ҳам кучлироқ рухий ларза Бобурнинг тилида қолган дудукликни бирдан йўқ қилиб юборди. Душманларига қарши чексиз бир нафрат ва газаб унга куч-қувват бермоқда эди.

— Хоинлар жазосини олур! Чекиниш йўқ! Одамларни тўпланг! Ҳаммага айтинг! Андижонга борурмиз!

Бобур отини кескин бурди-ю, паришон бўлиб тарқаётган одамларга қараб кетди.

4

Ўша йили Бобур Аҳмад Танбал аскарлари билан олишиб, Марғилон ва Ўшни қўлга киритди, Андижон яқинида ёвнинг бир қисм аскарларига шикаст бериб, уларни қўрғон ичига чекинишга мажбур қилди.

Бироқ Бобурнинг бекалари дастлабки ғалабалардан мағрурланиб, яна беларволик қилишди. Бир кун Андижон яқинидаги Хоқонариқ бўйида очик жойда қоровул қўймай ухлаб қолишди. Тонг отганда кимдир: «Ёғий босди!»— деб қичқирди-да, тура қочди. Уйқусираган одамлар ваҳима ичида тумтарақай бўлиб кетди. Бобур ён-верига қараса, ўнтача навқари қолибди. Нарироқда ёвнинг беш-ўнта жапгдовуллари қочганларнинг кетидан ўқ отяпти. Бобурга ёв оз кўринди. У тез отланди-ю, қолган навқарлари билан ёв жапгдовулларига ҳамла қилди. Улар орқага бурилиб қочди. Бобур уларни қувиш билан бўлиб, дарахтлар панасидан чиқиб келаётган юзга яқин отликни анча кеч кўрди.

Тонг ёрийшиб қолган эди. Ҳаммадан олдинда бошдан-оёқ зирҳли кийим кийиб, қўлида қалқон тутган Аҳмад Танбал келмоқда эди. Бобур уни танигач, отининг жиловини тортиб, орқасига қаради. Йилитларидан фақат учтаси қолибди, бошқалари қочиб бўлибди. Агар Бобур ҳам шу заҳоти орқага бурилиб қочса, балки соғ қутуларди.

Лекин унга шунча аламлар ўтказган, шунча хиёнатлар қилган Аҳмад Танбал энди биринчи марта жапг майдонида юзма-юз дуч келди. Бундай фурсатни бой бериш мумкинми? У дарҳол жиловни қўйиб юбориб, камонига ўқ ўрнатди. Аҳмад Танбал қиличини суғураётганда Бобур унинг ёноғи бўртган юзини ва қисик кўзларини мўлжалга олиб ўқ отди. Ўқ Танбал кийган дубулғанинг пешонасига тегиб сирпаниб ўтди. Бобур иккинчи ўқни унинг бўйнига тўғрилаб отди — дубулға ва жиба кийган одамнинг юзи билан бўйнигина сал очик қолар эди. Лекин Танбал қалқони билан бўйинини бекитишга улгурди. Бобур отган иккинчи ўқ қалқонга урилиб қапчиб

кетди. Бу орада Танбалнинг ёнидаги кишилар Бобурга ҳам ўқ ёғдирдилар. Бир ўқ унинг тиззасидан пастроқ болдирини тешиб ўтди. Аҳмад Танбалнинг ўзи отини «чу-чулаб» кўлида қиличи билан Бобурга бақамти келди. Бобур ярадор оёғининг «жизиллаб» куйиб огриганини ва Аҳмад Танбалнинг кўлидаги қилич алланечук таниш эканини бир вақтда ҳис қилди. Бу — Бобурнинг номидан Аҳмад Танбалга ўшда инъом қилинган олтин соғли бағдодий қилич эди. Бу қиличнинг ўпиб, Бобурга садоқатли бўлиш ҳақида қасамёд қилган Аҳмад Танбал наҳотки энди уни эгасига қарши кўтарса? Бобур буни ўйлашга ҳам улгурмасдан олтин соғли қилич унинг бошидаги дубулгага келиб тушди. Бобурнинг кўзларидан гўё оловли учқунлар сочилиб кетди, боши бировнинг бошидек ҳиссиз бўлиб қолди. Қиличнинг тиғи дубулга кийгизини кесиб ўтолмаган бўлса ҳам бош яраланган эди. Бобурнинг бўйнига дубулга четидан қон сирқиб тушди. Болдиридаги ярадан этиги иссиқ қонга тўлмоқда эди.

Аҳмад Танбал ғолибона ҳайқириб қиличини яна кўтарди. У энди ўткир қиличини Бобурнинг зирҳли кийимлари орасидан сал-пал кўриниб турган бўйнига урмоқчи ва бошини кесиб туширмоқчи эди.

Шу пайт ортдан Тоҳир етиб келди-ю, Бобур минган бўз отнинг жиловини силтаб тортди. Бедов от ўрнидан сакраб кўзгалар экан, Аҳмад Танбал бўйинни мўлжаллаб урган қилич Бобурнинг ёй-ўқлари солинган садоғига тегиб, уни шарт кесиб тушди.

— Амирзодам! Жиловни олинг! — қичқирди Тоҳир.

Ўзи эса Бобурнинг отига қамчи босди.

Қамчи еб ўрганмаган учқур бедов олдинга ўқдай отилиб, эгасини бало-қазодан олиб чиқиб кетди.

Ярадор Бобур ўшга қайтди, анча кунгача боши гувиллаб, оёғи чўлоқланиб юрди.

Уни яра огригидан ҳам ортиқ қийнаган дард — Аҳмад Танбалга берган қиличининг айланиб келиб ўз бошига тушгани эди. Қотилга ким қилич берса, бу қилич охири келиб ўз эгасини чопар эканми? Бироқ дунёда адолат бўлса, шунча ёмонликлар қилган Аҳмад Танбалдан ҳаёт нега қасд олмайди? Шундай разиликлар қилган одам... Бобур билан юзма-юз тўқнашганда нега унинг қўли баланд келди?

Қутлуғ Нигор хоним ўғлига тасалли бериб:

— Омон қолганингизга минг шукур! — деди. — Сиз ҳали ўн олти ёшдасиз, жоним. Танбалнинг ёшига етгунча кўп ғалабаларни кўрурсиз. Холбуки бу урушларда эл-улус беҳад толиқди. Тошкентлик тоғойингиз Маҳмудхон орага тушиб, сизни Жаҳонгир мирзо билан яраштириб қўймоқчи-

лар. Майли, Ахси Жаҳонгир мързоники бўлсин. Андижон сизга қолур.

— Энди Фарғона водийсидаги битта кичик давлат ҳам иккига ажралиб, парчаланиб кетсинми, а? Бутун Мовароуннахрни бирлаштириб, қудратли давлат тузиш ўрнига баттар майдалашиб, заифлашиб!.. Тақдир кинояси бунча аччиқ?!

— Ҳозир бу кинояга чидашдан бошқа чора қолмади, жоним! Тошкентда қайлиғингиз бизга мунтазир экан... Менга хабари келди. Эгачиси: «Келинларингни тезроқ тушириб олинглар», деган мазмунда китобат йўлламишлар.

Бобур ҳали ўзи кўрмаган, лекин хаёлида афсонавий гўзал қиз деб тасаввур қилиб юрган қаллиғининг энди ўн тўртга тўлиб, ўн бешга қадам қўйганини эслади. Онасига: «Ҳали ёшмиз-ку!» деб эътироз қилгиси келса ҳам, лекин бундай дейишга тили бормади. У шунча вақтдан бери бир кўришга муштоқ бўлиб юрган қизига етишини ич-ичидан истаб турарди... Онаси ҳам Бобурни суйганига уйлантириб сал тинчитмоқчи эди.

* * *

Орадан икки йил ўтди.

Жавзо ойининг илиқ оқшомларидан бирида, Андижон аркидаги ҳарамда икки ойлик келинчак Ойиша бегимнинг хобгоҳида канизлар шохона дастурхон тузадилар. Олтинкумуш буюмлар ва ипак гиламлар билан безатилган танобий уйнинг даҳлизига гулдор пояндоз тўшалди. Ойиша бегимнинг қошига қўйилган ўсма ҳали қуриб улгурмасидан кимдир хаяжон билан шивирлади:

— Келдилар!

Айвонда бошига олтин жиға кийган Бобур кўринди.

Сўнгги йилларнинг тинимсиз олишувлари уни хийла пишитган. Елкалари тўлишиб, ўн саккиз ёшли дуркун йигитга айланган.

Хобгоҳ олдида Бобурни таъзим билан кутиб олган ўн олти ёшли Ойиша бегим куёвга нисбатан кичкинагина, ингичкагина кўринади. Унинг бошига кийган сербезак баланд тоқиси, бўйнига тақилган зебигардон ва маржонлар нозик қоматига оғирлиқ қилаётгандек туюлади.

Канизлар таъзим қила-қила чиқиб кетдилар. Бобур улардан баъзиларнинг кўзлари шўх чақнаганини пайқаб ўнғайсизланади. Куёв ҳарамда тунайдиган тунни канизлару савдарлар олдиндан билиб, махсус тайёргарлик кўриши, хобгоҳга шунча одамнинг кириб-чиқиши унга нохуш туюлади.

Бунинг устига Ойиша бегим ҳаддан ортиқ уятчан.
У Бобурни:

— Марҳабо, ҳазратим! — деб тўрға таклиф қилганда овози ҳаёдан титраб зўрға эшитилди.

Уйнинг тўрида — ҳарир парда ортида икки кишилик баланд тўшак бор. Ойиша бегимнинг уятчанлиги Бобурни баттар ўнғайсизлантирди. У юқорига ўтиб ўтираётганда тўрдаги тўшакка қарамасликка тиришди. Кўзини дастурхонга тикиб:

— Хушвақт юрибсизми, бегим? — деб сўрашди.

— Шукр.

Ойиша бегим азбаройи тортинганидан дастурхоннинг Бобурдан энг узоқ четига ўтирди. Сўнг орага поқулай жимлик чўкди.

Ойиша бегим хушсурат бўлса ҳам ҳали етилмаган норасида қиз эди. Ота-онасидан эрта ажралган бу қиз кўп касалга чалиниб озиб кетган.

Бир вақтлар Бобур уни кўрмасдан олдин ҳаёлида тасаввур этиб юрган афсонавий паризод бутунлай бошқа эди. Ҳаёл билан ҳаёт орасидаги фарқ қанчалик катта бўлишини Бобур энди билди.

Урф-одатга биноан улар бир-бирларини тўйдан сўнг гўшангада биринчи марта кўрдилар. Улар ҳали бирор марта ҳамсухбат бўлмасларидан ва руҳан яқинлашишга улгурмасларидан олдин бошланган жисмоний яқинлик Бобурга уят ишдек туюлар ва унинг илгариги мусаффо туйғуларини поймол қилаётгандай бўларди. Шунинг учун кечалари давлат ишлари билан бўлиб, кўпинча ўзининг хобгоҳида тунаб қоларди... Ҳукмдорлик удумига биноан унинг фақат баъзи тушларни хотини билан ўтказиши расм-русумга ҳилоф ҳисобланмас, Бобурнинг отаси Умаршайх мирзо ҳам шундай қиларди. Лекин ёш келин-куёв орасида аввалги ҳаёлий орзу билан ҳозирги аҳволнинг кескин фарқидан келиб чиққан нохуш бир мураккаблик борлигини Ойиша бегим ҳам пайқар ва ўзини Бобурга номуносиб сезиб ич-ичидан изтироб чекарди.

Ойиша бегим орага тушган поқулай жимликда қирмизи чойнақдан пиёлага чой қуйиб, тавозе билан Бобурга узатди.

Бобур пиёлани олаётганда Ойиша бегимнинг ҳали унча тўлишмаган озғин қўллари титраб кетганини кўрди.

— Раҳмат,— деганда, унга ўз овози ҳам гуноҳқорона товланиб эшитилди.

Бобур бир вақтлар ҳаёлида ардоқлаб, оёғига бош қўйдиси келиб ғазал ёзган қаллиғини энди бунчалик уялтираётгани учун ўзини ҳам гуноҳқор сезарди.

Чошнагир аёл чинни лаганда зира ҳиди келаятган кабоб кўтариб кирди. Ёши элликка борган бўлса ҳам дуррани чаккасига қия қилиб ўраган бу шаддод аёл куёв-келинддаги уятчанликни сезиб, ҳазил қилди:

— Амирзодам, йигит киши ёш келинчакни гапга солиб ўтириши керак эмасми? Қизиқ-қизиқ ҳангомалардан сўзлаб беринг. Самарқанддан элчилар келган эмиш. Қандай хушхабарлар бор?

Чошнагир аёл лаганни куёв-келиннинг ўртасига қўйиб, кумуш соврини¹ очди. Оқ кийикнинг гўштидан тайёрланган тоза кабобнинг ҳиди зира ҳидига қўшилиб атрофга таралди.

— Бегим, сиз ҳам очилибгина ўлтиринг. Бундай бахтли ёшлик бир марта келадир. Завқини суриб қолинг, айланай бегим, бизга ўхшаб кексарганингизда эслаб юарсиз!

Чошнагир кулиб чиқиб кетди. Унинг «завқини суриб қолинг» деган сўзлари Ойиша бегимдаги уятчанликни камай-тириш ўрнига баттар оширган эди. Бобур эса бир оз дадилланиб:

— Қани, бегим,— деди. Лаган устига қўл чўзди-ю, лекин Ойиша бегим кабобга қўл узатишини кутди.

— Сиз бошланг,— шивирлади келинчак.

— Хўп, мана. Қани, энди, сиз...

Шу тарзда бир оз кабоб еганларидан кейин яна чойга ўтдилар.

— Бегим, шаҳрингизни соғинганингиз йўқми?

Ойиша бегим энди Бобурнинг юзига ботиниброқ қаради:

— Самарқандними?.. Соғиндим.

— Агар насиб қилса, ёзда Самарқандга қайтурсиз.

— Кошки эди... Бироқ мен... ўзим кетурменми?

— Йўқ, Самарқанд насиб бўлса, бу ердан ҳаммамиз кўчиб кетурмиз.

— Кўчиб?.. Андижон кимга қолур?

Бобур ҳоргин товуш билан:

— Ҳозирча Аҳмад Танбал билан Жаҳонгир мирзога, деди.

Ойиша бегим ҳеч нарсага тушунолмаб таажжубланиб қолди. Бобур Андижонни қайта қўлга киритгунча озмунча азиат чекдими? Энди нечук Андижонни ихтиёрий равишда ташлаб кетмоқчи?

— Мен Самарқандни соғинган бўлсам ҳам,— деди Ойиша бегим,— лекин сизнинг ота юртингизда осуда яшашни афзал кўрурмен!

¹ Соврин — овқат совиб қолмаслиги учун устига ёпиладиган махсус идиш.

Ойиша бегим бояги уятчанлигини унутиб, очилиб гашира бошлаганида Бобурга унинг юзи аввалгидан жозибалироқ кўринди.

— Сиздан ҳам ўтишамен, ҳазратим,— давом этди Ойиша бегим,— кўн азоб тортгансиз. Самарқанд сизга жангсиз дарвоза очмас. Энди ўзингизга раҳм қилинг. Урушга борманг, ўтишамен!

— Бегим, бу ердаги ҳозирги аҳволимиз сизга ҳам муносиб эмас, менга ҳам.

— Нечун бундай дедингиз? Ахир сиз ўз юртингизда подшоҳсиз-ку.

Бобур кинояли кулимсираб, бош чайқади:

— Ҳозир фақат номим подшоҳ,— деб кўйнидан бир варақ букланган қоғоз олди-да, Ойиша бегимга узатди.

Сўнгги ойларда Бобур кўнгил дардларини қоғозга туширишга кўп эҳтиёж сезар ва деярли ҳар куни шеър машқ қилар эди. Бу қоғозда унинг шу бугун ёзган бир қитъаси бор эди. Ойиша бегим қоғозни очиб, сатрларга кўз югуртирди:

Қолмади ҳурмат ахли оламда,

Оламу олам аҳлидан юв илик.

Бобуро, икки подшоҳлигини

Яхшироқ бу замонда бир беклик.

— Ҳазратим, шеърингиз муборак бўлсин!

— Қуллук. Энди менинг дардимни тушунгандирсиз?

— Тушундим. Сиз Жаҳонгир мирзонинг Аҳсида иккинчи подшоҳ бўлиб олганидан дард чекмоқдасиз. Илгариги ягона давлат иккига бўлинган...

— Бегим, гап фақат Жаҳонгирда эмас. Жаҳонгир мирзо хали бола. Гап Аҳмад Танбал билан Али Дўстбекда.

Бобур шундай деб, Али Дўстбек билан ўзининг орасидаги чигал ва мураккаб муносабатлар ҳақида гашира бошлади.

Бобур бултур бир даста навқари билан Ўратенанинг жаңубидаги тоғлар орасидан жуда қийин аҳволда юрганда Али Дўстбекдан чопар бориб қолди. Ўшанда Али Дўстбек Марғилон ҳокими эди ва Аҳмад Танбал билан ораси бузилган эди. «Агар Бобур мирзо Андижон дарвозасини Аҳмад Танбалга очиб бериб қилган гуноҳимдан ўтсалару илгаригидай яхши муомалада бўлсалар, Марғилонга келсинлар, шаҳарни берурмен», деди. Бобур дарҳол Марғилонга етиб келди. Али Дўстбек ҳам сўзининг устидан чиқди. Кейин унинг ёрдамида Бобур Андижонни ҳам олди.

Кўнглида кек сақламайдиган Бобур Али Дўстбекнинг бу

Ўрадамларини тангилик деб билиб, ўзи бундан ҳам катта бир тангилик қилди: Али Дўстбекнинг гуноҳидан кечибгина қолмай, уни Қосимбекнинг ўрнига соҳибихтиёр эшик оға қилиб кўтарди.

Лекин яхшиликни билмайдиган Али Дўстбек барча бекларни ўз томонига оғдириб олиб, Бобурдан ҳам юқори туришга интила бошлади. Бунга монелик қилмоқчи бўлган Қосимбекни Али Дўстбекнинг тарафдорлари тухматкашликда айбладилар. Ҳозир агар Бобур Али Дўстбекка қарши кескин бир чора кўрадиган бўлса, ичкарида унинг ҳамма тарафдорлари бош кўтаради. Ташқарида Аҳмад Танбал қиличчини қайраб турибди. Андижонга бостириб келиш учун баҳона излаяпти. Агар шундай баҳона топилса, ички-ташқи кучлар бирлашиб, Бобурнинг бошига яна қора кунларни солишади. Шу сабабларга кўра Бобур тишини-тишига қўйиб, ҳаммасига бардош қилишга мажбур.

— Ҳозир Али Дўстбек билан Аҳмад Танбал бизни ўргимчак тўридай чирмаб келурлар,— деди Бобур Ойиша бегимга.— Агар биз шу ўргимчак тўрини ёриб чиқиб кетмасак, кейин буларга емиш бўлурмиз!

— Ҳазратим, Самарқандда ҳам ёғийларингиз беҳисоб. Яна уруш бошланса...

— Самарқандда ҳозир дўстларимиз ҳам оз эмас.

— Келган элчи сизни нойтахтга чорладими?

Бобур элчи билан бўлган гапларни ҳозирча жуда махфий тутиши зарур эди.

Самарқанд беклари билан Султон Али мирзо орасида нифоқ кучайган. Мазид тархон бошлиқ беклар мингдан ортиқ навкарлари билан шаҳарни ташлаб чиққанлар. Улар Ургутда Бобурга мунтазир турган эмишлар. Яқинда Бухорони забт этган Шайбонийхон энди Самарқандга кўз тиккан эмиш. Агар Бобур тезда етиб бормаса, Султон Али мирзо пойтахтни Шайбонийхонга бериб қўйиши аниқ. Шайбонийхоннинг бераҳмликларини кўп эшитган одамлар ундан кўрқиб, энди шаҳар дарвозаларини Бобурга пинҳона очиб бермоқчи эмишлар. Бобур мана шу қулай пайтдан фойдаланиб қолганини истайди.

— Элчи бизни чорлагани рост,— деб, у Ойиша бегимга умумийроқ жавоб қилди.— Аммо Султон Али мирзо тахтни бизга осонликча бермас.

— Демак, яна уруш! Яна хавфу хатар!..

— Бегим, тоғнинг боши қорсиз бўлмас, йигитнинг боши — хатарсиз.

— Ҳазратим боя ўргимчак тўридан гап очган эдилар. Агар сиз кетсангиз, ўргимчак тўрида биз қандай қолурмиз?

Истасангиз сизни бирга олиб кетурмен!

— Жанг майдонгами?

Ойиша бегимнинг саволида озгина киноя ҳам бор эди. Буни сезган Бобур хижолатдан хиёл қизарди.

— Уруш тугагунча онам билан Хонзода бегим учовларингиз Ўратепада туришларингиз мумкин. Баҳаво жой. Шаҳар ҳокимининг хотини онамининг туғишган синглиси. У ердан Самарқандга боришларингиз ҳам осон.

— Ўратепа тоғлиқ жойми? Йўллари жуда ёмондир? Мен отлиқ юролмаймен.

— Маҳофада боришингиз мумкин.

Шаҳар қизи бўлган Ойиша бегим бир жойда муқим яшашни яхши кўрарди, йўл азобини кўтаролмас эди.

Бобурнинг сўнги гапига бош чайқаб:

— Маҳофадан кўрқамен,— деди.

«Ўгай тақдир менга бу борада ҳам киноя қилмиш! — деди Бобур ичида.— Мендек қўнимсиз сайёхтабиат кишига бунингдек позигу муқим табиат рафиқа бермиш!»

Ойиша бегим ҳозир ҳимояга муҳтож бир муштинар қиз бўлиб кўриди. Бобур унинг кўнглини кўтаргиси келиб, қувноқ оҳангда гапирди:

— Отда юролмасангиз, бегим, маҳофадан кўрқсангиз, унда мен сизни... кафтимда олиб юрурмен!

— Кулманг, мирзо ҳазратлари! Мен кафтингизда юришга муносиб эмасмен...

Ойиша бегимнинг сўнги сўзлари Бобурга алланечук ширин туюлди. Унинг йигитлик қони кўпиргандек бўлиб ўрнидан кўтарилди-ю:

— Йўқ, муносибсиз! — деди.

— Кулманг...

— Муносиблигингизни исбот этайми?

Ойиша бегим хуркович кийикдек чаққонлик билан ўрнидан турди ва қочишга ҳозирланди. Бобур тўй кечаси уни маҳофадан қандай озод кўтариб туширган бўлса, ҳозир ҳам ўшандай кўтариб олди. Уни тўрдаги тўшак томонга олиб ўтаётиб, пастки қандилда ёниб турган шамларни пуфлаб ўчирди.

Ҳозир шу дақиқаларда Ойиша бегим Бобурнинг кўзига оловли жозибага тўлиб кўриди. Ўзининг бу хобгоҳда уч-тўрт кунда бир марта тунаши энди тушуниб бўлмайдиган англашилмовчиликдай туюлди. «Минбаъд ҳар кун шу хобгоҳга келурмен! — деб ўзича аҳд қилди.— Мен Самарқандга кетсам, неча ой, неча ҳафталар айрилиқда ўтгай. Ундан кўра Андижонда мурсою қаноат билан яшайверсам-микин?»

Тонг етди. Кечаси Бобурнинг режаларини ўзгартирмоқчи бўлган сеҳрли туйғулар эрталаб офтобдан қочган юлдуздай қаёққадир яширинди. Эр-хотин нонушта қилиб ўтирганларида Аҳмад Танбал билан Али Дустбекнинг ўргимчак тўрлари яна унинг хаёлини чирмаб олди. Бобур кеча элчига «Самарқандга албатта борурмиз», деб ваъда берган, Қосимбек бошлиқ содиқ кишилар янги юриш тайёригини бошлаб ҳам юборишган эди. Бобур ваъдасидан қайтиши мумкин эмаслиги эрталабки ёруғликда аниқроқ кўринаётганга ўхшади.

Ойиша бегим ундаги хомушликни сезиб, сукут саклаб ўтирибди. Бобур унинг юзига ботиниб қарай олмай кўкрагидаги олтин баргакларига кўз ташлади:

— Бегим, ўрателага борадиган бўлдингизми?

Бобурнинг Самарқандга яна юриш қилиши қатъий экани унинг гап оҳангидан сезилди. Олдиндаги бир неча ойлик ҳижрон Ойиша бегим учун беҳад оғир эди. Бу оғирликни Бобур унчалик сезмаётгани Ойиша бегимга худди бемехрлик нишонасидек туюлди-ю, бирдан аламини келтирди.

— Ҳазратим, аввал Самарқанд сизга муяссар бўлсин. Кейин борсам биратула шахримга борурмен. Ўрателага эмас!

Бобурнинг назарида, Ойиша бегим унинг Самарқандни қайта эгаллашига кўп ҳам ишонмаётгандай кўринди. Шунинг учун Бобур ҳарамдан чиқиб кета туриб:

— Майли, бегим,— деди совуқ оҳангда:— Худо хоҳласа, шахрингизда кўришганда бу гапларни яна давом эткарурмиз.

САМАРҚАНД.

ҲАЛ ҚИЛУВЧИ ОЛИШУВ

1

Бўстонсаройининг бир четида ранг-баранг тошлар билан сангфарш¹ қилинган мрамор ҳовузли ҳаммом бор эди. Кечки пайт шу ҳаммомга Султон Али мирзонинг ҳарамдаги энг чиройли қизлар чўмилишга келдилар.

Ҳаммомнинг ичида гиламлар ва кўрпачалар тўшалган, шоҳона дастурхон тузаб қўйилган маҳсус бир хона бор эди. Бир вақтлар Султон Маҳмуд мирзо тириклигида шу хонадан қизлар чўмиладиган бўлмага махфий бир туйнук очилган эди. Шаҳвонийпарстлик билан доғ чикарган Султон Маҳмуд мирзо ўша туйнукдан қизларнинг чўмилишини томоша қилар эди.

¹ С а н г ф а р ш — гўзал тошлардан гул ясаи.

Султон Маҳмуд мирзо ўлиб кетганга беш йил бўлди. Ҳаммомда махфий туйнук борлигини унинг ўн етти яшар ўғли, ҳозир Самарқанд тахтида ўтирган Султон Али мирзо яқинда билиб қолди. Уни бу сирдан воқиф қилган Абу Юсуф Арғун ҳарамга бир қанча чиройли қизлар келтириб бериб, ёш подшонинг соҳибихтиёр, сирдош бекига айланди.

Ҳозир Султон Али мирзо қўлида май тўла биллур қадах билан махфий туйнук олдида ўтирибди. Мармар ҳовузда қий-чув қилиб чўмилаётган ялангоч қизлар унинг кўзларини ёндириб, вужудини жингак қилаётгандай бўлади. У томоғи курукшаганда май хўплаб қўяди-ю, аммо кўзини туйнукдан олмайди.

Бир пайт унинг бу томошасига кимдир халақит берди.

— Мирзо ҳазратлари, махфийлар фавқулодда хабар келтирмишлар.

Султон Али мирзо Абу Юсуф Арғунинг майин овозини танийди-ю, аммо унга ўгирилиб қарагиси келмайди:

— Нима хабар бўлса онамга айтаверинг.

— Бегим ҳазратлари мени сизга юбордилар, амирзодам!

Султон Али мирзо энди Абу Юсуфга ўгирилиб қаради.

Унинг қуюқ таъзими ҳам, пастки тишлари тушиб кетган кемтик оғзининг табассуми ҳам кўзига жуда ёмон кўринди:

— Жаноб бек, ўзингиз-ку, бизга меҳрибончилик кўрсатиб гўзал қизлар пешкаш қилдингиз... Энди нега ором олгани кўймайсиз?

— Мирзо ҳазратлари, салтанатингиз хавф остида! Мен шунинг учун оромингизни бузишга журъат этдим!

— Яна қандай хавф? Онам қаердалар?

— Девони хосда сизга мунтазирлар.

Султон Али мирзо кайфини бузганларидан аччиғи келиб, қўлидаги қадахни майи билан мармар деворга отиб уриб чил-чил сийдирди. Сўнг барвақт семирган йўғон гавдаси кайфдан хиёл чайқалиб, ташқарига чиқди.

Қоронғи тушиб қолган эди.

Девони хоснинг кираверишида эллик ёшлардаги қовоқлари қалин, жингалак соқолли бир бек қўл қовуштириб, бош эгиб турибди. Уй тўрида тикка турган Зухра бегимнинг юзи қаҳрданми, кўрқувданми оқариб кетган:

— Амирзодам, сиз айшу шират билан бандсиз. Хиёнатчилар пойтахтни ёғийга пинҳона топширмақчилигидан беҳабарсиз!

Султон Али мирзодан норози бўлиб шаҳарни ташлаб чиққан мингдан ортиқ бек ва навкарлар Андижондан қўшин тортиб келган Бобур билан бирга Дарғом бўй-

ларида фуреат кутиб юрганлари маълум эди. Аммо Султон Али мирзо барча дарвозаларга энг ишончли кишиларини қўйиб, шаҳарни маҳкам беркигиб ётар эди. Шунинг учун онасига зарда килиб:

— Яна нима ваҳима?— деди.

— Менга ишонмасангиз, мана Муҳаммад Султон жанобларидан сўранг. Бу бек ҳозиргина Бобурнинг қароргоҳидан қочиб келмишлар. Шаҳар ичидаги фитначилар бугун кечаси Сўзангарон дарвозасини Бобурга яшириқча очиб бермоқчи эмишлар. Пирингиз Хўжа Яҳё ҳам сиздан юз ўгириб, Бобурга тарафдор бўлган эмишлар.

— Ишонмаймен! — деб Султон Али мирзо қўл қовуштириб турган Муҳаммад Султонга тикилди.

— Амирзодам, гапим ёлғон бўлса бугун кечаси текшириб кўринг! Мен ёғнийларингиз билан Дарғом бўйида икки ҳафта юрдим. Хўжа Яҳёнинг ризолигини Бобур роса ўн бир кун кутди. Ниҳоят, бугун эрталаб Мамадали китобдор хўжанинг ризолигини олиб борибдир. «Тун ярмида келсинлар, шаҳарга киритгаймиз», деганмиш. Бобур бугун пешинда ишонган бекларини тўплаб, машварат ўтказди. Хайриятки, унинг ишонган беқларидан бири, мен — сизнинг содиқ қулингиз эдим!..

Султон Али мирзо қовоғи қалин бекка энди мамнун назар ташлади-ю:

— Ўғрини қароқчи ургандай бўлибдир! — деб хахолаб кулди.

Унинг кайф билан бепарво кулиши Зухра бегимнинг гашини келтирди:

— Амирзодам, ҳар бир дақиқа ғанимат. Хос навкарларингиз отланган. Ҳаммаси фармойишингизга мунтазир.

— Фармойишми? — деб Султон Али мирзо бир лаҳза ўйланиб олди:— Майли, Бобур дарвозадан кирсин. Кейин туттириб кўзига мил торттирмоқ керак! Токи бизга қасд қилгани учун абадий кўр бўлиб қолсин!

Абу Юсуфбек оқ оралаган қалин соқолининг учини тутамлаб бош чайқади:

— Туттиролсак яхши эди-ю, аммо бу режа анча қалтис, амирзодам. Дарвозани очсак, сўнгра ёпиб бўлмас. Бобурнинг улкан қўшини бор. Қалъа ичида ҳам тарафдорлари кўп. Ўтган сафар Самарқандга кирганда очларга нон улашиб, деҳқонларга уруғлик қарз бериб, авомнинг кўнглини овдаган экан. Бир ёқдан Хўжа Яҳёнинг фатвоси билан авом кўтариб, ташқаридан қўшин кирса..

— Йўқ, бу — жуда хатарнок! — деди Зухра бегим.

— Ҳа, ундан кўра тезроқ Сўзангарон дарвозасига бориб, у ердаги соқчиларни алмаштириш лозим,— деди Абу Юсуф ва

зарҳал жиддга сояшган бир қоғоз келтирди. — Амирзодам, мана бу — сизнинг муборак номингиздан ёзилган нишон¹. Бунда фитначи бекларнинг номлари ҳам кўрсатилган. Шулар бугун кечаси қўлга олинмоғи лозим.

— Фитначиларнинг молу мулклари мана бу Муҳаммад Султон каби садоқатли бекларга олиб берилсин! — деб қўшимча қилди Султон Али мирзо.

Қовоғи қалин бекнинг жосуслик қилишдан мақсади ҳам шу эди. У Султон Али мирзога икки букилиб таъзим қилди:

— Ўлгунимча хизматингиздамсен, амирзодам. Ижозат беринг, мана бу муборак фармойишингизни бажо келтиришда фақир ҳам навкарларим билан иштирок этай.

Бу бек фитначиларнинг ҳовлиларини талашда бевосита иштирок этса кўпроқ ўлжа олиши мумкинлигини сезиб шундай демоқда эди.

— Ижозат бердик.

Муҳрдор чақиртирилди ва қоғоздаги фармойишга подшоҳнинг муҳри босилди.

— Қолган ишни биз бажо этурмиз, — деди Абу Юсуф.

Султон Али мирзо тил учиди:

— Мен ҳам бирга борай, — деди.

— Йўқ, йўқ! — деди Зухра бегим тез. У ёлғиз фарзандини қоронғи тунда душман кўпайиб кетган шаҳарга чиқаришни истамас эди. Мирзо онасининг юзидан ўтолмагандай бўлиб саройда қолди.

Сўнг она-бола Бўстонсаройнинг иккинчи қаватидаги очиқ айвонга чиқиб, Сўзангарон дарвозаси томонга қулоқ сола бошладилар.

Тун сукунатида отларнинг дупури қулоққа баралла чалинарди. Гўри Амирдан сал нарироқда жойлашган Сўзангарон дарвозаси Бўстонсаройга кўп ҳам узоқ эмас эди.

Ярим кечада Бобурнинг илғорлари дарвозага секин яқинлашганда Абу Юсуф ва Муҳаммад Султоннинг навкарлари дарвозахона устидан уларга камондан ўқ отиб, бир қанча кишини ярадор қилди.

Қоронғида девор тепасидан тусмол билан отилган баъзи ўқлар отларга ҳам теккан эди. Оғриқдан асабийлашган отларнинг қаттиқ кишнагани Бўстонсаройга ҳам эшитилди.

Дарвозахона устидаги кўриқчилар Бобурнинг одамларини масҳара қилиб кулишарди:

~~Мирзоларинг барак²ни хом санабдир!~~

¹ Нишон — фармон, буйруқ.

² Барак — чучвара.

— Ха-ха-ха!

— Самарқандни энди тушларингда кўришлар!

— Кейин тушларингни сувга айтурсанлар!

— Хо-хо-хо!

Бобурнинг қўшини орқага қайтиб кетиши билан дарвоза олдида шовқин тинди-ю, кейин шаҳарни у ер-бу ерида итларнинг жон-жаҳд билан ҳургани, одамларнинг аччиқ фарёди эшитила бошлади. Абу Юсуф бошлиқ хос навкарлар дарвозани тинчитиб, энди фитначиларни овлашга киришганини айвонда ўлтирган Султон Али мирзо шу узук-юлуқ дод-войлар товушидан сездн.

— Энди тинч ухласак бўлур,— деб хобгоҳига кириб кетди.

Аммо Зухра бегим қандиллар ёниб турган ўз хонасига келиб, тонг отгунча ухламай ўтирди.

Ҳозиргина бир фалокатнинг олдини олинган бўлса ҳам, аммо келажакдаги мушкулотлар унинг уйқусини қочирмоқда эди. Бобур Самарқандни яна қамал қилиши мумкин. Унинг ўтган галги қамали ҳали кўпчиликнинг эсидан чиққан эмас. Ичкарида Зухра бегим ишонадиган одамлар тобора камайиб боряпти. Бугун фитначи беклар жазоланса ва таланса, Султон Али мирзодан норози бўлувчилар яна кўпаяди. Уларнинг бошчиси — Хўжа Яхё жуда нуфузли руҳоний. Султон Али мирзо Хўжа Яхёга қарши кескин чора кўролмайди. Чунки бутун диндорлар Хўжанинг томонида. Агар Хўжа авом халққа фатво бериб, бутун муллоларни ишга солса, ғулу кўтарилиб кетиши мумкин.

Зухра бегим хаёлидан ўзига таянч излар экан, яқинда Бухорони олган, энди Самарқандга қўшин тортиб келиши кутилаётган Шайбонийхон эсига тушди. Бундан уч кун бурун нақшбандий дарвишларидан бири Зухра бегимга Шайбонийхондан махфий бир хат келтириб берган эди. Бегим пардали махсус тоқчада турадиган олтин сандиқчасига калит солиб очди-да, ўша хатни олиб, қандил ёруғида қайта ўқий бошлади.

Зарвараққа битилган чиройли ёзувда Зухра бегимнинг ақли ва ҳусни усталик билан таърифланган, ёш умрини ўғлига фидо қилиб эрсиз юргани алоҳида эҳтиром билан тилга олинган эди. Хатнинг энг ғалати жойи — Шайбонийхоннинг Зухра бегимга ғойибона кўнгил қўйиб, унга уйламоқчи эканини шеър билан айтгани эди:

«Ўғлингиз ўғлиму ўзингиз ёрим,
Дилбару ҳамнафасу дилдорим».

Ҳозир шу сатрларни ўқиётганда Зухра бегим забардаст бир эркакнинг ўтли нафасини ўз юзида ҳис қилгандай бўлди. Зухра бегим олти йилдан бери мана бу тўшақда ёлғиз ётади. Унинг гулдай умри бевалиқда сўлиб боряпти. Зухра бегим тегаман, деса уни оладиган зодагонлар топилар эди. Ахир у таърифи кетган гўзал қиз бўлгани учун Султон Маҳмудхондай подшоҳнинг суюкли хотинига айланган эди. Бироқ ўғли тахтга ўтирган Зухра бегим фақат ўзига муносиб подшоҳга тегиши мумкин, удум шундай.

Мана энди унга харидор подшоҳ ҳам топилди. Бегим Шайбонийхоннинг шеъридаги иккинчи сатри яна бир ўқиганда хаёлий бир эркак уни қучиб, «Дилбар ёрим, дилдорим!»— деб эркалаётгандай бўлди-ю, бадани қизиб кетди.

У ўрнидан туриб, қатта тошойна олдиға борди-да, ўзининг аксига тикилиб қаради. Уйқусиз тундан кўз остилари хиёл кўкариб салқиган. Аммо қошлар — қалдирғоч қаюпти. Қора кўзлари учқун сочиб порлайди. Кўкраклар баланд. Бўйни оқ мрамардай силлиқ, лаблари эҳтиросли.

Шайбонийхоннинг ёши эликка яқинлашган, хотинлари ва болалари бор, Зухра бегим буни билади. Аммо бегим ўзининг ойнадаги аксига мамнун тикилиб турган шу дақиқаларда: «Шайбонийхоннинг саҳройи хотинлари нима бўлипти?— деб ўйланди.— Мен хонни ўзимга шундай ром қилайки, ҳаммаси оғзини очиб қолсин!»

Эртага ўша дарвеш келиб, бегимнинг жавобини олиб кетиши керак. Бегим Шайбонийхонга хат ёзиш учун қоғоз-қалам олди.

Бироқ қандилларда кўпдан бери ёнаётган шамларнинг тутунидан уй сал хира тортиб қолган эди. Зухра бегим ҳаворанг барқут дарпардаларни очди-ю, саҳар салқинига юзини тутиб, айвон эшиги олдида бирнас турди.

Шунда аркка яқин бир маҳалладан эр кишининг жон аччиғи билан қичқиргани эшитилди. Леёл кишининг ўкириб йиғлагани унга жўр бўлди.

Абу Юсуф билан Муҳаммад Султон ҳамон фитиачиларин овлаб юргани, уларнинг уйларини талаб бойнётгани, алмакимлар ўқ ёки тиг зарбидан жон бераётгани, Зухра бегимнинг кўз олдиға келди. Шунда хаёли бирдан бошқа ёққа бурилди.

Шайбонийхон Самарқандни жангсиз олиш учун Зухра бегимга ёлғондакам ишқ изҳор қилаётган бўлса-чи? Самарқандни олгандан кейин сўзидан қайтса-ю, Зухра бегимни мана бу қоронғи тунда ўкириб йиғлаётган аёлнинг аҳволиға солса-чи?

Бу шубҳадан бегимнинг борлиги музлаб кетди. У орқасига қайтиб Шайбонийхоннинг мактубини яна қўлига олди. Хон унинг шундай шубҳаларга боришини олдиндан сезгандай, мактубнинг яна бир жойида шеър айтган эди:

«Мен Самарқандни сенсиз нетайин,
Жасади тийрани жонсиз нетайин?»

Бу сатрларнинг тафтидан Зухра бегимнинг қалбига яна илиқлик югурди. Шу топда бегимнинг ўзига ҳам ёрсиз Самарқанд — жонсиз танадай совуқ туюларди. Шайбонийхон унинг бевалик ҳаётига иссиқ жон бўлиб кириб келиши кўз олдида гавдаланди-ю, қаламини қўлига олиб, хонга жавоб ёзишга киришди. Сатр бошидан хоннинг таърифини юксакларга кўтариб:

«Ҳазрати имоми замон, халифайи раҳмон», деб ёза бошлади...

2

Самарқанд қалъасининг ташқарисидаги боғ кўчалар, Улуғбек расадхонасининг атрофлари, Оби-раҳмат ариғининг бўйлари беҳисоб кўшинга тўлиб кетган. Чупонота тоғининг этакларида, нарёғи Зарафшон соҳилида юзлаб ўтовлар ва чодирлар пайдо бўлган.

Бу кўшинининг сарқардаси Шайбонийхон Боғи Майдонга, Улуғбек қурдирган машҳур Чилсутун кўшигига келиб тушган эди. Шайбонийхон кўшкнинг юқориги қаватида тўрт тарафи айвонлик катта уйда пешин намозини ўқиб бўлган ҳам эдики, ясовул кириб, Султон Али мирзо бир неча ичкилари билан қалъадан хон хузурига келганини айтди.

Шайбонийхоннинг кичик-кичик кўзлари қувончдан ялтиллаб кетди.

— Султонларни бу ерга чорланг. Кейин мирзонини бошлаб киришг.

— Ҳазратим, тахтингиз пастки, ошиёнда.

— Жойнамозим тахтимдан баланд!

— Лутф қилдингиз, ҳазратим!

Ясовул икки букилиб таъзим қилганича орқаси билан юриб чиқиб кетди.

Шайбонийхон бўғалоқ жунидан тўқилган майини малла жойнамоз четига қайтиб ўтирди.

Ясовул пойгаҳдаги эшикдан Султон Али мирзонини бошлаб кирганда Шайбонийхон хали ҳам шаҳнишинда ўша жойнамоз

устида ўзгирган эди. Шаҳидини пастиди унинг. Ун чоғли султонлари чўккалаб ўлтиришибди.

Шайбонийхон безаксиз жўн кийинган эди. Султон Али мирзо эшиқдан кирган заҳоти унинг салласига қадалган дуру гавҳарлар, тўнига тикилган олтину марваридлар дабдаба билан ялтираб кўзга ташлади. Аммо Мирзонинг кўзлари бесаранжом, семиз гавдаси бўшашган. У онасининг ва Абу Юсуф арғунинг гапига кириб, қалъадан қўшинсиз чиқиб келган эди. Бу ерда хоннинг беҳисоб қўшинини кўриб, юраги така-пука бўлиб кетди.

Шайбонийхон билан аввалдан тил бириктириб юрган Абу Юсуф Султон Али мирзони хон хузурига авраб олиб келиш учун боя тушки овқат пайтида мирзога яхши кўрган майларидан анча ичирган эди. Ҳозир Султон Али мирзо Шайбонийхонга томон таъзим билан бораётганда оёқлари гиламда қоқиниб, гавдаси гадираклаб кетди. Абу Юсуф суяб қолмаганда йнқилиб тушарди.

Шайбонийхон ўрнидан туриб, Мирзо билан кўришар экан, хушбўй май ҳиди димоғига урилди. У Мирзонинг кайфи борлигини дарров сезди-ю, уни ўғли Темур Султон ва куёви Жонибек Султондан қуйироққа ўтқазини ясовулга имо қилиб буюрди.

Шайбонийхон бошига қизил бўрк устидан оқ салла ўраган, кўк мовутдан або кийган. Олтин тугмали або тагидан кийган яшил кўйлаги мусулмон байроғининг рангини эслатади. Жойнамоз устида ўлтиргани ҳам уни художўй бир одамга ўхшатиб кўрсатар эди. Бунинг ҳаммаси Султон Али мирзонинг ваҳимасини сал босди-ю, аммо қуйидан жой кўрсатилгани унинг иззат-нафсига тегди. Бошқа султонлар Шайбонийхоннинг олдида чўккалаб ўтирганда, Султон Али мирзо атайлаб чордана куриб олди. Шайбонийхоннинг ўғли унга гаши келиб қараб қўйди.

— Сиз менга фарзанддек яқин бўлмоқчимисиз, Мирзо? — сўради Шайбонийхон мулоим товуш билан.

— Хон ҳазратлари иттифоқ тузиш учун чорлабдирлар...

— Волидаи муҳтарамингиз келмадиларми?

— Онам мени юбордйлар.

— Аммо ўзлари ҳам келмоқчи эдилар.

— Аёл киши, тортинурлар.

— Одам юборинг, Мирзо, онангиз ҳам келсинлар.

Султон Али мирзо ёнида чўккалаб ўтирган Абу Юсуфбекка қаради. Абу Юсуф дарҳол ўрнидан туриб, Шайбонийхонга таъзим қилди:

— Ижозат беринг, хон ҳазратлари, мен ҳозир бориб Зухра бегимни айтиб келай.

Бу нозик ишларнинг ҳаммаси Абу Юсуфнинг ҳаракатлари билан битаётганини яхши биладиган Шайбонийхон ясовулга буюрди:

— Абу Юсуфбекка менинг энг чопқир отларимдан бирини инъом қилинг!

— Миннатдорман, ҳазратим!

— Бек, кайтишда Хўжа Яҳёга ҳам хабар қилинг. Султон Али мирзо келган жойга Хўжа келмаса ора узилур.

— Ҳақ гапни айтдингиз, хон ҳазратлари!

Абу Юсуф бу топшириқни бажариш учун кетгандан кейин Шайбонийхон ўрнидан турди-ю, султонларига қараб:

— Мирзо билан суҳбатлашиб ўтиринглар,— деди, ўзи эса орқа эшикдан айвонга чиқиб, пастга тушиб кетди.

Султон Али мирзо атрофидаги султонларнинг адоватли юзларига қараб, улар орасида ёлғиз қолишга кўрқди ва ўрнидан туриб, ён эшикка қараб йўналди. Шунда туркистонлик султонлардан бири ўрнидан сакраб туриб, унинг йўлини тўсди.

— Амирзода, буйруқ бўди¹ энди бизнинг янимиздан кетмайсиз!

Барваста бир навкар қўлини ханжарининг сопига қўйиб, эшикка кўндаланг бўлиб олди. Султон Али мирзо қопқонга тушганини энди сизди-ю, кайфи бирдан тарқаб кетди. Юзи бездек бўлиб, бояги жойига қайтиб ўтирди.

Орадан бир-икки соат ўтгандан кейин Зухра бегим ҳам тўртта канизи билан Боғи Майдонга кириб келди. Унинг бошида келинчакларни эслатувчи оқ ҳарир рўмол, пешонасига эса тиллақош тақилган. Эғнида хипча белли гулгун қабо. Унинг тагидан кийилган оқ атлас қўйлагининг этаги шунчалик узунки, икки каниз икки томондан кўтариб келяпти.

Зухра бегимни Чилсутуннинг пастки ошиёнида махсус безатилган хонаи хосга бошлаб ўтаётганларини Шайбонийхоннинг қирқ ёшлардан ошган катта хотини кўриб қолди:

— Бу не деган юзсиз хотин? — деб ёнидаги аёлга шипшиди: — Эрсираган мегажин иззатини билиб уйда ўтирмайдими? Совчи бориб ишни битирганча шошмай турмайдими? Илойим касофати ўзидан берига келмасин!

Зухра бегим хонаи хосга кирганда Шайбонийхон тахт устида ўтирар эди. Зухра бегим икки букилиб таъзим қилар экан, Шайбонийхон у билан тахт устидан тушмасдан сўрашди.

— Хуш келдингиз, бегим.

¹ Б ў д и — бўлди.

Хондан бошқача муомала кутган Зухра бегим тўсатдан кўнгли бузилиб, кўзига ёш олди.

— Хон хазратлари, мен ўзимни сизга қурбон қилдим. Фарзандимни, хону монимни — ҳаммасини марҳаматингизга ишониб топширдим!

Зухра бегимнинг юзи оқ ипак тўр ортидан аниқ кўринмас эди. Хон унинг тавҳар кўзли олтин узуклар тақилган кўлларига қаради. Томирлари бўртиб турган бу титроқ кўллар бегимнинг анча ёшга борганидан далолат берарди. Шайбонийхон яқинда Бухорода никоҳлаб олган ўн тўққиз ёшли кичик хотинини эслади. Сўнг Зухра бегимнинг каттагина ўгли Султон Али мирзо кўз олдидан ўтди.

— Хотиржам бўлинг, бегим. Сизнинг мақсадингиз бизга маълум. Худо хоҳласа, муродингиз ҳосил бўлмай қолмас.

Шайбонийхон бошқа ҳеч нарса демади. Ясовул Зухра бегимни хонан ҳосдан олиб чиқиб кетди. Уни канизлари билан бошқа бир кичикроқ хонага киритиб, эшикларини ташқарисидан ёшиб олдилар.

* * *

Шайбонийхоннинг инима қилмоқчи эканини ҳеч ким тушуинмас, аммо бугун Боғи Майдонда фавқулодда бир ҳодиса бўлаётганини сезган барча лашкарбошилар ва аъёллар Чилсутун кошонасининг ён-вериди икки-учтадан бўлиб айланиб юришар эди. Уларнинг орасида шоир Муҳаммад Солиҳ ҳам бор эди. Унинг ипак салласи нозик қилиб ўралган, калта енгли ипак абоси ўзига жуда ёпишиб туради. Ёзда ҳам теллак кийиб юрадиган, урушдан бошқа нарсани билмай кўполлашиб кетган кўчманчи султонлар унинг зиёлича нозик кийинишини ёқтирмайдилар, темурийлар хизматида ўтган оғир ўтмишини эслатиб туришни яхши кўрадилар.

Найман уруғининг бошлиғи Қамбарбий боғда Муҳаммад Солиҳга тегишди:

— Ҳа, жаноб шоир, Самарқанддан мирзонгиз минан чечангиз¹ келиб, суюниб турибсизми?

— Қамбарбий жаноблари, Зухра бегим асли ўзбекнинг найман уруғидан бўлурлар. Бегимни мендан олдин сиз чеча дейишингиз лозим.

Мангит, дўрмон ва кўшчи уруғининг султонлари бу гапни ёқтириб хахолаб кулдилар, Қамбарбийнинг аччиғи келди. Муҳаммад Солиҳга ўшқириб:

¹ Чечача — бу ерда келиннинг, янга маъносига.

— Сиз-чи? — деди.— Сиз барлос туркиданмисиз?! Темур ва темурийлардан чиққан барлослар Шайбонийхоннинг энг ёмон кўрган уруғи эди. Муҳаммад Солиҳ Хусайн Бойқаро саройида хизмат қилган, Султон Али мирзога ҳам мулозим бўлган, ахири мирзолардан айниб, Шайбонийхон томонига қочиб ўтган эди. У Султон Али мирзонинг ҳарбий сирларини Шайбонийхонга айтиб бериб, Бухоро ва Дабусия қалъасининг олиншига кўмаклашгани учун хон уни ёқтириб қолган эди. Аммо Қамбарбий ичида уни: «Хиёнат йўли билан обрў орттирган беқарор турк!»— деб ёмон кўрар эди.

Муҳаммад Солиҳ Қамбарбийнинг бу нафратини ўзига олгиси келмай, гапни ҳазилга бурди:

— Жаноб Қамбарбий, мен ҳозир — ўзбек туркиданмен!

— Қувлик қилманг, ўзбек бошқа, турк бошқа!

— Лекин ўзбекда «ота юртим Туркистон» деган нақл бор-ку, бунисига не дейсиз?

— Вой-бўй,— деди Кўпакбий,— манав шоиринг бизнинг Туркистонни ҳам туркларга бериб жубормоқчи-ғу!

Дашти Қипчоқдан чиққан оми Кўпакбий Туркистондаги маданий шаҳарни ўзиники қилиб гапирганидан Муҳаммад Солиҳнинг кулгиси келди:

— Жаноб Кўпакбий, сиз аввал Туркистон деган сўзнинг маъносини тушуинг! Туркистон — турклар макони дегани-ку!

— Не демоқчисан? Биз Рум¹ туркидан тарқаганмизма?

— Йўқ, Рум турклари бошқа, биз бошқамиз! Чунки Мовароуннаҳр ҳалқи Рум туркларидан неча асрлар аввал мана бу водийларни обод қилмишлар. Самарқанд кўрғонидан берида турган ху ана у тепаларга бир қаранг. Ана ўша ерда бундан минг йил аввал Афросиёб деган улкан шаҳар бўлган. Афросиёб эса Мовароуннаҳр туркларининг афсонавий қаҳрамони эди. «Унинг асли оти Али Эр Тўнға бўлган» деб, «Қудатғу биллик» да Юсуф Хос Ҳожиб ёзмишдир.

— Бу шоир ўзбекнинг понини еб, нуқул туркни мақтайди-я!

— Жаноб Қамбарбий, ўзбек, қозоқ, туркман, қирғиз — барчаси ҳам туркий улуслардир. Бир отанинг болаларидек еримиз бир, тарихимиз бир. Сизлар ўзбек уруғларининг тарихини Ўзбекхондан² бошлайсизлар. Бу тўғри эмас.

¹ Рум — Туркия

² Ўзбекхон — Олтин Ўрда хони, 1312—1342 йилларда ҳукмронлик қилган, унинг пойтахти Сарой Берке Волга бўйида, ҳозирги Волгоград яқинида бўлган.

— Нега тўғри бўлмас экан? — ўшқирди Кўпакбий, — Ўзбекхондан тарқилган эмасмизма?

— Жаноб Кўпакбий, сизнинг қипчоқ уруғингиз Ўзбекхондан беш юз йил олдин машхур бўлган. Кўнғирот уруғининг тарихи ҳам олти-етти асрга боради. Манғит, найман, дўрмон, қушчи уруғлари ҳам қадимдан бери бор. Бу уруғлар ҳаммаси ҳозир онҳазратим Шайбонийхон қўл остига бирлашиб, «Ўзбек улуси» деган умумий ном олган экан, сизлар бу улуснинг тарихини эсдан чиқарманглар. Ўзбек деган исм туркий халқларда Ўзбекхондан печа юз йил олдин ҳам мавжуд бўлган. Мен Хоразмда ўсмишмен. Қадимий китоблардан ўқидимким, Чингизхондан олдин шоҳ бўлган Хоразмшоҳ Муҳаммад ўз ўғилларидан бирига Ўзбек деб ном қўймишдир. Шундан маълумки, бу ном юртимизда Чингизхон келмасидан олдин ҳам мўътабар бўлган. Ўзбек номини бизнинг улусимиз Ўзбекхондан олган эмас. Аксинча, бу қадимий номни Ўзбекхон бизнинг туркий улуслардан олмишдир!

— Яна туркий дейди-я! Оббо сартнинг боласи-ей!

— Тарих шундай бўлса мен не қилай, жаноб Қамбарбий? Минг йиллардан буён Хуросондан нарёғи Эрону бериғи ёғи Турон деб юритилур... Хон ҳазратлари буни яхши билурлар. Имоми замон Бухоро мадрасасида таҳсил кўрганларида жуда кўп туркий шеърларни ёд олганлар. Ўзлари ҳам туркий тилда ғазаллар ёзганлар. Мен онҳазратнинг ғазалларидан бир байт келтирай, эшитинг:

«Фиркат отидин йиқилдим, ёр келди сўрғали

Эй Шайбоний, ёр дардингга даво қилди яна».

— Хон ҳазратларининг бу шеърлари туркийча эмас, ўзбекча! — деди Қамбарбий.

— Лекин барча туркигўй шоирлар худди шу тилда шеър ёзганлар-ку! Агар бу ўзбек тилида бўлса, демак, Навоий ҳам ўзбек тилида ёзган. Демак, камина ҳам ҳозир сизлар билан ўзбек тилида сўзлашмоқдамен. Демак, Мовароуннаҳрнинг туркий тилию ўзбек тили, аслида бир тил. Жаноблари, энди дилимиз ҳам бир бўлмоғи керак. Темурийлар турку ўзбек деб улусни улусдан ажратиб, халқни пароканда қилдилар, мамлакат парчаланиб, хароб бўлди. Энди имоми замон, Искандари соний¹ яна шу улусни бирлаштириб,

¹ Искандари соний — Иккинчи Искандар, Шайбонийхонга берилган юксак таърифлардан бири.

мамлакатга ягона жон ато қилмоқчилар! Илоҳим ҳазрат хонимиз шу мақсадларига етсинлар!

Муҳаммад Солиҳнинг бу гапига энди ҳеч ким эътироз қилолмади. Мунозарада усталик билан ғолиб чиққан шоир кўшкка қараб кетди.

Кўпакбий Қамбарбийга қараб:

— Сартнинг боласини кўрдингизми? — деди.— Буларни гап билан жеңиб бўлмайти!

— Гап билан енгмасак қилич билан енгамиз! — деди Қамбарбий. Ҳаммалари хаҳолаб кулдилар.

* * *

Кўшкдан ясовул чиқиб, боғда мунтазир турган лашкар-боши ва аъёнларни хон ҳазратлари юқориги қаватга кенгашга чақирганини айтди.

Боғдаги аркони давлат кўшкнинг тўрт бурчига минорага ўхшатиб шланган ва торгина йўлак ичидан ўтган зинопо-лар билан юқорига кўтарила бошладилар.

Хоннинг ўзи ҳали ҳам пастдаги хонаи хосда яна ниманидир кутмоқда эди.

Кечки пайт Самарқанддан беш-олтита муридани эрган-тириб, Хўжа Яҳё ҳам чиқиб келди. У Боғи Майдонга кириб отдан тушаётганда саросима бўлиб, оёғи узанги қайишига ўралиб қолди. Муридлари уни суяб туширдилар.

Катта оқ салла, малла сақарлот делагай кийган Хўжа Яҳё Шайбонийхон ўтирган тахтнинг олдиғача таъзим қилиб борди. Қироатга ўрганган жарангдор товуш билан:

— Ассалому алайкум, хон ҳазратлари,— деди.— Самарқанд дарвозалари сиз улуг зот учун очикдур!

Шайбонийхон Хўжа Яҳё билан ўрнидан турмай сўраш-ди-ю, киноя қилиб деди:

— Самарқанд қопқаларини биз учун сиз очиб келдингизми?

— Ҳазратим, ҳар иш худонинг хоҳиши билан бўлур.

— Бироқ сизнинг хоҳишингиз — Самарқандни Бобурга бериш эди-ку?

— Осий бандалармиз, хон ҳазратлари. Хатолик ўтган бўлса, афв этинг, хузурингизга бош эгиб келдим...

Хўжа Яҳё кўзига ёш олди.

Шайбонийхон ясовулга буюрди:

— Юқорига олиб чиқиб мирзосининг далдасига¹ ўтир-ғизинг!

¹ Далдасига — қаватига, сояеига дегани.

Хўжа Яҳёни олиб чиқиб кетганларидан кейин Шайбонийхон ўзининг энг яқин маслаҳатгўйи бўлган олтмиш ёшли мўйсафид мулла Абдурахимни чақирди ва у билан шима ҳақдадир яккама-якка гаплаша бошладди.

Хоннинг шошилмаётгани баъзи султонларни таажжубга солмоқда эди. Самарқанд дарвозалари очик пайтда нега пойтахтга от қўйиб кирмасдан, бу ерда имллаб ўтиришибди?

3

Шайбонийхон тўрдаги эшикдан кирганда ҳамма ўтирганлар ўришларидан санчиб туриб, хонга эгилиб таъзим қилдилар. Хон шаҳнишинга тўшалган кимхоб кўрпача устига чордана қуриб ўтирди. Унинг ўнг ёнига чўкка тушган мулла Абдурахим қуръондан қисқа бир оят ўқиб, хон ҳазратларига энг олий тилаклар билдирди-ю, ниҳоят мақсадга ўтди:

— Имоми замон, халифани раҳмоннинг ниятлари фақат шаҳр олиш эмас, дину миллат душманларини фош этиб, сизу бизни Муҳаммад алайҳиссалом юрган муқаддас йўлга етаклашдир. Агар фақат молу мулкни ўйлайдиган подшоҳ бўлса, Самарқанд қопқалари очилган заҳоти урҳо-ур, деб қалъага от қўйиб кирур эди, карнай-сурнай чалдириб, ўз галабасини тезроқ халққа ошкор килур эди. Аммо бизнинг улуғ хонимиз доноликда Искандари замон Шайбонийхон молу мулкдан аввал инсофу имонини ўйлаюрлар.

— Барҳақ!— деб қўйди мулла Абдурахимдан настрокда ўтирган Муҳаммад Солиҳ.

— Подшоҳ инсофу имонини унутса не чоғлиқ мурдорликлар юз бериши, мамлакат не чоғлиқ хароб бўлиши темурийларнинг кирдикорларидан бизга аён. Абдуллатиф мирзо ўз отаси Улуғбек мирзони ўлтиртирди. Ҳиротда Ҳусайн Бойқаро ўз невараси Мўмин мирзони ўлтиртирди. Мана ҳозир биз билан ўлтирган Султон Али мирзо ўз отаси Бойсунқур мирзони туттириб ўлдирмоқчи бўлганда, отаси қочиб қутулди. Кейин Бойсунқур мирзо бу инисини туттирганда кўзини кўр қилмоқчи бўлди. Аммо жаллодни олтига сотиб олиб, бу Мирзо ҳам қочиб қутулди. Мирзоларнинг саройида сотқинлик, хиёнат, бузуқлик авж олди. Қуръони шариф майини макруҳ деб қатъий тақиқлаган. Аммо даврамизда ўлтирган мана бу ёш Мирзо жойнамоз устида ўлтирган имомни замон ҳузурига май ичиб ширакайф келмиш. Бу Мирзонинг шаҳвонийпарастлиги, шу ёшдан ҳаром йўлга юришлиги имомни замон хонимизга аввалдан аён эди!

Кўнакбий ғазабланиб гап қўшди:

— Осиб ўлдириш керак бундай Мирзони!

— Айб фақат бу навжувон Мирзода эмас,— деб Муҳаммад Солиҳ унга эътироз қилди.— Бунинг отаси Махмуд мирзо бағоят имонсиз бузуқ одам эди. Самарқандда подшоҳлик қилганда хотинбозликка қаноат қилмай, баччабозликни ҳам авжига чиқарган эди. Бечора халқ чиройли ёш ўғлонларини кўчага чиқартиришга қўрқиб, кизларни яширгандек ичкарига яширар эди.

— Ўғил отасига тортибдир-да?

— Онаси-чи? Мирзонинг онаси қалай?

Бу қалтис саволдан ҳамма бир лаҳза жим бўлиб қолди. Чунки «Шайбонийхон Зухра бегимни никоҳлаб олмоқчи эмиш», деган овоза кўпчиликнинг эсига тушди. Хон бу аёлга уйланса обрўси тушишини бояёқ сезган ва уйланмоқчи эмаслигини мулла Абдурахимга айтган эди. Ҳозир мулла Абдурахим миш-мишларни баратараф қилишга шошилди:

— Мирзоларнинг касофати хотинларига ҳам урмиш. Бу Мирзонинг онаси ўз нафси учун ёлғиз ўғлини қурбон қиладиганга ўхшайди!

Мулла Абдурахимнинг бу гапидан кейин хоннинг Зухра бегимга муносабати ҳам кўпчиликка аён бўлди. Султонлардан бири:

— Қутурган бияга судратиб ўлдириш керак ундай хотинни! — деди.

Яна бири:

— Қонга солиб энг баланд минорадан ташлаш керак! — деди.

Шайбонийхон мунозарага эрк бериб, ўзи ҳамманинг гапига зимдан қулоқ солиб ўлтирарди. Бир-биридан қўрқинчли таклифлар кўпайиб кетгандан кейин Шайбонийхоннинг ишораси билан мулла Абдурахим ҳаммани жим қилди.

Хон гапирар экан, ўнлаб кишилар унинг салмоқдор, вазмин овозидан, дона-дона қилиб айтаётган сўзларидан сехрлангандай котиб қулоқ сола бошлади. Шайбонийхон мирзоларининг инсофни, имонни унутганлари, эл-улусни вайрон қилганларига яна бир талай мисоллар келтирди-ю, бирдан Хўжа Яхёга юзланди:

— Бу мирзоларининг пирн — сизнинг отангиз Хўжа Аҳроп эди. «Мен валийман» деб, подшоҳларга ҳукмини ўтказиб, жуда катта бойлик орттирган эди. Бизнинг хабаримиз бор, отангиздан сизга жуда кўп олтин қолган. Отангиз ўлгандан кейин, мана, ўн бир йилдан бери сиз Самарқандга руҳоний ота бўлиб юрибсиз. Сиз ҳам нафсга берилиб, жуда кўп сийму зар тўплагансиз. Баллиқ бошидан бузилади. Пир қандай бўлса, мурид ҳам шундай бўлади. Далдангизда

ўтирган мана шул шаҳвонийпараст ёш Мирзо сизнинг муридингиз, худо олдида сиз шунга жавоб бераман деб қўлини олгансиз!

Шайбонийхон шаҳодат бармоғини бигиз қилиб, аввал Мирзони, сўнг Хўжа Яҳёни кўрсатди-да, кейин ўша бармоғини пастга қаратиб силкитди:

— Сизнинг яна бир муридингиз аёл боши билан эр истаб келиб, пастда ўтирипти. Сизнинг қандай пирлигингизни мана шулар кўрсатиб турипти! Сиз аввал муридларингизга хиёнат қилиб, Самарқандни Бобурга бермоқчи бўлдингиз. Кейин булар пирларига хиёнат қилиб, менинг олдимга келди. Хиёнат устига хиёнат! Бири у ёққа тортса, бири бу ёққа тартади! Подшоҳ ўзича-ю, дин раҳнамоси ўзича! Бири бирини алдайди. Бири бирининг гўштини смоқчи бўлади! Муҳаммад алайҳиссалом ҳам пайғамбар эдилар, ҳам подшоҳ эдилар, ҳам лашкарбоши эдилар. Ким шунга қодир бўлмаса, ким пайғамбаримизнинг муқаддас йўлидан юрмаса, мана шу пир билан муридга ўхшаб кофирлик жарига йиқилади!

Шайбонийхон бу гапларни ўзининг қўл остидаги аъёнларига ҳам тегизиб гапирмоқда эди. Чунки уларнинг баъзиси «хонимиз тахту тожга қаноат қилмай имоми замон, халифани раҳмон ҳам бўлиб олдилар», деб шивирлашар эди. Темурийларнинг ишини қўдан бери кузатиб юрган Шайбонийхон уларнинг салтанатларида Хўжа Аҳрор каби диний раҳбарлар ўзларича мустақил ҳукмдор бўлиб олиб, мирзоларнинг ҳокимиятини ичдан заифлаштирганини яхши билар эди. Шайбонийхон хонлик ҳокимияти билан диний ҳокимиятни ўз қўлида бирлаштириб темурийларга нисбатан катта бир устуликка эришмоқда эди. У Бухорода мадрасада ўқиб юрганда шарият ва тариқат илмини яхши ўрганган, қуръонни ёд билар эди. Ҳозир Шайбонийхоннинг қароргоҳида ислом динини ундан яхши биладиган, қуръонни қироат билан ўқишда ундан ўтадиган одам йўқ эди. Унинг имомлик ва халифалик уивонлари шундан ҳам келиб чиққан эди. Шайбонийхон марказлашган улуғ бир давлат тузишга интилар экан, бу мақсадга тезроқ етиш учун қўл остидаги одамларнинг ихлос ва эътиқодини ҳам қозонишга, уларнинг мафкурасини ўзига бўйсундириб ҳаммасини бир дохий атрофига жисмлаштиришга алоҳида эътибор берар эди. У ўз даврининг энг зўр мафкураси — диний мафкура эканлигини яхши биларди. Шунинг учун ҳозир ўзи эришяётган муваффақиятларни ҳам динга ва илоҳий кучларга боғлаб гапира бошлади:

— Бизнинг Самарқанддаги душманларимиз етти бошлиқ аждарҳодай зўр эди. Бу аждарҳо ис-ис қўшинларни қомига

тортиб ютиб юборган. Аммо бизнинг имонимиз пок, иятимиз холис. Олло таоло ўша аждархони инидан тортиб чиқариб, бизнинг хузуримизга олиб келди. «Нима қилсанг қил!» деб кўлимизга берди. Худонинг қудрати билан Самарқанддек шаҳарнинг қопқалари бизга жангсиз очилди!

Самарқанд урушсиз таслим бўлаётганлиги, унинг подшоҳи ва диний раҳбарлари ўз оёқлари билан Шайбонийхон хузурига кириб келганлиги нақадар улжап бир зафар эканини барча аъёнлар гўё энди астойдил хис қилдилар. Бу зафарнинг худо томонидан берилганлиги эса Шайбонийхонни уларнинг кўзига худонинг назари тушган бир авлиё қилиб кўрсатар эди. Шайбонийхон нафаси ўтқир валий бўлмаса, бу қадар мураккаб, бу қадар қийин ишни шунчалик донолик ва усталлик билан амалга оширолармиди?

Мулла Абдурахим ўрнидан сакраб туриб:

— Имоми замонимиз минг йил умр кўрсинлар! — деб олқиш айтди.

Бошқалар ҳам оёққа қалқдилар. Устма-уст олқиш янгради:

— Искандари сонийга офарин!

— Ҳазрати валийга минг раҳмат!

— Халифани раҳмон, дунё тургунча турсинлар!

Ҳамма аъёнлар ўринларидан турганларидан кейин Султон Али мирзо билан Хўжа Яхё ҳам жойларидан кўтарилдилар. Аммо улар тирик мурдадек оёқда зўрға туришар эди. Агар ҳозир Шайбонийхон мана бу олқиш айтаётганларга бир оғиз буюрса, улар Мирзо билан хўжани тилка-пора қилиб ташлашлари аниқ эди.

Хоннинг ишораси билан олқишлар тинди, ҳамма жойига қайтиб ўтирди.

— Манави хўжа билан мирзога,— деди Шайбонийхон,— минг азоб бериб ўлдирсак ҳаққимиз бор. Бироқ инсофу имон қанчалик бўлишини буларга яна бир кўрсатиб кўяйлик. Майли, қонларидан кечайлик, жоилари омон қолсин!

Боятдан бери ўлимни бўйинларига олиб, жоиларидан умид узиб ўтирган Мирзо билан хўжа энди бирдан эгилиб, хонга миннатдорчилик билдирдилар. Хўжа Яхёнинг қўнгли юмшаб, кўзига ҳатто ёш келди:

— Худо умрингизни берсин, хон ҳазратлари!..

— Бироқ,— деди хон овозини кўтариб,— жаноб Хўжа Яхё молу дунёга ҳирс қўйиб, тавфиқни унутган. Имонларини поклаш учун Маккаи мукаррамага сафар қилсинлар. Хўжага эрталабгача муҳлат берамиз. Керакли нарсаларини йиғиштириб, икки ўғиллари билан бирга ҳажга жўнасинлар. Кўпакбий!

— Лаббай, хон ҳазратлари!

— Хўжа Яҳёни ўғиллари билан эрта эртагаб Самарқанддан чиқариб қўйишни сизга тошширдик!

— Бош устига, хон ҳазратлари!

— Мана бу ёш Мирзо,— деб Шайбонийхон Султон Али мирзога қараб давом этди,— бизга ўғил тутингиси келибди. Майли, диндан қайтгани яна дин йўлига солиш — савоб иш. Шаҳзода Темурхон уни ўз одамлари қаторига олсинлар.

Отасига яқин ўтирган йиғирма ёшли хушбичим Темурхон семиз Мирзога нафратли бир назар ташлади-ю, аммо хонга таъзим қилиб, буйруқни бажаражагини айтди.

— Яхши бўлса ошини ер,— қўшиб қўйди Шайбонийхон,— ёмон бўлса бошини!

Султон Али мирзо вақтинча тирик қолаётганини кўп одам шу сўзлардан сездди. Энди пастки каватда ўтирган Зухра бегимнинг тақдирини хал қилиш керак эди.

Шайбонийхон бир вақтлар Зухра бегимни жуда гўзал деб эшитиб, «Ўзимга гунчачи¹ қилиб оларман», деб ўйлаган эди. Шунинг учун бегимга ёзган хатига бир неча сатр шеър қўшган эди. Аммо уни бугун ўз кўзи билан кўргандан кейин бегимдан ихлоси қайтди. Тўғри, шеър ёзиб бегимни алдагани кўнглининг бир четини хира қилиб турар эди. Аммо бу ерда Зухра бегимдан нафратланиб гапирган аёнлар у хотиннинг бузуқлигига хонни ҳам ишонтирди-ю, кўнгидаги бу хираликни тарқатиб юборди. «Ўзи шундай алданишга муносиб хотин экан,— деб ўйланди хон.— Агар ҳозир қўйиб берсам, султонлар уни қутурган бияга судратиб ўлдиради. Лекин мен «Муродингизга етасиз!»— дедим. Муроди — эрга тегиш экан. Зўр бир эр топиб бериб, сўзимнинг устидан чиқайин!»

Хоннинг кўзлари даврада ўтирган султонларни оралаб ўтиб, пойгакроқда ўтирган йўғон гавдали чўтир қора кишида дўхтади. Мансур бахши деб аталадиган бу одам табиблик килар эди. У чилдирма чалиб «кўчирик» қилишни ҳам билар эди, «кўтарувчи» деган лақаби бор эди. Унга хотин чидамас эди — олган хотинлари ё бир-икки йил умр кўрмай ўлар, ёки қочиб кетар эди.

— Мансур бахши, сиз хотинга ёлчимамай юрибсиз,— деди Шайбонийхон.— Пастдаги бегим келинчак ёнглиқ ясаниб келибди. Шунини сизга узатайикми?

Мансур бахши ўрнидан сакраб турди, қувонганидан сўзи қулоғига етгудай қулиб таъзим қилди:

— Марҳаматингиздан айланайин, ҳазратим, жон дейман!
Ҳамма қулиб юборди. Шайбонийхон бу тугунини ҳам

¹ Г у н ч а ч и — муваққат хотин.

султон ва аъёнларга ёқадиган бир усталлик билан ечганидан кўпчилик мамнун эди:

— Хон ҳазратлари дено йўл топдилар!

— Мансур кўтарувчи энди бегимни кучоғидан қўймай роса кўтаради.

— Бири бирига муносиб!

— Бироқ,— Шайбонийхон яна сўз бошлаган эди, ўзаро гаплар ва кулгилар дарҳол босилди,— бахшининг тўйини Самарқандда қиламиз. Ҳаммамиз шаҳарга тартиб билан кирамиз...

Самарқандда бир неча марта бўлган ва каерда нима борлигини яхши биладиган хон қўшинларнинг шаҳарга кириш ва жойлашиш тартибини олдиндан ўйлаб қўйган эди. Ҳозир шуни буйруқ шаклига келтириб, лашкарбошиларга аниқ кўрсатмалар бера бошлади.

Шайбонийхоннинг беш минг кишилиқ қўшини Чорраҳа дарвозасидан Самарқандга кириб борганда шаҳарнинг нариги томонидаги Сўзангарон дарвозасидан юзлаб одамлар қочиб чиқиб кетмоқда эдилар. Бобур ҳозир Шаҳрисабзда эди. Самарқанддан қочиб чиққан унинг тарафдорлари Шаҳрисабзга қараб шошилмоқда эдилар.)

Аммо Шайбонийхоннинг қуюндай югурик отлиқлари уларнинг қўпини қувиб етиб, кўчларини талашди, кўпларини аёвсиз ўлдиришди.

Кечаси шаҳарда талончилик авжига чиқди. Фақат Хўжа Яҳёнинг ҳашаматли уйига ва кенг ҳовлисига талончилар йўлатилмади. Кўпакбийнинг юзтача навқари Хўжа Яҳёнинг ҳовлисини қўриқлаб турди. Бироқ Кўпакбий қўйган махсус одамлар Хўжа Аҳрордан қолган бойликлар, олтин ва жавоҳирларнинг қайси сандиқларга жойлаштирилаётганини пана-панадан кузатиб, қўз тагига олиб қўйдилар.

Хўжа Яҳё икки ўғли, уч хотини, ўн бештача хизматкори ёрдамида туни бўйи кўч йиғиштирди. Тонг отганда барча сандиғу бўғчаларини, кўч-кўронини тўртта аравага ва ўн икки туяга юклатди. Аёлларни соябон аравага чиқаришди. Хўжа Яҳёнинг ўзи, икки ўғли ва ўнта қўриқчи хизматкор йиғити энг яхши отларини миндилар, Самарқанд билан гамгин хайрлашиб, қалъадан чиқдилар. Кўпакбий ўз навқарлари билан бирга Хўжа Яҳёни Оҳаклик тоғигача кузатиб қўйди. Термиз йўлига тоғ ошиб ўтиш керак эди. Бир тоғ дарасининг ичида Кўпакбий Хўжа Яҳёга қараб:

— Биз онҳазратимнинг буйруғини бажардик, энди у ёғига ўзингиз кетаверинг! — деди-ю, навқарлари билан орқага бурилди.

У кўрнинишидан Самарқандга қайтмоқчиға ўхшарди. Аммо

дарадан чиққандан кейин йўлни ўнга бурди, бошқа бир дара орқали Хўжа Яхёнинг ўнг томонидан айланиб ўтди.

Гира-шира қоронғилик тушиб, одам одамни яхши танимайдиган пайт бўлганда Кўпакбий барча аскарлари билан юқоридан кўчкидай ёпирилиб тушди. Қий-чув, дод-войларга қарамай, Хўжа Яхёнинг ўзини ҳам, икки ўглини ҳам, кўриқчи йигитларини ҳам қиличдан ўтказишди. Тирик қолган аёллар Кўпакбийнинг ўнбошиларига бошқа ўлжалар қаторида улашилди. Сандикдаги жавоҳирлар ва олтин-кумушларнинг ярми кечаси хоннинг хазинасига элтиб тоширилди. Чунки Кўпакбийнинг Хўжа Яхёни ҳажга жўпатиш баҳонаси билан тоғ ичида ўлдириши ва бойлигини мусодара қилиши Шайбонийхоннинг имо-ишораси билан қилинган эди.

Бу воқеадан хабар топган Султон Али мирзо ўлим хавфи ўзига ҳам яқинлашиб келаётганини сезди-ю, қапдай қилиб бўлса ҳам қочиб қутулишнинг пайига тушди. Қуюқ туман тушган кун азонда икки навқари билан Феруза дарвозасидан яшириқча чиқиб, Панжакент томонга қочди. Бироқ Темур султон унинг кетига қўйган хуфялар бу воқеадан хабардор эдилар. Султон Али мирзо қалъадан қочиб чиққунча уни атайлаб қўйиб берган эдилар. Чунки унинг айбини бўйнига қўйиб қочиб кетаётган пайтида тутиб ўлдирмоқчи эдилар. Султон Али мирзо Сиёб бўйларига бормасданок кетидан Темур султон икки юз навқари билан уни қувиб етди ва дарҳол ўраб олиб, бир қилич зарби билан бошини танасидан жудо қилди.

Мансур бахшига никоҳлаб берилган Зухра бегим ёлғиз ўглининг тобутда бошсиз ётган танасини кўрганда ўзининг калласига муштларини уриб дод солиди, юзини қўли билан тирнаб қонатиб юборди, кўйлагининг ёқасини йиртиб чинқирди. Лекин ғолиблар бунинг ҳаммасига: «Баттар бўл, ўзинг сабабчисан!» дегандек бир заҳарханда билан қарашди.

4

Сувларнинг юзи хазонларга тўлиб оқадиган сершамол куз кунлари бошланди. Самарқанддан ўттиз чақиримча шарқ-жануб томонда, Панжакентдан қуйида Зарафшон дарёсини кечиб ўтган икки юздан ортиқ қуролли суворийлар қоронғи тушганда Сиёб бўйига яқинлашдилар. Улар йўлларида учраган қишлоқларни четлаб ўтишар, ҳеч қаерда тўхтамасдан, шовқин-сурон кўтармасдан мумкин қадар сукут сақлаб келишар эди. Уларга бирда-ярим дуч келиб қолган деҳқонлар кўрқиб ўзларини четга олар эдилар. Шайбонийхоннинг

аскарлари ҳамманинг юрагини олиб қўйган эди. Ҳозир Самарқанд атрофларида хоннинг беш мингдан ортиқ қўшини бор эди. Одамлар мана бу отлиқларни ҳам шу қўшиннинг бир бўлаги деб ўйлаб, улардан балодан қочгандай қочар эдилар.

Бирок отлиқларнинг ўзлари алланарсадан хавотири бордай эҳтиёт билан бормоқда эдилар. Қоронғида Сиёбдан ўтаётганларида, отларнинг беш-олтитаси балчиққа тикилиб қолди. Уларни балчиқдан чиқаришга уришиб, ўзлари лойга ботган, юзларини қамишлар тирнаган навкарлар аччиқ устида баланд овоз билан сўзлашган эдилар, таниш овоз уларни уришиб берди:

— Мунча додлайсиз? Ёғийга хабар бермоқчимисиз?

Бобурнинг овозини таниган бир навкар:

— Маъзур тутинг, амирзодам,— деди.— Ҳаром ўлгур от ёмон тикилди!

Булоқ сувларидан йиғилган Сиёб совуқ куз кечасида буғланиб оқмоқда эди. Тун қоронғиси устига сув буғлари ҳам қўшилиб, балчиқни қуруқ ердан ажратиб бўлмас эди. Лойга ботган отлар анча одамни йўлдан тутиб қолаётганини кўрган Бобур:

— Бас, чиқариб бўлмаса, қолсин! — деди.

Қосимбек дарҳол унинг сўзини қувватлади:

— Пиёда қолганлар меинг отларимдан олсинлар!

Оти лойга тикилган навкарлардан бири Тоҳир эди.

— Тоғларда қанча оту тевалар қолди, учмалардан ўтиб келган отим энди шу балчиқда қолсинми-а? — деди Тоҳир отига ачиниб.

— Ўзимизнинг жонимиз ҳам қил устида! — деди Бобур.

Тоҳир Қосимбек учун етаклаб келинаётган отлардан бирига минди. Яна икки навкар пиёда қолган эди. Уларга Бобур ўзининг тўртта отидан иккитасини берди.

Ҳозир унинг кўзига от-улов кўринмас эди. Энг муҳими, унинг Самарқандга яқинлашаётганини Шайбонийхон мутлақо сезмаслиги керак.

Бобур ёзи билан тоғларда юрди, Шаҳрисабздан Ҳисорга, ундан Фондарё бўйларига ошиб ўтди. Самарқанд беклари бутун навкарлари билан Ҳисор ҳокими Ҳисравшоҳ томонига ўтиб кетди. Андижондан Бобур билан келган одамларнинг кўпчилиги Искандарқўл бўйларидан ўратепа орқали Фарғона водийсига қайтдилар.

Жангдовуллар бу хабарларнинг ҳаммасини Шайбонийхонга аллақачон етказган эдилар. Бобурнинг бир неча юз киши билан тоғ орасида қийналиб юрганини аниқ билладиган Шайбонийхон энди унинг Андижонга қайтиб кетишга ёки

Ўзгандан нарида хошлик қилаётган тоғаси Олачахон олдига боришига шубҳа қилмас эди. Шайбонийхон ёв хужум қилишини кутмас, шунинг учун шаҳарда беш юз кишилик қўшин қолдириб, наридаги Хўжа Дийдор деган жойни қароргоҳ қилган эди.

Шайбонийхоннинг бежавотир юрганидан хабар топиб, Самарқандга таваккал қилиб бораётган Бобур жуда қалтис бир ишга бел боғлаганини сезарди. Шайбонийхоннинг жосуслари кўплиги унга маълум эди. Хон ўзини сезмаганга солиб, Бобурни шаҳарга яқин келгунча қўйиб бериши, кейин қуршовга олиши мумкин эди. Шаҳар ичидаги қўшин ҳам Бобурнинг одамларидан икки-уч баробар кўп. Бобур Шайбонийхоннинг қўлига тушса, тирик қутулдмаслигини билади. Навкарлар, беклар омон қолиши ва хон аскарлари сафида хизмат қилиб кетиши мумкин — Султон Али мирзонинг кўпчилиги бек ва навкарларини хон ўз лашкарларига қўшиб олгани ҳаммага маълум. Аммо янги бир сулолага асос солмоқчи бўлган Шайбонийхон темурийларни аёвсиз ўлдиришга қасд қилганини Бобур билар эди. Шунинг учун агар бирон фалокат бўлса-ю, қутулиб кетолмаса, охириги нафасигача жанг қилишга, хоннинг қўлига тирик тушмасликка аҳд қилиб бормоқда эди.

Қоронгида яна бир талай ариқлардан ўтдилар, куз кириб, эгалари кўчиб кетган кимсасиз боғотларни оралаб бориб, Самарқанддан берироқдаги Тули Мағоқ кўприги олдида тўхтадилар. Бундан икки кун олдин тўртга ишончли навкар деҳқон кийимида шу ерга юборилган, улар қалъа деворига қўйиб чиқиш учун улкан шотилар тайёрлаган, шу билан бирга, вазиятни ўрганган эдилар. Олдиндан тузилган режага биноан, навкарлардан етмиш-саксонгаси шу ерда отдан тушдилар ва шотиларни кўтаришиб, секин Ғори Ошиқон деб аталадиган баланд жарликка томон пиёда кетдилар.

Бобур қолган навкарлар билан Феруза дарвозасига яқин бориб, дарахтзор тепалик панасида тўхтади.

Атроф жимжит. Узоқдан хўрознинг биринчи қичқириви эшитилди. Осмон ола булут. Қорайиб турган баланд кўрғон кўзга зўрға чалинади. Бобур ёнидаги Қосимбекнинг ютоқиб, титраб нафас олганини сезди-ю, ўзининг ҳам эти уча бошлади.

Қалъадан ажал совуғи эсаётгандай туюларди. Бундан тўрт ой олдин мана шундай қоронги тунда Хўжа Яҳё шаҳар дарвозасини яшириқча очиб боришига ишониб борган Бобурнинг сирини фош бўлгани, йиғитлари ўқ еб, душманининг масҳарасини эшигиб қайтгани эсига тушди. Ундан олдин Ғори Ошиқонга кечаси борган йиғитларнинг алданиб,

қўлга тушиб ҳалок бўлгани кўз олдига келиб, қалбига таҳлика солиб ўтди. Бобур бу гал яна алданмаслик учун шаҳар ичидаги тарафдорларнинг ҳеч бирига хабар бермасдан, фақат ўз кучига ишониб, таваккал қилиб келди. Аммо унинг икки юз қирқ кишилик бир даста қўшини Шайбонийхоннинг беш-олти минг кишилик лашкарларига қандай бас келиши мумкин? Яна хон қўшини мустаҳкам қалъа ичида. Тарихда бунчалик таваккалчилик бўлганмикин?

Қўрғонга пинҳон етиб олдилар. Агар Шайбонийхон ичкарига «қопқон» қўйган бўлса-чи? Бобур бу «қопқон»га ўз оёғи билан кириб борадими?

Баъзи беклар мана шу андишаларни айтиб, Бобурни қалтис ниятидан қайтармоқчи ҳам бўлдилар.

Аммо бу ниятдан қайтиш — Андижонга шумшайиб бориб, яна Али Дўстбекка муте бўлиш деган сўз эди. Ёки уйсиз, жойсиз, куз изғиришлари-ю, қиш совуқларида хору зор бўлиб юришлари керак эди. Бобур мутелигу хор-зорликдан кўра бир ўлимни бўйнига олиб, Шайбонийхонга йўлбарсдай дадил ташланишни афзал кўрган ва бекларни ҳам шунга кўндирган эди.

Агар ишлари чаппасидан келса-ю, Шайбонийхоннинг қопқонига тушсалар, ажал сиртмоғи энг аввал Бобурнинг бўйнига тушишни хаммалари билардилар. Бобурнинг барча ҳаракати — ёв «қопқони»нинг қопадиган жойига тегмасдан ўтишга қаратилган эди. Шу ергача шарпаларини ёвга сездирмай келдилар. Энди бу ёғи қандоқ бўларкин?

Бобур бутун вужуди билан атрофга қулоқ солар экан, тун суқунатида ўз юрагининг дукиллаб уришини баралла эшитди. Бу дукиллашда гўё тақдир отининг дукури ҳам бор эди.

* * *

Оғир шотиларни секин кўтариб, қадимий Чақардиза¹ қабристонини айланиб ўтаётган навкарларнинг бири — Тоҳир эди. Улар қоронғида туртина-туртина Шоҳи Зинданинг орқа томонидаги баҳайбат бир ўнгирга яқинлашдилар. Ўнгирнинг тепаси балаид жар. Унинг этагида ғор ҳам бор. Бу ваҳимали жойларга кундузлари ҳам ҳеч ким келмайди. Оёқ ости чакалакзор. Қўрғоннинг девори мана шу жар устидан ўтади. Шотиларни девор тагига кўтариб боргунча йиғитлар қора терга ботиб кетишди.

¹ Чақардиза — кейинчалик «Шакаржиза» деб айтиладиган бўлган.

Уларга бонгчилик қилаётган Нуён Кўкалдош девор тепасига тикилиб бирпас кутди. Терак бўйи келадиган ғиштин девор жуда энли эди, унинг тепасидан бир неча киши бемалол юриб ўтиши мумкин эди. Бироқ тепада ҳеч бир шарпа сезилмас, қоровуллар совқотиб пастга тушиб кетганга ўхшарди.

Шотиларни секин тикладилар, учини девор қиррасига тираб қўйдилар.

— Қани, чиқинглар! — шивирлади Нуён Кўкалдош ғуж бўлиб турган навкарларга. Аммо ўн уч газ баландликдаги девор жуда ваҳимали, ундан йиқилган одам тирик қолмаслиги аниқ эди. Эҳтимол, қоровуллар сезиб қолишар-да, чиқаётганларга тош отар, ўқ ёғдирар? Сал итариб юборса ҳам тамом. Шунини сезган навкарларга биринчи бўлиб чиқиш жуда дахшатли туюларди.

Охири Нуён Кўкалдош ўзи шотининг поясига оёқ қўйди-ю:

— Бир ўлим бўлса ҳаммавақт бор, мардона бўлинглар, қани! — деди.

Тоҳир иккинчи шотидан чиқа бошлади. Шотилар кенг, мустаҳкам қилиб ишланган, ҳар бири олти-етти кишини бемалол кўтарар эди.

Йигитлар олдинма-кейин юқорига чиқар эканлар, Нуён ҳаммадан олдин девор тепасига етди. Деворнинг усти йўлкадай кенг, отлиқ юрса ҳам бўладиган. Яқин-орада ҳеч ким йўқ.

Тоҳир ҳам чиқиб, ўзини девор кунгурасининг панасига олди ва пастдан чиққан навкарни қўлидан тортиб шивирлади:

— Болта қани?

— Мана.

Иккинчи навкар белига қистирилган болтани Тоҳирга олиб берди.

— Шинакка бекин! — шивирлади Нуён кимгадир.

Кунгура ва шинаклар бўлмаса, девор устидаги одамнинг қораси пастдан кўриниб қолиши мумкин эди. Шунинг учун пастдан чиққан навкарлар шинакларга бекиниб турдилар. Ҳамма чиқиб бўлгандан кейин секин-секин юриб, энгашиб, девор усти билан Феруза дарвозаси томонга бора бошладилар.

Деворнинг маълум бир жойларида қоровулхоналар бор эди. Бир қоровулхонага яқин келганларида ичкаридан кимдир найманча талаффуз билан уйқу аралаш:

— Ирисбай, келдингма? — деб сўради.

Девор устидан келаётганлар таққа тўхташди. Тоҳир қўлидаги болтанинг сойини икки қўллаб қисди-ю:

— Ҳа,— деди.

Аммо ичкаридаги қоровул унинг овозини танимай ҳадиксиради шекилли, уйқуси бирдан ўчиб:

— Кимсан? — деди.

Нўён Кўкалдош қоровулхонага қараб отилди. Қоровул ичкаридан шошиб чиқаётганда кўкрагига ғарчиллатиб ханжар санчди. Қоровул жон аччиғида чинкириб юборди. Пастдаги қоровуллар ҳам уйғониб кетди.

— Тоҳир, тўхтамасдан дарвозага югур! — деди Нўён Кўкалдош. У йигитларнинг беш-ўнтасини пастда уйғонган қоровулларни бир ёқли қилиш учун қолдирди-ю, ўзи бошқа навкарларни эргаштириб, Феруза дарвозасига томон югуриб кетди.

Шайбонийхон бу дарвозани кўриқлашни Фозил тархон билан унинг юз эллик йигитига топширган эди. Ҳозир бу йигитларнинг кўпчилиги уй-уйига тарқаб кетган, дарвоза қоровулхонасида йигирматача одам ухлаб ётар эди. Улар то уйғониб, қурол-яроғларини қўлларига олганларича болта кўтарган Тоҳир дарвоза қулфига яқинлашди. Отнинг калласидай келадиган қулф бир-икки зарбани писанд қилмади. Уйи бу ерга яқин бўлган Фозил тархон машъала кўтарган йигитлари билан дарвозахонага етиб келди. Уларнинг бири дарвоза қулфига болта ураётган Тоҳирга қараб найза отди. Найза Тоҳирнинг дубулғасига ёнлама тегиб сирғалиб ўтди-ю, дарвоза ёғочига қадалди. Дарвозахонада найзабозлик ва қиличбозлик бошланди. Нўён Кўкалдош бошлиқ йигитлар кўпчилик эди. Фозил Тархон бўйнидан қилич еб, отдан йиқилиб тушди.

Тоҳир болгани икки қўлаб кўтариб, гоҳ қулфга, гоҳ дарвоза занжирининг зулфига урар, темирдан учқун сачрар, аммо зўр қулф, «қилт» этмас эди. Ниҳоят, зулфин синди-ю, занжир шарақлаб тушди.

Қўрган атрофида сув тўлдириб қўйилган энли чоҳ бор эди. Чоҳдан дарвозага ўтиладиган кўприк ҳам махсус занжир билан дарвоза томонга кўтариб қўйилган эди. Тоҳир дарвозани очаётганда йигитлардан бири кўприкнинг занжирини ҳам бўшатди.

Бобур ва Қосимбеклар ичкаридаги олишув шовқинини эшитиб, чоҳ лабига келиб турган эдилар. Дарвоза очилиб, кўприк тушини билан улар ичкарига от қўйиб, қилич яланғочлаб кирдилар. Фозил Тархоннинг тирик қолган навкарлари шаҳар ичига қараб қочдилар.

Қосимбек бошлиқ отликлар уларни қувиб кетди. Нўён Кўкалдошга отини келтириб бердилар. Тоҳир ҳам, бошқа пиёдалар ҳам яна отландилар. Бобур навкарларнинг бир қисмини Нўён Кўкалдош билан бирга Чорраха дарвозасини эгаллашга юборди. Ўзи қолган навкарлар билан Сўзангарон

дарвозасига қараб от чоптириб кетди. Агар дарвозалар тезроқ эгалланмаса, ташқаридан Шайбонийхон бутун қўшини билан кириб келиши мумкин эди.

Феруза дарвозаси олдидан бошланган жанг шовқини бирпасда бутун шаҳарни қамраб олди. Шаҳар доруғаси Жонвафо Шайхзода дарвозаси томонда — Хўжа Яҳёдан тортиб олинган ҳашаматли ҳовлида ухлаб ётган эди. Тўполондан чўчиб уйғониб, бор навкарлари билан ҳовлидан отланиб чиққунича, Қосимбекнинг йигитлари Фозил тархоннинг одамларини қувиб келди. Чорраҳа дарвозасидан қувилган Кўпакбийнинг навкарлари ҳам доруға ётган жойга қочиб келмоқда эдилар. Қоронғуда ёв қайсию ўзининг одамлари қайси, доруға ажратолмай қолди. Унинг кўзига ҳамма чошиб келаётган ёв бўлиб кўринди. Назарида, Самарқандга бир неча минг кишилик ёв бостириб кирганга ўхшади.

Доруға «беҳисоб ёвга бас келолмайман», деб ўйлаб, отини Шайхзода дарвозаси томонга бурди. Бобурнинг одамлари ҳали бу дарвозага етиб келмаган эдилар. Доруға ўз навкарларига буюриб, дарвозани очдирди-ю, юзтача одами билан хон қароргоҳига томон от чоптириб кетди.

Саҳар палла маст уйқудан кўркиб уйғонган кўпчилик самарқандликлар хон навкарларини Бобурнинг одамлари қувиб юрганини тонг ёришганда фаҳмладилар. Шайбонийхондан норози кишилар жуда кўп эди. Косиблар галаган, деҳқонларнинг экинларини кўчманчи қўшиннинг беҳисоб моллари топтаб ташлаган. Ҳаж йўлида икки бегуноҳ ўғли билан ваҳшийларча ўлдирилган Хўжа Яҳёнинг тарафдорлари қотиллардан қасд олиш учун косиб ва деҳқонларни кўзғатдилар. Ҳокимият ўзгаргандан кейин амалидан ажралган илгариги амалдорлар: «Шайбонийхоннинг одамлари Султон Али мирзони ҳам номардларча ўлдирдилар», деб хун талаб қилиб чиқдилар. Бобурнинг икки юзу қирқ кишиси ёнига беш-олти минг кишилик қасоскор оломон қўшилди. Селдай даҳшатли оломон хоннинг одамларини яширинган жойларидан тошиб чиқар, кўчада қочиб бораётганларнинг олдини тўсиб қуршаб олар, пичоқми, болтами, таёқми, тошми, фиштми, қўлларига нимаики тушса, ҳаммаси билан золимларни ура-ура ўлдириб, янчиб ташларди. Оломон орасида аввалги мирзалар ва беклардан жабр кўрган одамлар ҳам кўп эди, улар беш-ўн йил олдинги қасосларини ҳам энди мана бу золимлардан олмоқда эдилар.

Кун чиқаётганда шаҳар ташқарисида бир қисм қўшини билан Шайбонийхон пайдо бўлди, аммо сув тўла чоҳдан берига ўтолмади. Барча дарвозалар Бобурнинг одамлари томонидан бекитиб олинган, чоҳларнинг кўприклари кўтарилган, ичкарида интиқом давом этмоқда эди.

Тоҳир кечаси билан ухламай югуриб-елиб юрган бўлса ҳам ғалабанинг шодлигидан чарчаганини сезмас, фақат қорни очқаб, Самарқанднинг наввойлик ва ошпазлик расталари дам-бадам эсига тушар эди. Эрталаб ҳамма дарвозаларга қоровуллар тайин бўлгандан кейин Қосимбек Тоҳирга жавоб берди, Тоҳир отига мишиб, яна иккита отлиқ ўртоғи билан иоввойлик растасига келди. Бу ерда ҳам бир неча юз кишилик издиҳом беш-олтита хон навкарларини ўраб олиб, тошбўрон қилмоқда эди. Навкарларнинг баъзилари йиқилиб, тош-кесаклар остида жон берган, бир-иккитаси қўли билан юзини тўсиб дод солар, инграр эди. Яланг бошидан қон оқаётган, йиртилган кўйлаги орасидан моматалоқ бадани кўриниб турган, ўзи чўкна тушиб, одамлардан шафқат сўраётган йигирма ёшлардаги йигитга Тоҳирнинг раҳми келди. У оломон орасига от солиб:

— Халойиқ, Бобур мирзо фармон бердилар!— деб қичқирди.— Таслим бўлганларни асир олмоқ керак! Булар ҳам мусулмон! Халойиқ, бас қилинг! Биз ҳам навкармиз! Навкар айбдор бўлмаслиги мумкин! Ҳамма айб буларнинг хонларида! Халойиқ, тўхтаг! Бобур мирзонинг фармонини бажаринг!

Одамлар Бобурнинг номини эшитиб отлиқ йигитнинг ганига қулоқ сола бошладилар. Шунда нариги икки отлиқ ҳам оломон орасига ёриб кирди. Учовлашиб, тошбўронни тўхтатдилар.

Тоҳир бу ерга нега келганини ҳам унутди. Чала тирик йигитлардан учтасининг қўлини орқасига боғлашиб, асир қилиб олиб кетмоқчи бўлди.

Шунда оломон орасида турган сарғиш мўйловли, баланд бўйли бир киши:

— Тўхта, йигит, сен... Тоҳир эмасмидинг?— деб қолди.

Тоҳир йўгон сўйил кўтариб олган бу одамга тикилиб қаради-ю, бундан уч йил олдин мана шу кўчада очларга нон улашган пайтини эслади.

— Мамат ога! Сиз нега сўйил кўтариб юрибсиз? Ўзингиз ҳам ўзбек уруғидан эмасмисиз?

— Э, ука, булар ўзбекка кўп жамаплиқ қилди. Менинг бечора хотиним шуларнинг дастидан ўлиб кетди!

Маматнинг кўзларида ёш йилтиради. Тоҳир бу одам билан Робия ҳақида гаплашганини эслади-ю, унутилган аламлари бирдан янгилади. У асирларни нариги икки шеригига ҳайдашиб юборгач, ўзи отини етаклаб, Маматни четга бошлаб чиқди.

— Мамат ога, мен тайинлаб кетган гап эсингиздами?

— Қайси?.. Ҳа, ҳа... Айтмоқчи, бечора хотиним тирикли-

гида бир гап эшитиб келган экан... Сиз айтган қиз андижонликмиди?

— Қувалик.

— Билмадим, ишқилиб, ўша томондан обқочиб келишган экан. Кейин туркистонлик бир савдогар тархон сотиб олиб кетган экан.

— Туркистонгами?

— Ҳа, кейин шу тархон Шайбонийхон билан бирга Самарқандга кўчиб келипти.

— Қиз биланми? Қиз тирикми, йўқми?

— Тирик!

Тоҳир Маматнинг сўйил тутган қўлларида маҳкам ушлади-ю, шошилиб сўради.

— Оти Робиями, а, Робиями?

— Раҳматлик хотиним отини билмас эди.

— Ўзини кўриптими? Қаерда кўрипти?

— Фозил тархоннинг уйида.

— Қайси Фозил тархон?

— Бугун кечаси уни ўзларинг ўлдирибсизлар-ку?

— Уйи қаерда, уйи?

— Журинг, мен кўрсатиб қўяйин!

Тоҳир бир сакраб отига минди-ю, Маматни орқасига мишгаштирди. Мамат сўйилини ташлади, Тоҳирнинг қўлтиғи тагидан ушлаб, уни қинғир-қийшиқ кўчалардан бошлаб бора бошлади.

Отини йўрттириб бораётган Тоҳир: «Илоҳим ноумид қилмагин-да парвардигор!— дерди ичида.— Илоҳим Робия бўлсин-да!» У олти йилдан бери Робияни қидира-қидира, ахири, энди топилмайди, деган фикрга келган ва бу фикрга кўника бошлаган эди. Ҳозир чақмоқдай чақнаган умид унинг важоҳатига момақалдироқ ларзасини соляпти. Бу умиднинг чақиндай тез сўниши мумкинлиги юрагини така-пука қилади, аъзойи баданини зир титратади.

— Ана ўша уй!— деб Мамат орқасида катта боғи бор икки қаватлик гиштин иморатни кўрсатди.

Дарвоза ланг ачиқ, қуролли йигитлар ичкаридан жимжи-мали сапдиқлар ва чўғдай гиламлар кўтариб чиқмоқда эдилар. Яқинроқ бориб, Тоҳир Қосимбекнинг навкарларини таниди. Уларга қатта савдогар бой ва Шайбонийхоннинг яқин кишиси Фозил тархоннинг мол-мулкани мусодара қилиш топширилган эди.

Тоҳир дарвоза олдида оддан тушди-ю, таниш навкарларнинг ҳайҳайлашларига эътибор бермай, тўғри ичкари ҳовлига йўналди. Равонда Фозил тархоннинг қонга беланган мурдаси ётипти. Юқориги қаватдан аёлларнинг йиғи-сигиси

эшитилди. Фозил тархоннинг хотинлари эрлари учун аза очган, баъзилари бойяик тўла сандиқлардан ажралаётганлари учун ҳам додлашар, баъзилари эса ёвдан қўрқиб йиғлашар эди.

Тоҳир пастки қаватдаги очик эшикларга бош тикиб қаради. Ҳеч ким йўқ. Фақат аёлларнинг кийимлари-ю, безаклари турибти. Бу тархоннинг нечта хотини бўлганикин? Робия шунга тушган бўлса, уни ҳам хотин қилиб олганимикин? Тоҳирнинг хаёлига тўсатдан келган бу фикр қалбини ўртаб ўтди. У айвондан пастга сакраб тушиб, ҳовлининг ўртасига келди-ю, юқорида йиғлаётган аёлларга қарата қичқирди:

— Ҳей, Робия борми? Роби-я! Қувалик Робия шу ерда борми?

Ҳотиларнинг йиғиси бирдан тинди. Юқориги қаватнинг айвонидан яшил дуррали бир жувоннинг боши кўринди. Унинг қош-қўзи Робияникига ўхшарди. Тоҳир юқорига талиниб, қалтираб:

— Робия!— деди,— Робия!

Яшил дуррали жувон уни кўрди-ю, ўзини орқага олди, сўнг яна айвон четига чошиб келди. Тоҳир энди унинг бахмал нимчасини, бўйнидаги маржонларини ҳам кўрди. Жувонга йигитнинг товуши таниш туюлар, аммо қилич ва ханжар таққан, юзида катта чандиғи бор, соқол-мўйлови ўсиқ баҳайбат навкар унинг ваҳмини келтирарди. Жувон алданишдан қўрқиб яна орқага қочди. Тоҳир юқориги қаватга қараб чопди, аммо саросима бўлганидан, айвон четигагина зинапояни тополмади. Негадир ўпкаси тўлиб кўзига ёш келди:

— Робия, мен Тоҳирман! Тоҳир!

Юқоридан жувоннинг чинқириғи эшитилди:

— Тоҳир ога!

Сўнг яшил дуррали жувон чочпугини шилдиратиб, зинапоядан ўзи чошиб туша бошлади. Юз-қўзи Робияники, аммо маржонлари, кийимлари, яна нимасидир бегона. Тоҳир уни кўриб жойида қотиб қолди. Робия ҳам зинапоя олдида тўхтади, кўзларини чақчайтириб, кўрқув аралаш шивирлади:

— Сиз Тоҳир оғамнинг арвоҳисиз!

Робия Тоҳирни ўша найза зарбидан ўлиб кетган деб ўйлар, унинг арвоҳига бағишлаб дуолар ўқир эди. «Энди тирик кўрмаймэн, арвоҳини кўрсам ҳам рози эдим», деб худодан астойдил сўраган пайтлари кўп бўлар эди. Унинг шу илтимосига фаришталар омин деган эканми?

— Арвоҳингиз ҳам жонимдан азиз, Тоҳир ога!

— Мен тирикмен, Робия! Сени олти йилдан бери излаб юрибмен!

— Тириксеиз?!— деб, Робия Тоҳирга яқин келди. Унинг чакмонини, қиличини, қўлларини бир-бир ушлаб кўрди. Тоҳир

уни елкасида кучиб бағрига босган эди, Робия унинг арвоҳ эмаслигига энди ишониб, йиғлаб юборди:— Тирик! Тирик! Худога шукр, тирик!

Тоҳир унинг сариқ атлас кўйлаги устидан елкасини силаб:
— Робиям, жоним!— деди.— Хайрият, ўзинг ҳам тирик экансен! Мен сени олти йил изладим, қаерларда юрдинг? Нима бўлди?

Робия Фозил тархоннинг еттинчи хотини бўлиб ўтказган йилларини эслади-ю, бирдан орқага силташиб, Тоҳирнинг кўлларида юлқиниб чиқди:

— Мени кучманг, Тоҳир оға! Мен сизга муносиб эмасмен!

Робия аламли кўзлари билан айвонда ётган ўликка қараб кўйди. Фозил тархон уни ўша босқинчилардан бир ҳамён олтинга сотиб олган эди Робия эликдан ошган бу чолдан хазар қилар эди. Фозил тархон Туркистоннинг Ясси шаҳрида уни никоҳлаб олгандан кейин беш-ўн кун турар-турмас, савдо иши билан Бухорога жўнади, у ердан бошқа бир кўхлик қизни олиб, кейин ўша билан бўлиб кетди. Робия олти йилдин бери унинг ҳарамиди бевадай яшайди. Лекин буни энди Тоҳирга қандай тушунтиради? Тоҳирга фотиҳа қилинган Робия кейин бировга хотин бўлган, бунинг доғини қандай ювиш мумкин?

Робия юзини кўллари билан тўсиб юм-юм йиғлай бошлади. Унинг бўйидаги маржонлари, сочига тақилган чиройли кумуш чочпопуқлари, эғнидаги атлас кўйлаги — ҳаммаси ўша бой савдогарнинг нулига келган. Тоҳир шуни ўйлади-ю, унинг назарида, Робия ўлган эрига куюниб йиғлаётгандай кўринди.

— Робия, ростини айт, сен эрингга... содиқмисен?!

— Мени пулга сотдилар! Зўрлаб никоҳладилар!

— Бўлмаса нечун муңча куюниб йиғлайсен?

— Мен сизга вафо қилолмаганимга куюнамен! Сизни унутганим йўқ эди, Тоҳиржон оға! Мапа, тенамизда худо турипти! Бу савдогар сизнинг тирногингизга ҳам арзимас эди! Лекин мени унга қул қилиб бердилар.

Тоҳир тишини-тишига босиб сўради:

— Боланг борми?

Робия йиғи аралаш бош чайқади:

— Мен номига хотин эдим... Аслида бева...

Бир вақтлар гўлдай қиз бўлган Робиянинг ўзини «хотин», «бева», деб аташи Тоҳирнинг борлигини қақшатиб юборди. Робиядай қизга олти йилдан бери «ит тегмай» юриши мумкин эмаслигини у илгари ҳам хаёлдан кўп ўтказарди. «Фақат тирик топсам бас!»— деб қидирарди. Бироқ Робияни топгани билан ёшликдаги беғубор, содда бахти энди абадий топилмаслигини у илгари билмас эди. Бадаандаги оғир жароҳат тузалганда ҳам чандиғи умрбод қолганидай, бошларига тушган

савдонинг дахшатли изи кўнгилларидан осонликча кетмас-лигини Тоҳир энди сезмоқда эди. Робия ҳам абадий йўқолган беғубор ёшлигига қуюниб йиғламоқда эди.

— Робия, бас! Омон қолганимизга шукр қил, қани, юр!

Тоҳир Робиянинг билагидан олиб ташқарига бошлади. Қиз йиғидан тўхтаб:

— Қаёққа?— деди.

— Сен ҳали ҳам менинг қайлиғимсен. Юр, тезроқ!

— Ахир мен... мен... нарсаларимни олай!

— Ҳеч нарса олмайсен. Ҳаммасини унут. Иккинчи ёдимга солма!

Ташқи ҳовлига чиққанларида Робия юк ташиётган навкарларни кўрди-ю:

— Кўчада... уяламен!— деди.— Ёпинчиғим йўқ.

Тоҳир чакмонини ечиб берди. Робия товонига тушадиган узун симоби чакмонни бошига ёпинди-ю, Тоҳирнинг отига минганиб чиқиб кетди.

Кейин Тоҳир Қосимбекка арз қилиб, Фақиҳ Абуллайс маҳалласидан Шайбонийхоннинг одамлари ташлаб кетган дурустгина бир ҳовлини олди. Робиянинг иддаси ўтгач, маҳалла имоми уни Тоҳирга никоҳлаб берди.

6

Кечаси ёққан қални қор ҳар бир томни, деворни, ҳар бир дарахт ва гумбазни майин оқ ҳошия билан безаб чиққан.

Бобур Бўстонсаройнинг юқориги қаватидан шаҳарга қараб турибди. Тоза қор орасидан жимжима бўлиб кўринаётган дарахт шохлари ҳозир унинг назарида худди оқ қоғозга битилган настаълиқ¹ хатига ўхшаб кетади. Бугун Ҳиротдан, Алишер Навоийдан келган хат ҳам настаълиқ билан ёзилгани эсига тушди-ю, қалбидаги қувонч ва фахр туйғуси янги бир куч билан мавжлана бошлади.

Бобур Самарқандни Шайбонийхондан тортиб олгандан бери унинг жасоратига тан бериб шеър ёзганлар, сатрлардан абжад ҳисоби билан ғалабанинг аниқ санасини чиқарган тарихнавислар кўп эди. Алишер Навоийдан Бобурга келган табрик эса ҳаммасининг гултожи бўлди. Ҳирот Самарқанддан қанчалик узоқ, Навоийнинг диққат-эътиборини банд қиладиган машҳур одамлару муҳим ишлар қанчалик кўп! Шунга қарамай, Навоий Бобурни ҳам билар экан, унинг тақдирига

¹ Н а с т а ъ л и қ — араб ёзувидаги ҳуснихатнинг кенг тарқалган бир тури.

узокдан қизиқиб қарар экан, Самарқандни аввал бир марта олганидан хабардор экан. «Бу дафъа Самарқандни ўз номингизга муносиб ҳамла билан омишсиз», деб, Бобурнинг ўтган дафъа Самарқандни етти ой қамал қилганда, шаҳар халқи очликдан печоғлиқ азоб тортганини Навоий ҳам эшитган бўлса керак. Бундай қамалларни у Бобурга муносиб кўрмагани учун шундай деб ёзганмикин?

Бобур қимматбаҳо жавонларига китоблар териб қўйилган хонаи хоснинг тўрига ўтди. Хушбўй сандал дарахтидан ишланган миз устида Навоийдан келган олтин боғичли хат турипти. Бобур миз олдига тўшалган зарбоф кўрпачага ўлтириб, хатни бошқатдан ўқишга тушди.

Ҳар бир сатр туркий тилнинг гўзал жилвалари билан тўлган. Бобур биринчи ўқишда унча эътибор бермай ўтказиб юборган бир неча жумлага бу гал қайта-қайта тикилди. Навоий Бобурнинг шоирлик орзуси борлигини андижонлик бир меъмордан эшитиб, уни дадилроқ ёзишига ундаган эди. Бу меъмор мавлоно Фазлиддин бўлса керак. Агар мавлоно Ҳиротга етиб бориб, Навоийнинг ҳузурига кирган бўлса, бошқа кўп нарсаларни ҳам айтиб берган бўлиши керак. Бобур Навоийга йўлламоқчи бўлган жавоб мактубига яхши бир шеърини ҳам қўшиб юбормоқчи бўлди-ю, машқлари ёзилган қалин дафтарни олиб варақлай бошлади.

Кўпчилиги йўлда, от устида хаёлига келган, жангу жадаллар орасида дафтарга узук-юлуқ ёзиб қўйилган, аммо ҳали тугалланмаган шеърлар. Хиёнат устига хиёнат бўлган, Бобур хонумонидан айрилган, атрофида биронта сирдош дўст тополмай ўзини ниҳоятда ёлғиз сезган оғир кунларда бир ғазал бошлаган эди:

«Жошимдан ўзга ёри вафодоқ топмадим.

Кўнглимдан ўзга маҳрами асрор топмадим».

Аммо бу ғазал чала ётипти. Балки шунин битириб юбориш керакдир? Алишер Навоий ҳам атрофидаги кишилардан кўп бевафолик кўрганини, ҳатто яқин дўсти Ҳусайн Бойқаро ҳам унинг сирру асрорига маҳрам бўлолмаётганини Бобур ишончли бир одамдан эшитган эди. Қани энди Бобур Навоийнинг кўнглидагини ҳам топиб айтолса!

Бу ғазал Навоийга ёқиши мумкин. Уни тезроқ тугаллаш керак. Бобур қоғоз-қалам олди.

Шу пайт савдарбоши эшикдан ҳовлиқиб кириб, таъзим қилди:

— Мирзо ҳазратлари, қўлингизни маъзур тутинг.

Хўш? — деди Бобур порози бўлиб.

— Хоним ҳазратлари қабулшғизга мунтазирлар.

— Онаммилар? — деб Бобур сакраб ўрнидан турди.—
Келдиларми?

— Бегимлар ҳам келдилар!

— Вожаб! — деб Бобур қувониб эшикка томон шошилди.

* * *

Улар салкам олти ойдан бери кўришмаган эдилар. Қутлуғ Нигор хоним Ойиша бегим ва Хонзода бегимлар билан Ўратенада қолган эдилар. Кейин Самарқанддан Бобур юборган ишончли одамлар уларни Ўратенадан бу ерга кўчиртириб келдилар.

Бобур улар билан Бўстонсаройнинг биринчи қаватидаги катта танобий уйда кўришди. Онаси уни бағрига босганда, Бобур онасининг озиб, қўллари енгиллашиб қолганини сездди. Онаси Хонзода бегим эса совуқдан киргани учунми, юзлари чўғдай ёниб, қўзлари чақнаб туришти. Узоқ йўл уни ҳеч қанча қийнамагандек қувноқ. Аввалгидан ҳам чиройли. Бобур унга ўнг елкасини тутиб сўрашар экан:

— Нечун бу қадар ҳаял қилдиларинг? — деди.— Неча ҳафтадан бўли мунтазирмиз!

— Э, сўраманг, амирзодам узрли сабабларимиз бор,— деб Хонзода бегимга кўз ташлаб қўйди.

Бир вақтлар Ойиша бегимни кўрмасдан севиб юрган пайтларида унинг оёғига бош қўйгиси келиб ғазал ёзганлари энди Бобурга таъбири хато чиққан бир тушдай туюларди... У Ойиша бегимни ойлар давомида кўрмаса ҳам соғинмасди...

Шундай бўлса ҳам у Ойиша бегимга иложи борича яхши муомала қилар эди. Ҳозир ҳам кичик жуессали қотма келинчакка яқинлашиб:

— Хуш кўрдик, бегим! — деди-да, унга ўнг елкасини тутди.

Ойиша бегим озғин қўлини унинг елкасига қўйиб кўришар экан:

— Ҳазратим, галабангиз муборак! — деди.

Ҳамма Бобурни «амирзодам», деса, Ойиша бегим уни яна ҳам улуғлаб «ҳазратим», дерди.

— Сизга она шаҳришғиз муборак, бегим!

— Куллуқ,— деб Ойиша бегим таъзимга бош эгди.

— Келинимиз йўлда кўп азоб тортдилар,— деди Хонзода бегим.

Бобур хотинининг бели йўғонлашиб, қорни дўппайиб қолганини кўрди. Ажабо, Бобур ота бўладиганми? Кўришмаганларига олти ой бўлди. Демак, камида олти ойлик...

Ойиша бегимнинг озғин юзида ҳомиладор хотинларда бўладиган доғлар пайдо бўлган эди. Илгари ҳам отда юролмайдиган, маҳофада боши айланадиган бегим энди оғироёқлигида қанчалик кийналганини, унга қараб қанчалик секин йўл босганларини Бобур ўзича тасаввур этди.

— Худо хоҳласа, энди барча машаққатлардан халос бўлдиларингиз,— деди.— Ҳаммаларингиз учун махсус жойлару жиҳозлар тайёрланмишдир. Яна неки даркор бўлса буюрурсиз. Бўстонсаройда кимки бор, ҳаммамиз ҳизматларингизда бўлурмиз!

Хонзода бегим қувноқ кулиб:

— Миннатдормиз!— деди.— Амирзодам билан дийдор кўришиб бошимиз осмонга етди. Энди шу осмонда суҳбатингиздан баҳраманд қилсангиз бас.

— Камина ҳам суҳбатларингизни соғинганмен. Сизлар жойлашгунларингизча осмонда дастурхон ҳозирланур,— деб, Бобур қўли билан юқориги қаватга ишора қилди.

Унинг осмонни пайров қилиб ҳазиллашганидан ҳаммалари кулиб олдилар.

Бобур юқориги қаватга чиқар экан, қалбини тўлдирган шодликлар орасида сурнай навосидек жарангли ва ёқимли бир туйғу янграб эшитилаётганини сездди. Бу унинг дилида бирдан уйғониб кетган оталик туйғуси эди. Унинг бўлажак фарзандини бағрида кўтариб юрган Ойиша бегим юзидаги кўнғир доғлари билан Бобурга аввалгидан кадрдонроқ туюларди.

Буни сезган Ойиша бегим аввалгидан дадилроқ муомола қилар эди. Эр-хотин хобгоҳда чироқни ўчириб ётганларида бегим кўрпани юзига тортиб:

— Мен фахрланамен,— деб шивирлади.

Бобур ўз сўзининг устидан чиққанлиги учун, «энди Самарқандда учрашамиз», деб кетиб, ахири шу айтганини қилгани учун хотини ундан ифтихор қилмоқда эди.

У Бобурнинг бўлажак фарзандига она бўлиши билан фахрланишини ҳам айтмоқчи эди. Бобур буни тушунди-ю, ҳомиланинг неча ойлик бўлганини билгиси келди, аммо рўйирост сўрашга тили бормай гапни айлантирди:

— Энди... шодиёнаси қачон?

— Салкам уч ой бор... Ўйласам, ваҳмим келур.

— Ваҳмни қўя туринг. Ҳозир фахрдан гап очдингиз-ку.

— Ҳа, агар худо ўғил берса, исмини Фахриддин қўюрмизми?

Ойиша бегим Бобурнинг номи Заҳриддин эканини ўйлаб, шунга оҳангдош ном топган эди. Бобур мамнун товуш билан:

— Хўп, ўғил бўлса, Фахриддин,— деди.— Агар қиз бўлса, Фахринисоми?

Ойиша бегим қиз бўлишини истамас эди, чунки ўғил туғиб, тахт ворисига она бўлишни орзу қиларди. Шундай бўлса ҳам Бобурга:

— Майли,— деди.— Лекин мен худодан ўғил тилаганмен.

— Айтганингиз келсин!

Фахриддин... Фахринисо... Шу кунларда Бобурнинг кўнглини тўлдириб-тоширган ифтихор туйғусига бу номлар жуда мос эди.

* * *

Омад ҳам бир келса, қўша-қўша бўлиб келишини Бобур энди билмоқда эди. Самарқанд унинг қўлига ўтгандан кейин бу ёғи Ургут, у ёғи Суғд ва Дабусия қалъаси бирин-кетин Шайбонийхоннинг ихтиёридан чиқиб, Бобурнинг ҳокимиятини тан олди. Мана бугун Қарши ва Ғузордан хушxabар келди — бу шаҳарлар Шайбонийхон қўйган доруғаларни қувибди, Бобурга совға-саломлар юбориб, унинг ихтиёрига бир неча юз навкар ҳам йўллабди. Бобур бу навкарларни бошлаб келган бекларни девони хосда қабул қилиб, ҳаммасига сарпо кийдирди ва улуфа тайинлади.

Сўнг кеча тамомланмай қолган мактубининг давомини ёзиш учун иккинчи қаватга кўтарилар экан, кенг мрамар зина-пояда опаси Хонзода бегимга дуч келди.

— Амирзодам, Ҳиротдан китобат келгани ростми?

Бобур тўхтаб, опасининг юзига синовчан кўз билан қаради-ю:

— Рост, ҳазрат Алишербекдан,— деди.

— Муборак бўлсин!

— Қуллуқ.

Хонзода бегим инисидан яна қандайдир мураккаб бир хабар кутиб, унинг юзига термилиб қаради. Бобур опасининг кўнглидаги дардни сезиб, бир лаҳза тараддудланди. Сўнг рост гапни яширса ёлғон гапиргандай бўлишини ўйлади-ю:

— Юринг, китобатни кўрсатай,— деди.

Хонзода бегим хонаи хосда Бобурнинг қаршисида ўтириб, Алишер Навоийнинг мактубиши ўқир экан, андижонлик меймор тилга олинган жойига етганда кўзида ёш йилтиради.

— Нечун кўзингиз ёшланди, бегим? Мен сизни суюнтирмоқчи эдим-ку!

— Қандоқ қилай, толеим паст экан.

— Ичингиз подшоҳ бўла туриб, наҳотки сизга ёрдам беролмаса?

« — Сиз ҳали ҳам мени деб кўп жафо чекдингиз. Агар ўша йили... Ўшда мен рози бўлсам, эҳтимол кейин Аҳмад Танбал сизга бунча ёғийлик қилмас эди.

Опасининг бунчалик тантилик билан айтган сўзлари гўё Бобурни яна танти бўлишга ундар эди. Қўнгли яхши туйғуларга тўлиб юрган шу кунларда наҳотки туғишган эгачисига катта бир яхшилик қилолмаса?

Мана, ҳозир улар Самарқанднинг мухташам бир кошонасига кўчиб келишди. Бу ерда қанча аслзодаю шахзодалар яшаган. Аммо кўпчилиги из қолдирмай кетган. Фақат меъморлар яратган гўзалликлар ҳали ҳам кўрган кўзни қувонтириб, ял-ял ёниб турибди. Яхши бир меъмор — хунарсиз аслзоданинг юзтасидан афзал эмасми?

— Бегим, сиз Танбалнинг ёғийлиги учун хижолат чекманг. Илон бари бир илонлигини қилур эди.

— Миннатдормен, амирзодам.

— Ҳазрати Алишербек ҳам биздан улуғ ишлар кутиб китобат юбормишлар. Насиб қилса, биз ҳам умрбоқий обидалар қурурмиз, хунарпешалар яна йнгилиб келурлар. Мен бу муборак китобларнинг жавобини махсус элчидан бериб юборурмен. Агар Ҳиротга борган ўша андижонлик меъмор — мавлоно Фазлиддин бўлсалар, элчи тониб, Самарқандга таклиф қилур.

Хонзода бегимнинг ҳали ёши қуримаган кўзларида энди шодлик учкунлади. У инисига завқ билан тикилиб шивирлади:

— Сиз Мовароуннаҳр осмонида бизнинг ягона умид юлдузимизсиз!

— Энди парвардигор Шайбонийхонни тезроқ даф қилсину юрт тиңчисин, денг. Ўшанда нафасни ростлаб, Ўшда қилган орзуларимизнинг ижросига киришурмиз.

Мавлоно Фазлиддин Андижонда қурмоқчи бўлган меъморлик обидаларининг тархларини, лойиҳаларини Хонзода бегим онасидан олиб, ҳамон асраб юрар эди. Ҳозир буни Бобурга айтишдан ийманди-ю:

— Амирзодам, мен энди кечаю кундуз худога илтижо қилурмен,— деди,— илоҳим шу орзуларимиз рўёбга чиқсин!

Хонзада бегим руҳи кўтарилиб чиқиб кетганидан кейин Бобур сандиқчадан шеър дафтарини олди-ю, кечаги машқини давом эттирмоқчи бўлди. Дафтардаги бир матлаъ унинг ҳозирги руҳига мосроқ эди:

«Ҳар кимки вафо қилса вафо топқусидир,

Ҳар кимки жафо қилса, жафо топқусидир...»

Алишер Навоийга шу шеърни битириб юборса яхшироқ бўлармиди? У яна бир сатр ёзди, ўзига ёқмагандан кейин ўчириб, яна ёзди, яна ўчирди, ниҳоят учинчи уринишда:

«Яхши киши кўрмагай ёмонлик ҳаргиз»

деган сатрни топди-ю, уни ич-ичидан ёқтириб, илҳом ҳаяжонидан нафасида титроқ пайдо бўлди. Назарида, Навоий унинг елкаси оша бу янги сатрни ўқиётгандек эди. У одамларга Навоийдек кўп яхшилиқ қилган сиймоинг ҳеч қачон ёмонлик кўрмаслигини истар, энди шу истагини шеърнга ҳам сингдирмоқчи бўларди.

Бобур тўртинчи сатрни бошлаганда савдарбоши эшикдан бош эгиб, кўрқа-писа:

— Мирзо ҳазратлари,— деди.

Мени тинч қўйинг демабмидим?

Қўлингизни афв этинг...

Яна не ташвиш?

Амирзодам буюрган эдилар. Агар мулла Биноийни келтирсалар, дарҳол хабар беринг, деган эдингиз.

— Шоир Биноий Шаҳрисабздан келибдирми?

— Қосимбек жаноблари келтирмишлар.

Бобур бу хабарни эшитди-ю, ёзишдан тўхтаб, қаламни миз четига қўйди. Пастдаги қабулхонага тушиб бораётганда Биноийнинг тақдирига оид мураккаб воқеалар хаёлидан такрор ўта бошлади.

* * *

Бобур ҳиротлик машҳур шоир Камолиддин Биноий билан бундан уч йил олдин Самарқандга биринчи гал келган пайтларида танишган эди. Биноийнинг сағъаткор хаттотлар томонидан кўчирилган нодир бир қўлёзма китоби бор экан. Китоб йиғишга ҳавасманд Бобур бу китобга жуда ҳаваси келди. Биноий китобини унга совға қилмоқчи бўлди. Бобур Биноийнинг Самарқандда мусофир эканини, танқислик тортиб қийналганини билар эди. Шунинг учун Бобур саҳҳофларни чақириб, бу китобнинг энг баланд нархи қанча бўлишини сўради. Саҳҳофлар «энг баланд баҳоси беш минг дирҳам», дейишди. Бобур бу пулни Биноийга юборишга улгурмай, қаттиқ бетоб бўлиб ётиб қолган эди.

Кейин у касалликдан туриб, Андижонга жўнаш учун йўл ҳозирлигини кўраётганда «Мажмуати Рашиди» деб аталадиган ўша китобни кўрди-ю, Биноийга ҳали ҳақини бермагани эсига тушди. Дарҳол хазиначини чақириб, беш минг дирҳам олтинни санатди, сўнг пулни китобдорга бериб, Биноийга юбортирди.

Бир вақт китобдор Бинойни тополмай қайтиб келди. Мусофир шоирнинг Самарқандда муқим турадиган уйи йўқ, у буғун қаёққадир меҳмонга кетган эди. Бобурнинг одамлари Андижонга тезроқ жўнаш ва кўч йигиш ташвиши билан ниҳоятда банд бўлганликлари учун ҳозир Бинойни қидириб юриш уларга жуда малол келди. Лекин Бобур:

— Шу қиёматлик қарзни узмагунча Самарқанддан қўзғалмаймен! — деб туриб олди.

Шундан кейин савдари навкарлар шаҳарнинг ҳар тарафига от чоптиришиб, ниҳоят Бинойни топдилар, унга бўлган воқеани айтиб, беш минг динор пулини топширдилар.

Киши молига суқ подшоҳларни кўп кўрган Биной ўн олти ёшли Бобур мирзонинг бунчалик ҳалоллигидан жуда қаттиқ таъсирланди-ю, унга атаб бир шеър ёзди. Бу шеърдан бир нусхасини хаттотга кўчиртириб, Бобур жўнаётганда унга эсдалик қилиб бериб юборди.

Қирқ тўрт йўллик бу шеърда у Бобурни кўп мақтаган:

«Шоҳ султони Заҳриддин Бобур,

Ки жаҳон шуд зи сити адлаш пур!»—

деб, гўё жаҳон Бобурнинг адолат бобидаги шухратидан тўлганини айтган эди. Бобур, «Жаҳон қайда-ю, менинг шухратим қайда!» деб, бу сатрлардаги муболағадан кулган бўлса ҳам, лекин замонадан кўп жабр кўрган Биной учун шу кичик яхшилик туфайли, эҳтимол, бутун жаҳон адолатга тўлиб кўрингандир, деб ўйлади.

Бироқ кейинчалик Самарқандга Шайбонийхон хон бўлди ва шаҳар шоирларини йигиб бир мушоира ўтказди. Бу мажлисига Биной ҳам қатнашиб, шеър ўқиди. Хон унинг шеърини ёқтиради-ю, Бинойни ўзига мулозим қилиб олади ва эришган ғалабаларининг тарихини ёзишни топширади. Биной «Шайбонийнома» деган асарини энди ёза бошлаган пайтда Самарқанд яна қайтадан Бобурнинг қўлига ўтади. Шайбонийхон атроф туманлардан ҳам қувулиб, Бухорога қараб чекинган кунларда Биной унинг қароргоҳидап қочиб, Самарқандга келади. У Бобур билан учрашмоқчи бўлади, лекин Қосимбек уни Шайбонийхон тарафдори деб, Бобурнинг ҳузурига киритмай, Шаҳрисабзга жўнатиб юборади. Бобур бу ҳодисадан яқинда хабар топиб, Қосимбекка:

— Чакки қилибсиз,— деди.— Мулла Биной — катта шоир. Ўзи келган бўлса рухсат бермоқ керак эди.

Қосимбек важ кўрсатди:

— Катта шоирингиз Шайбонийхонни мақтаб шеър ёзган. Бобур кулди:

— Бизни мақтаб шеър ёзганини билмасмиёиз? Тождорлар мақтовни суйсалар, шоир не қилсин!

Қосимбек жиддий туриб эътироз қилмоқда эди:

— Амирзодам, бу одам Шайбонийхоннинг хуфяси бўлиши мумкин.

Бобур ўйлаб туриб:

— Йўқ,— деди.— Ҳиротда Бойқародай шоҳга хуфя бўлмаган киши Шайбонийхонга хуфя бўлмас.

— Аммо бу шоир Ҳўжа Яҳёнинг ҳовлисида туриб, унинг тузиши ичган, кейин Ҳўжа Яҳёни ноинсофларча ўлдиртирган Шайбонийхонга мулозим бўлган. Шу яхшими?

— Бу яхши бўлмаса, яхшилик қандай бўлишини биз кўрсатмоғимиз керак. Одам юборинг, мулла Биноийни Самарқандга бешикаст олиб келинлар.

Сўнги сўз фармойиш тарзида айтилгани учун Қосимбек уни бажаришга мажбур бўлган эди.

... Бобур пастга тушиб, девонномга тўрдаги эшикдан кирди. Кўп ўтмай ийогаҳдаги эшикдан Қосимбек Биноийни бошлаб кирди.

Биноийни Бобур бундан икки-уч йил олдин ҳам бир кўрган эди. Ўшанда у жуда салобатли эди. Ҳозир эса жуда озиб, гавдаси алланечук кичрайиб қолган. Тўни ҳам, салласи ҳам эскириб кетган. Фақат йирик-йирик кўзлари аввалгидай мағрур чақнаб турибди. Бобур унга пешвоз чиқиб уй ўртасида қўл бериб кўришди. Ўнг ёнига Қосимбекни, чап ёнига Биноийни ўтқазиб ҳол-аҳвол сўради. Шунда Биноий ёдаки бир рубоий айтиб, егулик ғалласи йўқлигини, княй деса ғалланинг қопи ҳам топилмаслигини айтди:

Не ғалла мароказ тавонам пўшид,
Не муҳмали ғалла то тавонам пўшид —

деган сатрлардаги нозик сўз ўйинини сезиб, Бобур беихтиёр жилмайди. «Мухмал» аслида ноаниқ деган маънони билдирарди. Бу сўз билан мулла Биноий ўз аҳволининг ноаниқлигига ишора қилмоқчи эди. Айни вақтда, «муҳмали ғалла» — яъни қоп княдиган даражага етганини ҳам айтиб, ўз аҳволига киноя қилмоқда эди. «Хон ҳузурда тонган мартабамиз шу бўлди!» — демоқчи эди.

Бобур бунинг ҳаммасини тушунган маънода бош иргади-ю, панжасини пешонасига тираб, бир лаҳза жим қолди. Унинг авзойидан шеърга шеър билан жавоб бермоқчи эканлигини сезган Қосимбек Биноийга «Шошмай туринг!» — дегандай ишора қилди. Ниҳоят, Бобур қўлини пешонасидан олди-ю, Биноийга кулимсираб қаради:

Инъому вазифа бори буйрулгусидир,
Муҳмалга бўю галлага уй тўлгусидир.

Бобурда бунчалик шеърий истеъдод бор деб ўйламаган Биноий бир лаҳза ҳайратланиб турди-ю, сўнг тожикча талаффуз билан:

— Яна бир такрорланг, амирзодам, фақир радифини уқиб олмоқчиман! — деди.

Бобур шеърни иккинчи айтишда баъзи жойларини силлиқлаб, «галлага уй» жумласини «галладин уй тўлгусидир», деб тўғрилади. «Бўй» ва «уй» деган ички қофиялар ўзига ҳам ёқимли туюлиб, завқини келтирди.

— Таъби назмингизга тан бердим, амирзодам! — деди Биноий. Сўнг у оқ оралаган қалин соқолининг учларини тутамлаб бирпас жавоб қидирди. Топди шекилли, бошини тез кўтариб, қаддини тиклади:

Бир муҳмал учун мунча ипоят бўлди,
Мустаъмал агар десам иелар бўлгусидир!

Биноийнинг туркий шеърга ҳам бунчалик усталиги энди Бобурни ҳайратга солди. Бу ерда «муҳмал» сўзи учинчи бир маънода ишлатилгани — Биноий аввалги рубойисига камтарона баҳо бериб, уни «муҳмал», яъни «хом» деб атагани ҳам ажойиб эди. «Муҳмал»га «мустаъмал», яъни «пишиқ», «мукаммал» сўзининг ички қофия қилингани ҳам Бобурга жуда ёқди. У муншийини чақириб, мулла Биноий айтган рубойларни ёзиб олишни буюрди.

Икки орада бўлиб ўтган мушоирадан Қосимбек ҳам хийла таъсирланган эди. У ўша кунгек Биноийни яхши бир ҳовлига жойлаштирди, Бобурнинг буйруғи билан аравада ун, гуруч, бир қўй, иссиқ барра пўстин бериб юборди. Биноий подшоҳ мулозимлари қаторида улуста ола бошлади.

Орадан икки кун ўтгач, янги зира беқасам тўн устидан барра пўстин кийган Биноий яна Бўстонсаройга келди. Бобур бу гал уни иккинчи қаватдаги меҳмонхонада қабул қилди.

Бу гал улар дастурхон атрофида яккама-якка суҳбатлашдилар. Биноий Бобурнинг Шайбонийхон ҳақида савол беришини кутиб, хон саройида кўрганларини киноя билан гапириб беришга тайёрланиб келган эди.

Лекин Бобур Биноийни ўнғайсизлангирмаслик учун ўтган гал ҳам, бугунги суҳбатда ҳам, Шайбонийхонни атайлаб тилга олмади. Сўнгги кунларда Навоийдан келган хатнинг таъсирида юрган Бобур Ҳиротдан гал очди. У Навоий билан Биноийнинг

ўзаро муносабатлари ҳақида баъзи бир гаплар эшитган, энди бунинг тафсилотларини билгиси келар эди.

Шайбонийхон тилга олинмаганидан енгил тортган Биноий кулиб гап бошлади:

— Алишербекнинг қулоқлари огриганда кўк қийиқ боғлаган эканлар. Буни базвоз эшитиб, кўк рўмолга «Нози Алишерий» деб ном қўйиб сотадиган бўлдилар. Алишербек — улуғ сиймо, номларига ярашадиган улуғ ихтиролар қилганлар. Бачкана кишилар арзимаган нарсаларга ҳам «Алишерий» деб ном қўйиб, пул ишлашлари фақирнинг ғашига тегди. Эшагимга ғаройиб бир эгар ясадим бунга ҳам «Алишерий» деб от қўйдим. Кейин шу эгар ҳам машҳур бўлди! Мен бу билан савдогарларнинг бачкана гапларига киноя қилган эдим. Аммо ифвогарлар буни «Алишербекка беҳурматлик» деб овоза қилдилар, икки орага ғубор солдилар.

Мулла Биноий ҳазиломуз бошлаган гапини ҳасратли товуш билан тугатди:

— Амирзодам, менинг Алишер Навоийга эҳтиромим чексиз! Фақир у зотнинг суҳбатларидан баҳраманд бўлган пайтларимни эсласам, юрагим эзилур.

— Ёмон одамлар солган ғуборни орадан олиб ташлаш мумкин эмасмикин?

— Мен ҳозир шу ғуборни тарқатиш ҳаракатидамен. Мусофиротда юриб, Алишер Навоийга атаб бир қасида ёздим. Жоиз бўлса, баъзи жойларини амирзодамга ўқиб берай.

— Марҳамат!

Мулла Биноий ўзи ёзган шеърий асарларнинг ҳаммасини ёддан билар эди. Ҳозир ҳам бир бурчакка тикилиб, «Мажмаъул ғаройиб» деган қасидасини ёдаки айта бошлади. Мулла Биноий Навоийдан узоқда унинг суҳбатини соғиниб:

Бе ту чун оби Даргамам дар ғам,

Бе ту чун руди Кўҳакам гирён¹,—

деганда, Бобур завқдан бош ирғаб:

— Ўҳ! — деб қўйди.

Қасида ўқиб тугатилганда Бобур таъсирланганидан қасрда ўтирганини ҳам унутган эди. У атрофига қараб, гўё меҳмонхонага узоқлардан қайтиб келгандай бўлди.

— Мавлоно, бу қасидани Алишербекка нега юбормайсиз?

— Ҳиротга борадиган тайинлик одам йўқ, амирзодам.

¹ Сенсиз Дарғам сувидек дарду ғамдамен,
Сенсиз Кўҳак (Зарафшон) дарёсидек гирёнман.

— Биз яқинда Ҳиротга элчи юбормоқчимиз. Каминнага Алишербекдан китобат келган эди. Жавобини ёзиб юбормоқчимен.

— Амирзодам, қани эди, қулингизнинг бу қасидасини ҳам...

— Марҳамат, хаттотга бериб кўчиртирмоқ зарур бўлса, мен буюрурмен. Сўнг элчидан бериб юборурмиз.

Гап шунга қарор топди-ю, мулла Биноий хурсанд бўлиб чиқиб кетди.

Бобур яна хонаи хосга кириб, чала қолган шеърини қўлига олди. Бироқ энди катта шоир билан бўлган узоқ суҳбатдан сўнг, аввалги шеърлари Навоийга юборишга муносиб эмасдек туюлди. Унга илгари жўн туюладиган нарсалар ҳам аслида жуда мураккаб экани ҳозир жуда аниқ сезилаётгандай бўларди. Ҳамма нарсани муҳит, аҳли жаҳон мураккаблаштиради. Ҳиротда яшаётган Алишер Навоий ҳам, ҳозир Бобурга кўп нарсаларни қуюниб айтиб берган Биноий ҳам муҳитдан, замона аҳлидан норози бўлганларича бор эди. Бобурнинг ўзи бу замонадан озмунча жабр кўрдими?

Ким кўрибдир, эй кўшиқ, аҳли жаҳондин яхшилик!

Бу ҳароратли сатр қоғозга тез ва раво тушди. Бобур ўз зеҳнининг гўё қайралиб, ўткирлашиб қолганини сезиб турарди. У ҳозир хаёл кўзи билан Ҳиротдаги Алишер Навоийни аниқ кўраётганга ўхшарди. Бобур муҳитдан, замонадан, фақат ўз манфаатини кўзлайдиган жаҳон аҳлидан яхшилик кутган одам алданиши муқаррарлигини Навоийга айтиб дардлашгиси келарди:

Кимки андин яхши йўқ, кўз тутма андин яхшилик.

Яъни, ўз муҳитидан баланд туролмайдиган одам бировга яхшилик қилолмайди. Алишер Навоийнинг одамларга шунча кўп яхшилик қилаётгани — Бобурга унинг жаҳон аҳлидан бекиёс даражада юксак эканини яққол кўрсатаётгандай бўларди. У ўз кўнглини ҳам мана шу юксакликка ундаб яна бир байт ёзди.

Бори элга яхшилик қилғилки, мундин яхши йўқ,

Ким дегайлар даҳр аро қолди фалондан яхшилик.

Шу куни кечаси Бобур Навоийга аталган мактубини ҳам, шеърини ҳам ёзиб тугатди. Орадан икки кун ўтгач,

бу мактуб маҳсуе элчи билан Самарқанддан Ҳиротга жўнатилди. Бобур Навоийдан қиш чиққунча жавоб олиш умидида эди. Бироқ қиш чиқиб, энди бойчечак очилган кунларда Ҳиротдан мусибатли хабар келди: қиш чилласи пайтида ҳали Бобур юборган элчи йўлда эканида Алишер Навоий вафот этган эди. Бобур ўзига улуғ бир мураббий топдим, деб суюниб юрганда, ўгай тақдир уни бу мададкоридан ҳам жудо қилган эди.

7

Тепаликка учиб чиқаётган чопқир отнинг туёғи ердан бош кўтариб, бугун-эрта очилай деб турган лола гунчасини эзиб-янчиб ўтди. Бу от устида ўтирган Шайбонийхоннинг кўзлари эса пастдаги кенг текисликда чуғурчуқдай ёпирилиб пойга ўтказаётган отлиқларда эди.

Тиниқ баҳор осмонининг бир четида Самарқанд билан Бухоро оралиғининг энг машҳур кўрғони бўлган Дабусия¹ қалъаси савлат тўкиб турибди. Кеч кузда бу қалъа ҳам Шайбонийхоннинг қўлидан чиқиб, Бобурга ўтиб кетганда, қўшини Бухорога чекиниб, оғир аҳволга тушиб қолган эди. Руҳи тушган баъзи саркардалар: «Эсимиз борида этак ёпиб, Туркистонга қайта қолайлик!» дейишган эди. Аммо Шайбонийхоннинг Самарқанддаги хуфялари Бобурнинг шоирлар ва олимлар суҳбатига берилиб, янги жангларга султ тайёрланаётганини билдириб турар эдилар. Қўлдан-қўлга ўтиб, жуда кўп таланган Самарқанд баҳорга чиқиб яна очлик ва қаҳатчилик балосига йўлиққан эди. Бунинг ҳаммаси Шайбонийхонни дадиллаштирди. Яқинда у Бухородан Дабусияга қўшин тортиб келди. Қалъанинг баланд деворларига улардан ҳам баланд шотилар қўйдирди. Қалъа ҳимоячилари тепадан ўқ ва тош ёғдиришаётган бўлса ҳам хон ўз аскарларига тап тортмай чиқаверишни буюрди. Одамлар ўлган-қолганига қарамай чиқиб келаётганини кўрган ҳимоячилар тепадан катта ёғоч болорлар отишди, ёниб турган ёғларни чиқаётганларнинг бошидан қуйишди. Девор тағлари ўликларга тўлиб кетди. Хон навкарлари кўрқиб чекина бошладилар. Шунда Шайбонийхон ўзининг туғишган укаси Маҳмудхонни ва суюкли ўғли Темурхонни бутун навкарлари билан жангга солди. Хон укаси ва ўғлини ҳам аямаётганини кўрган жангчилар яна шотиларга ёпишдилар. Юқоридан ёғилаётган ажал шотига чиққанларни тутдай тў-

¹ Д а б у с и я — «Темир кўрғон» демакдир. Зиёвиддин деган жойда хозир бу қалъанинг харобалари бор.

каётган бўлса ҳам бир неча юз киши шовқин-сурон билан девор тепасига чиқиб борди. Девор тепасидаги жангда икки томондан ҳам жуда кўп одам қирилди, ўликлар туйнукларни бекитиб қўйганидан пастга ўқ отиш мумкин бўлмай қолди. Хон қўшини сон жиҳатдан бир неча баробар кўп эди ва шотилардан орқама-орқа чиқиб бормоқда эди.

Бобурдан ёрдам сўраб кетган чопари Самарқандга етиб боргунча бўлмай Шайбонийхон Дабусияни қонга белаб ахири олди-ю, ҳимоячиларни битта қолдирмай қиличдан ўтказди.

Бу зафар хон қўшинининг руҳини кўтарди.

Энди Шайбонийхон Дабусияни тоғдай бир таянчга айлантириб, ундан Самарқанд устига сакраш тайёрлигини кўряпти.

Ҳозир пастда ўтказилаётган пойга ҳам — шунчаки кўнгил очиш учун эмас. Бобур билан бўладиган ҳал қилувчи жангларда Шайбонийхонга энг зўр, энг чопқир отлар керак.

Кунин кеча Самарқанддан келган дарвиш кийимдаги бир махфий Бобурнинг хотини қиз туққанини, отини Фахринисо қўйганларини айтиб берган эди.

Шайбонийхон пойгада бир-биридан ўзиб, сор бургутлардай учиб бораётган йигитларига завқ билан тикилди-ю, ўзича деди: «Майли, Бобур куздаги ғалабасида фахрланиб, қизига Фахринисо деб от қўйсин, керилиб, шеърини ёзиб ётаверсин! Унгача мен бургутларимнинг ҳаммасини овга ўргатаман».

Шайбонийхон ҳали ҳеч қайси жангга бунчалик жонжаҳди билан тайёрланган эмас. У Бобурни енгиш осон эмаслигини сезарди. Бобур энди ўн туққизга кирган ёш йигит бўлса ҳам ниҳоятда истеъдодли, ниҳоятда довурак саркарда эканини Шайбонийхон амалда кўрди. Ҳозир бу атрофдаги шаҳару қишлоқларнинг кўпчилиги Бобурга ён босади. Шайбонийхоннинг душманлари эса беҳисоб. Султон Али мирзонинг кўпчилик бек ва навкарлари бултур Шайбонийхонга қўшилган эди, Бобур Самарқандни олгандан кейин ҳаммаси унинг томонига қочиб ўтиб кетди. Бобурнинг қўшини кун сайин кўнайиб боряпти. Ҳатто Андижондаги Аҳмад Таубал ҳам укаси Султон Халилни икки юз навкари билан Бобурнинг ихтиёрига юборипти. Шайбонийхон шуни эшитгандан кейин, ҳозир Бобурнинг обрўси жуда баланд эканини, ундан ҳатто Аҳмад Таубал ҳам кўрқиб қолганини сизди. Бу кетишда ёзга бориб Бобурнинг қўшини яна ҳам кўпаяди. Шайбонийхон ҳал қилувчи жангни тезлатмаса, кейин ютқизади.

Шайбонийхон султонлари билан кенгашиб, эрта баҳорда Бухоро ва Дабусия қалъасини ишончли одамларига қолдирди-ю, ўзи Самарқанд томонга қўшин тортиб кела бошлади. Шундан сал олдин Шайбонийхон Бобурга мактуб йўллаб, уни масоф урушга¹ чақирган, «Мардлар майдонда синалгай, қалъада бекиниб ётиш ёш боланинг ҳам қўлидан келур!»— деган мазмунда аччиқ киноялар қилган эди.

Ниҳоят, Бобур ҳам Самарқанддан қўшин билан келди-ю, Сарипулда² Шайбонийхон аскарларидан бир тош берида тўхтаб, жангга тайёрлана бошлади. Бобур Зарафшон дарёси кўриниб турган бир жойни ўрда қилиб, атрофига чуқур хандақлар қазитди, шох-шаббалардан ўқ ўтмайдиган ихоталар ясади.

Шунга қараганда Бобур масоф урушга унча тез киришмоқчи эмас эди, орқадан яна янги кучлар етиб келишини кутмоқчи эди.

Бироқ Шайбонийхоннинг йигиладиган аскарлари йиғилиб бўлган, энди узоқ Туркистондан янги кучлар етиб келолмаслиги аниқ. Шаҳрисабздан келган махфий хабар хонни изтиробга солиб қўйди. Ўша ёқда Боқи тархон икки минг қўшин тўплаган эмиш, яна мингта аскар йиғиб кейин ҳаммасини Бобурга ёрдам бергани олиб келмоқчи эмиш. Агар бу қўшин ҳам Бобурга келиб қўшилса, Шайбонийхон енгилиши мумкин. Хон урушни тезроқ бошлашнинг чорасини излаб, Бобур қароргоҳида мунажжимлик қилиб юрган яширин кишисига хабар юборди. «Осмондаги юлдузларга қараб, Бобурни тезроқ жанг қилишга қўндирсин, агар ишни чўзса, жосуслигини фош қилиб, бошини кестиргаймен!»— деб мунажжимга таҳдид қилди.

Бу мунажжим ҳам шоир Биноийга ўхшаб, хон қароргоҳидан Бобур ҳузурига қочиб борган эди. Хон Бобурнинг раҳминини келтириш учун мунажжимни Бобур ҳузурига қочиршидан олдин калтаклатиб, оғиз-бурнини қон қилган, кийимларини йирттирган эди. Мавлоно Шаҳобиддин исмли бу мунажжим ҳозир Бобур саройида иззат-икромда экани ҳам Шайбонийхонга маълум эди. Хоннинг яширин топшириги қаландар кийимидаги киши орқали мунажжимга етказилган куни кечаси Шайбонийхон ўн минг қўшини билан

¹ Масоф уруш — очик жойда юзма-юз олишиш.

² Сарипул — ҳозирги Каттакўрғон шаҳри яқинидаги бир қишлоқ.

Бобур ўрдасига бөстириб борди, нақоралар, карнайлар чалдириб, истеҳком деворлари орқали ўқлар ёғдирди.

Отлар хандақлардан ўтолмас, аммо хон аскарларининг ҳақоратомуз қичқириқлари ўрдада ўтирган Бобурга ва унинг одамларига баралла эшитиларди:

— Жонинг бўлса майдонга чиқ!

— Қўрқоқлар, курк товукдай мояк босиб ўтира бера-санми?!

— Бобурнингда юрак бўлса улуғ хонга ўзини кўрсат-син!

— Мард бўлса чиқсин майдонга!

Ҳимояда ётган одамларга тунги хужум ва шовқин-сурон оғир таъсир қилишини Шайбонийхон яхши билар эди. Бобурнинг ўрдаси атрофида унинг юзлаб отличлари урра-ур қилишиб, борлиқни ларзага келтиришди, ихота қилинган шох-шаббаларга ёниб турган ёй ўқларини отишиб, бир-икки жойини ёндириб юборишди. Ичкаридан ҳам ўқлар отилди, аччиқланган навкарларнинг ҳақоратлари эшитилди, аммо хон кўшини билан олишиш учун ҳеч ким юрак ютиб чиқолмади.

Шайбонийхон Бобурнинг кечаси кўккисдан майдонга кўшини тортиб чиқолмаслигини олдиндан биларди, чунки ҳеч бир ақли-хушли саркарда бу қоронги тунда селдай ёпирилиб келган лашкар қаршисига тайёргарликсиз бетартиб отилиб чиқмаслиги ўз-ўзидан аён эди. Бу тунги шовқин-сурон Шайбонийхонга ўз лашкарининг руҳини кўтариш учун керак эди. У ўзининг ҳеч нарсадан қўрқмаслигини, Бобур эса гўё тиззаси қалтираб, истеҳкомдан берига чиқолмаётганини ҳар икки томонга намойиш қилмоқчи, шу билан ёш душманининг иззат-нафсини кўзғатмоқчи эди. Айни вақтда, бу тунги хужум — Бобур қароргоҳида иш олиб бораётган мунажжимни ҳам дадиллаштиришига қаратилган эди.

Чиндан ҳам бу тунги хужум Бобурнинг иззат-нафсига қаттиқ тегди. Мунажжим эса осмондаги юлдузлар тартибини мураккаб бир тарзда унга тушунтириб: «Ҳозир саккиз юлдуз сиз томонда рост турур,— деди.— Яна икки кун ўтгач, бу саккиз юлдуз ғанимишгиз томонига оғиб кетгай. Агар эрта-индин жангга киришсангиз, ғалаба сизники бўлишидан бутун фалакиёт далолат бермоқда!»

Ахири шу сабаблар бир бўлиб, Бобур Шахрисабз ва Тошкентдан келадиган катта кўмакни кутиб ўлтирмасдан, индин чоршанба кuni жанг майдонига чиқишга қарор берди. Мунажжим буни ўша алоқачи қаландар орқали Шайбонийхонга етказдирди.

Шайбонийхон чоршанба куни ҳаёт-мамоти ҳал бўлишини сезиб, бор истеъдодини, бутун тажрибасини ишга сола бошлади. Куни бўйи бўлажак жанг майдонининг ҳар бир пасту баланд жойини кўздан кечириб чиқди, офтоб қаёқдан чиқиб, шамол қаёқдан эсишигача эътибор берди. Кечаси эса отларни эгарлатиб, ҳамма нарсани тахт қилиб ётишни буюрди, ёв майдонга чиққан заҳоти дарҳол қулай томонни эгаллашнинг режасини тузиб қўйди. Икки кеча деярли ухламади. Ярим тунда ҳам, сахар паллада ҳам унинг оқ ўтовидан кучли овоз ва катта ихлос билан ёдаки кироат қилинаётган қуръон товуши эшитилиб турди. Шайбонийхон жойнамоз устида саждага бош қўйиб, худога муножот қилар, кўзларига ёш олиб «Шарманда қилма парвардигор!» — деб пичирларди.

Жангдовуллар азон палла Бобур қўшинининг шошилини сафланаётганини ва туғ тикаётганини айтиб келган заҳоти Шайбонийхон ҳам бор аскарларини оёққа турғизди. Чавқар отда сафларни айланиб чиқди.

— Шунқорларим! — деб жарангли овоз билан қўшинга мурожаат қилди. — Бу атрофда бизнинг худодан бўлак суянчигимиз йўқ. Ота юртимиз узоқ, енгилсак етолмаймиз. Бирдан-бир нажот — енгил! Менинг парвардигордан умидим катта. Тушимда аён бўлди — насиб қилса, ғалаба бизники!

— Ишпоолло! — деди ўнлаб овоз бирдан.

Шайбонийхон қуръондан қисқа бир сурани оҳангдор товуш билан таъсирли қилиб ўқиди-ю, диний раҳбарларга ҳос сирли ва салобатли тарзда фатво берди:

— Омин, оллоҳу акбар!

Минглаб одам бирдан:

— Оллоҳу акбар! — деб такбир туширганда осмон титраб кетгандай бўлди. Шайбонийхоннинг валийлигига ишонадиган, унинг фатвосидан руҳланган қўшин аввалдан ўйланган аниқ режа билан ёв томонга йўналди.

Узоқ машқлар бекор кетмаган эди. Хоннинг қўшини гўё бир тан-бир жон бўлиб ҳаракат қилар, худди таранг тортилган ёйдайд ўртаси хиёл олдинга чиқиб борар эди.

Чап томон дарё. Шайбонийхон қўшинини ўнг томондаги кегиликлардан дарё томонга қиялатиб йўналтирди. Чунки дарё томон нишаброқ эди, бугун шамол ҳам жанубдан ёсмөкда эди. Йўл нишаб бўлса-ю, шамол орқадан эса, чопқир отлар янада тезроқ учиши мумкин. Шайбонийхон бугун қўлламоқчи бўлган тўлғама усули — яшин тезлигида ҳаракатланишни талаб қилади. Шунинг учун у отларнинг чопқирини аввалдан танлаб қўйган, бугун эса шамолнинг йўналиши-ю, ернинг нишаблигини ҳам ҳисобга олган эди.

Шайбонийхон қўшинининг жанубдан қиялаб яқинлашаётганини кўрган Бобур қўшини ёв билан юзма-юз тўқнашиш учун ўнг қанотини олдинок чикариб, дарёга орқа ўгирди-ю, жанубга томон бурила бошлади.

Орада икки-уч чақиримча масофа қолганда Шайбонийхон хос навкарлари, ичкилари ва туғбардори билан бирга баланд бир тепаликда тўхтади. Бобур ҳам шунақа бир тепаликда отлиқ турар, унинг орқасидаги дарёнинг суви эрталабки қуёш нуридан товланиб кўринарди.

Бобурнинг қўшинлари орасида тўра¹ кўтарган, дастаси узун найзалар ва ойболталар билан қуролланган пиёдалар ҳам кўп эди. Агар отлиқлар уларга тўғридан рўпара бўлса узун найзалар отга ёки отлиққа санчилади. Шайбонийхон пиёдаларнинг марказда келаётганини кўриб, ўзининг қўшинига ёв марказини очик қолдиришни, ёвнинг икки қанотини айланиб ўтиб, икки биқинидан ва орқадан зарба беришни буюрган эди.

Ўнг қанотдаги Маҳмуд Султон, Жонибек Султон ва Темур Султон хонинг буйруғига амал қилишиб, ёвга бир чақирим қолганда отларини тўсатдан ўнг томонга буришди ва Бобур қўшинининг чап қанотини айланиб ўта бошлашди. Шайбонийхон қўшинининг чап қанотидаги машҳур лашкар-бошилар Ҳамза Султон ва Мадҳи Султон ҳам марказга тегмай, Бобурнинг ўнг қанотини айланиб ўтмоқда эдилар.

Энг зўр кучларини марказга қўйган Бобур аввал тузган режасини шошилич равишда ўзгартира бошлади. Бобур марказга қўйган қўшинининг бир қисми ўнг қанотга қўшилиб, Шайбонийхоннинг чап қанотига ташланди.

Тўлғаманинг бир қалтис жойи шунда эдики, марказга тегмай ўтган икки қанот бир-биридан ажралиб қолиши мумкин эди. Ёв уларни иккига бўлиб ташлаши, сўнг орқадан ҳужум қилиб тўлғама ишлатмоқчи бўлганларнинг ўзларини тўлғаб, қуришаб олиши мумкин эди. Ҳозир Шайбонийхон қўшинининг чап қаноти худди мана шу аҳволга туша бошлади.

Аmmo мана шу ерда энг югурик отларнинг ташлангани иш берди. Бобурнинг отлиқлари олдиндан қирқиб чиқишга улгурмадилар. Маҳмуд Султон бошлиқ уч-тўрт юз чавандоз ёв қўшинининг орқасига ўтиб олишга муваффақ бўлди. Ўнг қанотдан Ҳамза Султоннинг икки юз отлиғи ҳам чопқир отларда ёвни айланиб ўтиб келиб, Маҳмуд Султоннинг йигитлари-

¹ Тўра — қалқоннинг бир тури. Отлиқларнинг қалқонидан катгароқ бўлади.

га қўшилди. Бобур қўшини кутилмаганда ҳам икки ёндан, ҳам орқадан зарба еб, эсанкираб қолди. Жон аччиғида бақираётган, қилич ва ўқ зарбидан йиқилаётган, оёқ остида мажақланиб чинқирган ваҳимали овозлар, тиг, найза зарбалари, «Ур-ҳо, ур!» — деган нидолар отларни ҳам қутуртириб юборган эди. Бобур қўшинининг дастлабки ясоғи бузилиб кетди, икки томоннинг отлиқлари аралаш-қуралаш бўлиб, пиёдаларнинг устига отда бостириб келди. Пиёдаларни энди ўз қўшинининг отлиқлари ҳам босиб-янчиб кета бошлади.

Очиқ қолган марказдан Бобур аскарларининг бир қисми алашга тилидай отилиб чиқди-ю, Шайбонийхон турган тепаликка ҳамла қилиб кела бошлади. Ўнг қанотдаги Темур Султон билан Жовибек Султоннинг йигитлари ҳали ҳам қуршовдан чиқолмас эди. Шайбонийхон томонга бостириб келаётган икки юздан кўпроқ отлиқнинг рафтори жуда ваҳимали эди. Кўпакбийнинг уч-тўрт юз йигити қирғин бўлаётган жойдан чиқиб, ёв отлиқларининг кетидан тушди. Аммо орадаги масофа анча узок, Кўпакбий етиб келгунча беригилар Шайбонийхонни бутун ичкилари билан янчиб ўтиши мумкин эди. Буни сезган хоннинг ичкилари саросимага тушиб қолишди. Ювошгина от миниб чиққан мулла Абдурахим:

— Ҳазрати имоми замон, вақт ўтди, беҳатар жойга чекинайлик! — деди.

Шайбонийхоннинг рангида қон қолмаган. У ҳам беҳатар жойга кетишни истарди. Аммо бу тепаликда у туғлар билан турибди. Агар пастга тушиб кетса-ю, аскарлари ўгирилиб қараб, уни ва туғларни кўрмаса, «Енгилбмиз!» — деб ўйлашади. Хоннинг чекиниши — енгилш аломати бўлади.

Шунинг учун Шайбонийхон титраб-қақшаб:

— Ўлим бор, чекиниш йўқ! — деб қичқирди. Сўнг у юз кадамча нарида турган хос навкарларига буюрди:

— Чик ҳамманг! Ана у келаётган отлиқларнинг йўлини тўс!

Бу хос навкарлар хоннинг энг сўнги таянчи ҳисобланар, улар одатда енгилб қочиш керак бўлганда хонни кўриқлаб олиб кетиш учун сақланар эди. Хон буйруқ бергандан кейин ёпирилиб келаётган нариги ёвнинг қаршисидан чиқиб, ёйлардан ўқ ота-ота уларга яқинлашдилар. Хос навкарлар наригиларга қараганда икки баробар оз бўлсалар ҳам дадил саваша бошладилар. Нарёқдан Кўпакбий ҳам уч-тўрт юз отлиғи билан етиб келди. Энди ёв илғорлари қуршовда қолди. Бир вақт шу қуршовни ўнтача отлиқ ёриб чиқди. Худди кўпқари пайтида улоқ ташлаб тўсатдан томошабин устига бостириб келиб қоладиган улоқчи-

ларга ўхшаб, Шайбонийхон турган тепаликка чиқиб борди. Мулозимлардан бир нечаси «гур» этиб орқага қочди. Аммо Шайбонийхон ўз навкарларининг қўли баланд келаётганини кўриб турар эди. Камонга ўқ ўрнатиб, тепани қиялаб қочиб ўтаётган ёв отлиқларига қараб отди. Ўқ ҳеч кимга тегмаган бўлса ҳам хон шахсан ўзи жангга қўл урганини кўрган навкарлар аввалгидан ҳам қаттиқроқ қичқиришиб, ёв илғорини битта қўймай қириб ташладилар.

Нарёқда ёв қўшинини ўраб, чулғаб, тўлғама усулини хон айтгандай амалга ошираётган султонлар мингга яқин йигитлари билан Бобур турган тепаликка етиб бордилар. Пиёдалар Бобурга иш бермай қўйди. Яқинда Тошкентдан келиб қўшилган мўғул отлиқлари Бобурнинг жангни бой бераётганини сезишди-ю, ўлжасиз кетмаслик учун эгасиз қолган отларни жиловидан тутиб, етаклаб, жанг майдонидан чиқиб кета бошладилар. Баъзи мўғуллар эса ўзлари билан бир сафда жанг қилаётган андижонлик ва самарқандлик йигитларни эгарларидан ағдариб ташлаб, отларини ўлжа қилиб олиб қочишга тушдилар.

Бир вақт Шайбонийхон Бобурнинг ўн-ўн бешта ичкилари билан тепаликдан тушиб, дарё томонга қараб чекинаётганини кўриб қолди. Бу бир ҳийла эмасмикин, деб тикилиб қараса, Бобур тўлиб-тошиб оқаётган дарёга от солиб кирди. Қирғоқда қолган унинг бир неча юз навкарлари Бобур кетидан интилган ёвнинг йўлини девордай тўсиб олди. Бобур Самарқандга қараб қочаётганига энди астойдил ишонган Шайбонийхон қўлларини осмонга чўзиб, хаяжон билан:

— Худоё ўзингга шукр, ўзингга шукр! — деди. Аммо ёви енгилиб қочаётгани энди унга озлик қиладигандай туюлди. Шу топда у ўз ғалабасининг яна бир даража баланд бўлишини истарди. Шунинг учун ортда турган чопар томонга ўгирилди:

— Тез бориб шунқорларимга айт. Бобурнинг бошини кесиб келган одамга боши баробарлик олтин бераман!

Чопар энди отининг жиловини бўшатиб жойидан силтаниб кўзгалганда Шайбонийхон:

— Тўхта! — деди. У мағлуб бўлган Бобурни асир олиб, тавбасига таянтирса, ғалабасининг шухрати яна бир даража ошишини сизди:— Шунқорларимга яна бир буйруғимизни еткиз! Бобурни тирик тутиб келганига бўйи бараварлик олтин бераман! Ё тирик, ё ўлик, албатта, олиб келинглар!

Чопар тепаликдан от чоптириб тушиб кетаётганда Шайбонийхон кўзларининг нам эканини сизди. Ғалаба завқидан кўзига ёш келганини у энди пайқади-ю, кулимсираб, кафти билан кўз ёшини секин артиб қўйди.

Саратон ўтиб, асад оёи кирди. Самарқанд атрофидаги боғларда мевали дарахтларнинг шохлари етилган ҳосилдан эгилиб, ерга салом бера бошлади. Шаҳар ичида ҳам мевали дарахтлар, тоқлар жуда кўп, аммо улар ҳаммаси ҳозирданоқ шишшидам бўлиб қолган. Ҳали сарғаймаган кўм-кўк барглар орасида бирорта олма, бирорта шафтоли, бирор шингил узум қолмаган. Беш ойдан бери қамал азобини тортаётган шаҳар халқи бор меваларини пишар-пишмас еб тугатган. Қўрғоннинг ҳамма дарвозалари ёпиқ, шаҳар атрофини Шайбонийхоннинг қўшини қуршаб ётибди. Ичкаридан ҳам ҳеч кимни чиқармайди, ташқаридан ёрдам бермоқчи бўлганларнинг ҳам йўлини тўсади.

Улуғбек мадрасасининг баланд томи устидаги текис саҳиға Бобурнинг оқ ўтови ўрнатилган, бу ердан қўрғон деворлари, атроф маҳаллалар, шаҳар дарвозалари яхши кўринади. Бобур гоҳо оч одамларнинг том бўғотларига ин қурган мусичаларни овлаб юрганини кўради. Қанотли қушлар силласи қуриган очларга тутқич бермайди. Шаҳар ичида қушлар ейдиган дон-дун, овқат қолдиқлари ҳам топилмайди. Шунинг учун бу ердан қушлар ҳам ўзини олиб қочади. Гоҳо атроф кўчаларда бирор киши ит ёки мушук тутиб олса, очлар шуни ҳам таллашиб, фикиллашиб қолишади.

Мадрасанинг орқа томонида подшоҳнинг катта отхонаси бор. Илгари бу ерда саройнинг етмиш-саксонга оти боқилар эди. Ҳозир шулардан тўрттагинаси қолган. Бир қисми Сарипулда қўлдан кетди. Кўпчилиги сўйиб ейилди. Бироқ шу тўртта отга ҳам емиш топилмайди. Дон юзини кўрмаганларига бир ойдан ошди. Пичану бедалар аллақачон тугаган. Атрофдаги дарахтларнинг баргларини ҳам юлиб, қоқиб, от ва туяларга едиришган. Ҳозир баргсиз дарахтлар ёзда ҳам худди қишдагидай яланғочланиб, кўзга жуда хунук кўринади.

От-уловларга барг ҳам топилмай қолгандан кейин дарахтларнинг қуриган ёғочларини рандалаб берадиган бўлишган.

Бобур отхона ҳовлисида ёғоч рандалаётган Тохирни кўрди. Сарипулда бу йигит Бобурнинг хос навқарлари орасида эди, дарёдан ўтишда ҳам, орқадан ҳамла қилган ёв илғорларининг ҳужумини қайтаришга ҳам жонбозлик кўрсатган эди. Бобур яқинда унинг уйланиш тарихини эшитди. Шунча азоблар билан қайта топиб олган хотини очарчи-

ликда нобуд бўлиб кетмасин деб, Робияни онаси Қутлуғ Нигор хонимга каниз қилиб қўйди.

Тоҳир майда қилиб рандалаган ёгочни сарғиш мўйловли Мамат сувга ивитиб юмшатмоқда эди. Шундай қилинмаса уни от еёлмас эди.

Сарипул жангига Мамат ҳам навкар бўлиб қатнашган эди. Ўша қирғиндан эсон-омон қайтган бу йигит ўтган ҳафта қўрғон ташқарисига мева ўғирлашга чиқиб, бир қулоғидан ажралиб қайтди.

Қўрғон деворидан бўй чўзиб, ташқарига қараган очлар ташқи боғларда пишиб, шохларда тиралиб турган, ерларга тўкилиб ётган олмалар, ноклар, шафтолиларни кўриб чидаб туролмас эди. Кечаси эл ухлаганда Мамат уч-тўртта эски косиб ошшалари билан қалъа девори тагидаги обмўридан ташқарига чиқади. Чоҳдан ҳам бир амаллаб ўтиб пишган мевалардан тўйганича ейишади. Кейин қўлларидаги халта ва хуржунларни ҳам мевага тўлдиришади, аммо қўрғонга томон қайтаётганларида шафқатсиз Қўнакбийнинг йигитлари уларни тутиб олишади. Мамат ҳам ўзини косиб деб танитди. Агар «Бобурнинг навкариман» деса тирик қолмас эди. Қўнакбий «мева ўғирлагиси келганларга ибрат бўлсин», деб тутилганлардан учтасининг бурнини, иккитасини қулоғини кестиради-ю, қўйиб юборади. Бир сиқим мева учун қилинган бу ваҳшийлик туфайли Мамат энди ёзда ҳам телпагини кесик қулоғидан пастгача бостириб киядиган бўлган. Баъзида у ўзига-ўзи тасалли беради:

— Қулоқни-ку, жаширса бўлади, бурним кесилса нима қилар эдим?

Бобур кўчадан ўтаётиб гоҳо бурни кесилган бечораларни ҳам кўриб қолади.

У бир вақтлар ўзи Самарқандни етти ой қамал қилиб ётганда одамларнинг бошига қанчалик оғир кулфатлар тушганини мана энди чинакам билипти. Ўша очарчиликда саҳ-ҳофлик растасига борганларида ўғли кунжара еб пишиб ўлган, ўзи жинни бўлиб қолган бир кампир худони қаргаб, «Илоҳим ўзи ҳам шу қўйга тушсин!»— деганини Бобур энди қасоскор тақдирнинг ҳукмидек эслайди...

Камбағаллар кулбасидан бошланган очлик аста-секин навкарлар, беклар қароргоҳига ҳам, подшоҳ саройига ҳам ўрмалаб келди. Мана, ўн кундирки, Бобур нон юзини кўрмайди. Ун аллақачон тугаган. Унга олтин-кумуш идишларда эрталаб бир сиқим майиз билан чой, кечкурун туя гўштидан пиширилган бир коса шўрва ёки уч-тўрт туюр кабоб берадилар. Бобур олтинлари ялтираган шоҳона идиш-товоқларга термилиб қарайди-ю, ҳозир шуларнинг

хаммасидан бир парча нонни афзал кўради. Лекин нон олтинга ҳам топилмайди.

Ойиша бегимнинг олти ойлик эмизикли қизчаси биғиллаб йиғлайди. Чунки озиб, мадордан кетиб қолган Ойиша бегимнинг сийнасидан сут келмайди. Яқинда бола кўрган бошқа бир онани топиб, Фахринисони беш-ўн кун эмиздирган эдилар, фалокат юз берди. У она вабога учраган хонадондан экан. Даҳшатли касаллик Фахринисога юқди-ю, икки кун ичида бола мумдай эриб жон берди.

Бобур кафанга ўралган гўдакни янги қазилган қабр олдиғача кўтариб борар экан, унинг буришган юзчасига юзини босиб йиғлаб юборди: «Майли, шу вабо менга ҳам юксину бу азоблардан биратўла халос бўлай!» — деган аламли ўй билан гўдакнинг совуқ лабларидан ўпди.

Галаба кунлари дунёга келиб Фахринисо номини олган қизчани қабрга қўйиб, устига тупроқ тортганларида Бобур бир лаҳза ўзини унинг ўрнида кўрди, хали тирик бўлса ҳам ҳаётининг бир бўлаги, аввалги зафарлари-ю, қувончлари билан бирга умрбод тупроқ тагида қолганини бутун вужуди билан ҳис қилди.

Ичкарида Бобур кулфат чекиб ғам-ғуссага ботган сари ташқарида унинг душманлари тантана қилишмоқда эди. Бобур Ҳиротдаги амакиси Ҳусайн Бойқародан, Тошкентдаги тоғаси Маҳмудхондан беш ой давомида ёрдам кутди, келмади. Энди келмаслиги аниқ. Шунини пайқаган Шайбонийхон ҳар куни кечаси дарвозалар ташқарисида нақора чалдиради, карнай-сурнайлар билан шаҳар аҳлини уйғотади. Сўнг хон жарчилари кўрган ташқарисидаги кўтармаларга чиқиб, шаҳардагиларни хон томонига ўтишга чорлайди, оч одамларга турли иоз-неъматлар ваъда қилади. Бобур энди урушни бой берганини сезган бек ва навкарлар деворлардан ошиб тушиб, сув мўриларидан ўтиб, қамал балосидан қочади.

Бир кун кечаси Бобурни қўриқлаб юрадиган қўрчи беги ҳам қалъадан яширинча чиқиб қочди. Хос қўриқчилар орасида Тоҳир бор эди. Эртаси куни кечаси Бобур уни ўз хузурига чақириб олди.

Тоҳир озиб кетганидан елкалари пучайиб қолган, кўзлари ичига ўпирилиб тушган. Юзидаги чандиги эса бўртиб, гўё аввалгидан хийла катта бўлиб кетган.

— Тоҳирбек, — деди Бобур, — Гўри Амир мақбарасининг хошиясига араб тилида бир ҳикмат битилмишдир. Бу ҳикматда «Жаҳон сендан юз ўгирмасдан олдин сен жаҳондан кўнгил уза билгин» дейилмишдир. Мен энди жаҳондан кўнгил узмоқчимен. Вабо мени олиб кетса, балки тез қутулар эдим. Лекин мени вабо ҳам четлаб ўтди...

— Худо сақласин, амирзодам! Бизнинг суянган тоғимиз ўзингизсиз!

— Суянган тоғингиз ҳозир ер билан яксон бўлмишдир, Тоҳирбек! Кеча бир байт битмишмен:

Эй кўнгул, гар Бобур ул оламини истар, қилма айб,
Тағри учун де, бу оламнинг сафоси қолдиму?!

Тоҳир шеърдан таъсирланиб:

— Рост, ҳозирги кунларимизда сафо қолмади, амирзодам! — деди.— Лекин ойнинг ўн беши қоронғи бўлса, ўн беши ёруғ. Шукр, ҳали таңда жон, белда шамширимиз бор!

Бобур ўйланиб турди-ю:

— Энди сўнги илинж ёғий илқиға тирик тушмаслик! — деди.— Бор кучларни тўплаб, қулай бир пайтда қалъадан чиқайлиғу ёғий ҳалқасиға ҳамла қилайлик! Кунимиз битмаган бўлса ёриб ўтурмиз, битган бўлса қилич билан жон берурмиз!..

— Худо хоҳласа ёриб ўтурмиз, амирзодам!

— Бу сирни ҳозирча фақат Қосимбек билур, сиз ҳам сир сақланг, тайёрлик кўринг!

— Жоним билан!

Тоҳир ўша кун кучаси Қосимбекка учради. Икковлари қалъа деворининг хокрезлари орқали ташқарини кузатиб, ёвнинг асосий кучлари Оҳанин, Феруза ва Чорраҳа дарвозалари томонда жойлашганини, Шайхзода дарвозасининг атрофларида эса ёв ҳалқаси заифроқ эканини аниқладилар. Навкарлар ва отлиқларнинг энг бақувватларини танлаб, уларни ҳамлага тайёрлай бошладилар.

Бобур Бўстонсаройда хонайи хосда китоблари ва қоғозларини кўздан кечириб, уларнинг энг кераклиларини олиб кетмоқчи бўлиб саралаётганда эшикдан Қутлуг Нигор хоним, Эсон Давлат бегим ва Қосимбек кириб келишди. Важохатларидан фавқулодда бир гап бўлган.

* * *

— Амирзодам,— деб Бобурнинг бувиси, сўнги йилларда анча букчайиб қолган Эсон Давлат бегим гап бошлади: — Шайбонийхон сулҳ таклиф қилиб одам юбормиш!

Сулҳ сўзи Бобурнинг қулоғиға нажот оҳангидай эшитилди. Аммо нажотни ҳеч қачон Шайбонийхондан кутмаганлиги учун қулоқларига ишонмай, кўзларини бувиси билан онасига тикди. Қутлуг Нигор хоним негадир қаттиқ изтиробга тушган. Эсон Давлат бегимнинг қўлида зарқал хошияли қоғоз. Камшир алланарсадан хижолат чеккандай бўлиб:

— Хоннинг номаси,— деди-да, қўлидаги қоғозга истаристамас қараб қўйди.

Хонинг номаси нега энг аввал бувисининг қўлига келиб тушганидан Бобурнинг таажжуби ошди:

— Номани ким келтирди?

— Нуфузли бир дарвиш. Нақшабандийлардан. Раҳматлик Хўжа Яҳёга қўл берган мўйсафид экан.

Бобур онасига қаради:

— Сизга келтириб бердимми?

— Йўқ,— деб Қутлуғ Нигор хоним маънос бош чайқади. Эсон Давлат бегим номани Бобурга узатар экан, уялинкираб қўшиб қўйди:

— Аслида бу нома Хонзода бегимнинг номларига келмишдир.

— Ажабо! — деб Бобур хатни жирканиброқ қўлига олди.

— Амирзодам,— деди бувиси,— сизга айтишга ҳам уялурмен... Шайбонийхон Хонзода бегимнинг таърифларини эшитиб ғойибона дард чекармиш. Номасида бир пора шеър ҳам бор.

Бобур Шайбонийхоннинг бу йил эллик ёшга кирганини, ўғилларини аллақачон уйлантириб, неваралик ҳам бўлганини билар эди. Заҳарханда билан номани очар экан, энг аввал шеърый сатрларга кўзи тушди:

«Сифатингги эшитиб зор ўлдим,
Ишқинг илжиги гирифторм ўлдим».

Бобурнинг гаши келиб, номани гилам устига отди:

— Бу хон бултур Султон Али мирзонинг онаси Зухра бегимга ғойибона ошиқ бўлиб нома юборганини нечун унутдиларингиз? Наҳотки, ишониб бўлса?!

Қутлуғ Нигор хоним уҳ тортди. Эсон Давлат бегим эса иложи борича совуққонлик билан гапира бошлади:

— Амирзодам, бошқа вақт бўлса душманингизнинг бу номасини ўқишга ҳам ҳазар қилур эдик. Лекин ҳозир жонимиз қил устида. Мен-ку, ёшимни яшаб, ошимни ошаганмен, беш кун олдинми, кейинми, бари бир кетурмен. Лекин сиз фарзандимнинг ёлғиз ўғли, кўзимизнинг оқу қораси...

— Мен ҳам тақдиримда борини кўрурмен. Насиб қилса, ёв ҳалқасини ёриб чиқурмиз!

Бобурнинг қалтис қарорини Қутлуғ Нигор хоним Қосимбекдан эшитган экан шекилли, таҳлика тўла товуш билан гапирди:

— Тақдир деб ўзингизни ўтга ташламанг, амирзодам! Бизни ҳам ўйланг! Сиз ёв тигига ўзингизни урсангиз, биз не қилурмиз? Умр йўлдошингиз Ойиша бегим не қилур?

Бобур бундай хатарли жангга аёлларни олиб чиқиб бўлмаслигини энди ўйлади-ю, онасининг сўзларига жавоб тополмай қолди. Бир лаҳзалик сукутдан сўнг Эсон Давлат бегим гилам устида ётган номага ишора қилиб, истехзоли кулимсиради:

— Бунинг келганига икки кун бўлди. Мени билурсиз, амирзодам. Кўп балоларни кўриб пишган тадбиркор кампирмен. Нома келтирган дарвишни гапга солдим. Шубҳаларимизни айтдим. Дарвиш қасам ичди. «Хон астойдил сулҳ тузмоқчи», деб бир талай далил келтирди. Бари бир ишонмадим. «Бўлмаса вакил юборинг, хон ўз ниятини қўлида қуръон билан тасдиқласин!» — деди. Биз буни сизга айтишдан олдин ўзимиз тафтиш қилмоқчи бўлдик. Раҳматлик Хўжа Яхёга қўл берган ҳалолу покиза бир мўйсафид бор эди. Ўшани дарвиш билан бирга хон ўрдусига чиқардик. Бугун эрталаб қайтиб келди. Хон барча султонларнинг олдида қўлига қуръон олиб айтибдир: «Шунча қон тўкилгани стар, энди Хонзода бегим рози бўлсинлар, ишиларига, оналарига, бошқа одамларига тегмаймиз, қалъадан бежавотир чиқиб кетсунлар», дебди. Катта тўй-томоша билан уйланмоқчи эмиш. Самарқанд халқига ҳам авфи умумий бермоқчи эмиш! Бир қанча мўйсафидлар буни эшитиб биздан илтимос қилдилар. Начора?

Бобур чаккаларини икки қўли билан қисиб, бир лаҳза жим турди-ю, сўнг бирдан алами келиб гапирди.

— Гулдай Хонзода бегим неваралик хоннинг ҳарамида... Йўқ, йўқ! Бу инсофсизлик!

— Амирзодам,— деб энди Қосимбек гапга аралашди.— Шу кетишда Шайбонийхон Самарқандни бари бир олур. Ўшанда зўрлик билан бўлса ҳам ўз ниятига етур.

Бобур онасидан ҳимоя кутиб, Қутлуғ Нигор хонимга юзланди:

— Онажон, Хонзода бегим ҳам сизнинг суюкли фарзандингиз-ку. Шундай жигарбандимизни қайси виждон билан ўтга солурмиз?!

Ўзи зўрға турган Қулуғ Нигор хоним ўғлининг бу гапидан қуюниб йиғлай бошлади:

— Худо менинг бошимга бу қора кунларни солгунча жонимни олса бўлмасмиди?! Хонзода бегим — менинг тўнғичим! Ёлғизлигимни билдирмай юрган сирдошим, меҳрибоним! Мен унда қандоқ айрилгаймен, э, парвардигор? Мен шундай қизимни ёғни панжасига қандай топширурмен?!

Эсон Давлат бегим қизининг елкасидан силаб, унинг изтиробини босишга тиришар экан:

— Ўзингизни босинг, болам! — деди.— Сиздан кўра қизингиз ақлироқ. Хонзода бегим ҳамма нарсани тушунди. Мушкилотларга фаҳми етди. Йиғлаб-сиктаб, ахири кў

Бобур ҳанг-манг бўлиб Қосимбекка юзланди:

— Наҳотки шу гап рост? Хонзода бегим рози бўдларми?

— Ҳа, амирзодам!

— Ишонмаймен! — деди Бобур. Сўнг кафтини кафтига асабий уриб савдарбошини чақирди-ю: — Хонзода бегимни чорланг! — деб буюрди. Кейин онаси, бувиси ва Қосимбекка қарата деди: — Мени маъзур тутингиз, бегим билан яккама-якка сўзлашмоқчимен.

Учовлари индамай чиқиб кетишди. Анчадан кейин яшил қабо кийган Хонзода бегим эшикдан мотамсаро бир алфозда секин кириб келди.

Бобур уни каршисига ўтқазиб, бир лаҳза юзига тикилиб турди. Илгариги гулгун ёноклар энди сарғайиб ичига ботган. Лаблар сўлғин. Фақат йирик-йирик кўзларда қандайдир қатъият аломати бор.

— Бегим, сиз... Шайбонийхон таклифига ризолик берган эмишсиз. Шу ростми?

— Ризо бўлмай не иложим бор?

— Менинг мағлубиятим сизни иложсиз қолдиргани рост. Лекин инингиз ҳали тирик. Мен асир тушмоқчи эмасмен. Бир ўлим бўлса, ҳаммавақт бор. Ажал етмаган бўлса, сизларни олиб чиқиб кетурмиз. Куним битган бўлса, илкимда қилич билан жоп берурмен. Ана ундан кейин ризолик берсангиз майли. Унда ҳеч ким: «Ўзи омон қолиб, эгачисини қурбон қилди», деёлмас. Менга бундай маломатдан ўлим афзал. Ризо бўлманг!

Хонзода бегимнинг кўзига ёш қуюлиб келди. У Бобурнинг ёв ҳалқасини жанг билан ёриб чиқиб кетолмаслигини биларди. Бобур бир ўлимни астойдил бўйнига олиб шундай деганини сезарди. У Бобурни мана шу мардлиги ва довураклиги учун ҳам жонидан ортиқ кўрар, ўзини ёв қўлига тутқазиб, укасини нақд ўлимдан олиб қолишни истарди.

Лекин у ўзининг бу ниятини Бобурдан яширишга мажбур эди. Чунки Бобур, ҳозир ўзи айтгандай, опасини қурбон қилиб қутулиб кетиш маломатидан ўлимни афзал кўрарди. Агар у Хонзода бегимнинг асл ниятини билиб қолса, ҳар қандай йўл билан бўлса ҳам опасини ниятидан қайтаради. Ундан кейин нажот йўли бутунлай бекилади!

— Бобуржон, сиз мени деб бевақт ўлимни бўйингизга олманг. Мен сизнинг улуғ истиқболингизга ишонамен. Сиздек нодир истеъдодлар дунёга кам келишини бошқалар бил-

маса ҳам мен билурмен. Ўзингизни эҳтиёт қилинг! Тақдирингизни толси паст эгачингизнинг тақдири билан тенглаш-тирманг!

— Нечун бундай дейсиз? Ҳаммамиз ҳам бу ўткинчи дунёга меҳмонмиз! Сиз билан мен бир онанинг фарзандларимиз!

— Лекин мен қиз туғилганмен, фарқимиз шунда! Ёшим йиғирма бешга кирди-ю, ҳамон ёлғизмен. Мен кўнгил қўйган одамни тақдир менга раво кўрмади! Омадингиз келиб, Шайбонийхонни енгганингизда, балки менинг орзуларим ҳам рўёбга чиқур эди! Ўшанда балки менинг ҳам бахтим очилармиди? Йўқ, ҳамма умидларим тарихнинг ғилдирағи тагида янчилди! Қачонгача даргоҳингизда қари қиз бўлиб юргаймен, иззатимни билишим керак!

— Наҳотки, сиз неваралик чолни ўзингизга муносиб кўрсангиз?

— Муносибимни топишдан умидим узилган! Энди кексами, ёшми менга бари бир!

— Бир вақтлар Ўшда сиз менга нелар деган эдингиз? «Кўнглингизга ишонинг», демагаи эдингизми? Наҳотки, сизнинг кўнглингиз шу бераҳм хонга мойил бўлса? Бултур бу одам Зухра бегимга қанчалик ноинсофлик қилганини бир эсланг. Наҳотки, сиз шундай одам туфайли биздан ажралиб кетмоқчи бўлсангиз?!

Хонзода бегим ўкириб йиғлаб юборди:

— Не қилай?! Бошқа нажот йўқ! Йўқ!!!

— Бир онадан туғилганмиз, энди тақдиримизда неки бўлса бирга кўрурмиз! Биздан ажралманг! Тунда ёв ҳалқасига ҳамла қилурмиз! Тайёр туринг!

Хонзода бегим ҳам яна эркакча кийиниб, укаси билан жангга киришни бутун вужуди билан истарди. Ҳозир унга ҳам душман асоратидан кўра қўлида қурол билан ўлиш афзал туюларди. Хонзода бегим тўсатдан шу туйғуга берилиб:

— Қачон? — деб сўради.

Бобур овозини пасайтириб:

— Шу бугун кечаси! — деди.

Хонзода бегим бугун кечаси суюкли укасининг ёв қуршовида ҳалок бўлиши муқаррарлигини гўё олдиндан сездию, сесканиб ўрнидан турди:

— Бугун эмас! Йўқ, йўқ!

Бобур ҳам ўрнидан турди:

— Бегим, менинг иниларча айтган сўзим инobatга ўтмаса, буни подшоҳлик фармони деб билинг!

Хонзода бегим индамай Бобурга яқинлашди. Юзини

укасининг кўкрагига босиб, елкалари силкина-силкина ўртаниб йиғлади. Шу тарзда у Бобур билан сўзсиз видоланди-ю, кейин гўё унинг фармониغا бўйсунгандай бош эгиб, чиқиб кетди.

* * *

Ярим тунда Бобур, Қосимбек, Қутлуғ Нигор хоним, Ойиша бегим, Тоҳир хотини Робия билан бирга, яна ўттиз-қирқта бек ва навкарлар Шайхзода дарвозасига йиғилдилар. Бироқ уларнинг орасида Хонзода бегим йўқ. Бобур Хонзода бегимни бирга олиб чиқишни онасига топширган эди.

Қутлуғ Нигор хоним йиғлайвериб овозини олдириб қўйган. Унинг хазин товуш билан берган узук-юлуқ изоҳидан Бобур шуни билдики, Хонзода бегим бувиси билан бирга Чорраҳа дарвозасига қараб кетган.

Шайбонийхоннинг қароргоҳи ўша томонда. Наҳотки Хонзода бегим ўша ниятидан қайтмаган?!

Бобур орқароқда турган навкарларига ўғирилди-ю, кўзи Тоҳирга тушди:

— Тез Чорраҳа дарвозасига боринг! Хонзода бегимни топиб, менинг буйруғимни етказинг! Дарҳол бу ёққа етиб келсинлар! Бегим келмагунларича биз қўзғолмаймиз! Шуни бориб айтинг!

— Амирзодам!..— деб Қосимбек Бобурга эътироз қилмоқчи бўлган эди. Бобур унга қулоқ солмай яна Тоҳирга буюрди:

— Тезроқ боринг!

Шиддат билан чопаётган отнинг тақалари тошларга қарсиллаб урилиб, кўчаларнинг тунги сукутини бузиб ўтди. Тоҳир Чорраҳа дарвозасига етиб борганда Хонзода бегим тушган маҳофа машъал кўтарган отлиқлар қуршовида қўрғондан чиқиб кетмоқда эди.

Кўндан бери давом этаётган қамал ёв қўшинини ҳам толиқтирган, ҳамма уруш тугагини сабрсизлик билан кутар, агар Бобурнинг оласи хоннинг шартини қабул қилса, сулҳ тузилишини кўп одам билар эди. Энди шаҳардан машъалалар ёқиб, дарвозани очиб чиққан шоҳона маҳофа ва унинг ичида ўтирган Хонзода бегим хон қўшинига тинчлик аломати бўлиб кўринди-ю, ҳаммани уйғотиб юборди. Сулҳ келтираётган малика шарафига нақоралар ва карнай-сурнайлар чалинди.

Маҳофа атрофига мўри-малахдай қўшин тўпланиб бо-

раётганини Тоҳир очик дарвоза орқали кўрди-ю, отини тез оркага бурди. Шайхзода дарвозаси олдига учиб бориб, ҳамма кўрганларини Бобурга айтиб берди.

Шодликка тўлиб янграётган нақора садолари, карнайнинг «вах-вах-ху-у»си, сурнай навоси бу ерларга ҳам эшитилмоқда эди. Бобурнинг назарида, Хонзода бегим қари қиз бўлишдан кўрқиб ва укаси даргёҳида тортган кулфатларидап безиб, Шайбонийхон хузурига роҳат-фароғат излаб кетган эди.

— Дунёда садоқат йўқ экан! — деди у алам билан ва отининг жиловини силтади: — Дарвозани очинг!

Дарвоза секин очилди. Чоҳ кўприги туширилди. Олти ойдан бери кўрғондан чиқмаган бир даста отлиғу пиёда одамлар қоронғи тунда юракларини ҳовучлаб, чоҳ кўпригидан ўтдилар. Атроф таҳликага тўла. Гўё ҳар дарахт ортида бир ўлим кутиб турибди. Йўлларда ёв жангдовуллари учраб қолишдан хавотирланиб, йўлсиз жойлардан юрдилар, чуқур ариқлардан ўтдилар. Лекин бирор жойда ёвга дуч келмадилар.

Самарқанд кўрғонига ўралиб, унинг олти дарвозасини олти бошли аждарҳодай кўриклаб ётган ёв қўшинининг бутун диққат-эътибори хон қароргоҳидан келаётган карнай-сурнай товушига ва қалъадан гўё сулҳ тимсоли бўлиб чиққан маликага жалб бўлган эди. Хонзода бегим хоннинг шартини қабул қилгандан сўнг Бобурни таъқиб этмаслик ҳақида бутун қўшига фармон берилган эди.

Хонзода бегим ҳамма балоларга ўзини тутиб бериб, укасини ёв қуршовидан халос қилганини Бобур билмаса ҳам Қутлуғ Нигор хоним яхши билар эди. Узоқдаги нақора ва қарнай-сурнайлар тўй шодиёнасини эслатувчи қувноқ куйлар чалган сари Қутлуғ Нигор хонимнинг юраги қон бўлиб, кўзларидан дув-дув ёш тўкиларди.

ТОШКЕНТ. ЎРАТЕПА. ИСФАРА

КЎЧКИ БОСГАН БУЛОҚ

1

Тошкент... Ўн беш-йигирма йилдан бери урушнинг совуқ нафаси тегмаган бу шаҳар Самарқандга нисбатан осуда ҳаёт кечирмоқда эди. Тошкент кўрғонининг ҳар ўн икки дарвозасидан одамлар бемалол кириб-чиқиб турибди. Бўзсув ва Салор ариғининг бўйларидаги мевали дарахтлар куз ёмғирида ювин-

ган. Ўрик, олча барглари ўз бутоклари билан видолашини олди-дан шафақдай қизил тус олган. Ўзоқдан кўриниб турган Чоғ-қол тоғларига қор тушган.

Қамал даҳшатларини бошдан кечириб келаётган Бобурга Тошкентнинг тўкин-сочин кузи, бағри кенглиги, тоғдан эсан сарин шабадаси маъсуд ўсмирлик даврини эслатди. У ўн олти яшарлигида келганида Хадрадан пастдаги Ҳазрати Уккоша булоғидан сув ичган, Ўқчи маҳалласида Тошкентнинг жаҳонга машҳур ўқ-ёйларини ясаган усталарга олтин безакли «Камони Шоший» буюртма берган, Шайхантахурга кўмилган бобоси Юнусхоннинг қабрини зиёрат қилган эди.

Ҳозир у элликтача бек ва навқари билан (қолганлари уни Ўратепада кутиб турадиган бўлишди) Бешоғоч дарвозасидан киради, Қоратош маҳалласи орқали хон саройи томон борар экан, ёнидаги Қосимбек бирдан безовта бўлди:

— Нечун доруға пешвоз чиқмади?

Бобур Тошкент хонининг жияни эди, ўтган гал келганларида шаҳар доруғаси уларни кўрғондан ташқарида иззат-икром билан кутиб олиб, саройга бошлаб борган эди.

— Бу гал биз хоюмондин айрилиб, мағлуб бўлиб келмоқдамиз, жаноб Қосимбек! — деди Бобур маъюс кулимсираб.— Шунинг учун ортиқча эҳтиром кутманг.

Чиндан ҳам Маҳмудхон саройида Бобурни жуда совуқ қарши олишди. Унинг навқарларини ҳатто арқка киргизишмади. Бобур Қосимбекнинг иззат-нафсга бориб асабийлашаётганини кўрди-ю:

— Сиз билан биз Самарқандда нақд ўлимни зиммамизга олган эдик, ҳатто ўлимдан нажот излаган эдик! — деди.— Ўшал даҳшатларнинг олдида бу майда беҳурматликлар ҳеч гап эмас. Кеча Ўратепада бир байт битдим, айтайми?

— Бажонидил!

— Эшитинг:

Давлат учун кўнгулни зор этма,

Иззат учун ўзингни хор этма!

— Ҳақ гапни битибсиз, амирзодам. Бу бевафо дунё ғам емакка арзимайдир!

Шу билан икковлари бир-бирларига сал тасалли берган бўлдилару Бобур хоннинг қабулхонасига қараб кетди.

Қўлига олтин дастали ҳасса ушлаган, зарбоф тўн кийган шиговул Маҳмудхоннинг Шайбонийхон элчиси билан банд эканини айтганда, Бобурнинг қалбида бирдан нохуш туйғулар кўзгалди. У қамалдан чиққандан сўнг икки ойча Ўратепада холасиникида турган, Шайбонийхон Маҳмудхонга элчи юбо-

риб. Мовароуннахрни бўлиб олиш ҳақида битим тузишга ишти-
лаётганини ўша ерда эшитган эди. Мишмишларга қараганда,
Шайбонийхон Фарғона водийсини Тошкент хонига бериб,
Ўратепани ўзи ишғол қилмоқчи эмиш. Агар шу гап рост чиқса,
Бобурнинг бу атрофда жон сақлайдиган жойи қолмайди, Мо-
вароуннахрдан бош олиб чиқиб кетиш керак бўлади.

Унинг бугун Тошкентга келишидан мақсади — тоғасини
Шайбонийхоннинг макру хийлаларидан огоҳ қилиш ва уни
босқинчиларга қарши мудофаага чорлаш...

Бобур қабулхонада анча вақт мунтазир тургандан кейин
шиговул чиқиб, уни хоннинг ҳузурига бошлаб кирди. Тўрда
қимматбаҳо тошлар билан безатилган шатранж доналари кў-
ринди. Шайбонийхоннинг элчиси йўғон гавдали, баҳайбат Жо-
нибек Султон хонга таъзим қилиб турибди. Сарғиш юзли, хуш-
бичим Маҳмудхон тилларанг мўйловини диққайтириб мамнун
кулимсираётганига қараганда, ҳозир Жонибек Султонни шат-
ранжда ютган эди. Тўрт йилдан бери жиянини кўрмаган тоға-
си шунча узоқдан бошига қулфат тушиб келган Бобурни кут-
тириб қўйиб, ўзи Шайбонийхоннинг элчиси билан шатранж
ўйнаб ўтирганида қандайдир яширин маъно бор эди. Маҳ-
мудхон мағлуб бўлган жиянидан кўра ғолиб Шайбонийхонни
ортиқроқ ҳурмат қилишини элчига сездириб қўймоқда эди.

Буни пайқаган Бобур Жонибек Султонга атайлаб салом
бермади, унга худди деворга қарагандай бепарво бир назар
ташлади-да, тоғасига юзлағди:

— Хон ҳазратлари, мен сизни ёғийларингизнинг макру
хийлаларидин огоҳ қилгани келдим!

У Жонибек Султоннинг чиқиб кетишини кутиб бир лаҳза
сукут қилди. Орага тушган ноқулайликни тарқатиш учун
Маҳмудхон элчига махсус эҳтиром билдириб, уни эшик оғзи-
гача қузатиб қўйди. Сўнг Бобурни зарбоф кўрпача устига
таклиф қилиб, ўнг ёнига ўтқазди:

— Хуш келибсиз, Мирзам! Кўп оташин бўлманг. Бу кун-
лар ҳам ўтар. Сиз ҳали ёшсиз, ўн гулингиздан бири ҳам
очилган эмасдур.

— Менинг кўп гулларим очилмай хазон бўлди, ҳазратим.
Менинг бир қанотим Аҳмад Танбалнинг оловида куйди-ю,
иккинчи қанотимни Шайбонийхон куйдирди. Илоҳим, энди сиз
шу машъум оловларнинг орасида қолманг!

Маҳмудхон бу гапни сал бошқача тушунди:

— Тўғри, бирдан икки тараф билан ёғийлашиш яхши эмас.
Шуниг учун биз Танбал элчисини эмас, Шайбонийхон элчи-
сини қабул қилдик.

— Аммо сиз учун Танбалдан кўра Шайбонийхон юз чап-
дон хатарлироқ, ҳазратим! Чунки Танбалга Фарғона водийси

етиб ортадир. Аммо Шайбонийхон бутун Мовароуннахрни эгалламоқчи. Хуросон билан Эронни ҳам олмоқчи. Эътибор берган бўлсангиз, унинг унвои: «Халифани раҳмон, Искандар соний!» Шайбонийхон Искандар Зулқарнайндек барча мамлакатларни фатҳ этмоқчи, яна бу билан қаноатланмай, бутун мусулмон оламининг диний раҳбари — халифани замон бўлмоқчи!

Шайбонийхоннинг нияти унинг унвонидан ҳам кўриниб туришига Маҳмудхон илгари унча эътибор бермаган эди. Ҳозир Бобурнинг сўзлари таъсирида бир лаҳза ўйлашиб олди, сўнг боъги хон элчисининг сўзларини эслади:

— Назаримда, Шайбонийхон бизга қарши юриш қилмоқчи эмас. Элчисининг айтишича, улар Ҳисорни, сўнг Хуросон билан Эронни эгаллашмоқчи.

— Хон ҳазратлари, бу ҳаммаси сизни гафлатда қолдириш учун келтирилган ёлғон далиллардир! Тарихни бир эсанг: қайси фотиҳ аввал Тошкент билан Фарғонани олмай туриб, Хуросону Эронга юриш қилган? Чингизхонми? Йўқ! Амир Темурми? Йўқ! Ахир бутун Мовароуннахрни, Самарқанду Тошкенту Фарғонани эгалламасдан, уларнинг кучига таянмасдан туриб, Хуросону Эронга юриш қилиш аҳмоқлик бўлур-ку! Буни Шайбонийхон билмагай дейсизми?

Шайбонийхоннинг Тошкентга ҳужум қилиш эҳтимоли Маҳмудхонни анчадан бери таҳликага солиб келди. Шунинг учун у Иссиққўлдан нарида ҳукмронлик қилиб юрган укаси Олачахонни ўн беш минг қўшини билан ёрдамга чақирган. Бу қўшин ҳозир йўлда, бирор ой ичида Тошкентга етиб келади. Шайбонийхоннинг одамлари бундан аллақачон хабар топган бўлишлари керакки, Тошкентга элчи юбориб, мурса йўлини излаб қолишди. Маҳмудхон Шайбонийхоннинг саркардалик қобилиятини яхши билади ва у билан урушишни истамайди. Жияни Бобур эса уруш бўлишини жуда нақд қилиб қўйяпти. Нега? Маҳмудхон жиянининг ниятини аниқроқ билмоқчи бўлди:

— Хўш, Мирзам, Шайбонийхоннинг урушиши аниқ бўлса, биз не қилмоғимиз керак?

— Шайбонийхонга қарши турган барча кучлар тўпланиб иттифоқ тузмоғимиз лозим!

Маҳмудхон қўнғир кўзларини Бобурга синовчан назар билан тикди.

— Сиз билан иттифоқ тузайликми, Мирзам?

— Фақат биз эмас, кичик хон додам Олачахон ҳазратлари борлар-ку.

— Ҳа, Олачахоннинг қўшини билан менинг қўшиним бирлаша ўттиз минг бўлур. Кейин биз сизнинг қўшинингиз билан бирлашурмиз — шунда қанча бўлғай?

Бобурнинг икки юзу эликтагина одами қолган эди. Буни яхши биладиган Маҳмудхон Бобурни кулги қилмоқчи бўлиб шу саволни бермоқда эди. Чиндан ҳам ўттиз минг қўшини бер хонлар бир даста аскарни қолган, хонумонидан айрилган Бобур билан иттифоқ тузиб ўтирармиди? Бобур Маҳмудхонни ўзига яқин олиб, шу гапни айтганидан изза бўлди.

— Ҳазратим, ўгай тақдир ҳозир мени шу қўйга солди. Аммо биз мағлубият захрини ичишдан олдин ғалаба шаробини ҳам татиб кўрган эдик. Шунинг учун сизга кўнглимни очиб гапиришга журъат этдим!

— Очиқ ганирганингиз маъқул, албатта. Қалай, илож бўлса Шайбонийхон билан яна олишмоқчимсиз?

Маҳмудхоннинг саволида: «Йиқилган курашга тўймайди, чамаси-да!» — деган кинояли маъно бор эди.

— Олишишга менинг ҳаққим бор,— деди Бобур.— Чунки бирда йиқилган бўлсам, бирда йиқитганмен!

— Бу — рост, рост! — деди Маҳмудхон. Шу топда унинг кўнглидан: «Агар оғани икковимизнинг ўттиз минг қўшинимизга Бобурни саркарда қилиб қўйсак, жиянимиз Шайбонийхон билан урушиб, анча тажриба орттирган, ўзи ҳам довиюрак йигит, енгиб чиқиши мумкин», деган фикр кечди.

Маҳмудхоннинг ўзида саркардалик истеъдоди йўқ эди. Агар Бобур унинг қўшинига бош бўлиб Шайбонийхонни енгса, кейин одамлар Маҳмудхонни эмас, Бобурни ва унинг истеъдодини улуғлайди. Ундан сўнг, Бобур Тошкентни ҳам тоғасидан тортиб олишга ҳақли бўлади. Чунки азалдан маълум: қўшин кимнинг қўлида бўлса, ҳокимият ўшаники.

Маҳмудхон шуни ўйлади-ю, ўз қўшинига Бобурни саркарда қилиш фикридан дарҳол қайтди. Гапни бошқа ёққа буриб:

— Шўрлик Хонзода бегим... не қўйларга тушди-а? — деди.— Шайбонийхон маккор тулки-да. Хонзода бегим она томондан бизга авлод, ота томондан теурийларга мансуб. Бегимни олса обрўси ошишини билган. Самарқандда дабдабали тўй бериб уйланганмиш.

Маҳмудхоннинг гап авзойидан, Бобур гўё опасини қурбон қилиб, ўзи қутулиб чиққан эди. Бобур воқеани бошқача бўлганин айта бошлаганда, Маҳмудхон ишонгиси келмай бош чайқади:

— Жуда уят бўлди-да, Мирзам, ҳаммамиз маломатга қолдик!

— Даврон менинг бошимга тож кийдирган эди,— деди Бобур яна оташин бўлиб.— Энди шу тож ўрнида таъна тоши!.. Ҳаммасидан тўйдим, хон ҳазратлари! Энди борса келмас бўлиб бош олиб кетишдан бошқа иложим қолмади!

— Ундоқ деманг, Мирзам! Минбаъд сиз бизнинг азиз меҳ-

монимизсиз. Эгачим Қутлуг Нигор хоним сизга мунтазир эдилар. Заифангиз Ойиша бегим ҳам шу ердалар. Бориб улар билан кўришинг, дам олинг Эртага Шайбонийхон элчиси шарафига қабул маросими ўтказмоқчимиз. Сиз ҳам иштирок этинг!

Бобур хон хузуридан чиқар экан, ҳамма гапи бекор кетганини, Маҳмудхон Шайбонийхондан таҳликага тушиб қолганини ва у билан дадил олишинга журъат этолмай, хушомад йўлига ўтганини энди аниқ сездди. Арк ховлисидан ўтиб бораётганда Тошкентдаги осудалик ҳозир унга довул олдидан бўладиган хатарли сукунатдек туюлди. Яқинлашиб келаётган довулдан онаси ва хотинини олиб чиқиб кетиш нияти билан аркнинг тўридаги аёллар турадиган ички ховлиларига қараб кетди.

* * *

Ойиша бегим Тошкентга бундан икки ой аввал келган эди. Самарқандда илк фарзандининг ўлими устига қамал азоблари кўшилиб, ёш жувон касалманд бўлиб қолган эди. Маҳмудхоннинг суюкли хотини Розия султон синглисига ўзи турган қасрдан жой бериб, уни энг яхши табибларга қаратган ва яхши парвариш қилиб, оёққа турғизган эди.

Бобур шунинг ҳурматини қилиб, аввал Розия султон бегим хузурига кирди. Ойиша бегимга қилган иарваришлари учун қайнэгачисига миннатдорчилик билдирди-ю, энди хотинини Ўратепага олиб кетмоқчи эканини айтди. Лақаби «Қоракўз бегим» бўлган ўттиз ёшлардаги бу чиройли жувон шахло кўзларидан учқунлар сочиб:

— Амирзодам, Ойиша бегим саргардонликдан тўйган, энди уни чекка жойга юбормагаймиз! — деди.

— Тақдиримизда бори шу бўлса, начора, ҳазрат бегим?

— Мени маъзур тутишг, амирзодам, аммо ҳар кимнинг тақдири ўз пешонасига битилур.

— Бироқ... кемага тушганнинг жони бир бўлмасми?

— «Жонимиз бир» деб бечора синглимга шунча азоб берганларингиз етар. Озиб чўп бўлиб келди. Энди соғайганда яна сарсонлик, яна ломақонлик!

Бобур бугун майда-чуйда беҳурматликларга бардош беришни зиммасига олиб келган бўлса ҳам, лекин хоннинг бояги киноялари устига қайнэгачисининг бу беандиша гаплари кўшилиб, жон-жонидан ўтиб кетди.

— Ҳазрат бегим, мақсадингизни очиқ айтишг — энди синглингизни мендан ажратиб олмоқчимисиз?!

— Мен ундоқ деганим йўқ! Сиз ҳам саргардонликни бас қилишг, амирзодам. Энди Тошкентда муқим туринг!

Бобур: «Сизга сиринди бўлибми?» — дегиси келди-ю, лекин яна ўзини босиб:

— Таклифингиз учун ташаккур! — деди ва хайрлашиб чиқиб кетди. Ўша куни оқшом у Ойиша бегим билан ёлғиз қолганда Розия султон бегимнинг гапларидан порози бўлганини айтди:

— Тўн илиғини эгаси билур, дейдилар. Розия Султон бегим бизни ўзимизчалик билмасалар керак. Кўп арашмасалар яхши бўлур эди.

— Аммо мен эгачимга ҳамма гапни айтиб берганмен, Мирзам.

— Эр-хотиннинг ҳеч кимга айтмайдиган сирлари бўлма-гайми?

Ойиша бегимнинг илгариги уятчанликлари энди қаёққадир йўқолганди. У ҳам опасига ўхшаб, Бобурга тик гапирди:

— Менинг эгачимдан яширадиган сирим йўқ, Мирзам!

Бир вақтлар Бобурни улуғлаб, «ҳазратим» дейдиган Ойиша бегим энди хонга ўхшаб, баландроқдан келиб, «мирзам» дейиши ҳам ғалати эди.

Бобур киноя билан сўради:

— Демак, энди сизга мен керак эмасмен, фақат эгачингиз керак?

— Нечун ундай дейсиз? Мен ҳали ҳам сизнинг никоҳингиздамен!

— Ундай бўлса, мен сизни бу ердан олиб кетурмен. Сафар тайёргарлигини кўринг!

Йўл азобига чидами йўқ Ойиша бегим озорланиб сўради:

— Яна ўратепагами? Мен ўша йўлларни эсласам, кўнглим беҳузур бўладир. Ҳазратим, менинг жонимни йўл олди! Самарқандга бежон бўлиб бормасам эдим, жигарпорам ўлмас эди. Мана ҳозир бир ёшга кириб тетапоя бўлиб юриб кетур эди!

Ойиша бегим гўдак ўлган қизалоғини эслаб, кўзлари жикқа ёшга тўлди. Ўшандаги ўлимнинг совуқ нафаси Бобурнинг ҳам юзига тегиб ўтгандай эти увушди.

— Ажалга даво йўқ экан, бегим. Лекин ундан берида бир бошга неча қайта офтоб тегиб, неча марта кулфат тушар экан. Ёш бўлсак ҳам буни кўп кўрдик. Ўлмасак, ҳали яна ёруғ кунларга етишурмиз, фарзандлик ҳам бўлурмиз. Шу мушкул дамларда бир-биримизни тарк этмайлик. Мен билан бирга юринг.

— Бирга юрган пайтларимда сиз менга қарадингизми, Мирзом? Ҳамиша салтанат ташвишию уруш, юришлар... Мен сизни деб шунча саргардон бўлдим. Сиз мени ойлар давомида кўрмасангиз ҳам соғинмас эдингиз... Балки мен сизга муносиб эмасдурмен?.. Суймаган хотинингизнинг сизга не кераги бор?!

Бобур хотинига кўнгилсизроқ бўлиб юрган пайтларини эс-лади. Ҳозир ҳам Ойиша бегимни бирга олиб кетишга уринаётгани — уни ортқ даражада суйганидан ёки усиз яшай олмаслигидан эмас, балки Ойиша бегимни яқинлашиб келаётган хавф-хатар гирдобига ташлаб кетишни ўз шаънига муносиб кўрмаганидан эди.

— Хонзода бегимни ёғийга олдирганимиз озми?— деди Бобур.— Шунинг маломати ҳам менга етиб ортадир, бегим! Энди сизни бундай балолардан узоққа олиб кетмоқчимен!

— Ҳозир мен учун Тошкентдан тинч жой йўқ!

— Бу ҳаммаси — муваққат тинчлик, инонинг! Кўп ўтмай Шайбонийхон бу ерга ҳам бостириб келур!

— Мен эгачимнинг қаноти остида ҳеч нарсадан кўрқмай-мен! Даргоҳингиздан адои тамом бўлиб келиб, эгачимнинг ёнида яна тирилдим!

— Менинг даргоҳимда қийналганингиз рост. Лекин... яхши кунларимиз ҳам бўлган эди-ку!.. Инсоф билан бир эсланг ахир!..

Ойиша бегимнинг барча аламлари янгиланиб, хотираси лойқаланиб турган шу дақиқаларда бирорта яхши кун эсига тушмади.

— Даргоҳингизда қачон яхши кун кўрибмен, мирзам! Мудом сафар! Мудом таҳлика! Мудом сарсонлик! Мудом бе-мехрлик!

Бобур Ойиша бегимдан бунчалик адолатсиз гап кутмаган эди. Ахир у Самарқандни биринчи марта олганида Ойиша бегим «нажоткоримизга» деб совға юбормаганимиди? Кейинги ғалабасида «фахрланамен» деб шивирлаган ким эди? Бобур буларни эслаб ўтиришни ўзига эп кўрмади-ю, хотинига ҳайрат билан тикилиб:

— Наҳотки ҳаммасини унутгансиз?!— деди.

— Йўқ, кўрган азоб-уқубатимни умрбод унутмасмен!

— Фақат азоб-уқубат?!

— Бу озми? Оз бўлса, хўрланиб йиғлаганларимни ҳам унутмасмен! Энди қолган умримни эгачимнинг дуои жонини қилиб ўтказурмен. Саргардонлик бас! Хўрлик бас! Мен ҳам шох қизимен!

Бобур олтин камарига осилган чарм ҳамёнини титроқ қўл-лари билан очиб, ниманидир қидирди, аммо тополмади. Сўнг индамай ташқари чиқди-ю, мулозимлари турадиган хонага ўтди.

Дасторпеч эртага бўладиган қабул маросими учун Бобур-нинг шоҳона кийимларини сандиқдан олиб, дазмолламоқда эди. Олтинлар, қимматбаҳо гавҳарлар билан безатилган ипак кийимлар Бобур ҳозиргина хотини ва қайнэгачисидан эшитган

беандиша гаплар аламини янада ошириб кўрсатгандай бўлди. Шунинг устига Қосимбек Бобурга рўпара бўлиб шикоят қилди.

— Хон шиғовули эртанги қабул маросимида Жонибек Султонни сиздан баландроққа ўтказмоқчи эмиш! Бу не сурбетлик! Ахир сиз шоҳсиз! Наҳотки даштий бир бекни сиздан ортиқроқ эъвозласалар?

Қосимбек ҳали ҳам ўзини Бобурнинг эшик оғасидек тутар ва унинг обрў-иззатини ҳимоя қилишни ўзининг бурчи деб биларди. Хон бугун Бобурни қабулхонасида мунтазир қилиб қўйиб, Шайбонийхоннинг элчиси билан шатранж ўйнаб ўтирганда ҳам даштий султонни жиянидан баланд қўйган эмасмиди? Бир кунда шунча камситиш!.. Эртага бундай майда-чуйда камситишлар янада қўлайиши аниқ. Бунинг ҳаммасига чидаб, сизинди бўлиб юришга бардоши етмаслигини энди аниқ сезган Бобур:

— Йўқ!— деди.— Ҳаммасидан кечдим! Жаноб Қосимбек, мен энди шоҳ эмасмен! Керак эмас менга хон қабули! Бас! Улоқтиринг ҳаммасини!

Бобур дасторпечнинг қўлидаги олтин безакли тўнни юлқиб олиб, ерга отди. Нарирокда гавҳар ва ёқутлар билан безатилган шоҳона салла турган эди. Бобур саллага қадалган иккита гавҳар донасини — бир вақтлар Ойиша бегим берган совғани ситиб, юлиб олди, сўнг саллани эшикка қараб отди. Салла чувалиб кетиб, бир учи остона устига узала тушди.

Қосимбек саросима билан Бобурнинг елкасига қўлини қўйди:

— Амирзодам, сизга не бўлди? Амирзодам!

Рангида қон қолмаган Бобур ҳансираб хитоб қилди:

— Минбаъд мен бир дарвиш бўлиб кун кўрмоқчимен! Жаноб Қосимбек, онамга айтинг! Мен ҳозир Ўратенага кетурмен! Юз чумчуққа бир кесак! Тоғу тахт даъвосидан воз кечдим! Ким шунга кўнса, мен билан юрсин! Қолганларга жавоб!

Бобур салладан юлиб олган иккита гавҳарни сиқимлаганича арк ҳовлисига чиқди. «Суймаган хотинингиз сизга не керак?» деган сўзлар кулоғига қайтадан эшитилиб кетди. Чиндан ҳам юлдузи юлдузига тўғри келмаган бегимни энди ўз ихтиёрига қўйгани маъқул эмасми? Аммо бу бегим энди тил чиқариб, шунча аччиқ гапларни айтиши, эрдан биронта ҳам яхшилик кўрмадим, дейиши, Бобурнинг қалб яраларига сепилган туздек вужудини ачиштирмоқда эди. У ўз хонасига кириб қоғоз ва дафтарлари сақланадиган сандиқ тагидан Ойиша бегим бир вақтлар ипак билан тиккан халтачани қидириб топди. Йиллар давомида халтачанинг оқ матоси сарғайиб, хиралашган, аммо қизил ипак билан тикилган «Нажоткоримизга» деган

каштасимон ёзув аслидай турган эди. Бобур гавҳарларни халтачага солиб, Ойиша бегимнинг олдига борди.

— Бегим, сиз мени нажоткор билиб, бу гавҳарларни «тахтга чиққанда тожга кадаб чиқсинлар» деб юборган эдингиз. Ҳозир менинг тожу тахтим йўқ... Шохлик даъвосидан ҳам бутунлай воз кечдим. Дарвиш бўлиб тоғларга чиқиб кетмоқчимен. Сиз эса шох қизисиз... Олинг гавҳарларингизни!.. Балки яна бошқа бирон... нажоткорингизга совға қилурсиз!

Ойиша бегим халтачани олар экан, аччиқ билан бидиллаб деди:

— Мени яна ташлаб кетадиган бўлсангиз, жавобимни бериб кетинг!

— Шундоқми? Ажрашмоқчимисиз?

— Ҳа! Ажрашамен!

— Бўлмаса... бугундан бошлаб менга хотин эмассиз! Бошингиз очиқ! Шариат бўйича уч талоксиз!

2

Ўратепанинг жанубидаги Туркистон тизма тоғи этакларига баҳор анча кечикиб келади. Ҳамал ойининг охирларида далаларга энди қўш чиқади. Қорли Пирих чўққисининг тагида тўрт томони баланд тепаликлар билан ўралган шамолпана Даҳкат қишлоғида ўриклар савр ойига бориб гуллайди.

Қишлоқнинг кунботиш томонида баланд тепаликка кўтариладиган тик йўл — бароз бор. Бароз шунчалик баландки, унинг юқорисидан Даҳкатга қаралса, қишлоқ теран бир чуқурликнинг тубига жойлашгандай кўринади.

Бароздан юқоридаги текис далада Тоҳир яланг оёқ бўлиб, ҳўкиз билан ер ҳайдамоқда. Самарқанддан Тоҳирга қўшилиб навкар бўлиб келган бир қулоғи кесик Мамат эса ҳали ҳайдалмаган зояк ерга қулочкашлаб уруғ сочяпти. У ҳам яланг оёқ бўлиб иштон почасини шимариб олган. Улардан нарида учтўртта даҳкатлик тожик деҳқонлар ҳам ер ҳайдаб, экин экаётир. Ер юмшоқ, ҳаво ёқимли, ишнинг унуми яхши. Шунинг учун ҳаммаларининг руҳлари кўтаринки. Шунча вақт жангу жадалда юриб, деҳқонлик касбини соғинган Тоҳир энди яйраб ер ҳайдайди ва бирда-ярим ашула хиргойи қилиб қўяди.

Бароздан пиёда кўтарилиб келган Бобур тоғда қўй боқиб юрган, далада қўш ҳайдаётган ёш-ялангларга қарар экан, бир нарсадан таажжубланди. Тоғу тошга пойабзал чидамагани учун камбағалларнинг кўписи яланг оёқ юарди. Уст-бошлари ҳам юпун, лекин руҳлари тетик, қоринлари тўйиб овқат ейишса, кайфлари чоғ.

Бобур ўзини шу ёшларга қиёс қилади: унинг ҳам тўрт мучаси соғ, ўзи кучга тўлган йигирма ёшли йигит, қишлоқ

йигитларидан камлиги йўқ. Лекин нега у бунчалик ғамгин? Мана бу улуғвор тоғлар бағрида нега у гўзал табиатнинг тирик бир бўлагидай яйрай олмайди?

Ҳамма гап яланг оёқ юришда бўлганидай, Бобур ағдарма этигини ечиб марзага қўйди-ю, ҳайдалган ер устида сарпойчан юриб кўрди.

Туироқ бахмалдай майини, ундан баҳор ва ёшликнинг ҳиди келади. Одамнинг туироқдан яратилгани ҳақидаги ривоят эсга тушади.

Навкарлар ва деҳқонлар Бобурнинг яланг оёқ юрганини аввал ҳазилга йўйиб қулишди. Кейин Бобур этигини марзада қолдириб Даҳқатнинг барозидан яланг оёқ тушиб кетаётганини кўришди-ю, ҳайрон бўлишди.

Барознинг майда тошлари Бобурнинг товонларига ботар, тик жойлардан тушаётганда чақир тошлар оёғига тикан бўлиб кириб кетаётгандай оғриқ қўзғар эди. Лекин Бобур тишини-тишига қўйиб оғриққа чидаб борар эди.

Барознинг ярмигача тушганда кетидан ағдарма этикни қўлига олиб, сакраб-сакраб Тоҳир етиб келди:

— Амирзодам, этикни кийинг! Тўхтаг. Бу тошлар оёгингни яра қилмасин!

Бобур тўхтаб, Тоҳирнинг товонлари қорайган катта-катта оёқларига қаради:

— Сизнинг оёгингиз жароҳатсиз-ку?

— Э, амирзодам, биз ўрганиб кетганмиз.

— Мен ҳам ўрганмоқ истаймен.

— Нечун?

— Сизларга ҳавасим келур,— деди Бобур йўлида давом этиб.

Тоҳир ундан сал кейинроқда борар экан, кулди:

— Амирзодам, подшоҳнинг навкарга ҳаваси келиши мумкин эмас.

Бобур Тоҳирдан хиёл ранжиб:

— Сиз ҳам менга ишонмадингизми?— деди.— Тошкентда подшоҳлик даъвосидан воз кечганимни айтган эдим-ку!

Бу ҳодисага Қосимбек ҳам, бошқа кўпчилик бек ва навкарлар ҳам «аччиқ устида шунчаки айтилган гап» деб қарашган ва ўша икки юз эллик кишининг ҳаммаси Қутлуғ Нигор хоним билан бирга Бобурнинг кетидан Даҳқатга келишган эди.

Тоҳир оғир тин олди-ю:

— Амирзодам, мен сизга ўзимдан ҳам ортиқ ишонурмен,— деди.— Аммо сизнинг шоҳлик ташвишидан қутулишингиз мумкин эмас.

— Нечун? Ахир шаҳзодаларнинг тожу тахтсиз ўтганлари йўқми?

— Бор. Аммо сиз ундайлардан эмассиз.

— Аммо мен тожу тахтнинг бевафолигини билганлардан-мен. Шоҳ Жамшиддек, Искандар Зулқарнайндек тождорлар ҳам орттирган давлату молу дунёларини ташлаб, қабрга битта кафан билан кетган эмасларми?

Тоҳир яқинда тоғнинг нариги томонидаги Оббурдон қишлоғига борганларини эслади.

Бобурнинг тожу тахтдан ихлоси қайтганлиги беҳазил бўлса керакки, шоҳ Жамшиднинг тилидан тожикча шеър ёзиб, уни чашма бўйидаги тошга ўйдирди. Тўрт сатрлик бу шеърнинг икки сатри Тоҳирнинг эсида турибди:

Гирифтем олам ба марди-ю зўр,

Ва лекин набурдем бо худ ба гўр¹.

Оламини забт этган жаҳонгирларнинг салтанати ҳам омонат — ўзлари дунёдан кетишлари билан тугайди. Лекин шоирнинг яхши сўзлари тошга битилган ҳарфлардай асрлар давомида ўчмайди. Шундай экан, Бобур қолган умрини шоирликка бағишласа яхши эмасми?

— Мен жон дер эдим, лекин беклар сизни қўймаслар,— деди Тоҳир.

— Бекларга ижозат берурмиз, кетурлар.

Бобур шў сўзининг устидан чиқа олишини яланг оёқ юриш билан исбот қилмоқчи бўлгандай, яна майда тошлар устидан сарпойчан юриб кетди. Бироқ унинг қийналиб бораётгани майишиб юришидан сезилди. Тоҳир уни қувиб етди-ю:

— Амирзодам, этикни кийинг,— деди.— Яланг оёқликни хавас қила кўрманг. Худо сизни ҳеч вақт бу қўйларга солмасин.

— Қайси қўйларга?

— Яланг оёқларнинг аҳволига тушманг!

— Ажабо! Яланг оёқлар одам эмасдирларми?

— Одам. Лекин сиз шоҳ бўлиб туғилгансиз!

— У ҳолда — шоҳ одам эмасдирми?

Тоҳир жавоб тополмай қолди. У шоҳ билан навқар орасида тоғдай баланд девор борлигини билар, Бобур бу деворни бир сакраб ошиб ўтмоқчи бўлаётгани галати туюларди.

Тоҳирнинг назарида, Бобур қайта шоҳ бўлишдан умидини узгану тушкунликка учрагани учун шу гапларни айтяпти.

— Амирзодам, агар сиз шоҳликдан шоирликни афзал кўрсангиз, унда мен ҳам... аҳли аёлим билан тинч бир гўшада

¹ «Оламни мардлик ва зўрлик билан олдик, лекин ўзимиз билан бирга гўрга олиб кетмадик». Бобур 1502 йилда тошга ўйдирган бу сатрларни орадан 452 йил ўтгандан кейин 1954 йилда тожик олими А. Мухторов Оббурдон қишлоғидаги бир ҳудук ёнидан топиб олади. Тошга битилган бу шеър ҳозир Душанбада музейда сақланмоқда.

деҳқончилик қилиб, сизга садоқат билан умр ўтказган бўлур эдим... Лекин бунинг иложи бўлмас...

Бобур этигини Тоҳирнинг қўлидан олди.

— Сиз қайтишг, — деди Тоҳирга. — Аммо бу гаплар орамизда қолсин. Кейин яна кенгашурмиз. Боринг!

Тоҳир бароздан қайтиб чиқар экан, Бобурнинг унга ўзини яқин олиб шунча ғалати гаплар айтганидан кўнгли кўтарилиб кулиб қўйди. Бироқ Бобур бир гўшада тинчгина яшайдиган мискинтабнат одамлардан эмас эди. Унинг яланг оёқ юришга ўрғанмоқчи бўлгани эса, Тоҳирга шоврона бир шўхлик бўлиб кўринарди.

Тоҳир барознинг тепасига чиққанда оркасига ўгирилиб қаради. Бобур ҳамон этигини қўлига олиб, пастлаб бормоқда эди. Тоҳир унинг чидамига тап бериб: «Лекин сўзидан қайтмайдиган одати ҳам бор!» — деб қўйди.

Бобур оёғининг бир-икки жойи қавариб шилинганини сезса ҳам оғриғига чидаб, қишлоқнинг бериги четидаги чашма бўйигача сарпойчан борди. Ундан нарида юмшоқ тупроқли сўқмоқ бор эди. Лекин қишлоқ одамлари унинг яланг оёқ юрганини кўриб, пасту баланд гап қилишлари мумкин эди.

Унга уйини берган қишлоқнинг қадхудоси ҳам, бек ва мулозимлар ҳам «Мирзо ҳазратлари» деб, Бобурга ҳамиша таъзим қилишар эди. Агар Бобур камбағал деҳқонга ўхшаб сарпойчан юрса, булар оддий яланг оёққа таъзим қилгандай кўриниб, иззат-нафсга боришлари ва хафа бўлишлари мумкин эди. Шунинг учун Бобур аъёнлар учрайдиган жойлардан одатдагидай этик кийиб ўтар эди-ю, Даҳқатнинг атрофидаги ёнбағирларга боргач, яна яланг оёқ бўлиб оларди. Оёғига ботиб озор берадиган ғадир-будур тошлар, буталар дилини ўртаётган аламли ўйларнинг тафтини оладигандай бўлар эди. Кунлар ўтиши билан унинг товонлари сағри чармидай қалинлашиб, тош-пошлар, ёғин-сочинлар қор қилмайдиган бўлиб кетди.

* * *

Даҳқатдан уч-тўрт чақирим қуйида Қоразов деб аталадиган баланд жарлар тагидан одамни оқизадиган улкан Оқсув елиб ўтади. Бу сувнинг ўннга бурилиб, ёйилиб оқадиган сокинроқ бир жойида кечув бор.

Тоғ баридан қиялаб ўтган сўқмоқ билан арчалар орасидан юриб келаётган Бобур тушга яқин Оқсувнинг шу кечуви олдидан чиқди ва дарёдан ўтиб келаётган йигирматача қуроли отлиқларга рўнара келиб қолди. Олдинда пиёзи чакмон ва қизил бўрк кийган Қосимбек. Унга эргашиб келаётган навкарлар ҳам таниш.

Бобур уларга яланг оёқ юрганини кўрсатгиси келмади-ю,

йўлдан четланиб, баланд бир арчанинг соясига бориб ўтирди.

Лекин бу орада Қосимбек ҳам уни кўриб қолди. Кечувда қорнигача ҳўл бўлган отини Бобурдан анча нарида тўхтатиб, тез ерга тушди. Навкарлар ҳам Бобурни ҳурмат қилиб апил-тапил отдан тушдилар. Қосимбек отининг жиловини навқарига бериб, эгилиб таъзим қилган кўйича Бобурга яқинлашди. Му-сибатли товуш билан деди:

— Амирзодам, бир қошиқ қонимдан кечинг! Яна бир шум-хабар!..

Бобурнинг хаёли Тошкентга кетди. Қосимбек уч ойдан бери ўша ёқларда юрган эди. Бобурнинг тоғаси Маҳмудхон Шайбонийхоннинг элчиси шарафига зиёфатлар бериб юриб, ахири хон билан битим тузган эди. Бу битимга биноан Шайбонийхон ўратепани Маҳмудхонга бериб, ўзи Ҳисорга кўшин тортиб кетган эди. Пайтдан фойдаланган Маҳмудхон укаси Олачохон билан бирга Фарғона водийсидаги Аҳмад Танбалга қарши уруш очган эди. Улар водийни Аҳмад Танбалдан тортиб олиб, Тошкент хонлигига кўшмоқчи эдилар. Шайбонийхон аввал бу ниятга кўшилган эди. Наҳотки энди сўзидан қайтган бўлса?!

— Не бўлди? Сўзланг!

— Шайбонийхон манфурлик билан сўзидан қайтмишдир, амирзодам! Тоғалариңгиз Фарғона водийсида Аҳмад Танбал билан олти ой олишиб, уни еңғолмай, кўп талафотлар бериб, заифлашиб қолган пайтда Шайбонийхон битимни бузиб, кутилмаганда кетларидан бостириб келмишдир! Олдинда Аҳмад Танбал кўшини, кетларида ёлғон иттифоқчи Шайбонийхон кўшини! Тоғангиз бу икки балонинг орасида қолиб тор-мор бўлдилар! Шайбонийхон уни асир олмишдир.

Бобур жойида ўтиролмай ўрнидан туриб кетди.

— Ё алҳазар! Тошкент ҳам кетдими, а?

— Э, сўраманг, амирзодам! Тошкентда икки минг кўриқчи аскар бор эди. Олти ойга етгулик заҳира бор эди! Кўрғонни қаттиқ туриб ҳимоя қилса бўлур эди. Бироқ асир тушган Маҳмудхон беҳад уятлик бир иш қилмишдир. Шайбонийхон уни қатл эттирмоқчи бўлганда, Маҳмудхон: «Қонимдан кечинг, не талабингиз бўлса бажарай!»— деди. Шунда Шайбонийхон шарт кўюрки, Тошкентдаги кўриқчи аскарларингизга буйруқ ёзиб юборинг, токи кўрғонни жангсиз ташлаб чиқиб кетсинлар, аммо хазина билан ҳарам кўрғонда қолсин. Жон ширинлик қилиб, Маҳмудхон бу шартни қабул қилмишдир!

— Наҳотки бутун ҳарам Шайбонийлар илкига тушган бўлса?!

— Ҳа, амирзодам, ғолиблар кўриқчисиз Тошкентда уч кун элни таламишдир! Тоғойингиз Маҳмудхоннинг энг кўхлик синглиси Давлат бегим Шайбонийхоннинг ўғли Темур Султон

харамига учинчи хотин бўлиб кирмишдир. Эллик уч яшар Шайбонийхоннинг ўзи Маҳмудхоннинг ўн олти ёшлик гўзал қизи Мўғил хонимни никоҳлаб олмишдир! Маҳмудхоннинг суюкли хотини Розия султон бегим илгариги элчи Жонибек султонга гунчачи қилиб никоҳланмишдир! Бултур Хонзода бегим учун бизни шунчалар маломат қилган Маҳмудхон энди суюкли хотинини, қизини, синглисини ўз жони учун бунчалик шармандали ахволга солгани бутун эл-улуснинг нафратини келтирмишдир!

Бобурнинг хаёли Ойиша бегимга кетди. Ундан қўнгли қолиб, ажрашиб кетган бўлса ҳам, лекин бир вақтлар илк ёшлик меҳри билан суйган хотинининг Шайбонийхон харамига тушиши аҳтимоли уни даҳшатга келтирди. Опаси Хонзода бегимнинг Шайбонийхон харамига тушгани озми?

Бобур Қосимбекка даҳшат тўла кўзларини тикиб сўради:

— Наҳотки Ойиша бегим... Эгачим Хонзода бегимнинг кундошига айлантирилган бўлса?!

— Йўқ, амирзодам! Не тил била айтайки, Ойиша бегим хоннинг амакиси — эллик беш ёшли Кўчкинчихонга тўқол хотин қилиб никоҳланмишдир!

Бобур юзини қўллари орасига олиб нидо қилди:

— О, бу не разолат? Не шармандалик?!

Қора кўзларидан учқунлар сочиб Бобурга аччиқ гаплар айтган ўша Розия султон бегим бугун Жонибек султоннинг қучогида! Бу йўғон гавдали маккор бек Маҳмудхон саройида элчи бўлиб, хон билан шатранж ўйнаб, атайлаб ютқизиб юрган пайтларидаёқ унинг суюкли хотинини кўз остига олиб қўйган бўлса аҳтимоли. Ойиша бегим-чи?

Қосимбек армон тўла товуш билан сўзида давом эди:

— Кошки Маҳмудхон шунча уят ишлар қилиб тирик қолган бўлса!

— Тоғойим ўлдирилдими?!

— Шайбонийхон биринчи мартасида уни ўлдирмаган эди. Лекин ҳалиги шармандаликлар билан руҳан ўлдиргандан баттар қилиб Мовароуннаҳр чегарасидан шарққа — Олтой томонга қувиб юборган эди. Бундан алами келган Маҳмудхон ўша ёшларда ўзига тарафдорлар топиб, қўшин йиғиб Шайбонийхондан қасд олиш учун яна Сирдарё бўйига келади. Хўжанд яқинида иккинчи марта жанг бўлиб, Маҳмудхон яна енгиледи-ю, икки ёш ўғли билан асир тушади. Бу гал Шайбонийхон Маҳмудхоннинг ўзини ҳам, ёш ўғилларини ҳам аёвсиз қатл эттирмишдир!

— Ё алҳазар!.. Ё раб!..

Бир вақтлар Бобурга оқибатсизлик қилиб, алам ўтказган яқинларининг тақдир томонидан бунчалик шафқатсизларча

жазоланиши Бобурни қора бошириқдай эзиб, карахт қилиб қўйди. Бобур улардан ҳар қанча ранжиганда ҳам бундай оғир жазоларни уларнинг ҳеч бирига раво кўрмас эди.

Бобурнинг ранги қув ўчиб, юз мускуллари титраётганини кўрган Қосимбек шумхабар келтиргани учун яна бир марта уэр сўради. Бобурнинг сал тафтини оладиган чора қидириб:

— Амирзодам, қани, ўлтирсинлар, марҳумларнинг арвоҳига тиловат қилайлик,— деди.

Тиззалари бўшашиб, оёғида зўрга турган Бобур арча тагидаги бояги жойига қайтиб ўлтирди. Қосимбек унинг қаршисига тиз чўкди. Навкарлар ҳам бири-кетин чўнқайдилар. Қосимбек ширали, йўгон овоз билан қуръон сўраларини оҳангдор қилиб айтиб, узоқ тиловат қилди. Дарёдай бир зайлда оқадиган бу оҳанглар Бобурга дунёнинг бебақолигини, ўтиб турган ҳар бир дақиқа умр қайтиб келмайдиган неъмат эканини, ҳаётнинг ганиматлигини эслатди-ю, у ўзини сал босиб, яланг оёқларини тўнининг этаги билан бекитиб қўйди. Тиловат тугаб, юзларига фотиҳа тортганларидан сўнг Қосимбек навкарларга қўли билан нарироқ бориб туриш ишорасини қилди. Улар узоқлашгач, Бобурга янада яқинроқ келиб, паст овоз билан деди:

— Шайбонийзодалар бу ғалабалардан кутуриб, Андижонга кўз тикмишлар. Босқинчилар эрта-индин Ўратепага ҳам келурлар. Энди бу ерларда юриш хатарли, амирзодам. Тоғ ошиб, Ҳисорга кетмоқ керак.

Ҳисор ҳукмдори Хисравшоҳ тахтни Бобурнинг амакивачаси Байсунқур мирзодан тортиб олиб, бошқа бир темурийзодани тахтга даъвогар бўлмасин, деб, кўзига мил тортиб кўр қилган эди. Бобур шуни эслади-ю:

— Менинг қордан қочиб дўлга тутилишим не даркор, жаноб Қосимбек?— деди.

— Менинг мақсадим бошқа, амирзодам. Камина Ҳисор беклари билан бултурдан бери махфий музокара олиб бормоқдамен. Уларнинг кўпи Хисравшоҳдан норози экан. Ўзи бир навкардан чиққан таги паст ҳукмдор. Тахтга ўлтиришга ҳаққи йўқ. Борсак, яхши беклари сизга ён босгайлар.

— Яна тахт талашими? Йўқ, жаноб Қосимбек! Мен бу талашлардан жуда тўйдим! Ҳозир менга тинч бир гўша бўлса, дарвишона ҳаёт кечирсам, ашъор ёзсам — шу ўзи бас!..

Қосимбек боядан бери кўзини Бобурнинг яланг оёқларидан олиб қочмоқда эди. Шаҳзоданинг бундай юриши унга жуда эриш туюларди.

— Амирзодам, сиз бизнинг тақдиримизни ҳам ўйланг! Икки юз элликта содиқ одамларингиз — беклару мулозиму навкарларингиз сизга омад тилаб, аввалгидан ҳам қатта марта-

баларга етишингизга ишониб, тоғу тошда саргардон бўлиб юриши нечун?

Қосимбекнинг гапи тагида: «Чиндан дарвиш бўламен десаиз сизга бунча беку навкарларнинг не кераги бор? Нечун жавобини бермайсиз?»— деган маъно ётар эди.

— Сиз келтирган мудҳиш хабарлардан кўнглим вайрон бўлиб турган пайтда яна бир мушкул гапни кўзгадингиз, жаноб Қосимбек!

— Густоҳлигим учун мени кечиринг!

— Аммо сиз ҳақсиз. Мен сиздек содиқ кишиларимнинг тақдирини ҳам унутмаслигим керак. Ростини айтинг, жаноб Қосимбек, Хисравшоҳнинг ўзи ҳам сизни хизматга чорлаганми?

— Чорлаган. Икки қайта махсус одам юбормишдир.

Бобур Қосимбекнинг мардона юзига, қирк ёшга бормасдан оқ оралай бошлаган калта сокол-мўйловшга маънос бир назар ташлади.

— Сиздан маҳрум бўлиш мен учун беҳад мушкул!— деди.

— Отам ўлгандан бери менга отадек гамхўрлик қилдингиз. Мен сиздан кўрган садоқату яхшилигимни ҳали бошқа ҳеч қайси бекдан кўрган эмасмен!

— Сарафрозмен, амирзодам!

— Энди шу яхшиликларингиз ҳурмати, мен сизга жавоб берурмен. Майли, Ҳисорга боринг!

— Сизни тарк этиб кетишга кўнглим йўқ, амирзодам! Бирга кетайлик!

— Мен ўзим ҳам шоҳлик занжиридан бутунлай озод бўлишга интилмоқдамен, жаноб Қосимбек. Бу занжирнинг бир учи тобе одамларга боғланган бўлса, унинг иккинчи учи шоҳнинг ўзига боғланур экан! Шу сабаб, тобеларни занжирдан бўшатмагунча подшоҳнинг ўзи ҳам занжирбанд бўлур экан. Мен энди мана шу табиат бағрида занжирсиз яшашга қасд қилдим. Шунинг учун сизга жавоб! Бошқа беку мулозиму навкарлар ҳам вақт-соати билан жавоб олурлар!

Бобур Қосимбек билан хайрлашмоқчи бўлиб ўрнидан турди. Самарқандда суюкли опасидан, Тошкентда хотинидан айрилган, бугун эса шунча машъум хабарлар эшитиб, яна энг ишонган бекидан ҳам ажрашишга мажбур бўлаётган Бобур ўзини ҳар қанча тетик тутишга уринса ҳам тиззалари букилиб, гандираклаб кетди. Қосимбек уни қучоқлаб хайрлашар экан, кўзлари жиққа ёшга тўлди.

3

Бобур ўзига азоб берадиган оғир туйгуларни тоғлардан кўринадиган кенгликларга сочиб юбора олса ёки гўзал шеърый сатрларга жойлай олса бир қадар енгил тортади.

Не ерда сокин ўлай? Не қилай? Қаён кетайин?

Не дайрдин эшигим очилур, не масжиддин.

Неча эшиқдан эшикка гадо каби етайин?!

Куйиб-ёниб ёзган бу сатрлари қалбининг тафтини олар, дунёда унинг учун ҳамма эшиклар бекилганда ҳам бир муқаддас жопқа — шеърият қопкаси доим очиқ эканини ич-ичидан сезиб кўнгли кўтариларди. У ўз қалбида ҳали сарф этилмаган қудратли кучлар борлигини, опаси Хонзода бегим Бобур билан видолашган пайтида: «Сизнинг нодир истеъдодингиз бор, бу буюк неъматни ҳайф қилманг!» — деган сўзлари кўп эсига тушади. Кеча мана шу Оқсув бўйидаги бир қишлоқда тўй бўлган, шунда ёш бир хонанда сеҳрли товуш билан Бобурнинг «Кўнглимдан ўзга ёри вафодор топмадим» деб бошланадиган газалини ашула қилиб айтганини у ўзи кўчадан ўтаётиб эшитган эди. Ўша дақиқаларда унинг қалбидаги энг зўр куч жунбушга келиб, юзага чиқиш учун йўл ахтарган эди. Бу ички куч унга Даҳкатнинг кунчиқиш томонида уч минг газ баландликдаги Осмон Яйлов тоғининг учидан отилиб чиқиб турган мўъжизавий булоқни эслатди. Жилғалар бўйидан, тоғ ёнбағирларининг тагидан кўз очган булоқлар кўп. Лекин шундай юксак тоғнинг энг баланд бир нуқтасидан ёриб чиққан бундай ғалати чашмани Бобур биринчи марта шу ерда учратди.

Жанубда мангу қорга бурканган улуғвор Пирях чўққисен ялтираб турибди. Аммо у чўққи билан Осмон Яйлов тоғнинг орасида беҳад чуқур жилғалар, катта-катта баландликлар бор. Бу булоқнинг суви ўша чўққидан тушиб, яна Осмон Яйловга чиқиб келгунча икки орадаги чуқурликлардан ҳам теранроқ жойга тушиб, сўнг яна юксак тоққа кўтарилган бўлиши керак. Булоқ бунча кучни қаердан олганикин? Уни шунчалик баланд жойга чиқишга, шундай тошлар орасидан кўз очишга нима мажбур қилган экан? Эҳтимол, илгари унинг кўзи пастдаги тоғ камарларида бўлгандир? Балки булоқнинг устига тоғ кўчиб тушиб, аввалги кўзини бекитиб қўйгандир?

Бобурга бирдан ўз ҳаёти ҳам кўчки босган булоққа ўхшаб кўринди. Ахсида қулаган жар ҳам шу булоқнинг кўзига тушган. Кўчманчи султонларнинг Самарқанддаги ғалабаси ҳам... Ички бир куч билан қайнаб чиқаётган булоқ кўчкининг тупроқларини ювиб, тошлар орасидан йўл топиб ўта бошлаганда Мовароуннаҳрдаги ижтимоий зилзилалар зарбидан янги-янги жарлар қулайди, қоялар кўчади-да, яна шу булоқнинг кўзига тушади.

Булоқ ҳамон тугилган заминининг бошқа жойларига бош уриб, ёруғ дунёга олиб чиқадиган янги йўллар излайди.

Агар Осмон Яйлов булоғи тошлар орасидан йўл топиб, мана шундай баланд қояни ёриб чиққан бўлса, Бобур умидсизланмаслиги керак. Эҳтимол, унинг толеи ҳам мана шу булоққа ўхшаб, баланд бир нуқтадан қайта кўз очар. Балки бу баланд нуқта шеърятдадир?

Бир кун пешин кечроқ Бобур Осмон Яйлов булоғи бўйида мана шу хаёлларга ғарқ бўлиб ёлғиз ўтирганда, катта-катта иккита бўрибосар итни эргаштириб бир чўпон йигит келиб қолди. Оёғида чориқ, бошида қизил ҳошияли оқ қалпоқ, белига катта пичоқ осиб олган, қўлида қизил ирғай таёқ. У тош устида ўтирган Бобурга салом берди-ю, итларни орқароқда қолдириб, ўзи булоқдан кафти билан сув ичди. Кейин ҳўл қўлларини қалами яктағининг қўлтиқларига арта туриб, Бобурга гал қотди:

— Ҳа, жўра, пошшонг зикналик қилдими, тоққа яланг оёқ чиқибсен?

Чўпон «сен-сен»лаб гапиргани Бобурнинг қулоғини тирнаб ўтгандай бўлди. Аммо ўзини босиқ тутиб:

— Қайси подшоҳим?— деб сўради.

— Бобур деган бир пошшо Даҳқатда юрган эмиш. Сен ўшанинг одамлариданмисен?

Бобур эски кийимларини кийиб чиққан, ўзи тоғ офтобида куйиб қорайган, аммо унинг юзида, қўлларида аслзодаларга хос бир назокат борлиги билиниб турарди. Чўпон уни подшоҳнинг мулозимларидан деб ўйламоқда эди. Бобур ўзини танитгиси келмай:

— Ҳа,— деди.

Чўпон ирғай таёғига кенг кўкрагини тираб, Бобурга синовчан назар билан тикилди:

— Пошшонгга жуда содиқмисен?

Бобур мийиғида кулиб:

— Мен ўзимга содиқ бўлсам бас,— деди.

— Пошшонг ҳам сени ёмон кўрса керак-да, хор қилиб кўйибди.

Энди Бобур чўпоннинг юзига тикилиб қаради. Бетига хали устара тегмаган йигирма ёшлардаги йигит. Лекин чуқур кўзлари қирқ-эллик ёшга кирган ва кўп гам чеккан одамникидай сўлғин, кексанамо.

— Подшоҳимни мунча кўп сўроқладинг, бирон арзинг борми?— деди Бобур кулимсираб.

Чўпон қовоқларини уйиб:

— Мен уни мана шу тоғда яккама-якка учратмоқчимен,— деди.

— Агар учратсанг... Не ганинг бор?

Чўпон йигитнинг кўзлари ғазаб билан қисилди:

— Отам билан акамнинг бошини не қилган, шуни сўраб билмоқчимен.

— Бошини? Бобур-а?! Сен... сен кимсан ўзинг?

— Чагракларданмен!

Бобур Андижон тоғларида яшайдиган чорвадор туркий қабила — чагракларни эслаб хайрат билан сўради:

— Бу ерда ҳам чаграклар борми?

— Биз бу ерга Ўш томонлардан қочиб келганмиз. Мен ўшанда ўн тўрт яшар бола эдим. Бобур келиб отам билан акамнинг кўйларини, йилқиларини тортиб олмоқчи бўлган. Чўпонлар: «Бермаймиз!» деб ғалаён қилган. Кейин Бобур хаммасини ўлдириб, бошларини кесиб кетган. Онам билан борсак, ўн беш-йигирмата ўлик ётибди. Бошлари йўқ. Танасидан таниб олиш қийин бўларкан. Онам дам у танани кучоқлаб йиғлайди, дам бу танани...

Бобур Ўшнинг жанубида бундан олти йил аввал Аҳмад Танбалнинг қонли хуржунидан лолақизғалдоқлар устига юмалаб тушган каллаларни яна кўз олдига келтирди. Ўшанда уни сескантириб юборган ёшгина йигитнинг калласи ва устара тегмаган юзи кўз олдига қайтадан гавдаланди. Мана бу турган чўпоннинг юзи Бобурга бирдан ўша юзни эслатди-ю, кесик бўйинининг қон аралаш гўштлари хаёлида такрор пайдо бўлиб, борлигини даҳшатга келтирди. У чўпонга саросима кўзлар билан қараб:

— Аҳмад Танбал ўлдирган!— деди.— Султон Аҳмад Танбал!

Чўпон таёғини кўкрагидан олиб, Бобурга яқинроқ келди:

— Сен ўша бошларни кўрганмидинг?

— Ҳа, яйловда... Ўшнинг яйловида Аҳмад Танбал ўша бошларни келтириб кўрсатган. Бунга олти йил бўлди... Чўпонлар ғулу кўтариб, навкарлардан уч-тўрттасини ўлдирмишлар. Танбал ўшанинг қасдига бош кесиб келган эди!

— Танбал эмас! Менга кўрган одамлар айтган! Отамнинг бошини Бобур кесиб кетган!

— Одамлар ёлғон айтмишлар! Мен... аниқ биламен. Бобур норасида ўсмир эди. Тоққа Султон Аҳмад Танбал борган!

Бобур ўзини оқлаётган одамга ўхшаб шошилиб гапирётгани учун чўпон йигит энди ундан гумонсиради. Зуғум қилиб:

— Сен ўзинг кимсен?— деди.— Бобур сенинг киминг?

Бу савол Бобурнинг этини жунжиктирди. Гўё чўпон ҳозир ундан отасининг хунини талаб қиладигандек туюлди.

Эгасининг овозидаги ғазаб ва таҳдидни пайқаган итлар бирдан приллаб, Бобурга ташланишга тайёрланишди. Бобур ўрнидан сапчиб турди. Қўли беихтиёр белидаги халжарнинг сояга борди.

Лекин унинг оёқлари яланг эди. Итлар энг аввал унинг оёғидан оладигандай кўринди. Шу пайт у ўзининг яланг оёқ юрганидан қаттиқ пушаймон бўлди.

— Нега индамайсен?— деди чўпон яна таҳдид билан.

Бобур ўзини иложи борича вазмин тутиб:

— Не дейин? Гапимга ишонмасанг!— деди.

Чўпон итларига ўгирилиб:

— Тўрткўз, Бўйноқ, ётинлар!— деди. Сўнг яна Бобурга юзланди:— Хўш, гапинг чин бўлса, менинг отамни Бобурнинг ўзи эмас, Танбал деган беки ўлдирган. Шундайми?

— Шуидок.

— Ўша бекка ким фармон берган? Бобурми?

— Бобур бундай бўлишини билмаган... Ёшлик қилган!

— Яна пошшонинг тарафини оласан-а! Агар мен ҳозир мана бу итларимга «ол»!— десам, сени тилка-пора қилиб ташлагай. Шунда фақат итлар айбдор бўлмайми? Буларни олқишлаганим учун мен гуноҳкор бўлмасменми?

Бобур чўпоннинг бу гапига эътироз қилиб бўлмаслигини сизди-ю, бошини қуйи солди:

— Балки сен ҳақлидирсен...

— Кимсен ўзинг? Айт ростини!

Чўпоннинг овозидаги таҳдидни сезишиб, итлар яна прилашди. Бобур кўрққанини сезса, итлар унга ташланадиганга ўхшарди. У бор кучини гўё кўзларига йиғиб, чўпонга тик қаради-ю, дадил туриб:

— Мен Бобурмен!— деди.

Чўпон қулоқларига ишонмай, унинг яланг оёқларига яна бир қаради:

— Наҳотки подшоҳ Бобур сен бўлсанг?!

— Ҳа, мен подшоҳ эдим!

— Ҳозир-чи?

— Ҳозир... тожу тахт даввосидан воз кечдим. Энди фақат шоирона ҳаёт кечирмоқчимен.

— Шошма, шошма!

Оқсув бўйида бўлган кечаги тўйда чўпон ҳам бор эди. У хушовоз ёш ҳофизнинг Бобур ғазали билан айтган ашуласини тинглаб ғалати бўлиб кетган эди. Ашула охирида:

Бобур, ўзунгни ўргата кўр ёрсизки, мен

Истаб жаҳонни, мунча қилиб ёр топмадим!—

деган сатрлар унинг эсида қолган эди.

Ҳозир Бобур бир ўзи тоғу тошда ёлғиз юргани ҳам унинг ўша байтини тасдиқлаган кўринди-ю, чўпон итларига қараб:

— Ёт! Бўйноқ, ёт!— деб буюрди. Итлар тинчлангач, яна Бобурга кўз тикиб сўради:

— Шоирлигинг рост бўлса, шу ерда ёзган шеърларингдан бирини айт-чи?

Бобур ерга қараб ўйланиб олди-да, бошини кўтарди.

— Эшит:

Не хеш мени хушлару не бегона,
Не ғайр ризо менину не жойона.
Хар иechaки яхшиликда қилсам афсун,
Халқ ичра ёмонлик била мен афсона.

Ички туғён билан ўртаниб айтилган бу сатрларнинг тафти чўпоннинг бирдан ялтираб кетган кўзларида акс этди.

— Сен ҳам куйганлардан экансен, шоирлигингга тая бердим! Аган шу шоирлигинг бўлмаса, сени раҳматлик отамнинг қасдига итларимга талатиб юборар эдим! Хайр, шоир, омон бўл!

Чўпон итларини эргаштирганича чағатда ёйилиб юрган кўйларига қараб кетди.

Бобур шу кунни Осмон Яйловдан Даҳкатга қандай тушиб келганини билмайди. У машъум ўтмишидан осонликча қочиб қутулолмаслигини, ёмон беклар Бобурнинг номидан қилган зolimликларни одамлар ундан кўришини ўйлаб, вужудини янги бир безовталиқ чулғаб олди. Ёшликда бекларнинг раъйига қараб қилган хатолари бояги иккита ваҳимали итнинг қиёфасига кириб, ҳали ҳам кетидан қувиб келаётганга ўхшарди.

Даҳкатда эса уни яна бир таҳликали хабар кутиб турарди. Шайбонийхон қўшинлари Ўратенага етиб келган, шаҳарга бозор қилиш учун борган даҳкатлик кудхудони хон кишилари тутиб олиб калтаклашган.

— Бобур яшириниб юрган жойини кўрсатасан!— деб талаб қилишган эди. Юзлари қамчи изидан қонталаш бўлиб шишиб кетган эллик ёшлардаги кадхудо тожикчалаб:

— Мен меҳмонимни тутиб берадиган аблаҳ эмас!— деди Бобурга.— Ёвларингизни Оқтанги деган дарага бошлаб бориб, адаштириб, ўзим тоғма-тоғ қочиб келдим!

Оқтанги Даҳкатдан ўттиз чақиримча ғарбда эди. Хоннинг искабтопарлари бугун бўлмаса, эртага бу ерларга етиб келиши муқаррар. Шайбонийхон Бобурнинг бошини кесиб келганларга катта олтин ваъда қилган.

Ички ҳовлидан Қутлуғ Нигор хоним чиқди:

— Бобуржон, ҳаммамиз нажотни сиздан кутмоқдамиз! Дарвишона юришларни энди бас қилинг. Ҳамма сизни қувгиндаги шoҳ деб билур, бошқа гапга ҳеч ким ишонмагай. Хон кишилари ҳам сизни тахтга даъво қилиши мумкин бўлган бир шахзода деб излаб юрурлар. Даҳкатликлар ҳам шунча

вақт бизга нону туз бердилар. Энди бу қишлоқни хавф-хатардан қутқариш ҳам сизнинг бурчингиздир, жоним!

Бобур агар ёв билан бу ерда тўкнашса, қишлоқ оёқости бўлишини ўйлади. Бу ерда у билан бирга юрган онасини, бек ва навкарларини ёвдан омон сақлаш учун ҳам. Ўзи бояги чўпонга ўхшаш қасоскорларнинг тасодифий қурбони бўлиб кетмаслиги учун, даҳқатлик кадхудонинг тузини оқлаш учун ҳам Бобур яна қайтадан қурол-яроғ тақишга ва одамларига бошчилик қилишга мажбур эканини, ҳозир шундан бошқа иложи йўқлигини ҳис қилди-ю, оғир «ух» тортди:

— Шохлик тақдиримдан яланг оёқ қочиб қутулолмас эканмен! Жаноб Шеримбек! Сиз энди Қосимбекнинг ўрнида амирал умаросиз!

Бобурни ўн икки ёшида Олатоғ томонларга олиб қочиб кетиб қутқармоқчи бўлган кекса Шеримбек тоғойи қувониб таъзим қилди:

— Иноятингиздан сарафрозмен, амирзодам! — деди. — Буюринг!

— Одамларимизнинг барчасига амримизни етказинг. Кўч-кўронни йиғиштирсинлар! Шу бугун кечаси Даҳқатдан жўнаб кетгаймиз!

— Муборақ буйруғингиз алҳол адо этилур, амирзодам!

Яна зирҳли кийимлар кийган, қурол-яроғ таққан Бобур ўша кеча тоғдан-тоғқа ошиб кун чиқиш томонга — Исфарага қараб кетди.

4

Пастда Исфарасой тошларга бош уриб шовуллайди. Баланд бир қоятош устида ўтирган Бобур узоқларда — Хўжанддан наридаги Мўғултов устига сояси тўшалиб ётган оқиш булутларга қарайди. Ортидаги қорли тоғлардан совуқ шамол эсади. Водийлар эса ям-яшил баҳор либосини кийган.

Уфқнинг ҳарир пардаси ортида — кўз илғамас узоқликларда Чотқол тоғларию Тошкент воҳаси бор. Жиззах ва Самарқандни, Марғилон ва Андижонни Бобур ҳозир гўё хаёл кўзи билан кўрди-ю, бир вақтлар шундай кенг дунёда бежавотир, эркин юрган пайтларини эслаб, юрагини армон тимдалади.

Ҳозир мана шу улкан ватанда унинг осуда яшайдиган макони, тайинли бир уйи йўқ. Ҳаммаси Танбал билан Шайбонийхоннинг қўлига ўтиб кетган. Эшик ога Шерим тоғойи Бобурни Хуросонга кетишга ундайди.

Бироқ Бобур кетса ватанидан умрбод айрилиши мумкин-

лигини гўё олдиндан сезади. Илгари туғилган юртида бемалол юрганда унчалик билинмайдиган ватан туйғуси энди ватанидан айрилиш хавфи туғилганда унинг бутун вужудини қамраб олган. У мана шу ўлкани неча қайта у четидан-бу четигача кезиб чиққан, унинг ҳар бир чақиримига кўз нурини тўкиб, ёшлигини уруғдай сочиб ўтган. Унинг бутун умри, бутун борлиғи мана шу муаззам заминга илдиз отган. Энди бу илдизларнинг ҳаммасини қандай юлиб олиб кетади? Бунинг оғриғига қандай чидаш мумкин?

Аҳмад Танбал билан Шайбонийхон аввал бир-бири билан иттифоқ тузиб, ҳозир бир-бирининг пайини қирқишга тушган. Шу кунларда улар жанг қилаётганини Бобур аниқ билди. Зора бу иккаласи бир-бирининг бошини еса-ю, Бобурнинг бекилган йўллари очилса...

Бобур шу умид билан Андижон томонга махсус одамлар юборган. У эртаю кеч шу одамларнинг хушхабар билан қайтишини кутади.

Лекин юборилган одамлар бир ярим ойдан бери қайтмаяпти. Нима бўлдикин? Кутиш оғир. Кунлар бениҳоя секин ўтади. Бобур нима қилишини билмай тоғ ёнларини ёлғиз кезгани кезган. Тадбиркор Қосимбек кетиб қолмаганда балки ундан яхши бир маслаҳат чиқармиди? Жонкуяр сафдоши Нуён Кўкалдош ҳам йўқ — бултур Тошкентнинг жанубидаги Оҳангаронда бир номард уни баланд жардан ташлаб ўлдирган. Бир-биридан машъум хотиралар Бобурнинг хаёлида муттасил чарх уради. У интиҳосиз ғам-ғуссалар қуршовидан чиқиб кетишга интилиб, хаёлида шеър машқ қилиб кўрди. Аммо уни бу қўйларга солган даҳшатли воқеаларни қофияга солиб, оҳангдор қилиб айтишга ҳуши келмади.

* * *

Кечки пайт тоғларга туман тушди. Арчазор ёнида хаёл суриб юрган Бобур пастдаги водий йўлларини ҳам туман тўсиб қўйганини кўрди-ю, сой бўйига келди.

Қуюқ туман дунёни алланечук тор ва совуқ қилиб қўйди. Исфарасойнинг юқори-пастлари ҳам кўздан йўқолди. Тезоқар тоғ дарёчасининг қаёқдан келиб, қаёққа кетаётгани энди фақат унинг тошларга урилиб шовуллашидан билинар эди, холос.

Бобурнинг ҳозирги қароргоҳи мана шу сойнинг яқинида — кенг бир сайхонликда эди. Баландроқ бир жойда унинг қизил мовут чодирни бор. Чодирнинг ўнг ёнида Кутлуғ Нигор хонимнинг саккиз бурчакли оқ ўтовни туринти. Қолган йигир-

ма-ўттизта ўтов ва чодирлар уларнинг нари-берисига ўрна-тилган. Совуқ туман ичида чодир ва ўтовлар гўё бир-бирларидан узоқлашиб кетгандай ва ҳаммасини моғор босаётгандай кўринарди.

Бобур йўлида учраган одамларнинг таъзимларига индамай бош ирғаб ўтди-ю, Мамадали китобдорнинг ўтови томонга бурилди. Бу ерда Бобур доим ўз кўчи билан бирга олиб юрадиган китоблари сақланар эди. Беш-олти туяга юк бўладиган нодир китоблар қалин чарм қопланган махсус сандиқ ва қутиларга ёгин-сочини ўтмайдиган қилиб жойланган эди. Кексайиб қолган бўлса ҳам ҳамма сафарларда Бобур билан бирга юрадиган захил юзли эллик беш яшар Мамадали китобдор китобларни худди чақалоғини авайлайдиган онадай авайлаб асрар эди. У Бобурга таъзим қилиб:

— Буюринг, амирзодам!— деди.

Бобур тарихий китоблардан бир-иккитасининг номини айтди.

Мамадали китобдор китобларга қўл уришдан олдин қўлини яхшилаб ювадиган одати бор эди.

— Сиз мунтазир бўлманг, қулингиз элтурмен!

Бобур ўтовдан чиқиб ўз чодирига кирди. Орадан анча вақт ўтганидан кейин Мамадали китобдор айтилган китобларни ипак матога ўраган ҳолда икки қўллаб кўтариб кирди-ю, тўрдаги миз устига секин қўйиб, орқаси билан юриб чиқиб кетди.

Бобур машҳур саркардалар ва шоҳларнинг ҳаётлари ҳақидаги тарихий китобларни варақлар экан, мураккаб жумлалар, жимжимадор ўхшатишлар, афсона ва ривоятлар орасидан чинакам бўлган ва одамни ишонтирадиган воқеаларни изларди. Лекин кўнчилик китобларда нуқул ғалабалар дабдабали услуб билан қуйланарди.

Эҳтимол, ҳозир Шайбонийхон ҳақида ҳам мана шундай дабдабали китоблар ёзилаётгандир. Бобур Биноийнинг яна Шайбонийхон томонига ўтиб кетганидан, Муҳаммад Солиҳ эса «Шайбонийнома» деган шеърый китоб ёзаётганидан хабардор эди. Улар Шайбонийхоннинг Бобур билан олишганларини қандай ёзишаркин? Мана бу китоблардаги каби ғолибни кўкларга кўтариб, мақташса, Бобурга бўлмаган айбларни тақиб, уни ёмонлашса, кейин одамлар ҳақиқатни қаердан билади?

Бобур нуқул зафар тантаналарини қуйлаган жангномаларни бир четга суриб қўйди. Сўнг ўрнидан туриб, ўзининг «Вақоийъ» деб аталган хотира дафтарларини сандиқдан олди.

Қизиқ: сўнгги дафтарга Бобур ўзининг Самарқандни Шайбонийхондан қандай тортиб олганини ёзгану кейин унга

кўл урмаган эди. Демак, кейинги мағлубият ва саргардонликларни унинг ўзи ҳам ёзишни истамаган экан! Аммо булар дафтарга ёзилмагани билан Бобурнинг хотирасида муттасил такрорланиб юрибди-ку. «Иситмани яширсанг, ичга урар», дейдилар. Бобур қилган хатоларини дафтаридан яширгани билан улар ҳар куни неча қайта янги-янги тафсилотлари билан хаёлидан ўтиб, қалб ярасини тирнагани тирнаган. Бундан кўра ҳамма воқеаларни ростғўйлик билан мана бу дафтарга ёзса, балки ўшанда иситма ташига чиқиб, дили хиёл ситқилашар?

Бобур дафтарига Сарипулда қандай мағлуб бўлганини, кейин қандай хўрликлар кўрганини ёза бошлади.

У бу ишни гўё ўзи учун, ўз виждони олдида ҳисоб бергиси келиб қиларди. Шунинг учун боя ўқиган китобларидаги жимжимадор, баландпарвоз услуб бу ёзувларга мутлақо ярашмаслигини сезарди. У бошидан кечирган ҳодисаларини энг ишонган сирдошига айтиб дардлашаётган одамга ўхшаб ёзарди. Фақат унинг эндиги сирдоши — ўзию мана шу дафтари эди. Кўшиқ бўлиб кетган ғазалида «Кўнглимдан ўзга маҳрами асрор топмадим» деган Бобур энди ўзининг мана шу эътиқодига амал қилиб, гўё ўзига-ўзи роз айтар эди.

У чагракларга қарши чопқин бўлганини ҳам, Аҳмад Танбалга ишғом қилган қиличи ахири ўз бошига келиб тушганини ҳам, ҳатто ялангоёқ юрганидан оёқлари тоғу тошни сезмайдиган бўлиб кетганини ҳам содда, равон, ҳақғўй тил билан ёзгани сари қалбини шеър ёзгандаги каби жўшқин бир илҳом чулғаб олди.

Шоҳлик тақдиридан қочиб қутулмадими, энди бунинг ҳамма даҳшатларини очикчасига ёзади! Бобур билган тождорларнинг ҳеч бири ўзининг бошидан кечирганларини рўйи-рост айтиб берган эмас. Лекин одамлар доим ҳақиқатни билишга ташна. Бобур мана шу ташналикни озгина бўлса ҳам қондира олса унга берилган истеъдод бекор кетмайди, бошига тушган машаққатлар эса бошқаларга сабоқ бўлиши мумкин. Унинг подшоҳ бўлиб кўрган-кечирганлари ҳаққоний китобга айланса, қилич билан мулк ололмаган Бобур балки қалам билан кишиларнинг қалбини забт эта олар? Бу ҳам бир бахт эмасми?

Шу ўйлар билан хотира ёзишга берилиб кетиб, қоронғи туша бошлаганини ҳам сезмади. Савдарлар олтин қандилдаги шамларни ёқдилар. Бобурга кечки овқат келтирдилар. У ёлғиз ўтириб овқатланди. Хотира ёзганда унга ўз ҳаёти аввалгидан илиқроқ ва маънолироқ туюлган эди. Бекор ўтирганда эса яна ўша оғир ўйлар, совуқ пушаймонлар хаёлига

босиб кела бошлади. Бобур улардан тезроқ қутулгиси келиб, яна қаламини қўлига олди.

Кейин ярим тунгача дафтарида бош кўтармай сўнгги йилнинг воқеаларини ёзди.

* * *

Атрофдаги ўтовлар жим, ҳамма уйқуда.

Тун сукуватида отнинг душури, итларнинг хуриши эшитилди. Қароргоҳнинг четига қўйилган қоровул зарда қилиб:

— Тўхта! Кимсен?— деди.— Ўронни¹ айт!

— Ўрон — Андижон.

Қоровулнинг овози юмшади:

— Андижон бўлса келавер. Овозингдан Тоҳир чопуққа ўхшайсенми?

— Ҳа, Тоҳирмен.

— Бемаҳалда ёлғиз юрибсен?

— Мени гапга тутма. Мирзо ҳазратларига шошилиш хабар келтирдим.

Тоҳир қоронғида Бобурнинг чодирини тусмолаб топди-ю, отини берирокдаги қозиққа боғлади. У аввал соқчиларни ёки мулозимларни уйғотмоқчи бўлиб, чодирнинг рўнарасидаги ўтовга қараб ўта бошлади. Шунда чодирнинг ичи ёруғ эканини, эшик ўрнига тутилган парда очилиб, Бобур чиқиб келганини кўрди. Тоҳир Бобурнинг қаршисига келиб юқунди. Паст товуш билан:

— Амирзодам, мунтазир қилганим учун афв этинг,— деди.— Ёғийларингизнинг уруши энди тугади.

Бобур сабрсизланиб сўради:

— Хушxabар борми? Нечун ёлғиз қайтдингиз?

Тоҳир бошини қуйи солиб, хазин товуш билан деди:

— Бир қошиқ қонимдан кечинг, амирзодам!..

Бобур совуқ хабарлар изғиринини олдиндан сезгандай эти увушди:

— Қани, ичкари киринг.

Савдарлар ухлаб қолган. Бобур ҳеч кимни уйғотгиси келмади. Баланд, кенг чодирнинг тўрида тўрт-бешта шам липллаб ёниб турибди.

Бобур шам ёруғида Тоҳирга энди зехн солиб қаради. Чакмонининг этакларига лой сачраган. Озиб кетганидан елкалари пучайиб қолган, кўзлари ичига ўпирилиб тушган. Юзи-

¹ Ўрон — пароль.

даш чандиғи эса бўртиб, гуё аввалгидан хийла катта бўлиб кетган. Лаблари пирпираб, ўпкаси тўлиб гапирди:

— Амирзодам, Андижон ҳам Шайбонийхоннинг илкига ўтди. Беҳисоб кўп одам қирилди. Ҳамроҳим қирғинда ҳалок бўлди.

Тоҳир шунчалик чарчаган эдики, гавдаси чайқалиб, оёқ устида зўрга турар эди. Сўнгги умидидан ҳам айрилиб бўшаган Бобур кўрпача устига ўтиб ўтирди-ю, Тоҳирни ҳам ўтиришга таклиф қилди.

Тоҳир гилам устига чўккалаб ўтиргач, Бобур ундан воқеанинг тафсилотини ва Аҳмад Танбал нима бўлганини сўради.

Тоҳир Андижон яқинидаги Хўжа Катта деган қишлоқда бой бир одамга аравакаш бўлиб ёлланган, ўзининг кимлигини билдирмай бутун ҳодисаларни одамлардан сўраб билган, бойнинг шаҳардаги дўконига мол олиб борганда кўп нарсани ўзи ҳам кўрган эди.

Аҳмад Танбал Андижон этагида бўлган жангда шикаст егандан кейин қўрғонга кириб бекинади. Қамал бошланади. Қўрғон ичида очлик, касаллик ва нифоқ кучаяди. Бир вақтлар Самарқандда Бобурни ташлаб, Аҳмад Танбалга эргашиб қочган бек ва навкарлар энди унинг ўзини ташлаб, Шайбонийхон томонига қочиб ўтадилар. Хоннинг қўшини деворга шоти қўйиб чиқиб, қўрғонни босиб олади. Аҳмад Танбал акаси Бек Гилба, укалари ва бошқа одамлари билан аркка кириб бекинишади. Бироқ аркнинг атрофида уйлар кўп, уларга орқадан шоти қўйиб томига чиқиш осон. Аҳмад Танбал аркда жон сақлаётмаслигини сезади-ю, Шайбонийхондан шафқат сўрашга қарор беради. «Йиққан барча олтинларимни ҳазрати хонга молли амон тариқасида тўламоқчимен, умр-бод хизматларида бўлмоқчимен, қонимдан кечсинлар!» деб аркдан бир мўйсафидини вакил қилиб чиқаради. Аммо мўйсафид аркка қайтиб келмай йўқ бўлади. Хон аскарлари аркнинг томлари устига шоти қўйиб чиқа бошлайдилар. Талва-сага тушган Аҳмад Танбал ака-укалари билан бирга аркнинг дарвозахонасига боради. Таслим бўлганларини кўрсатиш учун қиличларини бўйинларига осиб, дарвозадан ташқарига шафқат сўраб чиқадилар.

Арк дарвозаси олдида Шайбонийхоннинг ўғли Темур Султон турган экан. Навкарларига: «Асир олма, арзимайди, қир ҳаммасини!» — деб буйруқ беради. Аҳмад Танбални ака-укаларига қўшиб, қилич билан чошиб, бурдалаб ташлайдилар. Кейин бошларини кесиб бир қопга тикадилару Шайбонийхонга кўрсатгани олиб кетадилар.

Тоҳирнинг ҳикояси шу ерга келганда Бобур:

— Ё худое тавба! — деб беихтиёр ёқасини ушлади.

Сўнги пайтларда Бобурни эзиб юрган жавобсиз саволлардан бирига ҳозир гўё момақалдироқдай ваҳимали жавоб келган эди. Хўжа Абдулладай мард, фидокор одамни қўрғон дарвозасига осиб ўлдирган Аҳмад Танбалнинг ўзи энди ўша қўрғондаги арк дарвозаси олдида итдай хор бўлиб ўлган эди! Бобур инъом қилган қилични унинг бошига разилона урган Танбал энди бошқа қиличлар зарбидан бурдаланган эди!

Тоғдаги чаграқларнинг бошини ваҳшийларча кесиб, хуржунга солиб келган Танбалнинг ўз бошини янада ваҳшийроқ бир тарзда кесиб, қонга солиб кетган бўлсалар, уни, албатта хонга элтиб кўрсатганлар.

Бобур қондан Шайбонийхоннинг оёғи тагига юмалаб тушган таниш каллаларни кўз олдига келтирди. Маҳмудхонда эшик оға бўлиб юрган Тилба Султоннинг йўғон бўйинли семиз бошини Шайбонийхон таниган бўлса керак. Аммо хон Аҳмад Танбалнинг калласини танимайди. Шайбонийхон ўзини шунча овора қилган Аҳмад Танбалнинг башарасини кўриб қўйгиси келади, аммо юзтубан тушган қонли каллага қўл ургиси келмайди. Аҳмад Танбалнинг қонли калласини оёғининг учи билан юмалатиб ўнглаб, сийрак соқолига, суяғи бўртган кенг юзига қарайди.

Бобур ўзича тасаввур этган бу ҳодисадан ақли шошиб: — Оббо! Оббо! — деб бир неча марта такрорлаб қўйди.

Бу ҳодисаларда қандайдир ўзгача бир адолат борлигини сезган Бобур бошқа воқеаларни ақлига сиғдиролмай лол бўлиб қолди. Шайбонийхон бераҳмлиқда Аҳмад Танбалдан ҳам ўтиб тушган-ку. Наҳотки фалак интиқом қиличини шундай шафқатсиз хоннинг қўлига бериб қўйса? Бир вақтлар Бобур орзу қилган, аммо етишолмаган улкан мақсадга — Мовароуннаҳрдаги пароканда вилоятларни бирлаштириб, ягона кучли давлат барпо этиш мақсадига — энди Шайбонийхон етишмоқдами? Наҳотки бунинг учун Шайбонийхондай маккор, зolim ва шафқатсиз бўлиш керак эди? Тоҳир Андижонда хоннинг буйруғи билан бўлган қирғиннинг тафсилотини айтиб берганда Бобурнинг сочлари тикка бўлиб кетди. Мингларча аёллар, ўсмирлар, чоллар Аҳмад Танбалнинг одамлари қаторида бекордан-бекорга нобуд қилинган эди. Наҳотки ҳозирги зўрлар замонасида енгиб чиқиш учун Шайбонийхондай зўравонликлар қилиш шарт бўлса?!

Бобур маърифатли шоҳ бўлишга уриниб, шеър улашга кўп вақт бериб, инсофу диёнатни ўйлаб, наҳотки шу туйфайли Шайбонийхонга ютқизган бўлса?!

— Амирзодам, хон кишилари сизни сўроқлаб юрганларини эшитдим. Айғоқчилари ҳид олиб Исфарага келиб қоясалар ҳам ажаб эмас!

Бобур ота юртидан батамом ажралганини энди астойдил ҳис қилди. Аҳмад Танбалнинг мағлубияти булоқнинг кўзига тушган янги бир кўчки эди. Тоғнинг бу томонида булоқ қайтадан кўз очиши мумкин бўлган йўлларнинг ҳаммаси бекилди. Агар Бобур тезроқ тоғ ошиб Хуросонга кетмаса, Шайбоний-хон айланиб ўтиб, унинг сўнгги йўлини ҳам бекитади!

Бобур изтироб ичида Тоҳирнинг оддий бир навкар эканлигини ҳам унутди-ю, унга ҳасрат қилиб гапирди:

— Хонумондан айрилганимиз озмиди? Энди ватандин ҳам жудо бўлурмизми?!

Бобурнинг кўзи ёшланганини кўрган Тоҳирнинг ҳам кўнгли бузилиб, лаблари пирпиради:

— Амирзодам, мусофирлик ғами менинг ҳам юрак-бағримни ўртайди. Бизнинг Қувалар ҳам хоннинг пошнаси тагида мажақланди. Агар борсам мендан Фозил тархоннинг қасдини олишлари аниқ. Биз ҳам киндик қони томган жойдан айрилдик, амирзодам. Мусофирлик тақдиримизда бор экан. Исфарада ҳам мусофирмиз. Ҳисорга борсак ҳам, ундан нарига кетсак ҳам шу мусофирлик... Йўлда келаётиб ўйлашиб келдим. Мен сиздан ажралмайман, амирзодам!

Тоҳир бутун нажотни одил подшоҳдан излайдиган дех-конттабиат йигит эканини Бобур биларди.

— Лекин мен сиз кутгандек одил подшоҳ бўлолмадим!— деди Бобур.— Келгусида бўламенми, йўқми, ҳали номаълум...

Орага бир лаҳза сукунат чўмди. Ташқарида Исфарасой гўё тун сукунатидан фигони чиқиб шовуллар эди.

Чодир ичида қувғиндаги шоҳ билан унинг оддий навқари юзма-юз ўлтирибди. Ватандан ажралош мусибати олдида уларнинг ораларидаги катта фарқ гўё кичрайиб, аҳамиятсиз бўлиб қолган. Бошларига тушган кўргиликлар уларнинг тақдирларини бир-бирига ўхшаш қилиб қўйган. Шунча йил жангу жадалларда бирга юриб, қанчадан-қанча ўлим хавфларини бирга кечирган бу икки йигит бугун биринчи марта сирдошларча очиқ сўзлашмоқда эдилар. Тоҳир бошқа вақтда Бобурга айтолмайдиган сўзларини ҳозир кўнгли юмшаб, эриб турган пайтда айтди:

— Амирзодам, мен бир навқарингиз бўлсам ҳам сизга туғушқонимдек меҳр қўйганмен. Ботирлигингизгами, шоирлигингизгами, одамгарчилигингизгами, ишқилиб, менинг... сизга ихлосим зўр! Сизга ёмонлик қилганлар бирин-кетин йўқ бўлиб кетгани бежиз эмас! Сизнинг шунча хавфу хатарлардан омон қолганингиз ҳам катта давлат!

Шу топда Тоҳир суюкли ишисига меҳри тобланиб, оғир пайтда унинг кўнглини кўтараётган жонқуяр акага ўхшар эди. Дарҳақиқат, у Бобурдан етти ёш катта эди. Бобур ҳам

бир лаҳза шохлигини унутиб, Тоҳирга худди акасига қарагандай қаради:

— Мени жуда кўп хатарлардан сиз олиб қолгансиз. Мен сиздан кўрган яхшиликларимнинг ўндан бирини ҳам қайтарган эмасмен. Сиз менга туғишган оғамдек қадрдонсиз.

— Раҳмат сизга.

— Лекин ҳозир менинг кўнглим ер билан яксон. Тақдир менга истеъдод берган, куч берган, гайрат берган, аммо нечун бахт бермаган?!

— Бу замонда бахт ўзи йўқ, амирзодам! Ахир сиздек нодир истеъдодлар дунёга ҳар куни келмайди-ку! Нодон тождорлардан қон йиғлаган эл-юртимиз сиздек маърифатли саркардага муштоқ. Лекин бахил замонга ғалабани золим хонга бериб, бизни, мана ватанимиздан ҳам жудо қилмоқчи. Илоҳим бу бахил замонанинг боғлари қуриб кетсини сизу бизнинг қадримизга етадиган яхши замонлар ҳам келсин! Энди... амирзодам, бу ердан тезроқ кетиш керак. Ҳирот ҳам бизга бегона юрт эмас. Иодшоҳ Ҳусайн Бойқаро сизнинг қариндошингиз. Менинг тоғойим мавлоно Фазлиддин ҳам Ҳиротда экан...

Бобур Хуросонга кетмай иложи йўқлигини ўйлади-ю, ошиб ўтиши керак бўлган тоғларни кўз олдига келтирди. Узоқдан мовий тусга кириб беҳад жозибали кўринадиган бу тоғлар тик доvonлардан, хатарли учмалардан ўтиши керак бўлган одамга қанчалик тунд ва бераҳм кўринади! Ҳозир Бобурнинг тасавурида баланд чўққиларнинг асрий қорлари кафандай беҳаракат ва совуқ, ўлимдай абадий бўлиб гавдаланди.

— Хатарли йўлларда мен ўз жонимни аввал худога, сўнг сизга ишониб тошшироқчимен. Бугундан бошлаб сиз менинг кўрчибошимсиз. Ички беқларим қаторида бўлурсиз.

— Иноятнингиздан миннатдормен, амирзодам!

— Ҳозир бу иноятнинг шарафидан азоби кўпроқ. Йўлда чарчагансиз. Бориб дам олинг. Эртадан сафар тайёрлиги бошланур.

Тоҳир таъзим қилганича чиқиб кетди.

Бобурнинг уйқуси келмас эди. У яна чодирдан чиқди. Кундузги туман тарқаб кетган, лекин осмонда булут бор. Юлдузлар онда-сонда кўриниб қолади. Исфарасой осмонни бошига кўтариб шағирлайди. Тунда тоғларнинг қораси кундузгидан хайбатлироқ кўринади.

Бобур қоп-қора тоғларга тикилиб турганда яна кўчки босган булоқ эсига тушди. Тоғларнинг бу томонида ҳамма йўллари бекилган булоқ энди тоғларнинг нарғидан кўз очиб чиқа олармикин? Улуғтоғдан нарида баҳайбат Помир. Ундан нарида Ҳимолай ва Ҳиндикуш...

Булоқ бу тоғларнинг ҳаммасидан ўтиб бориб, нарёқларда қайтадан кўз очиши учун қанчалик катта куч-қудрат керак!

ФАЛАКНИНГ ГАРДИШИ

ҲИРОТ

ТЎЛГАН ПАЙМОНАЛАР

I

Хазонрезлик пайти. Ҳирот боғларига сув берадиган Ҳиррийруд дарёси ва Инжил анҳорининг қирғоқларига заъфарон янроқлар тўкилган. Қалъа ташқарисидаги машҳур Боғи Жаҳоноро, Боғи Мухтор, Боғи Зубайда, Боғи Чаманлардаги узумзор ва анорзорлар ёз бўйи кўтариб турган меваларидан айрилиб, яккам-дуккам қовжироқ барглар билан сўппайиб қолганлар.

Бироқ бу жанубий шаҳарда кузнинг хазонрезлик одатига бўйсунмайдиган дарахтлар ҳам кўп. Ҳиротга Капдахор томонидан келишда йўл бўйидаги хиёбон ва сайргоҳларда ўсган мингларча сарвлар, санобар¹ дарахтлари кузда ҳам баҳордагидек яшнаб турибди. «Хусайн Бойқаро ҳовузи» деб аталган улкан тошҳовуз бўйида кумушранг жажжи янроқлари қуш тилини эслатадиган баланд ва гўзал лисонитгайр дарахтлари бор — булар ҳам хазон нималигини билмайди.

Лисонитгайрнинг барглари яра-чақага дорилигини эшитган Тоҳир ҳовуздан берирокда отдан тушди-ю, жиловини ёнгина навқарига тутқизди. Сўнг ўзи ҳовузнинг хилватроқ томонига ўта бошлади. У доривор барглардан юлиб олиб кетмоқчи бўлиб, тенадаги шохларга тикилиб бораётганда қаршидан кимдир:

— Менга қаранг, бек йигит! — деб қолди.

Тоҳир дарахтнинг йўгон танаси ортидан чиқиб келаётган мулланамо кишини кўрди. Нимасидир Фазлиддин тоғасини эслатиб, юрагини ҳаприқтирди. Аммо соқолининг узунлиги-ю, юзининг кексанамо кўрinishи Тоҳирни шубҳага солди. У одоб билан:

— Лаббай,— деб салом берди.

Тоҳирнинг юзидаги ханжар юзига тикилиб турган ҳалиги киши энди унинг овозини ҳам танди-ю:

¹ Санобар — пина барги оч ҳаворанг тусдаги гўзал қарагайсимон дарахт. Бизда масалаи, Сайробда ва Ялга атрофларида учрайди.

— Тоҳир! Жияним! — деб қичқириб юборди.

Тоҳир ҳам энди тоғойисини таниб, қучоқ очганича унга қараб отилди. Ҳовузнинг шишадай тиниқ сувида уларнинг акслари бир-бирига қўшилиб кетди.

— Ватанимнинг ҳидини олиб келган, жияним! Худога шукур, эсон-омон экансен!

Мавлоно Фазлиддин жиянини қучоғидан қўйди-ю, кўзидан юзига оқиб тушган қувонч ёшларини артиб, Тоҳирнинг кумуш камарига, беклар тақадиган қимматбаҳо ханжарига ва сақорлот чакмонига энди разм солиб қаради. Тоҳирнинг бошидаги дубулганинг тепасида ҳам бекларга хос кичкина байроқча бор эди.

— Жияним, мартабанг ошибдими?

— Ҳа, тоға қўрчибегимен.

— Муборак бўлсин. Илоҳим сенга ёмон бекларнинг таъсири урмасин!

— Бобур мирзо ҳам ёмон бекларидан безгандан кейин биттасининг ўрнига мени қўйди... Хўш, ўзингиз қалайсиз, мулла тоға? Келганимдан бери қидирамен. Сўроқлаб-суриштирай десам, таниш-билиш йўқ.

Ёши қирққа кирар-кирмас юзига ажин тушган мавлоно Фазлиддин маъюс товуш билан деди:

— Юрибмиз... Тупроқдан ташқарида. Худо бизни омадсиз яратган экан-да, жияним. Бу ерга келиб, энди Навоий ҳазратларининг марҳаматларидан бахраманд бўлай деганимда, у зоти олий вафот этдилар. Катта қурилишлар Ҳусайн Бойқаро замонида ҳам унча-мунча бўлиб турган эди. Мана шу йил Ҳусайн Бойқаро ҳам оламдан ўтди. Қурилишлар тақа-тақ тўхтаган. Бизга ўхшаганларга яна иш йўқ!

— Ундай бўлса, Бобур мирзога бир учранг.

— Бобур мирзо ҳам бу ерда меҳмон... Мени қабул қиладими, йўқми? Орада нозик гаплар ўтган.

Тоҳир мавлоно Фазлиддин билан Хонзода бегим орасида бўлган мураккаб воқеаларнинг чет-ёқасини эшитган эди.

— Бўлмаса, аввал мен у кишини холи топиб, сиз тўғрингизда гап очиб кўрайми, мулла тоға?

— Майли, буни кейин яна маслаҳатлашурмиз. Оббо жияним-эй! Мен Бобур мирзонинг Ҳиротга келганларини эшитганимдан бери «сен ҳам бормикинсен, йўқмикинсен» деб ҳар бир навқарга кўз тикиб юрган эдим... Қани энди, юр, уйга борайлик! Агар сенга мана бу доривор япроқлар керак бўлса, уйдан топиб берамен. Бизнинг боғчада ҳам шу дарахтдан бор.

— Боғчада... бир ўзингизмисиз ёки уйландишгизми, мулла тоға?

— Уйланганмиз, жиян. Навоий ҳазратлари маслаҳат бердилар. У кишида боғбон бўлган дуруст бир одамнинг қизи бор экан...

— Муборак бўлсин! Фарзандлар ҳам борми?

— Ҳа, бир ўғил, бир қиз.

— Э, ажойиб-ку! Ундай бўлса, мен уйингизга тўёналар билан борурмен!

— Ўзингни кўрганам минг тўёнадан афзал, жиян! Қани, юр!

Тоҳир бир неча қадам юрди-ю, кейин ниманидир эслаб, осмонга қаради. Офтоб оғиб борар эди.

— Мулла тоға, уйингиз яқинми?

— Йўқ, узоқроқ. Шаҳар четидаги Назаргоҳ маҳаллотида. Нима эди?

— Мен ҳозир бир соатдан сўнг хизматда бўлмоғим керак эди. Подшоҳ буюрган эди.

— Оббо!.. Ундоқ бўлса... Шу ерда бирпас ўтирайлик. Мен сал дийдорингга тўяй! Ўзинг қалайсен, жияним, уйланган-мисен?

Тоға-жиян ҳовуздан четроқдаги тош курсига бориб ўтирдилар. Тоҳир Робияни қандай топганини айтиб берди-ю:

— Қобулга келиб битта ўғилча кўрдик! — деди.— Отини Сафарбек қўйдик.

— Э, хайрият! Мен бир вақтлар ҳамма нарсадан умидимни узган эдим. Сени ҳам қайта кўролмасмен деб ўйлаган эдим. Бош омон бўлса, ҳаммаси ўтар экан... Сен билан биз-ку, қутулиб келдик-а! Андижондагиларнинг аҳволи не бўлди?

— Буни сўраманг, мулла тоға! Шайбонийхоннинг қиргини кечалари тушимга кирса, босинқираб чиқамен!.. У ёқда роса абгор бўлиб, икки юз қирқтагина одам билан Хуросонга қараб жўнадик. Ҳисор тоғларининг орасида роса қийналдик. Отуловлар ўлиб-сўйилиб тамом бўлган. Бобур мирзо ҳам отини онасига бериб, ўзи пиёда юради. Оёқларимизда чорик. Қўлларимизда таёқ. Турадиган жойнинг тайини йўқ. Биров бери кел, демайди. Арзимаган амалдорлар Бобур мирзодай одамга беҳурматлик қилиб «йўлларингдан қолманглар, Ҳисордан тезроқ ўтинглар», дейди. Бизнинг ғазабимиз келиб, қўпол гапирган амалдорларни чошиб ташласак деймиз. Лекин Бобур мирзо: «Бардош қилинглар, тезроқ Амударёдан ўтиб олайлик», деб шоширади.

— Лекин шоширганича бор экан-да, жиян. Сизлардан сал кейин Шайбонийхон Ҳисорни ҳам босибди-ку.

— Ҳа, кейин билсак, Бобур мирзо узоқни ўйлаб шундай қилган эканлар. Ҳисор подшоҳи Хисравшоҳ умрида бир мушук билан ҳам урушиб кўрмаган кўрқоқ одам экан. Бек-

ларнинг кўпчилиги ундан порози экан. Бобур мирзога махфий одамлар юбориб: «Келинг, Ҳисорни сизга берайлик!» — дер эканлар. Лекин Бобур мирзо фитнага аралашмади. «Келинг», деган ҳалиги бекларга: «Хоқон бўлсаларинг ўзларинг келинглари», деб яхши гаплар айтиб, одам юбордилар. Биз Амударёдан бу ёққа ўтганда, Шайбонийхон Ҳисорга бостириб кирибди. Қўрқоқ Хисравшоҳ хон билан жанг қилишга юраги бетламай, нойтахтни ташлаб қочибди. Унинг ўттиз минг қўшини тарқаб кетибди. Ўзингиз биласиз, мулла тоға, бундай гайтда беклар номи улуғроқ бир подшоҳ излаб қолишади. Бобур мирзо Шайбонийхон билан дадил жанг қилгани, бирда енгилган бўлса, бирда уни енгани эсларига тушади. Илгариги эшик оға Қосимбек ўша пайтда Ҳисор қўшинининг орасида эди. Унинг Бобур мирзога ихлосмандлигини биласиз. Хуллас, уни бузилган арига ўхшаб тарқаган Ҳисор қўшини Амударё бўйида бизга келиб қўшилаверди. Энг аввал Боқибек Чағонийёний дегани тўрт юз аскарни билан келди. Бобур мирзо унга кутганидан зиёда ҳурмат кўрсатди. Боқибекни энг баланд мартабали эшик оға қилиб қўйди. Кейин Хисравшоҳнинг бошқа беклари-ю навкарлари кетма-кет келиб бизга қўшилаберди-да. Ўзимиз дарёдан икки юз қирқтагина одам ўтган эдик. Бир ой ичида тўрт мингга етдик...

Мавлоно Фазлиддин жиянининг сўнгги йилларда бир қадар ўзгариб қолганини энди аниқроқ сизди. Тоҳир илгари бунчалик сўзлай олмас эди. У гапдон аслзодалар орасида кўп юриб, мулозимларга хос мураккаб иборалар ишлатишга ўрганган эди.

— Биз Қобулга келсак, арғин деган уруғдан Муқимбек ҳоким бўлиб ўтирган экан. Тахт даъво қилишга ҳаққи ҳам йўқ, биз билан олишадиган кучи ҳам йўқ. Қобулни бизга жангсиз берди. Кейин Ҳусайн Бойқародан Бобур мирзога хат борди. «Черик билан келинг, Шайбонийхонга қарши иттифоқ бўлиб чиқайлик», дебди. Отда қирқ кун юриб шунча жойдан келсак, Ҳусайн Бойқаро оламдан ўтибди.

— Бир жиҳатдан Қобулни пойтахт қилиб, бу ерга обрў билан келганларинг яхши бўлибдир, жияним. Акс ҳолда, Ҳусайн Бойқаронинг калондимоғ ўғиллари Бобур мирзони писанд қилмаган бўлур эди.

— Лекин ҳозир ҳурматимиз жуда жойида. Шаҳар ҳокимини бизга қўшиб қўйганлар. Ҳиротни айлаштириб роса томоша қилдирди. Катта даргоҳларда ҳар кун зиёфат. Бугун кеч Бобур мирзо яна саройга боришлари керак эди...

Тоҳир осмонга кўз ташлаб, офтобнинг анча пасайиб қолганини кўрди-ю, безовталаниб ўрнидан кўзгалди:

— Мулла тоға, мен кеч қолсам бұлмас. Сизнинг уйингизга эртага борсам майлими? Қандай топиб борамен? Шунн айттинг.

Улар Тоҳирнинг отини жиловидан тутиб турган навкарнинг олдиға боргунларича мавлоно Фазлиддин уйининг қаердалигини Тоҳирга батафсил тушунтирди. Тоҳир отининг жиловини навкарининг қўлидан олар экан:

— Мулла тоға, отингиз қани? — деди.

— Жияним, мен пиёда юрамен.

— Уйингиз узоқ бұлса ҳам-а?

— Ўрганиб кетганмен.

Тоҳир тоғасининг камбағаллашиб қолганини энди сизди-ю, отининг кумуш безакли юганини мавлоно Фазлиддинга тутқазди:

— Бұлмаса мана шу от сизники.

— Ўзинг-чи, жияним?

— Отхонада менинг яна иккита отим турибди. Мининг!

Тоҳир тоғасини қўймасдан отга миндирди-ю, белига қистирилган қимматбаҳо қамчини ҳам тоғасига берди.

— Сиз Ўшда менга миндириб юборган отнинг қулуни бу, мулла тоға. Ўшанда мени бошдан-оёқ кийиштирган ҳам эдингиз-а, эсингиздами?

— Э, бош омон бұлса дўппи топилади, жиян! Буни эслатиб ўтирма.

«Аммо эртага келин аяга ҳам, болаларига ҳам бош-оёқ кийимлик олиб бориб, тоғамни яна бир суюнтиришим керак!»— деди Тоҳир ўзича.

Иккинчи от устида ўтирган ёшгина навкар нима бўлаётганига унчалик тушунмаса ҳам тоға-жиянға анграйиб қараб турарди.

Мавлоно Фазлиддин хўшлашиб кета бошлади. Тоҳир навкарига қараб шипшиди:

— Фаросатинг борми?

Бекни пиёда қолдириб, навкарнинг отлиқ туриши чиндан ҳам одобга тўғри келмас эди. Ёш навкар буни эртароқ сезмаганидан изза бўлиб отдан сакраб тушди ва жиловини Тоҳирга тутди:

— Афв этинг, бек жаноблари.

Мавлоно Фазлиддин орқага ўгирилиб қаради-ю, Тоҳир навкарининг отида бекларча савлат тўкиб бораётганини, навкар эса унинг ёнида йўрғалаб пиёда кетаётганини кўрди. Навкардан чиққан баъзи беклар обрўталаб бўлиши мавлононинг эсига тушди. «Ишқилиб, Тоҳир ўшаларга ўхшамасин-да!»— деб қўйди ичиди.

Бугун ўн етти кундирки, Бобур Ҳиротда Алишер Навоий истиқомат қилган муҳташам Унсияда¹ яшайди. Унсиянинг баланд пештоқлари, нилий гумбази, офтобда жилоланган ранг-баранг кошнлари Бобурга Самарқанддаги Улуғбек мадрасасини эслатади. Лекин Унсиянинг тўрт томонидаги тўртта минораси Улуғбек мадрасасиникидан баландроқ, бинонинг ҳажми ҳам каттароқ эди. Ўзи бундан ўн беш йилчагина олдин қуриб битирилган, ҳали ҳамма безаклари яп-янги эди.

Унсиянинг ичидаги хоналардан бир қанчасини Навоийнинг шахсий кутубхонаси эгаллаган. Бобур кутубхонадаги китобларни варақлаганда, уларнинг баъзи жойларида улуғ шоирнинг дастхатини кўрди-ю, Самарқандда ундан олган мактубни эслади. Навоийни кўришга муяссар бўлолмагани учун юрагини маъюс туйғулар чулғади.

Кутубхона эшиги олдига чиройли бир жавонга ўхшаш катта соат қўйилган. Белгили вақтларда бу соатнинг тепасидаги жажжи ҳайкалча ҳаракатга келади-ю, олтин болғачалар билан оҳангдор қилиб занг чалади. Бундай соат ясаш ғоясини соатсозга Навоийнинг ўзи айтиб, махсус буюртма берган эди. Кейин Ҳиротда «Алишерий» деб аталадиган занг чалувчи соатлар расм бўлиб кетган эди.

Бобур кутубхонадан чиқар экан, устма-уст занг чалаётган соатга қараб туриб, ўзича ўйланди: «Ажаб! Алишербекнинг ўзлари вафот этган бўлсалар ҳам ихтиролари тирик. Умри соний шулмикин? Бу соат ўз эгасининг иккинчи умрини ўлчаб занг чалмоқдамикин?»

Унсиянинг ич-ташида бу бинони қурган ва унда ҳаётининг охирги кунигача яшаган ноёб инсоннинг руҳи кезиб юрганга ўхшарди. Бобур Навоийнинг қўли теккан эшикларни эҳтиёт билан очар, мрамр зиналарда унинг кўзга кўринмас изларини босиб ўтаётганини ҳис қилиб, мумкин қадар секин қадам ташлар эди.

Ҳовлида тошҳовуз бўйидаги чинорлар тагида фаррош йигит хазон супурмоқда эди. Бобур икки томонида тўқ яшил шамшод дарахтлари қатор турган чиройли йўлкага бурилди. Бу ерда уни Навоийнинг шогирди Хондамир ва унинг энг яқин надим²ларидан Соҳиб Доро кутиб турар эдилар. Ҳасса таянган кекса Соҳиб Доро Бобур билан кўришаётиб:

— Амирзодам,— деди.— Ҳазрат Мирнинг вафотларидан

¹ У н с и я — «Дўстлик уйи» демакдир.

² Н а д и м — курдош-субхатдош.

бери Унсия руҳсиз танадек эди. Сиз келганингиздан сўнг бу танада янги жон, янги руҳ пайдо бўлди!

Ёши ўттизларга борган тийрак кўзли Хондамир Бобурга синовчан назар билан кулимсираб тикилди: Андижондан келган йиғирма беш ёшлик шахзода бу муболагали гапга яраша камтарона жавоб топармикин?

Қалби эзгу ва маънос туйғуларга тўлиб турган Бобур шоирона ўхшатишлар қилиб ўтиргиси келмай жўн жавоб берди:

— Мавлоно, ҳазрат Алишернинг маконлари менинг ўзимда янги бир руҳ пайдо қилди. Бу ерда мен санъату маърифатнинг хали умримда кўрмаган камолотини кўрмоқдамен.

Хондамир Бобурнинг жавобидан қаноатлангандек мамнун бош ирғади. Соҳиб Доро ҳам:

— Сиз ҳақсиз, амирзодам,— деди.— Ҳазрати Мир неки яратган бўлсалар, ҳаммасида ўзларининг олий руҳларидан бир нишона қолдирмишлар. Мана бу минораларга бир назар ташланг!

Бобур учи осмондаги оқ булутларга тегай деб турган баланд кошнкор минораларга тикилди.

Одатда, юксак минораларнинг одам чиқиб атрофга қарайдиган усти ёпиқ ҳалқаси, яъни шийпончаси энг теласида бўлади. Унсия минораларида эса телодаги ҳалқадан ташқари ўрта белида ҳам махсус халқалар бор эди. Соҳиб Доро бунинг сабабини айтди:

— Ҳазрати Мир Ҳирот манзараларига баланд бир жойдан қараб ўлтириб ҳордиқ чиқарар эдилар. Кексайган пайтларида минора теласидаги ҳалқага чиқишлари мумкин бўлмай қолди. Шундан сўнг меъморга ўзлари айтиб, пастроққа ҳам халқа қурдирдилар.

— Илож бўлса, шу халқалардан бирига биз ҳам чиқсак,— деди Бобур.

— Бажонидил!

Соҳиб Доро Бобурни Хондамир билан бирга ғарбий минорага томон бошлади. Аммо минора ичидаги тик, айланма зиналардан чиқолмаслигини айтиб, ўзи пастда қолди. Миноранинг ўрта ҳалқасига Бобурни Хондамир бошлаб чиқди.

Улар атрофга кўз югуртиришди. Узоқда қорли Мухтор ва Искалжа тоғлари. Пастда куз кириб, суви жилдираб қолган Инжил анҳори. Унинг чап соҳилида машҳур Гавҳаршодбегим мадрасаси савлат тўкиб турибди. Навоий қурдирган Ихлосия мадрасаси Инжилнинг ўнг қирғоғида — Гавҳаршодбегим мадрасасига юзма-юз тушган эди. Ихлосиядан нарида беморлар даволанадиган, айни вақтда, мударрислар ёшларга тиббиёт илмини ўргатадиган Шифоия номли шифохона — мадраса. Ундан нарида улкан гумбазли Халосия хонақоҳи. Катта бир маҳалланинг ўрнини оладиган жой Алишер Навоий қур-

дирган нодир обидаларга тўлиб, Ҳиротнинг салобатига салобат қўшган эди.

Шаҳарнинг нариги ёқларида ҳам мовий тоғларга ўхшаб юксалиб турган минора ва гумбазларнинг қўлиги Бобурга бирдан Самарқандни элатди-ю, юрагини дард аралаш соғинч туйғуси чулғади.

— Мавлоно,— деб Бобур Хондамирга юзланди.— Ҳирот обидаларини қурган меъморлар орасида Мовароуннаҳрдан келганлари ҳам бормиди?

— Амирзода, сиз Ҳиротда Самарқанд сайқали ҳам борлигини сезиб турганга ўхшайсиз.

— Ҳа, саволимнинг бойси ҳам шу.

— Ҳиротнинг кўп улуғ зотлари Самарқандда таҳсил кўрмишлар. Улар Самарқанд сайқалини қалбларида олиб келмишлар, яна Мовароуннаҳрдаги фаторатлардан безиб қочган талай истеъдодлар Ҳиротга келиб, ҳазрат Алишердан паноҳ топмишлар. У олий зотнинг фазилатлари беҳисоб эди. Лекин фақирга энг улуғ туюлган фазилатлари — ҳазрат Мирнинг истеъдодшуносликлари-ю, заковатпарварликлари эди. Улуғ ишларни улуғ истеъдодларсиз қилиб бўлмаслигини ҳазрат Алишер яхши билур эдилар. Шунинг учун ҳамиша эл-улус орасидан нодир истеъдодлар излаб ўтдилар. Ёнларида юрган надимларига, мусоҳибларига, биз каби шогирдларига айтар эдиларки, бахиллик доим нурсиз, лаёқатсиз, истеъдодсиз одамлардан чиқур. Хусусан, олий жамиятда лаёқатсиз бахиллар доим истеъдодларнинг йўлини тўсурлар, худодод заковатларини юзага чиқармай, хайф қилурлар, бундан бутун халқ зарар кўрур. Дунёдаги энг машъум бахиллик, истеъдодларнинг йўлини тўсгувчи бахилликдир. Дунёдаги энг олий саховат эса нодир истеъдодларни юзага чиқарувчи саховатдир.

— Айни ҳақиқат! — завқланиб хитоб қилди Бобур.

Хондамир бу хитобдан руҳланиб, овозини хиёл кўтариб давом этди:

— Биз бирон сафардан қайтсак ёки ҳазрат Алишерга бир-икки кун кўринмай юриб, кейин ҳузурларига келсак: «Қани, хўш, яна қандай ажойиб истеъдод учратдингиз?» — деб сўраб эдилар. Биз учратган нодир истеъдодларнинг баъзилари ўн беш-ўн олти ёшлик ўспиринлар бўлар эди. Ҳазрат Алишер: «Бўладиган бола ўн беш ёшида бош бўлур, бўлмай-диган одам қирқ ёшида ҳам ёш бўлур», дер эдилару тошилган истеъдод ўспирин бўлса ҳам ҳузурларига чорлар эдилар. Соҳиб Доро истеъдодли шоир Зайниддин Восифийни ўн беш ёшида ҳазрат Мирнинг ҳузурига келтирган эди. Ҳазратнинг саховатларидан баҳраманд бўлган бу ёш шоир жуда тез улғайиб, бутун Ҳиротга машҳур бўлди. Улуғ мусаввир Камолиддин

Бехзод ҳам ёшлиқдан ҳазрат Мирнинг тарбиялари ~~бала~~ улгайдилар. Шоир Ҳилолий, хаттот Султон Али Машҳадий ҳам ҳазрат Алишер кашф этиб, тарбият қилган истеъдодлардандир. Кўз ўнгимизда турган Ҳирот сўнги ўттиз-қирқ йил мобайнида аввалгидан ўн баробар гўзалроқ, улуғворроқ бўлиб кетганини барча фозил кишилар айтурлар.

— Сўзингиз чин, мавлоно. Мен кўрган Рубьи маскунда¹ Ҳиротдек шаҳар йўқдир!

— Амирзодам, бугунги Ҳиротни шунчалик гўзал, шунчалик улуғ қилганлар — эл-улус орасидан чиққан истеъдодлар эмасми?

— Рост! Кўз ўнгимизда турган барча нодир обидалар — улуғ истеъдодлар хазинасидан чиққан гавҳарлардир.

— Лутф қилдингиз, амирзодам. Ҳазрат Алишер — гавҳардай бебаҳо истеъдодлар хазинасини очган энг улуғ кашфиётчи эдилар. Буни султон Соҳибқирон Ҳусайн Бойқаро ҳам тан олган эдилар. Эшитгандирсиз, амирзодам, ҳазрат Алишер билан Ҳусайн Бойқаронинг ораларига нифоқ солган бахиллар кўп эди. Маълумингизким, султон Ҳусайн мастликда кўп ёмон ишлар ҳам қилган эдилар... Аммо ичмай юрган таъблари тиниқ кунларда ҳазрат Алишерга шундоқ эҳтиромлар кўрсатар эдиларки, ҳаммамиз ҳайрон қолар эдик.

Бобур Хондамирнинг завқли бир воқеани эслагандек мамнун кулимсираганини кўрди-ю, унинг ҳикоясини кутиб, юзига тикилди.

Хондамир ҳали йнгит ёшида бўлса ҳам кўп ўлтириб ишлаш оқибатида бир оз семириб қолган тўла гавдали ўрта бўй киши эди. У гўштдор бармоқлари билан қошининг устини силаб қўйди-ю:

— Ҳазрат Алишер «Хамса» ларини битириб Султон Ҳусайн Бойқарога ўқишга бердилар, — дея ҳикоя қила бошлади. — Султон Ҳусайн таъби назми ўткир зот эдилар. «Хамса» ни ўқиб ҳазрати Алишерни саройларига чақирмишлар, бутун аъёнлари олдида табрик айтмишлар. Султон Ҳусайннинг яхши кўрган бебаҳо бир оқ отлари бор эди. Мирохўрга: «Ўшал отни келтиринг!» — деб буюрмишлар. Мир ҳазратлари ҳайратга тушиб: «Менга от инъом қилмоқчиларми?» — деб ўйламишлар. Отни келтиргунларича подшоҳ Мир Алишерга қараб: «Энди сиз шеъриятда менга устоз пирсиз, мен сизга мурид бўлмоқчимен», деганлар. Мир Алишер изтироб билан эътироз қилганларки: «Ҳазратим, сиз подшоҳдирсиз, сизга мен мурид бўлмоғим керак». Шу аснода оқ отни олтин анжомлари билан келтирурлар. Султон

¹ Рубьи маскун — дунёнинг ишон обод қилган қисми.

Хусайн кулиб туриб сўрабдилар: «Мурид пирнинг амрини бажармоғи керакми?» Мир Алишер, албатта, тасдиқ жавоб бермишлар. Шунда подшоҳ у олий зотга айтмишларки: «Бўлмаса, мана шул отга мининг!» Шохнинг амри вожиб. Мир Алишер отга яқинлашурлар. Оқ отнинг бир феъли бор экан: Султон Хусайндан бошқа одам минмоқчи бўлса, беланглаб қўймас экан. Мир Алишер яқинлашганда от беланглашга тушмиш. Шунда Султон Хусайн отни жиловидан олиб: «Тинч тур!»— деб ўшқирурлар. От тинчлангач, ҳазрат Мир унга минурлар. Сарой аҳли: «Энди нима бўларкин?»— деб нафасларини ичларига олиб сукутга кетмиш. Султон Хусайн отнинг жиловини илкларидан қўймай ҳовли бўйлаб юриб кетмишлар. Ҳамма ҳайрон. Шунда подшоҳ от устидаги ҳазрат Алишерга айтурларки, «туркий тилда биринчи бўлиб ёзган улуғ «Ҳамса»нгиз учун мендек Султон Соҳибқирон сизга жиловдор мурид бўлса арзир!» Сарой аҳли бу сўзни эшитиб, лол бўлиб қолмиш. Ҳазрат Алишернинг ўзлари шу даражада мутаассир бўлмишларки, ҳушларидан кетиб қолмишлар. Кейин мулозимлар чопиб бориб ҳазратни отдан тушириб олмишлар... Ана амирзодам...

— Фикрингизга тушундим, мавлоно,— деди Бобур ўйчан товуш билан.— Қаердаки истеъдодларга бахиллар завол келтиролмаса-ю, сахийлар йўл оча олса, ўша жой бугунги Ҳирот каби камолот чўққисига кўтарилиур экан.

Хондамирнинг кўнглидаги гапни Бобур бунчалик яхши топиб айтгани мавлонога ғалати таъсир кўрсатди. Хондамир Бобурда ўзининг маслакдошини топгандай қувониб:

— Тасаню, амирзодам! — деди.— Ўшал улуғ зотлар даврида Ҳиротнинг камолот қуёши осмоннинг энг баланд нуқтасига чиққани рост! Лекин... афеуски, қуёш энг баланд нуқтадан сўнг пастга оғар экан. Сўнгги йилларнинг мудҳиш воқеаларини кўриб, қалбимни бир ваҳм титратур: Ҳиротнинг толе қуёши аста-секин оғиб тушмасдан, бирдан зулмат қаърига қулаб кетса... унда не қилгаймиз?

Хондамир Мовароуннаҳрдаги тўполонлар ва қирғинлар Шайбонийхоннинг қўшини билан бирга Ҳиротга ҳам яқинлашиб келаётганини сезгани учун шу изтиробли саволни берган эди. Унинг назарида, бу саволга Шайбонийхон билан юзма-юз олишган Бобургина жавоб бериши мумкин эди.

— Изтиробингиз бежиз эмас, мавлоно,— деди Бобур.— Ҳиротдаги бугунги осойишталик даҳшатли тўфон олдидан бўладиган муваққат сокинликни эслатур. Тошкент ҳам мен сўнгги марта борганимда, худди ҳозирги Ҳиротга ўхшар эди. Мен минг балоларни бошдан кечириб, жаҳаннам қаъридан

чиқиб борган эдим. Марҳум тоғойим Маҳмудхонга: «Бу балолар сизнинг ҳам бошингизга тушмасин, бирга чора то-найлик», деганимда истехзо қилиб кулган эди. Раҳматлик сиз айтган истехдодсиз, лаёқатсиз тождорлардан эди... Хийла бахиллиги бор эди... Маҳмудхон ахири Шайбонийхоннинг оёғи тагида қандоқ топталганлиги маълумингиздир.

— Наҳотки, ўша ҳодисалар Ҳиротда яна такрорланса, амирзодам?

Бобур Ҳиротнинг шимол-ғарбида ғубор ичида кўринаётган Соқи Солмон чўлининг хира уфқига тикилиб, ўйланиб қолди. У Ҳиротга темурийларнинг бошини қовуштириб, Шайбонийхонга қарши мустаҳкам иттифоқ тузиш учун келгани, бу мавзуда қарийб йигирма кундан бери музокара бораётгани Хондамирга маълум эди. Бобур тезда жавоб беравермагач, Хондамир андиша қилиб деди:

— Амирзодам, музокаралар махфий бўлса, фақир давлат сирларини билишга ҳаққим йўқ. Фақат...

— Мавлоно, минора устида биз фақат иккимиз турибмиз. Менинг сиздан яширадиган сирим йўқ. Ҳирот тахтида икки оғанини бирга подшоҳлик қилишларини билурсиз.

— Ҳа, асли ўзи тахт Бадиуззамон мирзоники эди-ю, лекин Хадича бегимнинг тарафдорлари Музаффар мирзони иккинчи подшоҳ қилиб кўтардилар. Тарихда ҳаргиз мисли кўрилмаган ҳодиса.

Хондамирнинг бу ҳодисадан норози эканлиги сезилиб турарди. Бобур босиқ товуш билан сўзида давом этди:

— Ҳар икки подшоҳларингиз ҳам меҳмондўстликда, суҳбатдорликда, ораста базм ўтказишда беназирлар. Аммо жангу жадалга хоҳишлари йўқми, ҳар қалай, Мурғоб бўйида учрашганимизда ғалати бир ҳодиса бўлди. Хоннинг бир пора қўшини Хуросоннинг Чечекту навоҳисини¹ босгани тўғрисида хабар келди. Хоннинг ўзи Амударёдан нарида эди. Хондан кўра биз турган жой Чечектуга яқинроқ эди. Мен таклиф қилдимки, Чечектуни беш-олти юз кишилик ёғий босган бўлса, дарҳол отланиб, уларнинг ўзларини боемоқ керак. Токи хон қўшини Хуросонга осонликча келолмайдирган бўлсин. Бадиуззамон мирзо инилари Музаффар мирзони Чечектуга юбормоқчи бўлдилар. Маълумингизким, ҳар икковларининг ўз эшик оғалари, ўз мулозимлари, ўз черикларию алоҳида саркардалари бор. Музаффар мирзо жанг кўрмаган йнгит, Чечектуга боришга журъат қилмади. «Ҳазрат оғам борсалар, биз бешқа чегаралар ҳимоясида

¹ Н а в о ҳ и — кичик ўлка, район.

бўлурмиз», деди. Бадруззамон мирзо: «Мен жангда нобуд бўлсам, бу тахтни ёлғиз ўзи эгаллайдими?» — деб ўйлади назаримда, Чечектуга боргиси келмади. Қўп сансалор бўлгандан сўнг мен айтдимким: «Ижозат бергайсизлар, мен йнгитларим билан бориб, Чечектуни ёғнидан озод қилишга уриниб кўрай». Ога-ини бир-бирларига қарадилару элудудан номус қилдилар. «Сиз меҳмонсиз», деб, мени бу ниятимдан қайтардилар. Қўймасдан Ҳиротга бошлаб келдилар. Чечекту ёғий илкида қолди.

Хондамир куюниб «ух» тортди:

— Бу ҳаммаси — Хуросондан толе юз ўгираётганининг нишонаси! Амирзодам, бошимиз устида қандай балолар тўпланаётганини бизнинг подшоҳларимиздан кўра сиз яхши билурсиз. Чунки барчасини ўз кўзингиз билан кўрмишсиз. Биз бу ҳақда мавлоно Бехзод билан ҳам кўп гаплашдик. Ҳиротнинг барча жонқуяр фозил кишилари умид кўзини сизга тикканлар. Хатар қанчалик кучли эканлигига шояд подшоҳларимизни ишонтирсангиз. Барча яхши кучлар бирлашса-ю, шояд фалокатининг олддини олишга муяссар бўлсалар.

Бобур минорадан настга тикилиб:

— Билмадим, мавлоно,— деди.— Бугун-эрта подшоҳлар билан яна шу ҳақда гаплашмоқчимен.

— Илоҳим, кушойиши корингизни берсини музокарангиз биз негагандек тугасин, амирзодам!

Бобур ташаккур айтиб, минора зинапоясига томон йўналди. Настга тушаётиб, Ҳирот қалъасининг ичида — баланд тепалик устида турган улкан аркка ноҳуш назар ташлади.

3

Куз илиқ келгани учунми, Ҳирот тождорлари ҳали ҳам қалъа ташқарисидаги боғларда яшамокда эдилар. Шаҳарнинг шимол-шарқидagi Қипчоқ дарвозасидан нарида Шохруҳ мирзо даврида машҳур бўлган Боғи Сафидда Музаффар мирзо Бобур шарафига катта зиёфат берди. Ҳиротнинг энг зўр пазандалари тайёрлаган физол¹ кабоблари, иштаҳа очувчи нордон очарлар², моҳича номи билан машҳур бўлган ўта пазик хуштаъм суюқ ошлар Музаффар мирзо ўз меҳмони билан ўтирган тиллакори кўшкнинг юқориги қаватига

¹ Физол — кийикнинг Хуросонда кўп учрайдиган бир тури.

² Очар — зира ва сирка кўшиб тайёрланган гўшти таом.

кетма-кет олиб чиқилмоқда эди. Созандалар пойгакроқда ўтириб, қонун ва уdda, ғижжак ва найда этни жимирлатувчи куйлар чалишарди. Ҳиротнинг машҳур ҳофизлари овозларини унча баланд кўтармасдан, юракнинг қат-қатига сингадиган сокин ва майин товуш билан ашула айтишар, бу ҳаммаси Бобурга жуда улуғвор бир санъатнинг намунаси бўлиб туюларди.

Базм авжига чиққанда соқий Бобур қаршисига келиб, бир тиззасини гиламга тираб чўккалади, сўнг йигирма йилдан бери хумда куч йиғиб ётган ва бугунги зиёфат учун очилган тиниқ хушбўй майи нобдан суроҳийга қуйди-да, Бобурга узатди. Бобур ҳали май ичмаган эди. Аммо ҳозир эшитган куй ва ашулаларининг таъсирида бирдан унинг май ичгиси келди-ю, ўнг ёнидаги Қосимбекка қаради.

Оббурдонда Бобурдан ажралиб Ҳисорга кетган Қосимбек Қавчин бултур Қобулда барча навқари билан бирга Бобур хизматига қайтиб келган ва яна унинг энг яқин маслаҳатгўйига айланган эди. Қосимбекнинг ўзи умрида май ичмаган худотарс киши бўлгани учун Бобурни ҳам ичкиликка йўлатгиси келмас эди.

— Амирзодам,— шивирлади Қосимбек.— Бадиуззамон мирзонинг чоғир мажлисида май таклиф қилганларида ичмаган эдингиз. Бу ерда ичсангиз, нариги мирзо эшитиб кўнглига олмасмикин?

Бу сўзлар Бобурни сергаклантирди. У битмай ётган мураккаб ва чигал ишларини эслади-ю, Музаффар мирзога қараб:

— Фақирни маъзур тутинг, мирзо ҳазратлари,— деди.— Мен умримда май ичмаганмен!

Музаффар мирзо Бобурнинг май ичишдан қўрқаётганини сезиб, қаҳ-қаҳ уриб кулди. Унинг анчагина кайф қилгани шу беандишароқ кулгисидан билинди:

— Амирзодам, наҳотки бутун Андижону Самарқанд май завқидан беҳабар бўлса?

— Мирзо ҳазратлари, май завқи Самарқанду Андижонда ҳам керагидан ортиқ. Аммо фақир бошқа завқлардан ортмас эдим. Узримни ҳазрат оғангиз Бадиуззамон мирзо қабул қилган эдилар... Фақир андеша қилмоқдамен...

Бадиуззамон мирзо тилга олингач, Музаффар мирзо ҳам жиддийлашди. Бобурнинг андишаси унга асосли туюлди-ю, соқийга: «Бас, қистама!» ишорасини қилди. Базмда Бадиуззамон мирзонинг эшик оғаси Зуннунбек арғун ҳам бор эди. Соқий подшосининг ишораси билан Бобурга қуйилган майни ўша Зуннунбекка берди.

Одамларнинг кайфи ошган сари базм қизиб борар, баъзи беклар ҳам ўртага чиқиб рақс қилишар, Мир Сарбараҳна, Бурхон гунг деган машхур қизиқчиларнинг аскияларидан кўтарилган қаҳқаҳалар шифтдаги нақшларни ҳам титратаётгандай бўлар эди.

Ҳусайн Бойқаронинг ўлимига ҳали кўп вақт бўлмаган. Ҳирот хавф остида турган оғир бир вазиятда шунчалик хушчақчақ базм ўтказилаётгани Бобурдан ҳам кўра Қосимбекнинг гашини келтирмоқда эди. Қосимбек кулги, шовқин орасида Бобурга шивирлади:

— Бу ширакайф шоҳ билан энди музокара қилиб бўлмас. Бунинг ихтиёри онаси Хадича бегимда эмиш. Ҳозир бегимнинг ҳузурига чиқайлик, амирзодам.

— Зиёфат тугамасдан чиқиб кетсак, беҳурматлик бўлмасми?

— Қулингиз келишиб қўйганмен. Бегим ўз қасрларида бизга мунтазирлар.

Аскиячилар мусобақаси тугаб, кулгилар босилгач, Бобур Музаффар мирзодан ҳазрат бегимнинг ҳузурларига бориш учун ижозат олди.

* * *

Оқ мрамардан қурилган уч қаватли улкан қасрда ўнлаб олтин қандиллар ёнмоқда эди. Бобур, Қосимбек, Зуннунбек ва уларни бошлаб бораётган Бурундукбек зиналарга тўшалган майин гулдор пояндозлардан товушсиз қадам ташлаб, учинчи қаватга кўтарилдилар. Қасрнинг деворларига Шоҳруҳ мирзо ўзининг санъаткор ўғли Бойсунқур мирзо учун ишлатган гўзал расмлар ҳали оҳори тўкилмай яп-янги турар эди.

Хадича бегим Бобурни қасрнинг мухташам қабулхонасида кутиб олди ва олти оёғи ҳам қўйма олтиндан ишланган, устига яхлит садаф қопланган миз ёнига ўтқазди.

Салобатли, хушқомат бегимнинг орқароғида — қабулхонанинг энг кўзга кўринарли жойида бир туп атиргул ярқираб турибди: поялари олтиндан, барглари зумраддан, тўқ қизил гуллари ёкутдан. Гул шоҳига қўниб турган кичкина олтин булбулнинг тумшукчасида — дон ўрнида соф гавҳар жилоланиб турибди. Қабулхонанинг эшик ва деразаларига осилган шоҳи дарпардаларга ҳам дурлар, лаъллар ва бошқа қимматбаҳо тошлар қадалган эди.

Фақат Хадича бегимнинг ўзи қорамтир кумушранг парчадан безаксиз қабо кийган, унинг бошидаги кўкиш тоқида кўзга унча ташланмайдиган сийрак марварид доналари

кўринар эди. Ақлни шоширадиган бундай жавохирот орасида гўзал қиз-жувонлар куршовида ўтирган эллик ёшли улуғсифат малика Бобурни ҳам, Қосимбекни ҳам анча довдира-тиб кўйди.

Бобур кўнглига тугиб келган мураккаб гапларини бегимнинг мусохабалари ва келинлари олдида қандай айтишни билмай безовталанди. Хадича бегим буни сезиб осойишта кулимсиради:

— Амирзодам, сиз бизга қариндошсиз. Шунинг учун менинг келинларим, мусохабаларим сизни ҳам ўз мирзоларидек эъозлаб суҳбатингизга иштирок этмоқчилар. Тортинмай эркин ўлтиринг.

— Муташаккирмен!

Юзларида юпка оқ пардалари бор қиз-жувонларнинг юз-кўзлари шам ёруғида унча аниқ кўринмас эди. Аммо хина кўйилган нафис қўллар, ипак кийимлар оғушидаги ингичка беллар ва баланд кўкраклар кўпчилик аёлларнинг ёш жувонлар эканидан далолат берарди. Музаффар мирзонинг энг кўхлик хотинларидан Қорақўзбегим дегани қайнонасининг қулоғига лабини яқинлаштириб, енгил бир кулги билан алланарса деди. Хадича бегим ҳам шўх кулиб бош ирғади-ю, Бобурга юзланди:

— Амирзодам, Ҳиротнинг аслзода қизлари сизга мароқ билан кўз тикар эмишлар. Шундай баҳодир шох, шундай кўхлик йигит, шундай истеъдодли шоир ҳарамсиз бўйдоқ яшар эмишсиз. Ростми?

Бобур қип-қизариб ерга қаради-ю, бу тўғрида гап очилганидан озорланиб:

— Ҳазрат бегим, рост,— деди.— Тақдиру насибим шундоқ бўлди.

— Тақдирингиз энди тағайюр топсин, амирзодам. Ҳиротда қолиб, Музаффар мирзога ини бўлинг. Сиз ҳам темирйоздалардансиз. Ҳиротдан сизга муносиб гўзалу оқила қизлар топайлик, тўй-томоша билан уйланинг.

Музаффар мирзога ини бўлиш — унинг тарафдорига айланиш деган сўз эди. Бир вақтлар невараси Мўмин мирзонинг ўлдирилишига сабаб бўлган Хадича бегим, эҳтимол, келажакда Бадиуззамон мирзони ҳам йўқ қилиш ва ўғлини якка подшоҳга айлантириш мақсадидадир. Бобур унинг ўглига ини бўлса, албатта, бегимнинг бу мақсадини амалга оширишга иштирок этиши керак.

— Ғамхўрлигингиздан миннатдормен, ҳазрат бегим,— деди Бобур.— Фақат менинг бир андешам бор.

— Қандай андеша, амирзодам?

— Фақирни маъзур тутинг.

Бобур сукут қилиб, ерга қаради. У гапини фақат Хадича бегимнинг ўзига айтмоқчи эканини сезган аёллар таъзим қила-қила чиқиб кетдилар.

Шундан кейин Бобур Шайбонийхоннинг Ҳирот устига бостириб келиши муқаррарлиги ҳақида, ҳозир тўй-томошага эмас, ҳаёт-мамот жангларига тайёрланиш кераклиги тўғрисида гапира бошлади.

— Шайбонийхон Андижондан Хоразмгача, Марвдан Туркистонгача барча жойни олиб, беҳисоб қўшин тўпламишдир. Мен унинг ҳар бир жангга қанчалик астойдил шайланишини билурмен. Бало-қазодай бостириб келса анча-мунча черик тит-пит бўлиб кетишини кўрганмен!

Бобур Шайбонийхоннинг ҳарбий қудратини ва шафқатсизлигини исботлайдиган далиллар келтира бошлади. Хадича бегим сабрсизланиб:

— Бу балонинг балоғардони недур? Шунини айтинг, амирзодам! — деди.

— Бунинг балоғардони барча темурийзодаларнинг бирлашувидир. Ҳамма вилоятларга тавочилар юбориб, эллик-олтмиш минг қўшин тўпламоқ керак. Қиш бўйи бу қўшинни машқ қилдириб, ягона бир саркарда бошчилигида жангга тайёрламоқ керак.

— Ягона саркарда ким бўлиши мумкин? — деди Хадича бегим сергакланиб.

Қосимбек «ялт» этиб Бобурга қаради. Ҳозир тирик қолган темурийлар орасида Бобурдан бошқа одам бу ишни эпюлмаслиги унинг кўнглидан ўтди. Аммо қўшин кимники бўлса, ҳокимият ҳам ўшаники экани азалдан маълум. Хадича бегим ўғлининг ҳокимиятига ҳеч кимни йўлатмаслиги ҳам аниқ.

Бобур унинг кўнгли учун: «Ягона саркарда — Музаффар мирзо бўлсинлар!» — демоқчи бўлди-ю, орқароқда Зуннунбек ўтиргани эсига тушди. Зуннунбек бу гапни Бадиуззамон мирзога етказса, икки орага нифоқ тушади.

— Бош саркарда ким бўлишини ҳазрат оғанилар ўзлари ҳал қилмоқлари керак, — деди. — Базмларни тўхтатиб, бутун эътиборни мудрофаага қаратмоқ керак. Ҳар бир кун ганимат, ҳазрат бегим!

Хадича бегим Зуннунбек билан Бурундукбекка мурожаат қилди:

— Жаноб амирлар, сизларнинг фикрларингиз қалай?

Зуннунбек ўсиқ қошларини диккайтириб, кўзларини Бобурга қатъият билан тикди:

— Амирзодам Шайбонийхоннинг Мовароуннаҳрдаги ғала-

баларию хунхўрликларидан бизни огоҳ қилганлари яхши. Аммо Шайбонийхоннинг Мовароуннаҳрда синмаган қиличи Хуросонга келиб, албатта синур! Мен бунга аминмен, ҳазрат бегим! Шунинг учун ортиқча ташвишу таҳликага ўрин йўқ деб ҳисоблаймен.

Зуннунбек ишонч ва эътиқод билан айтган бу сўзлардан Хадича бегим дарҳол енгил тортди. Бобур эса Зуннунбекқа таажжуб бидан тикилиб деди:

— Кароматингиз илоҳо тўғри келсин, жаноб амир! Аммо бу кароматга қандай асослар бор?

— Бу кароматни мен эмас, Ҳиротнинг энг обрўли валийлари қилмишлар.

Зуннунбек шундай деб Хадича бегимга нийманиброқ қараб қўйди. Бу қарашнинг маъносини тушунган Хадича бегим Бобурга кулимсираб изоҳ берди:

— Ҳиротнинг Қутб номли машҳур валийси бор. Шу вақтгача Қутб нимани каромат қилган бўлса, ҳаммаси тўғри чиқмиш. Қутбга тушида аён бўлурки, Шайбонийхоннинг қиличини амир Зуннунбек синдирурлар. Мўътабар мунажжимлар юлдузларга қараб, бу кароматни тасдиқ қилдилар. Шундан сўнг валийлар Зуннунбекнинг елкаларига муқаддас фўта солиб, номларига Ҳизабрулла уивонини қўшиб айтадиган бўлдилар.

«Ҳизабрулла» — арабча «оллоҳнинг арслони», яъни «енгилмас ботир» дегани эди. Арабчани яхши биладиган Бобур бу уивоннинг маъносини тушуниб, истехзол кулимсиради:

— Жаноб Зуннунбекда арслоннинг юраги борлигига шак-шубҳа йўқ. Аммо ҳазрат бегим валийлару мунажжимларни тилга олганларида фақир Сарипулда Шайбонийхон билан масоф урушга чиққан кунларимни эсладим. Мана, жаноб Қосимбек ҳам бор эдилар. Шаҳобиддин номлик мунажжим кечаси осмонга қараб: «Саккиз юлдуз елкангизда рост турур, эртага урушга кирсангиз, зафар, албатта, сизники бўлғай!» — деб валийлик қилди. Биз шунга ишониб, Шаҳрисабдан келадиган қўмакни ҳам кутмасдан, майдонга чиқдик... Мана, ҳалигача ўшал хатомизнинг азобини тортиб юрибмиз.

Бобурнинг гапларидан Хадича бегимнинг юзлари тундлашиб, лаблари атрофида бурушиқлар пайдо бўлди. Зуннунбек эса ўтирган жойида асабий тўлганиб:

— Амирзодам, ниятни яхши қилмоқ керак! — деди. — Ҳиротнинг валийлари Самарқанд мунажжимларидек нодон эмаслар! Сарипулдаги хатони Ҳиротдай улуг шаҳарда ҳеч ким такрор этмағай!

Зуннунбек кўзлари ёниб, телбаланиб гапирганини кўрган Бурундукбек уни босишга тиришди:

— Жаноб Зуннунбек, олий меҳмон бизга яхшилик истаб Кобулдай жойдан келмишлар. Вазият хатарли эканлиги рост. Шошилич чоралар ўйламоқ керак!

Хадича бегим баҳслашувчиларни мулойимлик билан яраштириб қўйишга ҳаракат қилди:

— Жаноб Зуннунбек, вазият чиндан ҳам жиддий, бепарво бўлмаслик керак. Аммо жаноб Бурундукбек ҳам бир нарсани унутмасинлар: мағлубиятни кўп кўрган одамга хатар гоҳо аслидан каттароқ кўринур. Амирзодам, сиз кўп ташвиш чекманг. Шайбонийхон бизга тажовуз қилса, ўз тажовузидан ҳалок бўлур!

* * *

— Хадича бегимдек кўпни кўрган малика шайхларнинг хушомад гапига ишониб юрганларидан мен ҳайрон,— деди Бобур эртаси куни Боғи Жаҳонорода Бадиуззамон мирзо билан гаплашиб ўтирганда.

Гавдасининг шертахлитлиги ва кўзининг қисқлиги отаси Хусайн Бойқарога ўхшаб кетадиган Бадиуззамон мирзо истехзо билан кулимсиради:

— Ҳайрон бўлманг, амирзодам. Не қилса ҳам аёл киши-да, қисқа ўйлаб ўрганган.

— Аммо бу калтабинликнинг қасрати ҳаммага уриши мумкин-ку, ҳазратим?

— Начора? Суюкли фарзандимиз Мўмин мирзо ҳам шу бегимнинг қасратидан ҳалок бўлиб кетди!

— Ҳазратим, раҳматлик отангиз кайф устида қилган фожиавий хатони энди унутинг!

— Унутолмаймен, чунки айб марҳум отамда эмас эди! Султон Соҳибқирон Мўмин мирзони беҳад яхши кўрар эдилар, шеърларини ёд билар эдилар. Авваллари отамнинг менга ҳам меҳрлари яхши эди. Ахир мен — тахт вориси эдим! Хадича бегим мен билан отамни душман қилишнинг йўлини излар эди. Мўмин мирзо асир тушгач, бу йўл топилди — уни ширакайф подшоҳнинг фармони билан ўлдирдилару мен билан отамни хундор душманга айлантирдилар. Шундан кейин бегимнинг ўгли Музаффар мирзо менингни ўрнимга валиаҳд бўлди. Бугунги шерики подшоҳлик ҳам мана шу бегимнинг ихтироси! Мен аниқ биламен: бегим мени муваққат тождор деб билурлар. Мени йўқ қилиб, Музаффар мирзони ягона подшоҳга айланттиришнинг қулай пайтини пойламоқдалар!

Бобур Бадиуззамон мирзога Шайбонийхонни эслатди:
— Ҳазратим, Шайбонийхон ҳақида не янги хабарлар бор?

— Хон Хоразмни олиб, Самарқандга қайтган эмиш...

— Ундоқ бўлса, хон энди Хуросон юришига чиқмоқчидур? — сўради Бобур.

— Дарҳол-а? Хоразм юришидан сўнг бирор йил дам олмасмикин?

Бадиуззамон мирзонинг тусмол гаплари — унинг душман орасидан аниқ хабар юбориб турадиган махфийси йўқлигидан далолат берарди. Ўз инисининг барча майдачуйда сирларини билиб туриш учун беҳисоб махфийлар юбориб қўйган подшоҳ бу ишни ашаддий душмани Шайбонийхонга нисбатан қилмаётгани Бобурни танг қолдирди.

— Ҳазратим, Шайбонийхоннинг реву рангини¹ фақир озроқ кўрганмен. Хоннинг махфийлари ҳозир Ҳиротда дарвеш, ё савдогар, ёки навкар қиёфасида юриб, барча зарур хабарларни Самарқандга етказиб турган бўлсалар керак.

Бобурнинг койиниб гапирганини сезган Бадиуззамон мирзо кинояомуз кулди:

— Амирзодам, сиз ҳам шохсиз, эҳтимол, сизнинг махфийларингиз Самарқанддан янги хабар юборгандирлар?

— Мен сизни отамдек эъзозлаймен, ҳазратим. Гап махфийларда эмас. Фақир тажрибадан шуни биламенки, Шайбонийхон чарчаган аскарларини босиб олган вилоятда дам олиш учун қолдириб, аввалдан дам олиб ётган қўшини билан дарҳол янги юришга отланур. Унинг бутун кучи шундаки, барча оға-ини, қариндош-уруғлари билан бир тан-бир жон бўлиб, майдонга чиқур. Биз бу хатарли ёғий қарши-сида ички низоларни унутмоғимиз керак. Биз ҳам бир тан-бир жон бўлиб, ягона саркарда бошчилигида жангга астойдил тайёрланиб кирмасак, оқибати ёмон бўлиши эҳтимолдан йироқ эмас.

— Ягона саркарда, дедингизми? Ким бизга саркарда бўлмоқчи, амирзодам?

Биринчиликни талашаётган бу икки оға-ини «Менга бўлмаса, унга ҳам бўлмасин!» — дейишга тайёр эканлиги Бобурга ҳозир аниқроқ сезилди. Рақиб оға-ини талашаётган мамлакат улардан фақат бирига ёки амакиваччалари

¹ Реву ранг — шумлик, ўз ишига пухталиқ.

Бобурга текканидан кўра етти ёт бегонага теккани афзалроқ. Чунки бегоналар уларнинг бунчалик бахиллигини келтирмас эди.

— Наҳотки жангга ҳам алоҳида-алоҳида чиқмоқчисизлар? — деди Бобур.

— Начора? Ҳар кимнинг ўз чериги, ўз саркардаси бор. Мен Музаффар мирзога ишонамаймен. Аммо сиз билан ҳар қандай жангга бирга киришга тайёрмен. Чунки сизга ишонамен. Амирзодам, сиз Ҳиротда қолинг! Неки даркор бўлса айтинг! Муҳайё қилурмиз.

Бобур оғанининг фақат шу нуқтада яқдил эканини сизди. Жанг кўрган Бобур бутун бек ва навкарлари билан Ҳиротда қолса-ю, вақти келиб, жангга бирга чиқса, уларнинг мушкуллари осонроқ бўладиганга ўхшарди.

Аммо оғанининг қўш ҳокимияти Бобурга таги чириб тешилган кемага ўхшаб кўринарди. У бу кемада қолса паймонаси тўлган оғанига қўшилиб фарқ бўлиши муқаррарлигини тобора аниқ ҳис қилмоқда эди.

4

Эртаси куни пешин намозидан кейин Унсияга Бобурни кўриш учун келган мавлоно Фазлиддин навкару савдарларнинг кўч йиғиштираётган ва сафарга ҳозирланаётганларини сизди. Йўлакда тоғасига дуч келиб қолган Тоҳир:

— Э, хайрият, ўзингиз келдингиз, мулла тоға! — деди.

— Ҳа, не гап жияним?

— Эртага тонгда Ҳиротдан жўнаб кетурмиз.

— Кобулгами?

— Ҳа,— деб шивирлади Тоҳир.— Лекин подшоҳлар буни билмасинлар. Рухсати олий шаҳар ташқарисида қишламоқ учун берилди. Ҳаммага «Хуросонда қишлагаймиз», деб эълон қилинди. Сиз ҳам билдирманг.

Мавлоно Фазлиддиннинг руҳи тушиб:

— Оббо,— деди.— Бизни сағирдек мунғайтириб кетар экансизлар-да?

— Қиш чиқса, сиз ҳам Кобулга кўчиб боринг. Ўтган гал учрашганингизда Бобур мирзо ўзлари таклиф қилдилар-кў.

— Кўчиб бориш осонми, жияним? Бир ой, қирқ кунлик йўл... Аёлманд одаммиз...

Мавлоно Фазлиддин хомуш бўлиб Бобурнинг қабулхонасига қараб кетди. Бир вақтлар Алишер Навоийнинг қабулхонаси бўлган кўркам таъобийнинг заррин ўймакор

эшиги олдида ясовул йигит турган эди. У ичкарига кириб, тез қайтиб чиқди-ю, эшикни очиб, мавлонога йўл берди.

Уй тўрида Бобур билан суҳбатлашиб ўлтирган кишиларни мавлоно бир қарашда таниди. Навоийнинг надимларидан бўлган қирқ беш ёшлардаги кўса одам — шоир Султон Муҳаммад эди. Ундан берига машхур хаттот Султон Али Машҳадий чўккалаган. Бобурнинг ўнг томонида Камолиддин Беҳзод ва Хондамир ўтиришибди.

Бобур мавлоно Фазлиддин билан ўрнидан туриб кўришар экан, бошқалар ҳам оёққа турдилар. Мавлоно Фазлиддин пойгаҳга ўлтирмоқчи эди, ёши ундан кичикроқ бўлган Хондамир:

— Сиз олий меҳмонимизнинг ватандошисиз,— деб уни ўзидан юқорига ўтказди.

Маъюсланиб ўлтирган Хондамир суҳбатни тўхтатган жойидан давом эттириб:

— Ажаб кажрафтор фалак бу! — деди.— Амирзодам, сиз Ҳиротнинг юксак санъатию ажойиб истеъдодларига хавасингиз келиб сўзладингиз. Биз эса бугунги Ҳиротга худо сиздек маърифатлик, сиздек истеъдодлик подшоҳ бермаганидан доғдамиз!

Бобур ўзини шунча иззат-икром билан меҳмон қилган подшоҳларнинг шаънига тегадиган гап айтишни истамас эди.

— Мавлоно, подшоҳларингиз ҳам маърифатли зотлар,— деди.

Қалта жингалак соқоли ўзига ярашган нафис юзли озгин Беҳзод киноя билан деди:

— Амирзодам, подшоҳларимизнинг бири офтоб бўлса, бири моҳтоб. Халқ орасида ҳозир бир шеър тарқалмиш. Мазмуни шуки, Ҳусайн Бойқаро ҳақиқий подшоҳ эди. Унинг икки ўғли икки тахт устида ўлтириб, бири «оймен» деса, бири «қунмен» дерлар, эртаю кеч бир-бири билан рақобат қилурлар. Буларнинг ўзаро курашлари худди шатранж тахтаси устидаги шоҳларнинг курашларига ўхшайдир. Чунки бу иккови оталаридек ҳақиқий шоҳлар эмас, балки шатранж тахтаси устидаги ясама шоҳлардир.

Бу ўхшатиш Бобурнинг икки подшоҳдан олган таассуротларига шу даражада мос келар эдики, у беихтиёр қулиб юборди.

— Лекин оға-инининг рақобати — шатранж ўйинига ўхшашлиги рост!

— Фалокат шундаки,— деди Хондамир,— бу ўйинда улар Хурсонини бой бермоқдалар! Буни уларга сўз билан уқтириш эса имкондан холи!

Шоир Султон Муҳаммаднинг кўзлари исёнкорона чақнади.

— Уларга буни сўз билан эмас, фақат шамшир билан уқтириш мумкин!

Хондамир эшик томонга хавотирли кўз ташлаб қўйди. Бир вақтлар Алишер Навоийдай одамга махфийларини юбориб қўйган подшоҳлар Бобурнинг кетига ҳам одам қўйган бўлишлари мумкин эди.

Султон Али Машҳадий суҳбатни хатарли мавзулардан нарироқ олиб кетиш учун ёнида турган чарм жуздонни очди-да, бир даста зарварақ олди.

— Фақир олий меҳмонимизнинг ғазалларидан бир нечасини кўчириб келган эдим.

Варақлар қўлдан-қўл ўта бошлади. Хаттотнинг ажойиб санъати туфайли ҳар бир ҳарф нафис ва тирик тасвирга айланган эди. Хондамир сатрларга кўз югуртириб:

— О! — деди ҳайрат билан.— Кўп шоирлар «ёр»ни илоҳийлаштириб, бутун нажотни «ёр»дан излаб ўрганмишлар. Амирзодам бу одатий алданишларга қарши исён қилган каби ёзмишлар:

Жонимдан ўзга ёри вафодор топмадим,
Кўнглимдан ўзга маҳрами асрор топмадим...
Бобур, ўзингни ўргата кўр ёрсизки, мен —
Истаб жаҳонни, шунча қилиб ёр топмадим!

— Мардона сўзлар! — деди Бехзод Бобурга қараб.— Сизнинг марта ҳақсиз! Одам ўзига ҳам ишонмоғи керак!

— Миннатдормен, мавлоно.

Шоир Султон Муҳаммадга иккинчи шеърнинг матлаи ёққан эди.

— Эшитинг, жаноблар:

Сендек менга бир ёри жафокор топилмас,
Мендек сенга бир зори вафодор топилмас.

Мавлоно Фазлиддин оғир тин олди:

— Ҳозиргина сўзлашган дардимизни айтмишлар!

Бобур мақтовлардан хиёл ўнғайсизланиб:

— Жаноблар,— деди,— мен сизлардек санъаткорлар билан учрашиб, суҳбатлашганим учун тангрига шукур қиламен. Фақирининг қоғозни қоралаб ёзган сатрларим мавлоно Машҳадийнинг тенгсиз санъатлари туфайли сизларга шунчалик манзур бўлди. Жоиз бўлса, ғазаллардан хотира учун мавлоноларга бир нусхадан бермоқчимен.

Айни муддао! деди Хондамир қувониб.

Бобур газалларидан итаълаб уч-тўрт нусхадан кўчиртиргани эди. Хондамирга, Беҳзодга, Султон Муҳаммадга ўзларини ёстиргани газаллардан бир нусхадан берди. Улар шоирни хаттоғининг ҳурматлари учун газал битилган зарварақларини олиб, пош каби кўзларига суртиб қабул қилдилар. Бобур сўнги газалдан бир нусхасини мавлоно Фазлиддинга узатиб:

— Мавлоно, биз сиз билан фақат ватандош эмасмиз, ҳамдарду ҳасратдошимиз, — деди.

Мавлоно Фазлиддин газални олиб кўзига суртди-ю:

— Мен амнимен, Ҳиротда битилган ушбу газал тез кунда Самарқанду Андижонга ҳам етиб борур,— деди.— Худо амирзодам билан бизни ҳам ватанга соғ-саломат қайтулик қилсин!

— Айтганингиз келсин, мавлоно!

Бобур Қосимбекни чақиртирди ва Султон Али Машҳадийга газалларни санъаткорона кўчирганлиги учун олтин тугмалик кимхоб тўн кийдирди.

Сўнг у мавлоноларни ҳовлига кузатиб чиқди. Ҳаммалари хайрлашаётганларида меъморга қараб:

— Балки келгуси йилда Кобулга борурсиз, мавлоно? — деди.— Рост, катта меъморлик обидалари қуришга ҳали имконимиз йўқ. Кобул ҳозир Ҳиротга нисбатан чекка бир вилоят. Улуғ санъаткорларга макон бўларлик саройимиз йўқ. Лекин худодан умидимиз борки, келгусида толе бизга ҳам қулиб боққай, биз ҳам улуғ санъаткорларга макон берадиган кунларга етгаймиз!

— Таклифингизни бажонидил қабул қилурмен! — деди мавлоно Фазлиддин.

— Амирзодам,— деди Хондамир.— Алишер Навоийнинг даргоҳларида қилган покиза ниятингиз илоҳим рўёбга чиқсин! Илоҳим ҳазрат Алишернинг руҳлари ҳамиша сизга мададкор бўлсин!

Бу тилакка ҳаммалари сидқидилдан қўшилиб, юзларига фотиҳа тортдилар.

* * *

Эрталаб кун чиқаётганда Бобур хос навкарлари ва беклари билан Ҳиротнинг ташқарисидаги кенг боғ-кўчадан кетиб борар эди. Кўчанинг икки томонида Ҳирот аъёнларининг гиштин деворли, кошникор гумбазли кўшк ва чорбоғлари бор эди. Салобатли бир боғ ҳовлининг баланд

девори ёнидан ўтаётганларида, девор тепасидан кимдир уч-тўртта атиргул ташлади. Тўк қизил рангли гуллардан бири Бобур минган саман отнинг ўсиқ ёлига келиб тушди. Гулнинг тиканлари от ёлига илиниб қолганини кўрган Бобур девор тепасига қаради-ю, ёш бир қизнинг қийғоч қошларини ва қош устига бостириб кийган гулдор тоқисини кўрди. Кейин у от ёлига илиниб қолган гулни кўлига олиб, лабига яқинлаштирди.

Узоқда ястаниб турган Занжиргоҳ тоғларининг баланд чўкқиларига қор тушган эди. Хиротнинг кеч кузида нима ҳам бўлиб очилган бу гулнинг ажиб ҳиди бор эди. Бобур гулнинг хуш бўйи димоғига урилган заҳоти жиловни бенхтиёр тортиб, отини тўхтатди. Узангига оёқларини тираб, эгардан бўй чўзди-да, девор тепасидаги қизга тикилиб қаради. Энди унга қизнинг олов чақнатиб турган қолқора кўзлари, бу кўзларга ниҳоятда ярашган гулранг ёноқлари аниқ кўринди. Бобур бу кўчадан аввал ҳам ўтган эди. Қиз авваллари ҳам уни кўриб, таниб қолган эканми, кўзлари мўлтираб ва уялиб бош эгди. Бу унинг салом берганимиди ёки хайрлашганимиди? Ўн етти-ўн саккиз ёшлардаги бу қизнинг жозибасию мўлтираб бош эгиши Бобурга шундай таъсир қилдики, у бир лаҳза нима қилишини билмай эсанкираб турди.

Бу орада бошқа мулозимлар ҳам қизни кўриб отларини тўхтатган эдилар. Бобурни Музаффар мирзонинг Хирот бўйича доруғаси Юсуф Алибек кузатиб бормоқда эди. Қирқ ёшлардан ошган кўнгилчан бу бек девор тепасидаги қизни таниб кулди-ю:

— Ие, Моҳиммисиз! — деди.— Оббо, Моҳчучук-ей, катта қиз бўлиб қолибсиз-а!

Қиз гўё энди ўзига келди, «лип» этиб, бошини девор ортига олди-ю, кўздан ғойиб бўлди.

Юзи қандайдир ички оловнинг тафтидан қизарган, кўзлари ғалати чақнаган Бобур Юсуф Алибекдан шошиб сўради:

— Ким? Ким дедингиз?

— Амирзодам, бу ховли Султон Соҳибқироннинг узоқ қариндошларидан бирига қарашли. Қизнинг отаси Ҳусайн Бойқароннинг нуфузли девонбошиларидан эдилар. Борди-келдимиз бор эди.

— Ҳозир бормилар?

— Борлару, лекин... давлат ишидан четланмишлар.

— Нечун?

— Билмадим, ҳозирги подшоҳларимиз билан оралари яхши бўлмаса керак. Қандаҳоргами, Ғазнагами кўчиб кетиш тараддусида эмишлар деб эшитдим.

Отлар юриб бормокда эди. Бобур Моҳим деб аталган қизнинг тобора узокда қолаётганини ўйлаб, кўнглида кучли бир армон сезди. Йигирма кун Ҳиротда юриб, бу қизни нега фақат энди, жўнаб кетаётган пайтда кўрди?

Бобур ҳали ҳам қўлида ушлаб бораётган гулга қаради. Бояги гўзал қиз Ҳиротнинг бутун нафосатини ўз жонибаси билан бирга мана шу гулга муаттар ҳид каби жойлаб берганга ўхшар эди.

Бобур гулни яна бир ҳидлади-да, бошидаги салласининг қатига кўзга унча ташлаинмайдиган қилиб қистириб қўйди.

5

Қиш осойишта ўтди-ю, авжи баҳор кунларида Шайбонийхон эллик минг қўшин билан Мурғоб дарёсидан ўтиб, Хуросонга бостириб кирди. Бадиуззамон мирзо билан Музаффар мирзо Ҳиротнинг шимолида Қораработ ва Тарноб деган жойларда икки бўлак қўшин, икки алоҳида саркарда билан ланж бир аҳволда ўтирган эдилар.

Шайбонийхоннинг Убайдулла Султон ва Темур Султон бошлиқ отлиқ аскарлари бу икки қўшиннинг орасига тиндай ёриб кирди-ю, кучли бир зарба билан икки подшоҳни икки томонга улоқтириб ташлади. Мирзолар кўпчилик бек ва навкарлари билан тумтарақай бўлиб қочдилар. Фақат Зуннунбек арғун ўзининг Ҳизабрулла бўлишига ва Шайбонийхоннинг қиличини синдиришга ҳали ҳам ишонгани учун бир неча юз навкарини хон қўшини қаршисига бошлаб чиқиб, охириги нафаси қолгунча олишди. Убайдулла Султоннинг отлиқлари ҳаял ўтмай уни эгардан уриб туширдилар, бошини кесиб найзага санчдилару Шайбонийхон минган отнинг оёғи тагига элтиб ташладилар.

Жанг майдонидан ҳаллослаб қочган Бадиуззамон мирзо Ҳиротга ҳаммадан олдин етиб келди, аммо шаҳар ичига кирмади. Боғи Жаҳонорода бир неча соат тўхтаб, отларига дам берди-ю, олтин-кумуш ва жавоҳирларидан кўтарганича олди. Унинг хотин-болалари шаҳар ичида — арқда эди. Орқадан қувиб келаётган ёв таҳликасидан қўрққан Бадиуззамон мирзо шаҳар доруғасини чақириб қалъа дарвозаларини бекитиб олишни буюрди. «Қамалда қолишдан қўрқманглар, биз Қандаҳор томондан қўшин тўплаб келиб, сизларни халос қилурмиз», деган қуруқ ваъда билан хотинлари ва болаларини қўрғон ичида қоддириб ўзи жанубга қараб шошилди.

Ҳиротга кечаеи етиб келган Музаффар мирзо ҳатто енгилш ва қочишда ҳам акаси билан мусобақалашган каби иш қилди. У ҳам шаҳар ташқарисидаги Боғи Сафидда бир неча соат тўхтаб, нафасини ростлагач, энг керакли нарсаларини олди-ю, ёв етиб келиб қолишидан кўрқиб, аркка кирмади, онаси ва хотинларини қалъа ичида қолдириб, дарвозаларни бекитишни буюрди, у ҳам «Қамалда қолсаларинг ўзим келиб қутқарамен!»— деганича Астрободга қараб қочди.

Мирзоларни кутганидан ҳам осон енгган Шайбонийхон шаҳардан ўн беш чақиримча шарқдаги Қахдистон деган хушҳаво ўтлоққа тушиб, шоҳона чодирларини тикдирди.

Ҳадича бегим Ҳиротда бор аъёнлар ва кўрикчи аскар саркардаларни тўплаб, кўрғон дарвозаларини бекитишга уришиб кўрди. Аммо икки оғанини подшодан биронтаси Ҳирот мудофаасига бош бўлмасдан қочиб кетганлиги ҳамманинг руҳига ёмон таъсир қилган, қамал азобини ҳеч ким зиммасига олишни истамас эди. Хоннинг ғазабига қолмаслик учун Ҳиротни унга жангсиз топширишни маъқул кўрувчилар кўп эди. Ахири Ҳирот шайхулисломи Тафтазани бир неча нуфузли кишиларни ёнига олиб, Ҳирот шаҳрининг калитларини қимматбаҳо совға-саломлар билан бирга хонга элтиб топширди.

Қахдистоннинг оромбахш баҳор ҳавосида улкан ғалабадан таъби очилиб юрган Шайбонийхон энди жозибали бир аёл билан қовушгиси келар эди. У Ҳиротнинг энг таърифи кетган гўзал жувони — Музаффар мирзонинг йигирма ёшлик суюкли хотини Қорақўз бегим деб эшитган эди. Тошкентда ва Андижонда Қорақўз бегим деб от чиқарган қиз-жувонлар қанчалик чиройлик бўлганини хон яхши билар эди. Ҳиротлик Қорақўз бегимнинг асл номи бошқа бўлса ҳам қора кўзли гўзаллар орасида энг чиройлиси бўлгани учун эл орасида шу исм билан танилган эди.

Шайбонийхон доимий одатини қилиб, бу жувонга ғойибона ошиқ бўлгани ҳақида қисқа бир ғазал ёзди-ю, шоир Муҳаммад Солихни орага қўйиб, шеърини бегимга етказдирди.

Музаффар мирзо номардлик қилиб хотинларини ташлаб кетганидан қаҳри келган Қорақўз бегим хоннинг ғазалини хуш қабул қилди. Ҳадича бегим бошлиқ бошқа келинлар Ҳиротнинг энг мустаҳкам истеҳкоми бўлган Ихтиёриддин қалъасига кириб бекинганларида Қорақўз бегим улардан ажралиб қолди ва отасининг шаҳар ташқарисидаги чорбоғига кетди. Кейин бегимни ҳаммомда ювинтиришиб, келин-

лардай ясантиришди-ю, хон юборган шоҳона маҳофага солишиб Каҳдистонга олиб кетишди.

Кечки пайт Хиротнинг шайхулисломи ва қозиси хон қароргоҳига чақирилди.

Бугун одатдагидан ёнроқ кўринаётган Шайбонийхон шарият пешволарини маҳфури¹ гилам тўшалган боргоҳда қабул қилди. Хоннинг ёнида турган мулла Абдурахим Қорақўз бегимни бугун имоми замонга никоҳлаш ҳақида гап очди.

— Бугунми? — деб шайхулислом қозига саросима бўлиб кўз ташлади. Қози бу қарашнинг маъносини тушунди.

Қорақўз бегим Музаффар мирзонинг никоҳида эди. Эрининг ташлаб кетганига беш кун ҳам бўлгани йўқ. Ҳолбуки, бир мусулмоннинг никоҳидаги хотиннинг иддаси бўлади, уч ой ўтмагунча бошқа кишига никоҳлаш мумкин эмас. Шарият буни қатъиян ман қилган!

Шайхулислом хоннинг оёғи тагидаги гиламни ўқиб, шу тўғрида гап бошлаган эди, хон унинг сўзини кесди:

— Шариятни бизга ўргатманг! Бегимни ҳезалак эри бундан тўрт ой олдин уч талоқ қўйган. Сиз уч ой дейсиз! Бегим тўрт ой беша очик юрган! Наҳотки, сиз, шарият пешволари, бундан беҳабарсиз?!

Хоннинг қаҳридан кўрқиб кетган шайхулислом оппоқ соқолини маҳфури гиламга суркаб яна ер ўпди:

— Хабардормиз, ҳазратим!

— Хабардормиз! — деди қози ҳам гиламни ўқиб.

Улар Музаффар мирзонинг бундан тўрт ой бурун аччиқ устида хотинини уч талоқ қўйганини билар эдилар. Бироқ кейин мирзо хотини билан яна ярашганда шайхулислом билан қози бегимни эрига қайтадан никоҳлаб берган эдилар. Лекин бегимнинг аввалги ёш эри тилга олинганидан рашки келиб, сабр қосаси тўлиб турган хонга буни айтиш — ўлимни бўйнига олиш билан баробар эди.

Шарият пешволари энди бу тўғрида «чурқ» этмасдан никоҳ ўқишга ҳозирландилар...

* * *

Салласига лаъл ва гавҳар билан бирга уқпар ҳам қадалган Шайбонийхон кечаси бегимнинг хобгоҳига шаҳдам қадамлар билан кириб кетди. Хобгоҳининг ташқи бўлмасида хоннинг ҳарамига қарайдиган кекса бека, иккита би-

¹ Маҳфури — гулларига шеърый байтлар қўшиб тўқилган подир иппак гилам.

чилган ҳабаш қул ва бегимга эргашиб келган иккита каниз навбатчилик қилиб қолишди.

Бир вақт хобгоҳ эшиги шахт билан очилди-ю, елвагай тум кийган, бошидаги оқ шаббўши¹ бир ёнга оғиб кетган Шайбонийхон чиқиб келди. Унинг ранг-қутти ўчган, лаблари пирпирайди.

— Беҳаё экан! Бузилиб кетган экан! Безбет!

Ҳарам бекаси бегимнинг канизлари билан бирга шоша-пиша ичкарига кирдилар. Тўшак четида юзини қўллари билан бекитиб олган гўзал жувон елкалари силжиниб, пиқ-пиқ йиғлар эди.

Маълум бўлишича, Қоракўз бегим Ҳиротнинг сўнги подшолари яхши кўрадиган ва олний табақа аёллари «ғалвира» деб от қўйган шўх бир қилиқ қилади. Бу билан у эллик олти ёшлик хонни қойил қилмоқчи, балки унинг илҳомини оширмоқчи бўлади. Бироқ қўн марта уйланган, қанча қиз-жувонлар билан бир ёстикқа бош қўйган хон умрида бундай қилиқларни кўрмаган экан. У аввал саросимага тушадди, кейин Қоракўз бегимнинг аввалги ёш эрини эслайди. Бегим бундай қилиқларни аввалги эрига ҳам қилганларини кўз олдига келтиради-ю, ҳафсаласи бирдан пир бўлади ва сўкиниб ўрнидан туриб кетади.

Бегим бу шўхликни хонга ёқиш учунгина қилганини, Ҳирот аслзодалари орасида бу жоиз эканини канизлар ҳарам бекасига тушунтирдилар. Бегимга раҳми келган ҳарам бекаси хоннинг олдига чиқиб, уни жаҳлидан тушширишга тиришди:

— Ҳазратим, айб фақат бу бегимда эмас! Айб унга шу қилиқни ўргатганларда! Ҳиротда беҳаёллар қўп экан!

— Бу шаҳар — диндан қайтган рофизийлар² уяси! — деди хон ҳам энди ғазабини бошқа томонга йўналтириб.— Бу жувоннинг қайнонаси Хадича бегим — безбетларнинг энг каттаси! Энг аввал ўшани тутиб жазосини бериш керак!

Шайбонийхон хобгоҳга қайтиб кирмади. Қоракўз бегимни тавфиқ ва ҳаё йўлига қайтаришни ҳарам бекаси билан ҳабаш қулларга топширди-ю, ўзи боргоҳга жой солдириб ётди. Аммо тонг отгунча ухлай олмади.

Эрталаб азонда боргоҳдан ҳиргоҳга ўтди-ю, лашкарбошилардан Убайдулла Султонни, мулозимлардан Муҳаммад Солиҳни, мавлоно Биноийни ва Мансур бахшини чақиртирди.

¹ Ш а б б ў ш — кечаси кийиб ётиладиган дўннисимон енгил бош кийими.

² Р о ф и з и й л а р — исломнинг сунний мазҳабидан шиа мазҳабига ўтганлар ва умуман, мусулмончиликдан чиққанлар.

Энг аввал жияни Убайдулла Султонни сўроққа тутди:

— Ихтиёридин қалъаси олиндим, йўқми?

— Хон ҳазратлари, бугун-эрта олинғусидир!

— Битта бузуқ хотин бекитиб ётган қалъани шунча лашкар билан ҳалигача ололмайсан! Ё ўзим бориб олайми?

Хонга кечаси бир бало бўлганини ҳамма сезд. Йигирма ёшли девқомат Убайдулла Султон улкан гавдасини эгиб, хонга икки букилиб таъзим қилди:

— Ҳазратим, қалъани шу бугун оламиз. Ҳозир мен ўзим бориб ҳамла қиламен!

— Ҳамла қиламен деб, лашкаринг деҳқонларнинг экинини топтаб кетибди. Биз Ҳиротга меҳмон бўлиб келганимиз йўқ! Деҳқоннинг ҳосили ўзимизга керак! Боғларни ҳам от босмасин! Мевасини ўзинг ейсан! Сен теурийзодаларнинг уруғини қурит! Ўшаларга хизмат қилиб қутурган шиаларни бос!

— Барча айтганларингизни бажо келтирамиз, ҳазратим.

Убайдулла Султон кетишга чоғланди. Шунда Шайбонийхон:

— Агар қалъани бугун оладиган бўлсанг, Мансур бахшини ҳам олиб кет!— деди.— Бу бахши яна бўйдоқ юрибди. Бунга хотин чидамайди. Хадича бегим шунга ўхшаган зўр бир эр тополмай юрган эмиш. Қалъани олсанг, ўша хотинни Мансур бахшига никоҳлаб берасан!

Семириб, аввалгидан баттар йўғонлашиб кетган ўтовдай катта Мансур бахши:

— Айналайин сиздан, хон ҳазратлари! — деди.— Самаркандда никоҳлаб берган Зухра бегимингиз ўлгандан бери сўққабошлик жонимга тегиб юрган эди!

— Лекин сен бахши ҳадеб нафсингни ўйлай берма! — деди хон.— Ҳиротнинг энг катта бойликлари Хадича бегимнинг қўлида. Менга ахбороти келган, бу хотин олтиндан гул ясаган эмиш, барглари зумраддан эмиш. Гулга қўниб турган булбулнинг оғзида гавҳари бор эмиш.

— Хон ҳазратлари, бунисени мен сизга топтириб бераман! — деди Мансур бахши.— Ҳазинаси ҳам сизники! Менга ўзи бўлса бас!

Бу шўх гаплардан кейин Шайбонийхоннинг чехраси сал очилди-ю, Убайдулла Султон билан Мансур бахшига кетиш учун руҳсат берди. Муҳаммад Солиҳ билан мавлоно Биноий хон қаршисида ҳамон қўл қовуштириб, сёқ устида сукут сақлаб туришарди. Қизил кимхоб кўрпача устида чордана қуриб ўтирган хон Муҳаммад Солиҳга қараб:

— Сен, шоир, нуқул Ҳиротни мақтар эдинг, — деди.— Ҳиротнинг ҳаёсини йўқотган бетавфиқларнинг уяси экан-ку!

Муҳаммад Солиҳ хоннинг бошига кечаси қандай ҳангома тушганини аллақачон пайқаган эди. Шайбонийхон ҳозир кексалик заифлигига чора тополмай алами келаётгани ҳам сезилиб турарди.

Муҳаммад Солиҳ унинг ярасига туз сепмаслик учун гапни бошқа ёққа бурди:

— Ҳазратим! Ҳиротнинг ахлоқини темурийлар бузган. Сиз темурийларни жангда жисмонан енгдингиз, энди уларни маънан енгмоқдасиз! Имоми замонамизнинг ахлоқий покликлари ҳиротликларга ибрат бўлмоғи керак.

— Гапга чечансен! Лекин Ҳиротнинг ахлоқини шоирлар ҳам бузганини нега айтмайсен! Темурийларни мақтаб, беҳаё шеърлар ёзиб лаган-лаган олтин олган шоирларнинг бўлмаганими?

— Бўлган, хон ҳазратлари. Мана, мавлоно Биноийни Ҳиротдан ана ўшанақа шоирлар кеткизиб юборган!

Шайбонийхон мавлоно Биноийга юзланди:

— Шундайми?

— Шундоқ, ҳазратим! — деди Биноий таъзим билан.

— Ундай бўлса мавлоно Биноий адолат қиличини белига тақиб, ёмон шоирлардан қасдини олсин! — деди хон.— Бизнинг ғолиб навқарларимиздан эллик-олтмиштасини мавлононинг ихтиёрига беринг. Темурийларнинг олтинидан қутуриб юрган шоирларнинг молу мулки мусодара қилинсин! Барча олтинларини тортиб олиб хазинага топширинг! Кейин бу шоирларнинг кўзи очилиб, тавфиқу ҳаё йўлига қайтиши осон бўлади!

Мавлоно Биноий безовталаниб Муҳаммад Солиҳга қаради. У бир вақтлар ўзига алам ўтказган баъзи Ҳирот шоирларини ҳар қанча ёмон кўрса ҳам, лекин ёнига аскар олиб, бировларнинг уйини тинтишни, молу мулкини мусодара қилишни ўзига муносиб кўрмас эди. Бироқ буни хонга рўйроғ айтиш ҳам мумкин эмас эди.

— Ҳазратим, шундай улуғ вазифани фақирга ишониб топширмақ ниятингиздан сарфарозмен!.. Фақат бир андешам бор.

— Ҳўш?

— Ҳазратим, мен умримда қилич чопмаган кекса одаммен. Ёшим эликдан ошган. Бу фармони олийни жанговар бек шоир Муҳаммад Солиҳ жаноблари фақирдан юз ҳисса яхши бажарурлар! Фақир бу жанобга кучим етганича ёрдам берай!

Муҳаммад Солиҳ бу ишни ўзинга йўлатгиси келмади.

— Мавлоно, мен Ҳирот шоирларини сизчалик яхши билмаймен!

Буйруғи сансалор бўлаётганини сезган Шайбонийхон, кўзлари таҳдидли ялтираб, Биноийга тикилди.

— От инъом қилдик — миндингиз. Тўн инъом қилдик — кийдингиз. Улуфа бердик — йўқ демадингиз. Энди иш буюрсак йўқ дейсизми?!

Бошқа эътирозга ўрин келмади. Олти йилдан бери хон хизматида юрган Биноий унинг ҳозирги буйруғини бажаришга мажбур эди...

* * *

Шайбонийхоннинг ўнг қўл вазири — олтинш беш ёшлик мулла Абдурахим Ҳирот алломаларидан олтин ундиришнинг бошқа бир йўлини ўйлаб топди. Ҳирот атрофларидан ғолибларнинг қўлига тушган ўлжалар орасида сурув-сурув қўйлар ҳам бор эди. Мулла Абдурахим шу қўйлардан олтиншасини Ҳиротнинг Қинчоқ дарвозаси ташқарисидаги бозорга ҳайдаб тушишни хизматкорларига буюрди. Сўнг шаҳарга бир тўп навкар юбориб, темурийлар даврида машҳур бўлган Хондамирни, Бобурга яқинлиги билан танилган мавлоно Фазлиддини, Ҳусайн Бойқарога атаб шеърлар ёзган «кўса» лақаблик шоир Султон Муҳаммадни, яна шуларга ўхшаш беш-олти кишини қўй бозорига мажбуран олиб келтирди. Кейин мулла Абдурахимнинг ўзи ҳам бир тўп мулозимлари билан бозорга ўйноқи бир арғумоқни миниб кириб келди. Мулозимлардан бири пиёда қўл қовуштириб турган Хондамирга ва унинг ҳамроҳларига шундай деди:

— Судурлар садри Низомиддин Абдурахим ҳазратлари ўзларининг бу қўйларини фақат сизларга сотмоқчилар!

Хондамир шерикларига: «Шу билан қутулсак кошки!» — дегандай қилиб қаради-ю, кейин судурлар садрига таъзим қилди:

— Бажонидил олурмиз. Нархини айтсинлар.

Мулозим овозига тантанали тус бериб деди:

— Бу қўйлар — судурлар садрининг нафаси теккан табаррук қўйлардир. Сизлар темурийлар хизматида ҳаромхўрликка ўрганиб, бузилиб кетган одамсизлар. Бу қўйларни сўйиб еб ҳалқумларининг поклашларинг керак. Шунинг учун қўйлардан ҳар бирининг нархи олти юз динор!

Олти юз динорга битта эмас, етти-саккизта қўй олиш мумкин эди. Бироқ қўйларни судурлар садри айтган нархда олмаслик — унинг ғазабига учраш ва шафқатсиз жазога гирифтор бўлиш демак эди.

Пулдан қийналиброқ юрган мавлоно Фазлиддин безов-
таланиб сўради:

— Жаноблар, яқинда моли омон ҳам тўлаган эдик-ку?

Шоир Муҳаммад Султон истехзоли кулимсиради:

— Мавлоно, бу ноёб қўйларга ҳазратимизнинг муборак
назарлари тушган экан. Шунинг учун энди бу моли омон
эмас, балки моли имондир!

Мулла Абдурахим истехзони пайқаб қаҳри келди ва
навкарларига буюрди:

— Буларнинг ҳар бирига қўйлардан ўнга-ўнга қўшалок-
лаб беришлар! Буларни темирйларнинг олтини кутуртир-
ган! Ҳаммасининг димоғи жуда баланд! Буларни осмондан
ерга тушириб қўйиш керак. Қўйларни уйларигача ўзлари
ҳайдаб кетсин! Ҳеч ким ҳайдашмасин! Уйларигача куза-
тиб бориб, пулини ундириб келишлар! Қайси бири буй-
руқни бажармаса, молу мулкни мусодара қилиб, ўзини зин-
донга ташланглар!!

Навкарлар буйруқни бажаришга киришдилар.

Ҳиротда кўпчилик танийдиган шоир, олим ва меъмор
несиқ кунда ҳалпиллаб, сергупроқ, серчанг кўчалардан
қўй ҳайдаб кетдилар. Кейин бу «табаррук» қўйларнинг пу-
лини қарз-ҳавола қилиб бўлса ҳам тўлаб қутулдилар.

* * *

Убайдулла Султоннинг бир ярим минг навкари ўн кундан
бери Ихтиёриддин қальясининг атрофида ғивирлар, аммо
ўқ ҳам, шоти ҳам етмайдиган балаидликдаги қальяни олиш-
нинг ҳеч иложини тополмас эди. Темир дарвозаларга тўпдан
ўқ отиб кўришди, бўлмади. Кейин ер тагидан ғор қазиш-
га тушишди.

Шуни ҳисобга олмаганда, Ҳирот ҳозир бир қадар тин-
чиб бормоқда эди. Мусодара қилинадиган хазиналар бўшаб
қолган, таланадиган молу мулклар таланиб бўлган эди.

Шайбонийхон Қаҳдистондан Боғи Жаҳонорога кўчиб ке-
либ, Ҳиротнинг машҳур санъаткорларини ўз ҳузурига ча-
қиртирди. Санъат ишларини бошқараётган Муҳаммад Солиҳ
воситачи бўлиб, Бехзодни хон билан бир-икки марта учраш-
тирди. Хоннинг маслаҳатгўйи мулла Абдурахим расм чи-
зишни шиалар ва рофизийларнинг иши деб ёмон кўрса ҳам
Шайбонийхон Бехзоднинг расмлари Ҳусайн Бойқарони кан-
чалик машҳур қилганини билар, энди бу мусаввирнинг
истеъдодидан ўз шуҳрати учун фойдаланишни истар эди.

Бехзодга Шайбонийхоннинг расмини чизиш топширилди.

Мусаввирнинг илтимоси билан хонни қип-қизил кимхоб кўрна устига ўтказдилар, унинг орқасига қора баҳмат болиш қўйдилар, белига ингичка олтин камар боғлатдилар, олдига олтин муқовали кичик дафтар, қалам ва снэхдос қўйдилар. Ўттиз йилдан бери рассомлик қилиб юриб, кўнгина подшоҳларни кўрган ва улар билан муомала қилишни яхши биладиган Бехзод Шайбонийхонга ҳам фақат маътов ёқишини аллақачон пайқаган эди:

— Ҳазратимни арғумоқ от устида қилич яланғочлаган пайтларида тасвирлашим мумкин. Бироқ ҳозир сизнинг эвазўр лашкарбоши эканлигингиз ҳаммага аён. Аммо олам аҳли сизнинг кўп йил мадрасаларда ўқиган фозил имоми замон эканлигингизни ҳам суратда кўрмоғи керак. Шу сабабдан фақир сизни муқаддас китобу олтин қалам билан тасвир этмоқчимен!

— Маъкул,— деб хон бунга розилик берди.

Сурат тайёр бўлгандан кейин Шайбонийхон, Муҳаммад Солиҳ ва бошқа бир неча мулозимлар Бехзод ишлаган хонага тўшландилар. Мулла Абдурахим расмга, сўнг хонга қаради-ю, ҳайрон бўлиб:

— Ҳазратимнинг худди ўзлари-я! — деди.

Суратда Шайбонийхоннинг кўпни кўрган тажрибали одам эканлиги кўзга аниқ ташланиб турарди. Бўёқлар Бехзодга хос улуг бир маҳорат билан хилланган эди. Оддий одам расмдан ҳеч бир камчилик тополмас, Бехзод хонни иззатикром билан тасвирлабди, деб ўйлар эди. Лекин Муҳаммад Солиҳ хоннинг тагидаги кўрпанинг ранги қип-қизил қон рангида эканини сизди. Хон кўрна устида эмас, гўё қон дарёси устида ўтирганга ўхшарди. Хоннинг белига боғланган ингичка олтин камарнинг учи чалмашган оёқлар тагидан худди қорамтир бошли сариқ илонга ўхшаб буралиб чиқиб турар эди. Хон суянган қора болиш ҳам қора кучларнинг тимсолига ўхшарди.

Шайбонийхоннинг барча ишларидан хабардор Бехзод бу яширин рамзий бўёқлар билан нималар демоқчи бўлганини Муҳаммад Солиҳ пайқади-ю, кўрқиб кетди. Агар у сезган маънони хон сезиб қолса, Бехзод ҳам омон қолмайди, орада воситачи бўлган Муҳаммад Солиҳ ҳам! Шунинг учун у суратга хомуш тикилиб турган Шайбонийхоннинг фикрини хатарли рамзий маъносдан узоқроқ олиб кетишга интилди:

— Муҳаммад алайҳиссалом яшил ранги яхши кўрар эканлар. Имоми замон хон ҳазратлари ҳам яшил ранги суйишларини мусаввир дуруст пайқабдир. Қаранг, ҳазра-

тимнинг кўйлаклари яшил рангда. Суянган деворлари ҳам яшил.

— Буниси маъқул,— деб хон энди оғзини очди.— Лекин... биз мавлоно Бехзоднинг бошқа суратларини ҳам кўрган эдик...

Шайбонийхон Бехзод тасвиридаги шертахлит Хусайн Бойқарони эслади. Хусайн Бойқаронинг сафарга чиққан пайтини тасвир этган бошқа бир расмда гўё булутлар ҳам, осмон ҳам, ҳатто тоғу тошлар ҳам подшонинг кетидан эрганиб, у кетаётган томонга интилиб бораётгандай кўрсатилган эди. Темурийларни бунчалик улуғлаган Бехзод Шайбонийхонни жўн бир одам қилиб тасвирлаганга ўхшарди. Хон суратни кўрганда кўнглида кўзгалган мураккаб туйғуларни айтишга муносиб сўз тополмади-ю, Бехзодга қараб:

— Мўйқаламни менга беринг! — деди.

Хоннинг авзойи ёмонлигини ҳамма сизди. Бехзод махсус қаламдонда турли бўёқлар билан бирга турган мўйқаламларни хонга таъзим билан тутди. Шайбонийхон қорамтир кўнғир бўёққа ботириб қўйилган мўйқаламни олди. У Бухорода мадрасада ўқиб юрган пайтларида сурат чизишни ҳам анча машқ қилган, мўйқалам тутишни сал-пал билар эди. Бехзод чизган суратда Шайбонийхоннинг соқол-мўйлови ҳаддан ташқари қисқа ва сийрак кўрсатилган, хоннинг назарида, тасвир шунинг учун жўнлашиб кетганга ўхшарди.

— Соқолни дурустроқ чизмоқ керак! — деб Шайбонийхон ўзининг суратида — кулоқ яқинида жуда сийрак кўрсатилган соқолни бир оз қалинлаштирмоқчи бўлди. Аммо мўйқаламда бўёқ кўпроқ экан, кулоқ олдидаги соқол бирдан кигиздай қалинлашиб кетди. Бехзод соғ тиши суғуриб олинаётган одамдай:

— Их! — деди.

Аммо Муҳаммад Солиҳ Бехзоднинг биллагини маънодор қилиб қисди-ю:

— О! О! Ҳазратим мўйқалам теккизишлари билан суратга яна файз кирди! — деди.

У Бехзодни фалоқатдан фақат хонни мақтаб қутқариш мумкин эканлигини сезиб шундай демоқда эди. У буни Бехзодга ҳам сездиргиси келиб:

— Мавлоно, тарихий бир ҳодиса юз берди! — деди.— Сиз чизган суратга имоми замон, Искандари соний ўз муборак қўлларини теккиздилар! Буни одамлар асрлар давомида бир-бирларига айтиб юргайлар!

Бехзод хоннинг қилган ишини — санъаткорга аҳмоқона

хўжайинлик қилишнинг намунаси деб билмоқда эди. «Шу маънода чиндан ҳам буни тарих унутмас, одамлар бир-бирларига кулиб айтиб юрурлар»,— деган фикр Бехзоднинг хаёлига энди келди. Муҳаммад Солиҳ расмдаги рамзий маънони аллақачон пайқаганини, энди хондан балога қолмаслик учун атайлаб шу гапларни айтаётганини Бехзод тушунди-ю, ички бир истеҳзо билан хонга таъзим қилди:

— Қулингиз чизган суратга халифани замонамизнинг назарлари тушганидан бошим кўкка етди!

— Баракалла! — деб хон уни энди мақтади.

Хоннинг қўли билан чаплаган сокол қулок яқинига ёпиштириб қўйилган пўстак парчасига ўхшар эди. Бехзод ичида: «Баттар бўлсин!»— деди-ю, хон бу соколни қандай хунук чаплаган бўлса, шундайлигича қолдирди.

6

Хадича бегим кириб бекинган Ихтиёриддин қалъаси Убайдулла Султонни ўн етти кун овора қилди. Ниҳоят, қалъа деворининг отбозорига туташган ичорроқ бир жойини тагидан кавлаб, нақб солиб¹ бузиб кирдилар. Қалъани мудофаа қилиб турган эллик-олтмиш йигит битта қолмай кириб ташланди. Қўлга тушган қиз-жувонлар голиб қўшиннинг бек ва навкарларига улашилди.

Хадича бегимнинг ўзи ҳарамнинг ичма-ич эшикларини орқасидан тамбалатиб, энг тўрдаги бир хонага кирди-ю, ёнида қолган канизларга буюрди:

— Тантанали маросимларда киядиган кийимларини келтиринг!

Убайдулла Султоннинг навкарлари ҳарамнинг ичидан тамбаланган эшикларини бузиб киргунларича Хадича бегим катта гавҳар қадалган бинафшаранг тоқисини бошига кийиб, ясаниб, охириги эшикдан ўзи чиқиб келди. Олтин аралаш ипакдан тўқилган қабоси кўзини камаштирар эди. Қаддини тик тутиб келаётган барваста аёл маликаларга хос улуғворлик билан шошилмай эшикдан чиқар экан, қилич яланғочлаган, ҳансираган навкарларни унинг салобати босди. Хадича бегим бошини мағрур тутиб яқин келганда навкарлар беихтиёр ўзларини четга олиб, унга йўл бердилар. Бегим уларнинг саркардасини сўради.

Навкарлар уни ҳовлида отлиқ турган Убайдулла Султоннинг олдига бошлаб чиқдилар. Ҳамон канизлар қуршовида

¹ Нақб солиш — таги кавланган деворни олов ва бөрүт (порох) билан портлатиб қулатиш.

келаётган бегим енгил бир таъзим билан шошилмай гап бошлади:

— Султон жаноблари, тақдир экан, биз таслим бўлдик. Энди мени Шайбонийхон ҳазратларининг ҳузурига йўллашингизни илтимос қиламен!

Убайдулла Султон бекларининг орасида турган Мансур бахши билан маъноли кўз уриштириб олди-ю, масхаро муз кулимсиради:

— Хон ҳазратлари бегимга айтадиган гапларини бизга тайинлиб юбордилар.

— Ундай бўлса қулоғимиз сизда, султон жаноблари!

Убайдулла Султоннинг беклари орасида оқ саллалик бир эшон ҳам бор эди. Убайдулла Султоннинг шораси билан Мансур бахши ва эшон отдан тушдилар. Мансур бахши зар ёқалик тўн, қизил этик кийиб, куёвлардай ясаиб келган эди. Йигитлардан етти-саккизтаси унинг атрофини куёвнавкарлар каби ўраб олдилар. Шундан кейин Убайдулла Султон Хадича бегимга юзланди:

— Имоми замоннинг фармони билан сиз бугун Мансурбекнинг никоҳига ўтурсиз!

— Бегимнинг ўзлари ҳам билгандай ясаиб чиқибдилар! — деб кулди мулозимлардан бири.

Хадича бегим қоп-қора йўғон Мансур бахшининг чўтир юзига қаради-ю, даҳшатга келди:

— Мен... мен хон ҳазратлари билан ўзим сўзлашамен!

— Хоннинг сиз билан сўзлашишга вақтлари йўқ!

— Ахир мен ҳам подшоҳ оиласиданмен! Бу қандай хўрлик?!

— Сиз рофизийлар оиласидансиз! Рофизийларни жазолаш — савоб!

— Султон жаноблари, сизнинг ҳам мендек кекса онангиз бордилар. Ҳеч бўлмаса онангимни ҳурмат қилинг!..

— Менинг онам сиз қилган разилликларни қилган эмас! Қайси она ўз неварасини ўзи ўлдиртирибди?! Сиз неварангиз Мўмин мирзонинг ўлимига сабаб бўлган хунхўрлардансиз!

Хадича бегимнинг бояги улуғвор ва мағрур қиёфаси энди бирдан аянчли тусга кирди, қадди букчайиб, қўллари осилиб қолди.

Убайдулла Султон навкарларига буюрди:

— Ичкарига олиб киришлар. Энди бунинг кўзини Мансур бахши очсин!

Хадича бегимнинг бўшашиб, гўё тўкилиб кетаётган гавдасини икки каниз икки томондан суяб ичкарига олиб кириб кетдилар.

Никоҳ ўқилгач, Мансур бахши канизларни ҳарамдан

чиқариб юборди-ю, Хадича бегим билан яккама-якка қолди.

Тун сукунатида қандайдир мислсиз қийноқлардан чиқирган бегимнинг фарёди ҳарам атрофидаги уйларга ҳам эшитилиб турарди.

Ярим кечада Мансур бахши сёқда зўрга тургац Хадича бегимни олдига солиб, ҳарамдан чиқди. Иккови оёдин қалъанинг бир четига қараб кетишди.

— Олтин гул,— деб шивирлади Мансур бахши.— Олтин булбули бор. Оғзида гавҳари бор. Ана шунинг тоғиб бермасанг, ҳозиргидан бешбаттар қиламен. Топ тезроқ!

Ҳозир жонидан бошқа нарса кўзига кўришмаётган Хадича бегим Мансур бахшининг кўрган четидаги яширин хазинага бошлаб келди. Ер остидаги бу хазинага салқин сув сақланган сардобанинг четидаги махфий йўлдан кирилар эди. Мансур бахши қўлида ёқмасдан олиб келаётган машъалани ер тағига тунганда ёқди.

Ер остида беш-олтита темир сандиқ қатор турибди. Хадича бегим мадорсиз қўллар билан уларга бир-бир калит солиб, очиб кўрди. Иккитасида кумуш тангалар, биттасида олтин тангалар. Биттасида қилич ва ханжарларнинг олтин дасталари. Яна бир сандиқда аёлларнинг қимматбаҳо тақинчоқлари. Мансур бахши кўзлари ёниб, бу бойликларга бир-бир қўл уриб кўрди-ю:

— Олтин гул қани? — деди.— Барглари зумрад гул қаерда?

Ер остини ағдар-тўнтар қилиб қидирсалар ҳам бу гул топилмади. Хадича бегим:

— Воҳ! — деди мусибатли товуш билан.— Энг ишонган одамларим ҳам менга хиёнат қилмишлар. Гулни ўғирлиб кетмишлар! Сўнгги нажотимни ҳам ўғирлатибмен! Оҳ!

— Сен оҳ-воҳ деб, Ҳусайн Бойқарони алдаб ўргангансен. Лекин мени алдай олмайсен. Топ гулни! Қани, қаерга яширгансен?

— Мана шу четки сандиқда эди...

— Ёлғон! Сен уни бошқа жойга яширгансен! Кўрсат ўша жойни!

Мансур бахши Хадича бегимни зинапоядан юқорига — сардоба бўйига олиб чиқди.

— Мени алдай олмайсен! Кўрсат!

— Мен сизни алдаганим йўқ! Ўзим алдандим! Менинг паймонам тўлгани рост экан! Мени ўғлим алдаб кетди! Музаффар мирзони деб мен нималар қилмаган эдим! Оқибати шу бўлди! Мени бу қийноқларга ўғлим ташлаб кетди! Ўғлим!!!

— Лекин сен олтин гулни ўғлингга ҳам бермагансен! Уни ўзинг яширгансен! Хон ҳазратлари менга айтдилар.

«Гавҳар донасини тишлаб турган булбули бор», дедилар. Мен бу гулни олтин булбули билан хонга пешкаш қаламен деб сўз берганмен. Топ ҳозир!

— Ўғирлатган бўлсам қандай топай?!

— Топмайсенми ҳали? Топмайсенми?! Мана топмасанг!

Девдай зўр Мансур бахшининг бир зарби билан Хадича бегим суви муздай сардобага шалоплаб қулаб тушди. Мансур бахши уни сочидан тортиб чиқариб олди-ю, ҳарамга томон судраб кетди.

Бу қийноқлар уч кун давом этди, аммо олтин гул топилмади. Тўртинчи куни кечаси Хадича бегим Мансур бахшининг хонасида жон берди.

7

«Наҳотки менинг ҳам паймонам тўлган бўлса?»— деган кўрқинчли ўй Шайбонийхоннинг хаёлига Мурғоб дарёсининг бўйида тўсатдан Шоҳ Исмоилнинг қўшинлари қуршовига тушиб қолган пайтда келди.

Аччиқ изгирин эсиб, қор учқунлаб турган бу бадқовоқ кунда Шайбонийхон Мурғоб бўйига Шоҳ Исмоил Сафавийни таъкиб этиб бориб қолган эди. Бундан бир неча соатгина олдин Шоҳ Исмоил бор қўшини билан Марв кўрғонидан орқага чекинган пайтда Шайбонийхон ўзининг яна улкан ғалабага эришишига мутлақо ишонган эди. Чунки Марв кўрғони ичида кўпдан бери куч сақлаб ўтирган Шайбонийхоннинг ўн беш минг қўшини бор эди. Хонга келган аниқ ахборотларга қараганда, Шоҳ Исмоилнинг Марв кўрғонини қамал қилиб, қиш совуғида изғиб юрган қўшини ўн икки мингдан ошмас эди. Совқотиб, орқага бетартиб чекинган лашкарга ичкарида иссиққина жойда куч тўшлаб ётган лашкар ҳамла қилса — Шайбонийхоннинг ғолиб чиқиши муқаррардек туюларди.

Сўнгги йилларда Шайбонийхоннинг энг зўр истаги — Шоҳ Исмоил устидан узил-кесил ғалаба қилиш эди. Ўзини «халифани раҳмон» деб эълон қилган Шайбонийхон мусулмон оламига ягона диний раҳбар бўлиш ниятида эди. Эрон ва Озарбайжонда шиа мазҳабини давлат дини қилиб кўтарган Шоҳ Исмоил Сафавий эса ўзини «соҳиби замон» деб эълон қилган эди. Демак, у ҳам мусулмон оламига раҳбар бўлишга интиларди. «Бир қинга икки қилич сиғмагай, мусулмон оламига ё мен раҳбар бўлишим керак, ёки Шоҳ Исмоил!»— Шайбонийхон шу эътиқод асосида Шоҳ Исмоил билан бултур астойдил беллашмоқчи бўлди. Ҳиротдан эллик минг қўшин

билан Эроннинг Кермон ва Гургон шаҳарларигача бостириб борди. Ўшанда Шоҳ Исмоил ғарбдаги турк султони Бөязид II билан жанг қилиб юрган эди. Гургонда ва айниқса Кермонда шиалар ҳаракати жуда авжига чиққан эди. Шайбонийхон бу шаҳарлардаги шиаларнинг бошлиқларини аёвсиз қатл эттирди, уларнинг масжид ва зиёратгоҳларини буздирди, мол-мулкларини талаттирди. Бу ҳаммаси шиалар пешвоси Шоҳ Исмоилни дарғазаб қилиши ва дарҳол жангга отлантириши керак эди. Ўша пайтда ҳал қилувчи жанг бўлса, Шайбонийхон ғолиб чиқиши муқаррар эди, чунки Шоҳ Исмоилнинг ярим кучи турк султони билан урушда банд эди. Буни шоҳнинг ўзи ҳам сезган бўлса керакки, ҳамма аламини ичига ютиб, Шайбонийхонга яхши муомала қилди, махсус элчи юбориб, уни Мовароуннаҳр ва Хуросоннинг олий ҳукмдори деб таъинлади ва орадаги адоватни урушсиз бартараф қилишга истак билдирди.

Шайбонийхоннинг ўғли Темур Султон, жияни Убайдулла Султонлар шоҳ элчисига иложи борича яхши муомала қилишни, унга ширин гаплар айтиб, шоҳга совға-саломлар юбориб, уни Самарқанддаги Султон Али мирзо ва Тошкентдаги Маҳмудхон каби гафлатда қолдиришни, кейин пайти келганда ўшаларга ўхшатиб йўқ қилиб юборишни истар эдилар. Лекин орада дину мазҳаб низоси аждаҳога ўхшаб оғзини очиб турарди. Шайбонийхон Хуросонда турган ўз қўшинининг шиалар таъсирида шу аждаҳонинг домига тортилиб кетишидан қўрқар, «дину имон йўлида мураса йўқ, кимки шиаларга қўл берса, диндан қайтиб, рофизий бўлғай», деган гапни кўп такрорларди. Энди агар Шайбонийхон ўғли ва жиянининг сўзига кириб, Шоҳ Исмоилни таъин олса, унга яхши муомалада бўлса, шу билан беихтиёр шиа мазҳабини таъин олган бўлмайдими? Одамлар: «Хонимизнинг ўзи ҳам рофизийлик йўлига қиряпти!»— демайдими? Йўқ! Шайбонийхон ўзининг пок эътиқодига доғ туширишни истамайди! Унингча, ғайридиндан ҳам рофизийлик ёмои. Чунки ғайридин — ҳали мусулмончиликдан беҳабар. Рофизийлар эса аввал мусулмон бўлган, кейин чорёрлар номига хиёнат қилиб, улардан юз ўгирган. Шайбонийхон бундай одамларга шафқатсиз муносабатда бўлиши керак. Шу фикр асосида у шоҳ элчисини беҳурмат қилиб қайтарди. Шоҳнинг мактубига эса осмондан келиб жавоб ёзди. «Сен бир шайхнинг ўғлисан, тожу тахтни сенга қил қўйибди, белинга кашкулингни боғлаб, қаландарлигингни қилсанг-чи!»— деган маънода унга кашкул ва ҳасса «совға» қилиб юборди. Бу воқеадан кейин Шоҳ Исмоил турк султони билан сулҳ тузди-ю, Шайбонийхонга қарши жангга тайёрлана бошлади. Хоннинг Кермондаги шиа масжидларини буздиргани

устига энди Шоҳ Исмоилнинг элчисини беҳурмат қилиб қайтаргани кўшилгач, Шайбонийхондан қасос олишни истовчиларнинг сони кўпайиб кетди.

Худди шу пайтларда Мовароуннаҳрдан ҳам таъвишли хабарлар кела бошлади — кўчманчи султонлар зулмига чидай олмаган Тошкент, Фарғона, Бухоро аҳолиси уларга қарши исён кўтардилар. Ғалаёнлар Самарқандда ҳам, Ҳисорда ҳам бўлаётганини эшитган Шайбонийхон Ҳиротдаги қўшинларидан ўттиз мингини Мовароуннаҳрдаги султонларга ёрдамга юборди. Бу ғалаёнларнинг сабабини билишга юборилган махсус кишилар Туркистон, Ҳисор ва Бухоро султонларининг ўзбошимчалик йўлига ўтганларини аниқлаб келдилар. Шайбонийхон уч йилдан бери Ҳиротда яшамокда эди. Унинг узокдалигидан фойдаланган султонлар ўзлари хон, кўланкалари майдон билиб иш олиб бормокда эдилар. Хуфиялар уларнинг икво гапларини ҳам Шайбонийхонга етказиб турар эдилар. Хусусан, Убайдулла Султон, Кўчкинчихон ва Ҳамза Султонлар Шайбонийхоннинг Шоҳ Исмоил билан қалтис сўёсат олиб бораётганидан норози эдилар: «Жангни биз қиламиз, ғалабани биз келтирамиз, хонимиз фақат ёш қизчаларни никоҳига олиб, лавзатланишни билади, ҳеч қайсимизнинг маслаҳатимизни олмайди, шундай бўлгач, биз ҳам бу ерда истаганимизча даврон сурайлик-да». Султонларнинг бу гаплари Шайбонийхоннинг ғзабини авжига чиқарди. У ички низоларни бир зарба билан бартараф қилмоқчи бўлди-ю, Убайдулла Султонни Бухоро ҳокимлигидан, Кўчкинчихонни Туркистон ҳокимлигидан, Ҳамза Султонни Ҳисор ҳокимлигидан олиб ташлади ва уларнинг ўринларига бошқа итбаткор одамларни қўйди. Албатта, бу кескин тадбир хон қўшини орасида катта обрўга эга бўлган Убайдулла Султон ва Ҳамза Султонларнинг тарафдорларини қаттиқ норози қилди.

Мовароуннаҳрдаги ғалаёнлар ва хон саройидаги ички низолардан хабар тошган Шоҳ Исмоил бу қулай фурсатдан фойдаланиб қолишга интилди. Одатда, катта ҳарбий юришлар баҳор ва ёз ойларида бошланар, Шайбонийхон ҳам шўҳнинг ҳужумини «бўлса, қиш ўтгандан кейин бўлар», деб ўйлар эди. Ушгача Мовароуннаҳрга жўнатилган ўттиз минг қўшин Ҳиротга қайтиб улгуриши мумкин эди. Лекин Шоҳ Исмоил хон кутмаган кеч куз пайтида Ҳирот устига қўшини тортиб келаётгани маълум бўлди. Хуросонда Шайбонийхондан норози одамлар жуда кўп, Шоҳ Исмоил яқинлашса улар бош кўтариши муқаррар. Хешнинг асосий кучлари эса Амударёдан нарида. Шайбонийхон шошилишч равишда Мурғоб бўйига — Марв қўрғонига чекинишга мажбур бўлди.

Хоннинг бундай сесканиб чекинишини кўпдан бери кўр-

миган аёнлари қаттиқ саросимага туша бошладилар. Шунда хон уларнинг ўлкасини босадиган битта важ кўрсатди:

«Уша гаддор рофизийлар юртидан узоқроқ кетганимиз маъқул. Шох бизга эрганиб Мовароуннахрга яқинроқ борсин. Ўзимизнинг ноқ мазҳабли суннийлар юртидан мадад олурмиз. Ушгача ўттиз минг лашкар етиб келгай. Биз шохга Марвда қопқон қўйиб, тумшуғидан илтиргаймиз!»

Хоннинг бу режасини барча мулозимлари ва аёнлари дарҳол: «Дано тадбир!»— деб мақтадилар. Бироқ улар Марв қалъасида бекиниб ўтирган пайтларида Шох Исмоил кўрғонни қамал қилиб, Шайбонийхон номига кинояли мактублар йўллади. «Хон юборган ҳассани суяниб, кашкулни белимизга боғлаб келдик, қани энди хонда юрак бўлса кўрғондан чиқсин, шайхнинг ўғли билан беллашсин!»— деган захарханда гаилар Шайбонийхоннинг иззат-нафсига қанчалик қаттиқ тегмасин, у тишини-тишига қўйиб, ҳафталар давомида кўрғонда ўтирди. У тажрибали лашкарбоши сифатида шуни яхши билар эдики, йигирма тўрт ёшли Шох Исмоил қанчалик уринмасин, эртами-кечми қиш совуқлари ва изғиринлари уни илқ жой излашга мажбур қилади. Очқ хавода дийдираб юрган аскарлар қўли қовушга келмай қунишиб чекинишга тушса, ана ўшанда Шайбонийхон иссиқ кўрғонда куч тўплаб ётган ўз аскарларини бошлаб чиқади. Ушгача албатта Мовароуннахрдаги лашкар ҳам келиб қолади. Икки томондан берилган зарба Шох Исмоилни тамом қилиши аниқ. Ана ундай кейин Эрон ҳам Шайбонийхонники бўлади, нарёғи Бағдодга ва Маккаю Мадинага йўл очилади... Шайбонийхон чиндан ҳам бутун мусулмон оламига халифани раҳмон ва Искандари соний бўлади!..

Хоннинг бу ширин ўйларини фақат бир нарса тахир қилмоқда эди. Чопар кетидан чопар бориб, Мовароуннахрдаги қўшинини тезроқ Марвга етиб келишга ундаётган бўлса ҳам ўттиз минг лашкар ҳамон Амударёдан нарида имиллаб юрар эди. Хон бу имиллашнинг сабабини биларди. Қўшинда ҳали ҳам Убайдулла Султон ва Ҳамза Султонларнинг таъсири зўр. Улар ҳокимликдан туширилганликлари учун хондан жуда хафа. «Мана энди онҳазратимиз бизсиз жанг қилиб кўрсинлар!» дегандек аразлаб юришибди.

«Лекин мен бўлмасам ҳамманг кучукбаччадай хор бўлиб ўласан-ку! — ичида султонларини сўкарди Шайбонийхон.— Ҳозир бутун давлатимиз, бутун сулоламиз хавф остида-я, наҳотки шуни фаҳмламасанглар? Ҳаёт-мамотнинг ҳал бўладиган пайтда, ё шох мени йўқ қиладиган, ёки мен шохни нест-нобуд қиладиган аснода шундай аразлаб юришларинг итлик

эмасми? Сен итлар ҳали кўрасенлар, шу қамалдан эсон-омон кутулсак, ҳаммангни тавбангга таянтиргаймен!»

Нихоят, изғиринли совук кунларнинг бирида, Шоҳ Исмоил хонга яна бир мактуб йўллаб, унинг қўрғондан чиқмаганини қўрқоқлик деб атади, баҳорда яна қайтиб келажagini билдирди, сўнг Марвнинг ғарби жанубидаги Махмуди деган қишлоқ томонга чекина бошлади.

Шайбонийхон ўн беш минг қўшинни дарҳол отлантирди. Уч юзтача навкарни қалъада қўриқчилик қилиш учун қолдирди-ю, қолганларини қўрғон дарвозаларидан ташқарига бошлаб чиқди. Узоқда шоҳ аскарлари чодир ва ўтовларини арваларга ортиб, бетартиб чекиниб бормоқда.

Шайбонийхон баланд бир жойга чиқиб, Амударё томонга узоқ тикилиб қаради. Қани эди ўша ўттиз минг қўшинни ҳозир етиб келса! Лекин ўша ёқдан отини елдириб келган чопар қўшиннинг ҳали ҳам Амударёдан нарида юрганини айтди.

Шоҳ Исмоил аскарлари ҳамон чекиниб бормоқда. Наҳотки Шайбонийхон шундай қулай фурсатни бой бериши керак? Одамлар: «Хон қўрқоқлик қилган, бўлмаса унинг қўшини шоҳниқидан кўп эди, дадил ҳамла қилса енгар эди», дейишмайдимиз? Нариги султонлар эса: «Ана, бизсиз хон ҳеч вақт жанг қилолмайди!»— дейиши ҳам турган гап. Эҳ, агар шу гап хон ғалабани нариги Убайдулла Султон ва Темур Султонларсиз қўлга киритса эди, қолган бутун умри шон-шухрат ичида ўтмасмиди?

Хон иккиланиб турганини кўрган мулла Абдурахим изғиринда лаблари кўкариб, илтимос қилди:

— Ҳазратим, биз сизнинг улуғ жонингизни хавф-хатардан узоқроқ тутмоғимиз даркор. Мовароуннаҳрдан келадиган қўшинни кутайлик.

Хон қаҳр билан сўради:

— Қани ўша қўшин! Қани?!

— Қиш изғиринида дарёдан ўтмоқ мушкул. Бироқ Убайдулла Султон билан Темур Султонлар ҳадемай келиб қолурлар.

— Шоҳ Исмоил Табризига етганда келурми? Агар бу ит султонлар истаса аллақачон етиб келмасмиди? Бу султонларнинг жўрттага мени ёлғиз ташлаб қўйди! «Ҳамма ғалабани биз қўлга киритамиз!»— деб мактанар эмишлар, аблахлар! Мен бўлмасам ғалабани тушларида ҳам кўришмас эди!

— Ҳақ гапни айтдингиз, ҳазратим!

— Мен мана бу шунқорларим билан эришганмен бутун ғалабаларга! — Шайбонийхон шундай деди-ю, жангга шай бўлиб турган ўн тўрт мингдан ортиқ қўшиннинг сафлари

орасига от чоштириб кирди: — Шунқорларим, ёғийнинг сафи бузилиб чекинганини кўрдиларинг. Улар сон жиҳатдан ҳам биздан оз! Ўзлари совукда дийдираб ҳолдан кетган. Мен ишонамен, оллоҳу таоло бизга яна бир улкан ғалабани инъом этгусидир! Муҳаммад алайҳиссаломнинг арвоҳлари пок сунний мазхабидагиларни қўллаб-қувватлагусидир! Чорёри босафолар мадақкорингиз бўлсин, шунқорларим. Душман ўз сафларини қайта тузиб улгурмасдан етиб боринглар! Худо омадларингни берсин! Омин оллоҳу акбар!

Минглаб овозларнинг:

— Оллоҳу акбар!

— Оллоҳу акбар! — деган ҳайқириғи барча сафлар бўйлаб таралди.

Қўпакбий ва Қамбарбийлар олдинда, Шайбонийхон қўшиннинг ўртагоғида қизилбошлар кетидан от чоштириб кетдилар.

Илгари хонга аниқ ахборотлар бериб турадиган махсус одамлар бу гал Шоҳ Исмоилнинг ёлғондакам чекинаётганини ва ҳарбий найранг ишлатмоқчи эканини билмай қолган эдилар.

Шоҳ Исмоил Марвни камал қилиш учун аскарларнинг озроқ бир қисмини бошлаб борган эди. Унинг яна йигирма минг кишилиқ сараланган аскарлари Марвдан йигирма чақиримча наридаги қумтепалар ортига пистирма қилиб қўйилган эди.

Бундай ҳарбий найрангни Шайбонийхоннинг ўзи ўн икки йил муқаддам Бухоронинг Қорақўл шаҳрида қўзғолон кўтарган исёнчиларга қарши ишлатган эди. У ҳам қўшиннинг асосий қисмини Қорақўлнинг шарқидаги пана жойларга бекитиб қўйиб, озгина аскари билан ҳужумга борган, қалъа ичидаги исёнчилар ёвнинг озлигидан дадилланиб ташқарига чиққан эдилар. Шунда хоннинг қўшини жўрттага тумтарақай бўлиб қочган, исёнчилар эса уларни «енгдик» деб, кетларидан қувган эди. Бироқ қалъадан беш-олти чақирим узоқлашганларидан кейин пистирмадаги хон аскарлари ёпирлиб чиққан ва исёнчиларни қириб ташлаган эди. Кейин Шайбонийхон қалъа ичида қолганларни ҳам қатлиом қилиб, Қорақўлнинг отбозорида одам калласидан улкан минора ясатган эди.

Ҳозир ўз кучига ортиқ даражада ишонадиган Шайбонийхон бу ҳийлани бошқа лашкарбошилар унга нисбатан ҳам ишлатишлари мумкинлигини хаёлига келтирмас эди. Шоҳ Исмоилнинг Марвга кўриниш берган ўн минг чоғлик қўшини Маҳмуди деган жойда Мурғоб дарёси устига қурилган кўприкдан шоша-пиша ўтиб кетди. Шоҳ Исмоил гўё бу кўприкни ҳимоя қилиб туриш учун уч юзтача аскар қолдирган эди. Шайбонийхон кўприкка яқинлашгач, бу уч юз қизилбош ҳужа-

кўрсинга тирақайлаб қочди. Дарёдан фақат шу кўприк орқали ўтиш мумкин эди — ҳар икки қирғоқ ҳам баланд жар, кечув йўқ, бувиғ устига, қишки дарёнинг суви жуда совуқ, тўпғиб қолиш ҳеч гап эмас эди. Шайбонийхоннинг бутун кўшини кўприқдан ўтиб бўлгунча Шоҳ Исмоилнинг пистирмада ётган кучлари ўзини сездирмади. Шайбонийхон узоқда «қочиб кетаётган» Шоҳ Исмоил кўшинининг изидан тушиб, кўприқдан анча узоқлашгандан кейин пистирмада ётган кучлар бирдан майдонга чиқди. Ўқлаб қўйилган замбараклар хон аскарлари устига тўсатдан ўқ ёғдирди. Тўрт тарафни қизилбошлар тутиб кетди.

Шайбонийхон ўзининг Қорақўлда ишлатган ҳарбий ҳийласини энди эслади-ю, орқада қолган кўприкка қараб чекинди. Аммо ёғоч кўприк аллақачон бузиб ташланган эди. Чекиниб борган кўшинининг бир қисми жардан дарёга қулаб тушди. Дарёнинг ўзанини отлар ва одамларнинг ўлиги тутиб кетди. Хоннинг ўзи сараланган хос навкарлари билан моллар қишлайдиган атрофи ёниқ бир кўрага кирди. Кўрани қизилбошларнинг олов ҳалқаси ўраб олди. Хоннинг хос навкарлари қизилбошлар қуршовида ўлган-қолганларига қарамай жанг қилдилар. Кўра дарвозасининг олдилари, пахса деворларнинг таглари ҳар икки томондан, қирилганларнинг жасадига тўлиб кетди. Хон ҳимояда қиттиқ турганини кўрган Шоҳ Исмоил замбаракларни кўранинг атрофига ўрнаттириб, девор оша ўқ оттира бошлади.

Замбарак гумбурлашидан ҳурккан, ярадор бўлиб қутурган отлар бир-бирларини уриб, йиқитиб, ўзларини у ёқдан-бу ёққа ташлай бошладилар. Кўра ичида даҳшатли тикилинч, ур-сур, тўполон бошланди. Шайбонийхон қўлида қиличи билан одамларига ҳайқириб, тўполонни босмоқчи бўлаётганда тўпнинг тош ўқларидан бири хон мишган отнинг бошига келиб тегди. От гандираклаб бир ёнига йиқилди-ю, эгасини ҳам ерга отиб урди. Шайбонийхон оёғини узангидан чиқаришга улгурмади — бир оёғи отининг тагида қолди. Шу заҳоти яна бир от суришиб йиқилди-да, ўмрови билан хоннинг кўкрагидан босиб тушди. Шайбонийхон, қовурғалари синиб, вужуди эзилиб, нафас ололмай қолди-ю, ҳушидан кетди.

Жанг тугагандан кейин хонни танийдиган қизилбош беклардан бири унинг жасадини қалашиб ётган от ва одам ўликлари орасидан аранг қидириб топди. Абдурахим Туркистоний, Мансур бахши кўтарувчи ва бошқа жуда кўн мулозимлар, навкарлар ҳам хоннинг нари-берисида ўлиб ётар эдилар.

Ғолиблар Шайбонийхоннинг бошини кесиб, найзага санчдилару Шоҳ Исмоил мишиб турган отнинг оёғи тагига элтиб ташладилар. Кейин қизилбошлар Шайбонийхон қирган ши-

лар қасдига унинг кесик бошидан терисини шилиб олиб ичига сомон тикдилар. Ғарбда шиаларни қувғин қилаётган ва Шох Исмоилга алам ўтказган суннийпарастлардан яна бири — турк султони Боязид II эди. Шох Исмоил Шайбонийхоннинг сомон тикилган бошини турк султонига: «Мен билан қасдлашган суннийлар қай аҳволга тушишини кўриб қўй!» деган маънода «совға» қилиб юбортирди.

Сунний — шиа душманлиги шу даражага етган эдики, қивилбошлар бунга ҳам қаноат қилмай, Шайбонийхоннинг бош суягига олтин қолатиб, ундан май ичадиган коса ясайдилар¹.

ҚУНДУЗ. САМАРҚАНД.

ИККИ ҚИЛИЧ ОРАСИДА

1

Заррин попуклар билан безатилган оқ туянинг устида — маликалар ўтирадиган бахмал соябонли кажавода Хонзода бегим тўққиз яшар ўғилчиси Хуррамшоҳ билан Балхдан тоғ ошиб, сув кечиб Қундузга бормоқда эди. Бегимни беш-олтита кашизлари, хизматкорлари ва юзга яқин шоҳ навкарлари кузатиб келмоқда эдилар.

Шайбонийхондан шунчалик шафқатсиз ўч олган Шох Исмоил хоннинг Марвда асир тушган хотинларидан бири — Бобур мирзонинг эгачиси эканлигини эшитиб, унга алоҳида илтифот кўрсатгани тасодифий эмас эди.

Марвдаги воқеаларни Қундузда туриб эшитган Бобур Шох Исмоилга маҳсуе маътуб йўллаб, уни Шайбонийхон устидан эришган катта галабаси билан табриклаган, сўнг хон ҳарамидagi эгачиси Хонзода бегимни бешикаст Қундузга жўнатиб юборишни илтимос қилган эди.

Бобурни Шайбонийхон билан дадил олишганлиги учун ҳурмат қиладиган Исмоил Сафавий энди уни ўзига илтифотдон қилгиси келди-ю, Хонзода бегимга қўшиб, энг ишонган кишиларидан бири — Муҳаммаджон эшик оғасини Бобур ҳузурига элчи қилиб жўнатди.

Хонзода бегим шохнинг яширни шиятларини билмаса ҳам

¹ Ақл бовар қилини қийин бўлган бу тафсилотлар Шох Исмоилнинг душманлари томондан ёзиб қолдирилса муболага деб ўйлаш мумкин эди. Лекин бу тафсилотлар Шох Исмоилнинг хайрихоҳлари ёзган «Тарихи олам оройи Аббосий»да ва Хондамирнинг «Ҳабиб уссияри»да ҳам келтирилган.

яна аллақандай хатарлар уни ёш ўғличаси билан бирга ўз гирдобига тортмоқчи эканини элас-элас сезар ва номаълум бир тахликадан юраги дам-бадам увушар эди.

Шоҳнинг элчиси ва навкарлари бутун йўл давомида Хонзода бегимни ҳам, унинг ўғли ва канизларини ҳам ўз одамлари каби астойдил авайлаб ва қўриқлаб келмоқда эдилар. Уларнинг аёллар билан муомаладаги одобларини, олижаноб эҳтиромларини бегим кўп марта сазди. Шоҳ Исмоилдан бошқа подшоҳ бўлса, Шайбонийхондай ашаддий душманининг норасида ўғлини йўқ қилиб юбориши, хоннинг хотинини ўз ҳарамининг асирасига айлантириши ёки бирорта бекига ниқоҳлаб бериши мумкин эди. Шоҳ Исмоил шундай қилмагани, аксинча, Хонзода бегимни маликалардай иззат-икром қилиб, ёнига мўътабар элчилару ўилаб навкарлариши кўчиб, Бобурнинг ҳузурига юборгани, бу жабрдийда жувоннинг қалбида умрбод унутилмайдиган бир миннатдорлик туйғуси уйғотган эди.

Хонзода бегимни бутун йўл бўйи сергаклантириб бораётган номаълум хавф гўё баҳайбат тоғлар ва ўрмонларда яшириниб турганга ўхшарди. Қиш энди чиққан, тоғларда ҳали қор кўп. Баланд доvonлардан, тор тангилардан ўтаётганларида Хонзода бегимнинг назарида, тоғдан кўчки тушиб, ҳаммаларини босиб қоладигандай бўларди. Момақалдиरोқли ёмғирлар ёққанда дараларнинг селлари бегимнинг ёнидаги ўғилчасини оқизиб кетадигандай ваҳмини келтирарди. Бир кеча Амударёнинг чап қирғоғидаги ўрмоннинг четида — Сурбайгал деган жойда тунадилар. Хонзода бегим ўрмонда кийик овлаб юрган йўлбарсларнинг йўғон ҳайбатли бўкиришларини эшитиб, туни билан ухлай олмай чиқди.

Илгари Шайбонийхоннинг укаси — жуда кўп хатарли жапгларда ўлмаган Махмуд Султон мана шу Қундузга келганда аллақандай ёмон безгакка учраб, бир неча кун ичида ўлиб қолган, кейин уни Қаршига элтиб кўмишган эди.

Қундузга яқинлашганларида Ғўри дарёси Қундуз дарёси билан қўшилиб, Амударёга қараб кетган серқамиш ботқоқлик жойда нафас олиш оғирлашиб, бирдан ҳавонинг рутубати кучайиб кетди. Хонзода бегим энди ўша ёмон безгакни эслаб, ўғилчасига яна хавотирланиб қараб кўйди.

У илгари «ўлгинг келса Қундузга Бор» деган афғонча мақол эшитган ва буни ҳазил гап деб кулган эди. Энди бу мақол унга чиндек туюла бошлади. У ўзидан ҳам кўра мурғак боласидан — хон ҳарамиди ўн йил асоратда яшаб орттирган мана шу ягона жигарпорасидан хавотирланарди. «Борди-ю, Бобур мирзо Қундузда бўлмасалар, тоғ ошиб Андижонга ўтган бўлсалар ёки Қобулга кайтган бўлсалар, унда не қилур-

миз?» — дерди Хонзода бегим ўзича. Шу ўй таъсирида Помир ва Ҳиндикуш тоғлари билан куршалган, Амударё ва унинг икки irmоклари бўйига жойлашган Қундуз воҳаси Хонзода бегимнинг кўзига жуда бадваҳима кўринарди.

Кечки пайт йўл дарёдан узоқлашиб баландликка кўтарилиб бораётганда қаршиларидан бир тўп қуроли кишилар чиқиб, уларни тўхтатишди. Сўраб-суриштиришлардан сўнг булар — Бобур томонидан йўлларга қўйилган қоровуллар экани маълум бўлди-ю, Хонзода бегим бирдан сугил тортди. Қоровулларнинг бошлиғи меҳмонларнинг олдига тушиб, уларни Қундузнинг баланд бир жойидаги қалъага бошлаб борар экан, энди атроф Хонзода бегимга алланечук бошқача кўриниб кетди. Мовий тоғлардан эсаётган шабада юзини ёқимли силаб ўтди. Амударё бўйидаги ўрмонлар узоқдан нечоғлик хушманзара кўринишини у энди пайқади.

Қундузнинг илгариги хонлари баҳаво бир жойга қурдирган мустаҳкам қалъа ва унинг ичидаги қаср ҳам Хонзода бегимга узоқдан хийла файзли кўринди. Бу қаср ичида ҳозир у ўзининг суюкли иниси билан учрашишини ўйлаганда шодлиғи кўксига сиғмай энтикди.

Уларни кутиб олган мулозимлар Хонзода бегимни ўғли ва канизлари билан бирга меҳмонхонанинг яхши безатилган алоҳида бир хонасига киритиб қўйдилару Бобурга хабар бериш учун қўрғоннинг тўрига қараб кетдилар.

Анчадан кейин Хонзода бегим ўтирган хонанинг эшигидан чиройли соқол-мўйлов қўйган ўттиз ёшлардаги бир йигит шошилиб кириб келди. Бегим уни Бобурнинг мулозимларидан деб ўйлади, секин ўрнидан туриб, саломига алик олди. Йигит унга томон юриб келар экан, овози титраб:

— Бегим, қадамингиз қутлуғ бўлсин! — деди.

Бу — Бобур эди. Лекин Хонзода бегим укасини соқол-мўйлов қўймаган ўн тўққиз ёшли силлиққина йигит қиёфасида эслаб қолган эди. Ҳозир унинг қаршисида турган кенг елкали, соқол-мўйлови текис тарашланган йигитнинг кийимлари ҳам шохона эмас эди: бошида безаксиз оддий симоби салла, эгнида зира беқасам тўн. Бегим яна уни Бобурнинг беқларидан бири деб ўйлади-ю, ҳаяжонланиб айтган сўзларига босиқ жавоб қилди:

— Қуллук!

Девони хосда ёзув-чизув ишларини қилиб ўтирган Бобур опасининг хабарини эшитиб хонаки кийимда чолиб келган эди. Хонзода бегим эса ҳали ҳам подшоҳ укасининг киришини кутиб, эшикка олазарақ бўлиб қарар эди. Бобур опасига ағрайиб қараб қолди. Эшикдан Муҳаммад Кўкалдош деган мулозим кирганда бегим ундан:

— Амирзодам қанилар? — деб сўради.

Муҳаммад Қўкалдош ҳайрон бўлиб Бобурга қаради. Бобур гап нимадалигини энди тушунди-ю, томоғига бир нарса тикилиб, овози бўғилди:

— Мени тапимадингизми?

— Сиз... Сиз...

— Мен Бобурмен!

— Наҳот?!

— Мен сизнинг инингизмен! Гуноҳкор инингиз Бобур!

Хонзода бегим бобурога кўзларини, бобурога овозини энди ташди-ю, ўзини инининг бағрига отди. Қўлларини юзи билан бирга Бобурнинг кўкрагига босди. Бобур опасининг елкаларидан қучди, унинг соғинч ва қувонч билан айтган сўзларини қулоғи билан эмас, гўё кўкси билан эшитди:

— Бобуржон! Сиз... Сиз ўшаанда мендан ранжигансиз!.. Биламен... Бошингизга таъна тошлари ёғилган... Мен... айтолмаган эдим. Ўзим учун эмас, сиз учун...

— Мен ҳам буни кейин билдим. Сиз мени қутқариш учун ўзингизни хонга тутиб бермишсиз. Мен сиздан умр-бод қарздормен!

— Ўшал қарзингизни мана энди уздингиз, Бобуржон. Бу дафъа мени сиз қутқардингиз! Агар Шоҳ Исмоилга ёзган номангиз бормаса, мени ҳам, хон ҳарами билан асир тушган аёллар қатори, бирон бек ёки мулозимга тутқун қилиб берур эдилар. Шоҳ Исмоил сиз туфайли мени шунчалар иззат-икром билан озод қилиб, кузатиб қўйди. Сиздек иним борлиги учун худога минг шукурлар қилдим!

Хонзода бегим юзини Бобурнинг кўксидан олди-ю:

— Ҳазрат онамлар қайдалар? — деди.— Бултур бир шум-хабар эшитдим, ростми?

— Беш йил бурун... Хасба¹дан жон бердилар. Кобулнинг Боғи Наврўзийсиға қўйдик.

— Э воҳ, элликка ҳам тўлмай кетибдилар-а!..

— Менга ҳам шуниси беҳад алам қилди! Саксонга, тўқсонга кирганлар озми?

— Онамни ғаму ғурбат адо қилган, амирзодам! Бизни деб озмунча кулфат чекдиларми!

Муҳаммад Қўкалдош гапни бошқа ёққа бурди:

— Тақдирга чора йўқ, бегим. Мана бугун сиз подшоҳ ҳазратлари билан яна топишганингиздан ҳазрат онангни арвоҳлари шод бўлур! Қани, ўтирсинлар. Фотиҳа ўқийлик.

Зарбоф кўрпачалар устига ўтиб ўтирдилар. Бу орада

¹ Х а с б а — ичгерлама, тиф.

ташқаридан бегимни кўриш учун кирган Қосимбек қавчин Қутлуғ Нигор хонимнинг руҳига бағишлаб тиловат қилди.

Кейин Хонзода бегим канизлари орасида ҳаммани жимгина кузатиб ўтирган ўғилчаси Хуррамшоҳни имлаб чақирди.

Боланинг оқ-сарғиш юзи, кўзининг кўкимтирлиги, қисқа бўйни ва сийрак қошлари худди Шайбонийхонниқига ўхшар эди. Бобур Шайбонийхонни кўрмаган бўлса ҳам Хонзода бегим ўглини унга таништираётганда боланинг киёфасида хон отасидан мерос қолган аломатларни аниқ кўргандай бўлди.

Хуррамшоҳ етти ёшга кирар-кирмас отаси уни Балх вилоятига ҳоким қилиб қўйган эди. Ҳокимликни болага атка қилиб белгиланган Мадҳи Султон қилса ҳам Хуррамшоҳ ўз қаршисида катта-катта одамларнинг бош эгиб таъзим қилишларига анчагина ўрганган эди. Хонзода бегим ўғлига Бобурни кўрсатиб:

— Тоғойингиз мана шу кишилар! — деганда Хуррамшоҳ Бобурнинг хаёлидан ўтган нарсани сезиб ётсирадими ёки унинг кийимлари жуғилигини кўриб, назарига илмадими, истар-истамас бош ирғаб салом берди. Аммо тоғасига яқин бормади. Шунда Хонзода бегим уни елкасидан секин итариб қулоғига шивирлади:

— Эсингизни йиғинг, подшоҳ Бобур мирзо ҳузуридасиз! Шоҳ Исмоил шу ҳазрат туфайли сизни озод қилди!

«Подшоҳ» ва «ҳазрат» деган сўзлардан боланинг кўзлари гўё чарақлаб очилиб кетди. Шу пайт Бобур жияанининг кўзлари ойисиникидай йирик-йирик эканини сизди.

Тождорлар билан муомала қилишнинг машқини яхши олган бола энди тиззачасини гиламга тираб, Бобур қаршисида юкунди, сўнг икки қўлини кўксига қўйиб, эгилиб таъзим қилар экан, чучук тил билан:

— Ҳазратим, мен сизга... сизга хизматқа келдим! — деди.

Бобур унинг бурни ҳам Хонзода бегимники каби қиррали эканини энди кўрди ва бу болага нисбатан қалбида тутун аралашган оловдай мураккаб бир илиқлик сизди.

— Хизматга келган бўлсангиз хуш кўрдик, шахзода, — деди-ю, болани қўлидан олиб, ўнг ёнига ўтказди.

Шу пайт ташқаридан эллик ёшлардаги семиз ҳарам бекаси таъзим қилиб кирди:

— Подшоҳ ҳазратлари, Моҳим бегим олинасаб эгачингиз ҳузурига келишга ижозат сўрадилар!

Бобур Хонзода бегимга қараб сирли бир тарзда жилмайди. Сўнг ҳарам бекасига буюрди:

— Айтинг, келсинлар! Мирзо Ҳумоюнни ҳам ола келсинлар.

Бобурнинг ёш хотини Моҳим бегим кекса Қосимбек ўтирган хонага киришдан ийманиб келолмаётганини ҳамма сизди. Қосимбек ва Муҳаммад Қўқалдош Бобурдан рухсат олиб, секин эшикдан чиқдилар.

Меҳмонхона олдида одам кўп. Марғилолик Хўжа Калонбек, унинг укаси Кичик Хўжа, қувалик Тоҳир қўрчи, тошкентлик Саидхон, самарқандлик Маждид барлос, Юсуф Андижоний деган бир навқар — ҳаммалари ватанларининг дарагини олиб келган Хонзода бегимни кўрмоқчи бўлишар, аммо ичкарига киришдан истиҳола қилиб туришар эди. Қосимбек уларга:

— Аввал ҳарам аҳли билан кўришсинлар, кейин сизларга ҳам рухсат сўрармиз,— деб уларни тарқатиб юборди.

2

Шафтоли гулли шак қабоси шигичка белига, назокатли қадди-қоматига жуда ярашган бир жувон шахзодаларча ясантирилган уч яшар болани қўлидан етаклаб, эшикдан охишта кириб келди. Болачанинг юз-кўзи Бобурга ўхшашини Хонзода бегим бир қарашдаёқ сизди-ю, тез ўрнидан турди. Моҳим бегим келинлик назокати билан эгилиб таъзим қилди. Хонзода бегим унга пешвоз чиқиб, аввал елкасига қўлларини қўйиб кўришди. Сўнг жувоннинг юзидаги нафис оқ пардани секин кўтариб қаради-да, унинг ажиб бир латофатини юракдан ҳис қилиб завқи келди. Келинини пешонасидан, кўзларидан қувониб ўпди, сўнг шодликдан балқиган юзини Бобурга ўғирди.

— Муборак бўлсин! Бир-бирларингизга бениҳоя муносиб-сизлар! Бахтли бўлинглар!

Кичкина Ҳумоюн бир қўлчаси билан онасининг этагидан тутиб пастдан юқорига мароқ билан қараб турарди. Хонзода бегим уни қўлига кўтариб олди. Бола аммасини биринчи марта кўраётган бўлса ҳам, бу истараси иссиқ аёлни кўпдан бери биладигандек бегонасирамас эди. Хонзода бегим боланинг дўппи юзига юзини қўйиб эркалаганда Ҳумоюн буни ёқтириб кулимсиради.

Хонзода бегим уни ўзининг ўғилчаси олдига кўтариб олиб борди-да, ерга қўйди:

— Қани, кичкина тоғача «катта» жиянча билан танишсинлар-чи!

Уч яшар бобурийзода билан тўққиз яшар шайбонийзода

аввал бир-бирларига жим тикилиб турдилар. Кейин Ҳумоюн Хуррамшоҳнинг белидаги кичкина безақдор ханжарчасига қизиқиб қўл чўзди. Хуррамшоҳ унинг қўлини олиб кўришди-ю, аммо ханжарини бергиси келмай орқага чекинди. Буни кўрган катталар кулиб юбордилар.

Хонзода бегимнинг бошидан кечган барча даҳшатлар, Қундуз йўлида унинг юрагини титратган номальум хавфу хатарлар шу бир қувноқ кулги билан гўё узоқ ўтмишга айланди. Хонзода бегим ийманиб табассум қилаётган келинини бир ёнига ўтқазди. Иккинчи ёнида хушчақчақ кулимсираб болаларга қараётган Бобурни кўрди. Яқингинада ўзлари ҳам мана шу тоғача-жийн каби ёш бола бўлган пайтлари эсига тушди. Оғир айрилиқ йилларида опа-ука икковлари ҳам фарзандлик бўлганлари, душман хонадонларидан чиққан бу болалар энди гўдакларча бир маъсумлик билан танишаётганлари қаҳратон қиш кетидан келган бахордек беҳад ёқимли эди.

Хонзода бегим келинига яна бир қараб олди-да, кейин Бобурга нўҳ назар ташлади:

— Толе сизга энди кулиб боқибди, амирзодам! Ўзингизга бунчалик муносиб маликани қандай учратдингиз! Моҳим бегим, қаерликсиз?

— Хурросонлик, ҳазрат бегим.

Моҳим бегим Бобурга: «Боғқўча деворидан гул ташлаганимни айтиб мени уялтириб қўйманг яна!»— дегандек илтимоскорона қараб олди. Бобур унинг бу қарашдаги маънони сезиб, завқли жилмайди. Сўнг Моҳим бегимнинг Ҳусайн Бойқарога қариндошлиги борлигини, оталари бундан тўрт йил бурун Бадиуззамон мирзо билан чиқишолмай Ғазнига келиб қолишганини опасига айтиб берди. Бобур Моҳимнинг ота ва оғаларини Ғазнидан Кобулга таклиф қилган, кейин бу ерда Моҳим билан яна кўришиб унга уйланган эди.

— Ҳирот билан Мурғоб оралиғида Ҳазрати Жом деган шаҳр бор, кўрганмисиз? — сўради Бобур опасидан.

— Кўрганмен! Улуғ шоир Аҳмади Жомийнинг номларига қўйилган.

— Бегимнинг она авлодлари ана ўшал Ҳазрат Жомийга хеш эканлар. Устод Абдурахмон Жомийга ҳамшаҳр эканлар.

Бобур ҳазиломуз кулиб қўшиб қўйди:

— Бегимнинг ўзлари ҳам шундай шоирпарвару шеършуносларки, Жомий билан Навоийнинг барча ғазалларини ёд билурлар. Аммо биз шеър ёзсак, мунаққидлик¹ қилиб, нуқсини кўрсатурлар.

¹ Мунаққидлик — танқидчилик.

Моҳим эрининг ҳазилига ҳазил билан жавоб берди:

— Мунаққид бўлмай иложим йўқ, чунки ҳазратим меннинг таърифимда кўп муболага қилурлар!

Хонзода бегим эр-хотинининг ҳазилкашлигидан завқланиб кулди:

— Лекин таърифингизда қанча муболага қилсалар ҳам оз!

— Миннатдормен, ҳазрат бегим!— Моҳим энди ҳаяжонли товуш билан гапирди:— Мен сизнинг жасоратингизни, фидоийлигингизни ҳазратимдан эшитиб, ўзингизни кўриш орзусида эдим. Танграмга шукур, бугун шу орзуйим рўёбга чиқди. Ҳазрат бегим, мен сизни афсонавий бир малика деб ўйлар эдим. Бироқ ўзингизни кўрдиму сиздаги меҳригиз афсонавий маликаларда ҳам бўлмас, деб ўйладим! Энди уйимизнинг пешгоҳи ҳам, кўнглимизнинг тўри ҳам сизники!

Моҳим бегим бу гапларни самимий бир ихлос билан айтганини сезган Хонзода бегим:

— Бизга сиздек келин берган танграмга шукур!— деб қўйди.

Хонзода бегим бирдан Ойиша бегимни эслади ва уни Моҳим бегимга таққослаб кўрди. «Бир ҳисобда, Бобуржон аввалги хотини билан ажрашиб кетгани ҳам яхши бўлган экан», деб қўйди ўзича. Сўнг хон ҳарамда ўзининг тортган азобларини эслаб кетди.

Бобур ўттиз тўрт ёшли Хонзода бегимнинг сочларига битта-яримта оқ оралаб қолганини энди кўрди. Шу туришда опаси Бобурга онасининг энди бева қолган ўттиз етти-ўттиз саккиз яшарли пайтларини эслатди. Хонзода бегим ҳам энди бева эди. Бобур шуни ўйлади-ю:

— Сиз мени деб кўп азоб тортгансиз!— деди.— Сизни эсон-омон даргоҳимизга етказдирган Шох Исмоилнинг яхшилигини ҳеч вақт унутмасмен!

Шох Исмоил тилга олинниши билан Хонзода бегимнинг чеҳраси яна очилди.

— Шохнинг Тождли хоним деган ёшгина, кўҳликкина хотини бор экан,— деб ҳикоя қила бошлади.— Шу жувон мени шохнинг ҳузурига бошлаб кирди. «Шох Исмоил сунний мазҳабидагиларни ўлдириб, терисига сомон тикдирармиш» деган ваҳимали гапларни кўп эшитган эдим. «Бадҳайбат бир одам бўлса керак», деб титраб-қалтираб бордим. Қарасам, йиғирма тўрт-йиғирма беш ёшли хушеурат бир йиғит тахтда ўлтирибди. Соқол қўйган эмас, фақат узун, ингичка мўйлови бор. Бургут бурун. Кўзлари катта-катта. Озарий тилда гапирди, сўзларининг ҳаммасига тушундим. Шиаларнинг имомлари Биби Фотиманинг авлодлари бўлган эмасми, шунинг учун

улар аёл зотини жуда ҳурмат қилар эканлар. Мен буни йўлда ҳам кўп сездим.

— Лекин ўзимизда ҳам илгари аёлларга эҳтиром кучли бўлган, — деди Бобур. — Самарқандда Биби Хоним номли мадраса қурилган. Унинг қаршисида Сарой Мулк хоним мадрасаси бўлган. Шоҳи Зидада Шоҳи Мулк хоним мақбараси, Туман она мақбараси бор. Ҳиротда Гавҳаршод бегим мадрасаси машҳур.

— Билмадим, у замонларда улуғ аёллар кўп бўлганми ёки уларнинг илму санъатга иштироклари катта бўлганми? — деди Моҳим бегим эрига қараб. — Ҳозир нечукдир ундок эмас-да, ҳазратим?

— Фалакнинг гардиши ажиб! — деди Бобур. — Аёлларга муносабат хамиша илму санъатга муносабат билан рост келур. Илму санъат барқ урган даврларда аёлларнинг ҳурмати ҳам батад. Чунки илму санъат аёлларнинг иштироки билангина астойдил юксалган. Маънавий инқироз даврларида олимлару санъаткорлар нечоғлиқ хор бўлса, аёллар ҳам шунчалик камситилмишдир.

— Сиз айтган шу инқироз ҳозир Мовароуннахри чирмаб олган, ҳазратим! — деди Хонзода бегим. — Кўчманчи хону султонлар мамлакатнинг қуруқ гавдасини эгаллаб олмишлар. Унинг руҳи билан ишлари йўқ. Ўлган одамнинг арвоҳини ранжитиш адолатдан эмас. Шайбонийхон пароканда бўлиб ётган ўлкаларни бирлаштирди, Самарқандда ўз номига мадраса қурдирди. Кўҳак¹ дарёсининг устига кўприк қурдирди. Савоб ишлари шу бўлди. Лекин одамлару санъаткорларга муомаласи қандок дурушт бўлса, аёлларга ҳам шундоқ эди. Темурийлар аёлларнинг номига мадрасаю мақбаралар қурдирганини айтсангиз ғазаби келур эди. Унингча, Улуғбек илму санъатга берилиб, дину имонни унутган эмиш, аёлларни талтайтириб, халқнинг ахлоқини бузган эмиш. Хон ёздирган «Шайбонийнома», «Нусратнома» деган китобларнинг биронтасида бирорта аёлнинг номи тилга олинган эмас. Шаҳзодаю, султонларнинг оналари ёки хотинлари ҳақида сўзлаш зарур бўлиб қолса, «фалончининг қизи», «фалончининг хотини» деб, фақат отаси ёки эрининг номини ёзурлар. Чунки аёлларнинг номини номаҳрамлар тилга олсалар гуноҳ бўлур эмиш! Ҳали бу — мадраса кўрган илмлик хоннинг даврида бўлган ишлар. Ҳозир тирик қолганларида шу илм ҳам йўқ. Фақат дағал бир кучу бидъату хурофот. Илму санъат аҳли султонлар зулмидан қочиб, бири Хуросонга, бири Истамбулга кетди, бири Кобулга келди. Энди бутун умидимиз сиздан,

¹ К ў х а к — ҳозирги Зарафшон.

Бобуржон! Сиз Мовароуннахрнинг улуг руҳини тикларсиз, илму маърифат қуёшини юртимизга қайтариб олиб борурсиз деб, йўлингизга кўз тикканлар кўп!

Бобур опасининг айтганлари қуруқ гап эмаслигини биларди. Шайбонийхон ўлгандан кейин Самарқанддан, Бухородан, Тошкентдан Бобурга махфий хатлар ва чопарлар келган эди. Кўчманчи султонлар зулмидан безган одамлар Бобурни тезроқ юртига қайтишга чорлар эдилар.

— Ўтган ҳафта Андижондан хушхабар келди,— деди Бобур опасига мамнун кўз ташлаб.— Тоға авлодимиздан бўлмиш Саид Муҳаммад дуглат Фарғона водийсидаги барча хайрихоҳларимизни атрофига тўплабдиру водийдан кўчманчи султонларни қувиб юборибдир. Менга китобат ёзибдирки, «Қоратегин орқали Андижонга тезроқ етиб келинг, ота юртингиз сизга мунтазир!»

Хонзода бегим қувонч билан:

— Тангримга минг қатла шукур! — деди.

— Ҳазратим бизни Кобулдан Қундузга олиб келганларининг бойиси ҳам шуки,— деди Моҳим бегим овозини пасайтириб,— тезроқ ватанларига қайтмоқчилар!

— Андижонгами? — шивирлади Хонзода бегим инисига.

Бобур ўйчан қулимсираб бош чайқади — у Андижонга ишончли бир кишисини юбормоқчи, ўзи эса Ҳисор орқали Самарқандга юриш қилмоқчи эди. Лекин Бобур ўзининг бу ниятини тарих саҳнасида пайдо бўлган янги бир куч — Шоҳ Исмоил билан келишмасдан амалга оширолмаслигини сезиб турарди. Чунки Шоҳ Исмоил кўчманчи султонларга қарши курашин давом эттириш ва уларни Мовароуннахрдан қувиб чиқариш учун Бобур билан иттифоқ тузмоқчи эди. Бугун Хонзода бегим билан келган элчининг қандай нияти борлигини Бобур тахминан билар эди.

Башарти, у Шоҳ Исмоил таклиф қилаётган иттифоқни рад этиб, Андижонга ёки Самарқандга ўзича юриш қилса, шоҳ ундан айниб, шайбонийзодалар билан иттифоқ тузиши мумкин эди. Шайбонийхоннинг ўғли Темур Султон шоҳга элчилар ва совғалар юбориб, музокара олиб борганидан Бобур хабардор эди. Бу икки зўр кучга Бобур ёлғиз бас келолмаслиги эса ўз-ўзидан аён эди...

У аёлларга бу мураккаб муаммоларни айтиб ўлтирмади-ю, Шоҳ Исмоилнинг шоирлигидан гап очди.

— Мирзохон менга шоҳнинг шеърларидан келтириб кўрсатди,— деди опасига.— Таъби назми баланд, озарбайжон туркийсида жуда чиройли ғазаллар битибдир. Яна камтарлик билан «Хатой» деган тахаллус танлабдир.

— Катта шоирлиги рост,— деди Хонзода бегим.— Ғазал-

ларини одамлар қўшиқ қилиб айтганларини эшитдим. Шоҳ мени қабул қилганда «Бобур подшоҳнинг шоҳлигини ҳам, шоирлигини ҳам эҳтиром эдюрмиз», деди. Кейин ҳазратимнинг Ҳиротда куйга солинган ғазалларидан икки сатрини ёд айтиб, «Чўх яхши!» — деб қўйди.

Бобур шоҳнинг бу мақтовидан кўнгли ийиб, уялинқираб: — Қайси ғазал экан? — деди.

Хонзода бегим бармоқларини лабларига қўйиб ғазални сўзма-сўз эслашга тиришар экан, Моҳим бегим унга кўмаклаша бошлади:

— «Менинг кўнглимки, гулнинг ғунчасидек таҳбатаҳ қондир» деб бошланурми?

— Ҳа, ҳа, худди шу! — деб Хонзода бегим иккинчи сатрини ўзи айтди: — «Агар юз минг баҳор ўлса очилмоғи но имкондир».

— Шоҳга бу матлабнинг ёққани бежиз бўлмаса керак, — деди Бобур. — У ҳам бизга ўхшаб, отасидан ёш қолган экан, қувғинларга учраб, кўн кулфат чеккан экан. Менга унинг тарихини Мирзохон айтиб берди. Энди Шоҳ Исмоил дунёда адолат ўрнатмоқчи эмиш.

— Шоҳ менга ҳам шуни айтди, — деди Хонзода бегим. — «Адолатни суннийлар ўн икки имом билан бирга ўлдирмишлар», деди. Лекин ўн иккинчи имом — Ҳазрати Мадрҳи ўлган эмас эмишлар, ҳозир осмондан ерга тушиб, суннийларнинг жазосини берар эмишлар. Шунинг учун шиалар шоҳни «соҳиби замон» деб улуғлар эмишлар.

Бобур бу ясама эътиқодлардан ғаши келиб, бош чайқади-ю:

— Таажжуб! — деб қўйди. — Махрум Шайбонийхон ўзини «Халифани раҳмон, имоми замон» деб юриб, охири нима бўлди? Динни сиёсатга айлантириш не ҳожат?

— Лекин шиалар билан суннийларнинг адовати аслида ҳокимият талашидан келиб чиққан эмасми, ҳазратим? — деди Моҳим.

Ислол тарихини яхши биладиган Бобур суннийлар билан шиаларнинг қонли курашларини хаёлидан ўтказа бошлади.

Бу кураш Бобур яшаган даврдан салкам тўққиз юз йил аввал — Муҳаммад пайғамбарнинг ўлими билан бошланган эди. Муҳаммад пайғамбар тузган давлатни ким бошқариши керак? Ким унинг давомчиси — халифи бўлиши керак?

Энг яқин қариндошни ворис қилиш тарафдори бўлганлар Алини биринчи халиф қилиб кўтармоқчи эдилар. Чунки Али пайғамбарнинг амакиваччаси эди ва унинг ягона фарзанди Биби Фотимага уйланган эди. Аммо Али чорёрлар орасида энг ёши эди. Қабила удуми, яъни суннага биноан энг

ёши улуг ва обрўси баланд ўтағаси мусулмон оламига бош бўлиши керак эди. Шу сабабли кекса Абубакирни биринчи халиф қилиб кўтардилар. Шу билан бирга Али ҳам пайғамбарнинг тўртта энг яқин салафларидан — чорёрларидан бири деб тан олинди, фақат ёшига қараб уни Абубакир, Умар ва Усмондан кейинги тўртинчи ўринга қўйдилар.

Душманлари аввал Умарни, кейин Усмонни сумқасд билан ўлдирадилар. Ниҳоят Али халиф бўлади. Аммо орадан беш йил ўтар-ўтмас душман тараф қасдма-қасдига Алини ҳам ўлдирди.

Али тарафдорлари унинг ўрнига ўғиллари — Биби Фотимадан туғилган Ҳасан ва Ҳусанни мусулмон оламининг бошлиғи деб эълон қиладилар. Аммо Имом Ҳасан касалланиб ўлди. Имом Ҳусан Карбало даштида суннийлар билан қилинган жангда ҳалок бўлди. Шундан кейин халифлик яна суннийлар қўлига ўтди-ю, Алининг авлодига мансуб бўлган барча имомлар бирин-кетин ўлдирилаверди. Фақат ўн иккинчи Имом Муҳаммад ёшлигида сирли бир тарзда йўқолди, унинг ўлик-тириги топилмади. Муҳолифлари уни ўғирлаб кетиб ўлдирганлари тахмин қилинса ҳам, унинг тарафдорлари халқ орасида «Имом Муҳаммад осмонга чиқиб кетган, бир кун Имом Мадҳи номи билан қайтиб тушиб, дунёда адолат ўрнатади» деган бир диний эътиқодни тарқатдилар. Адолатсизликдан азоб тортиб юрган жуда кўп содда одамлар бу гапга ишонадилар. Шиалар мусулмон оламидаги барча бахтсизликларга Алидан олдинги уч халифни ва уларнинг кейинги авлодларини сабабчи қилиб кўрсатдилар. Суннийлар узоқ вақт давлат тепасида турган ва мусулмон динини жуда кўп мамлакатларга тарқатган ҳоким куч бўлганликлари учун уларнинг зулмларидан норози бўлган кўпгина олимлар, санъаткорлар, деҳқонлар, косиблар ва бошқа турли табақа вакиллари ҳам шиалар томонига ўтдилар. Қадимий маданият маркази бўлган Эрон ва Озарбайжонда шиаларнинг суннийларга қарши кураши тобора ўсиб борди. Шоҳ Исмоил шиаларнинг мана шу курашидан фойдаланиб, давлат тепасига келди, тарихда биринчи марта шиа мазҳабини катта бир давлатнинг динига айлаштирди ва суннийларга қарши газовот эълон қилди.

— Рост, шиа-сунний адовати қандай хунрезликларга сабаб бўлганини мен Ҳиротда кўриб даҳшатга келдим! — деди Хонзода бегим ва бир воқеани ҳикоя қилиб берди.

Марвдан кейин Ҳирот қизилбошлар қўлига ўтгач, бу ерда Шайбонийхон даврида қатағон қилинган шиалар қасоскорона бош кўтарадилар. Улар Ҳиротда Шайбонийхоннинг барча ишларига фатво берган саксон ёшли шайху-

лислом Тафтазанини шиаларга тутиб бердилар. Шиалар чолни кўчага — халойиқ орасига судраб олиб чиқдилар ва дарҳол сунний мазҳабидан шиа мазҳабига ўтишни буюрдилар. Тафтазани бунга кўнмади. Шундан кейин шиалар уни кўчадаги бир дарахтга осиб ўлдирдилар ва жасадини дарахт билан бирга ёкиб юбордилар.

Буни кўрган холис одамлар шиа-сунний душманлигидан безор бўлиб, Абдурахмон Жомий тириклигида ёзиб кетган ўткир рубойини бир-бирларига шивирлаб айтадилар:

Эй муғбачаи даҳр, бидеҳ жоми маям,
Ки омад зи низойи сунни-ю, шиа қаям.
Гўяндки, Жомийё, чи мазҳаб дори?
Сад шукурки, саги сунни-ю, хари шиа паям!¹

Бу рубойнинг сўзлари оғиздан-оғизга ўтиб, шиаларнинг қулоғига ҳам етиб боради. Айниқса «шианинг эшаги» деган ибора уларнинг жонини чиқаради. Қизилбошлар бидъатга берилган ҳиротлик шиалар ва ёш безорилар тўдасини Абдурахмон Жомийнинг мақбарасига бошлаб борадилар. Қабр устига қўйилган мрамар тошни кўчириб ташлайдилар. Тошга ўйилган «Жомий» сўзидаги арабча «*ج*» нинг нуқтасини ўчириб, «*ع*» тарзида ҳарфнинг юқорисига қўядилар. Натижада улуг шоирнинг номи «Хомий» деб ўқиладиган бўлади. Жоҳиллар бу билан ҳам қаноат қилмайдилар. Жомий мақбарасига Навоий ўрнаттирган заррин ўймакорлик гўзал эшикни синдириб, мақбара билан бирга ёндириб юборадилар.

Бу воқеани опасидан эшитган Бобур ғазаб аралаш ҳайрат билан сўради:

— Наҳотки Шох Исмоил шундай жаҳолатга йўл берган бўлса?

— Менинг билишимча, бу ишдан шох беҳабар қолган. Ҳиротдаги мудҳиш ишларга шохнинг Хуросон бўйича ноиб Нажми соний бошчилик қилган.

— Не бўлганда ҳам ҳазрати Жомий минг марта ҳақлар: шиа-сунний низолари кўнгилини оздирадиган даражада хунук!.. Ҳайҳот, дунёнинг ишлари ҳаминча чигал! Туғишганлардан-ку, дўст-ёр тополмадим. Энди тақдир менга Шох Исмоилдек бир мард, танти, фозил дўст берди, деб суюнсам, бунинг ҳам ишқал ишлари бор экан.

¹ Таржимаси: Эй дунёнинг ёш оташпарастини, менга майим жомини берилки, сунний ва шиа низоларидан қусгим келмоқда. Десалар: Жомийё, сен қайси мазҳабдансен? Юз шукурки, суннийнинг ити-ю, шианинг эшаги эмасман!

Моҳим бегим Бобурнинг кўнглига чўккан гўборни таркатиши келиб, кулимсираб гапирди:

— Гул тикансиз бўлмас экан-да, ҳазратим!

Бобур хотинининг жилмайган юзига тикилиб қаради-ю, ўзининг ҳам чехраси очила бошлади. Шунча айрилиқлардан кейин севимли опаси билан яна учрашгани, бу қувончга Шоҳ Исмоил туфайли муяссар бўлгани такрор эсига тушди. Қундузда шайбонийзодалардан ихлоси қайтган йигирма минг кишилик қўшин мўғул беклари бошчилигида Бобур ҳузурига келгани ва унинг хизматига ўтгани яна ёдига тушди-ю, кўнглини яйратиб ўтди.

Бобур кўзини Моҳим бегимдан олиб опасига қаради:

— Энди ҳеч бир гулнинг тиканидаи кўрқмасмиз! Мақол борки, гули учун тикани ҳам ноилож суғорилур... Шоҳ Исмоил шунчалик одамгарчилик қилибди! Майли!

Бобур ўрнидан турди. У шоҳдан келган элчи билан учрашиши керак эди. Моҳим уни эшик олдиғача кузатиб борди. Бобур эшикдан чиқаётиб, Хонзода бегимни қаерга жойлаштириш ва қандай эъозлаш ҳақида хотинига кўп гапириб ўтирмади-ю:

— Эгачимни онам ўрнида кўргайсиз! — деди. Шу бир оғиз гапдан ҳамма нарсани англаган Моҳим ҳам:

— Жоним билан! — деб кўлини кўксига қўйди.— Сиздан ҳам бир илтимос, ҳазратим.

— Хўш?

— Биз тикан деб ўйлаган нарсалар оғули тиғлар бўлиб чиқмасин. Эҳтиёт бўлинг!

Бобур хотинининг ҳамма нарсага фаҳми етадиган зийрак бир дўст эканини ҳозир яна бир марта сезди-ю, унга меҳри тобланиб:

— Хотиржам бўлинг! — деди.

Сўнг қалби учрашув қувончига, меҳрибон аёллар нафосатига ва маъсум болалар завқига тўлиб, кўрғон ҳовлисиغا чиқди.

Девонхонага яқинлашганда элчилар билан бўладиган муомалани кўз олдига келтирди-ю: «Молу дунёни аямаслик керак» деган ниятini кўнглига тугди.

3

Бобурнинг буйруғи билан Вали хазиначи бисотида бор энг қимматбаҳо дуру гавҳарлардан, Бадахшон лаълиларини олтин безакли кийимлардан, камёб тиғлар ва буюмлардан шоҳга алоҳида, унинг элчисига алоҳида инъомлар ҳозирлади. Сарой бовурчилари, баковул ва ясовуллар икки кеча-ю икки кундуз югуриб-елиб, Қундузда ҳали мисли кўрилмаган

шоҳона зиёфат ва базмга ҳозирлик кўрдилар. Улкан зиёфат учун ҳисорий қўйларнинг ўзидан етмиш-саксонгаси сўйилди. Тоғлардан, ўрмон ва дарёлардан овлаб келинган ғозлар, какликлар, охулар сони бундан ҳам кўпроқ эди.

Шоҳ Исмоилнинг меҳмондорчиликларини кўп кўрган одамлардан бири — Бобурнинг холаваччаси, илгариги ўратепа хокимининг ўғли Мирзохон эди. У Бобурга бир неча марта:

— Шоҳ элчилари чоғирсиз зиёфатни зиёфат ўрнида кўрмаслар,— деб айтди.

Бобурнинг эшик оғаси Қосимбек эса ичкиликни жуда ёмон кўрарди. Бобурнинг ўзи ҳам хали беклари билан бирор марта ичкилик базми ўтказган эмас, фақат Кобулда Моҳимга уйлангандан кейин хушбўй чоғирлардан бир-икки марта татиб кўрган эди.

Ҳозир унинг кўнглида кўпириб турган қувонч билан бирга Шоҳ Исмоилга ва шиалар билан суннийларнинг душман муносабатларига бориб тақаладиган қандайдир ғашлик, чигаллик бор эди. Бу ғашликни бугун фақат май билан тарқатиш мумкинга ўхшарди. Бундан ташқари, меҳмонларнинг кўнгли учун ҳам Бобурнинг ичиши зарур эди.

Унинг амри билан Қундуздан топиш мумкин бўлган энг тоза чоғирлар, энг ўткир майлар топтириб келтирилди.

Гулгун парчадан зар ёқали або кийган ўспирин соқийлар олтин кўзалардан олтин-кумуш суроҳийларга май куйиб, аввал Бобурга, сўнг унинг ёнида ўтирган шоҳ элчиси Муҳаммаджон эшик оғасига, элчидан нарига чўккалаган Мирзохонга навбатма-навбат узатдилар.

Зиёфатда Бобур томонидан юздан ортиқ аъёнлар, беклар ва мулозимлар қатнашмоқда эдилар. Аввалги зиёфатларда Бобурдан ва Қосимбекдан яшириб май ичадиган кўпчилик беклар энди чоғир тўла қадахларини қўлларида бемалол тутган ҳолда бир-бирлари билан шўх-шўх кўз уриштиришар, қувноқ илжайишар ва подшоҳнинг ишорасини кутишар эди. Пойгаҳда кичик беклар орасида ўтирган Тоҳир ҳам қўлидаги май тўла кумуш қадахга жонли бир нарсага қарагандай эҳтиёт билан қараб кўярди.

Мирзохон ёнидаги элчига шивирлаб изоҳ берди:

— Олий меҳмон, сиз ғаройиб бир ҳодисанинг гувоҳидирсиз. Бобур подшоҳ саройида бугун биринчи марта чоғир мажлиси!.. Эътибор беринг: мажлисда фавқулодда бир ҳаяжон ҳукмроп!

Бошига қизил жиғалик катта салла ўраган, соқоли хина билан бўяб қизартирилган бургутбурун элчи Бобурга мароқ билан тикилди.

Бобур қўлидаги қадахни учиб кетиши ёки чўкиб оли-

ши мумкин бўлган нотаниш бир қуш каби авайлаб ушлаб турарди. Одамлар унинг сўзини кутаётганларини сезиб, овози товланиб гапира бошлади:

— Олий зотлар даврасида шодиёна кунларда узум сувидан ҳалолу покиза қилиб тайёрланган чоғир ичмоқ ота-боболаримиздан қолган одатдир. Ҳаётимизда шодликдан кўра ғаму ғурбат кўпроқ эди, шунинг учун ҳанузгача чоғир мажлисига майл кўрсатмадик. Хиротда Бадиуззамон мирзо билан Музаффар мирзодек тождор хешларимиз биз учун ораста базмлар бериб, чоғир таклиф қилганлари мажлис аҳлига маълум бўлса керак. Ўшанда ҳам биз узрлар айтиб, чоғирдан ўзимизни тортган эдик, чунки у маҳалларда май ичиб хурсандчилик қилгудек шодмон эмас эдик. Тангрим бизни шод-хуррам кунларга мана энди етказди. Биз бу масъуд кунларга Шоҳ Исмоил ҳазратларининг шарофатлари билан етишдик. Бугунги шод-хуррамликни бизга олий меҳмонимиз Муҳаммадҷон эшик оғаси жаноблари келтирдилар! Шунинг учун бизнинг биринчи чоғир мажлисимиз Шоҳ Исмоил ҳазратларига чексиз ишонч ва эҳтиромларимиздан кичик бир нишона бўлғай! Биринчи қадахимиз эса шохнинг муътабар элчиси Муҳаммадҷон эшик оғаси жанобларига юксак ҳурматимизнинг исботи бўлғай!

Бу сўзлардан кўнгли ийиб, чуқур кўзлари оловланиб кетган элчи ўрнидан туриб, Бобурга эгилиб таъзим қилди. Сўнг жойига ўтириб, кўлидаги чоғирни охиригача сипқарди.

Пастда ўтирган созандалар «Сарви наво» куйини чала бошладилар. Дастурхонга кийик ва каклик кабоблари тортилди. Энг мазали таомлар орасида яна икки-уч қайта май ичилди. Одамлар энди ўзларини боягидан хийла эркин сеза бошладилар. Қаҳқаҳа, ўйин-кулги авжига чиқди. Қувноқ шўх куйлар кетидан яна алёрлар айтилди. Ниҳоят, сўз навбати шох элчисига яқинлашди. Шунда Муҳаммадҷон эшик оғаси ёнидаги мулозимга нимадир деб шивирлади. Мулозим бош ирғаб, ён эшикдан чиқиб кетди-ю, навбатдаги қувноқ куй тугаган пайтда устига бир неча қават оқ ипак ёпилган қандайдир совғани олтин баркашга солиб кўтариб кирди.

Муҳаммадҷон эшик оғаси Шоҳ Исмоилнинг Бобурга бериб юборган мактубини ва олтин-кумуш инъомларини кундуз топширган эди. «Энди бу яна нима экан?»— деб ҳамма ўтирганлар олтин баркашга тикилиб қолди. Умумий жимликда қизилбош бек баркашдаги совға билан Бобурнинг қаршисига таъзим қилиб келди. Бобурга яқин ўтирган Муҳаммадҷон эшик оғаси ўрнидан туриб гап бошлади:

— Султон Заҳириддин Муҳаммад Бобур баҳодир ҳазратларининг соҳиби замон Шоҳ Исмоил ҳазратлари — йа чўх

юксад, чўх семимий ҳурматлари варлигина алҳол бизим ишончимиз камил ўлди. Шу себебли Шоҳ Исмоил ҳазратлари юбормиш муқаддас инъомни Бобур подшоҳ ҳазратларийа тошширмоға ижоза вергайсиз!

Элчи олтин баркашдаги совғанинг устидан ишак пардани олди. Бобур ёқут ва дур билан безалган нафис оқ ишак саллаши кўрди. Салланинг тепасига ўн икки имомнинг қонини ёслатувчи қизил жиға суқиб кўйилган эди. Салла анча катта — Бобур ўрамларнинг сони ҳам шаҳид бўлган имомлар каби ўн иккита эканини тахмин қилиб билди. Шиаларнинг эътиқодига биноан, бу ўрамларнинг ҳар бири — бир имомнинг руҳи учун муқаддас макон эди.

Ичган чоғиридан юзи қизариб, кўзлари ялтиллаб турган Бобур ўзининг аъёнлари орасида шивир-шивир бошланганини пайқади-ю, кулимсираб Қосимбек томонга қаради. Аммо Қосимбек ва ундан нарида ўтирган Хўжа Халифа номли шайхулислом олтин баркашдаги дасторга жирканиб ва ҳатто кўрқиб қарамоқда эдилар.

Чунки Бобурнинг ўзи ҳам, Қосимбек ҳам, зиёфатда ўлтирган бошқа сунний аъёнлар, мулозимлар ҳам чорёрларнинг ҳурмати учун бошларига тўрт ўрам қилинган салла ўрар эдилар. Кичиклигидан оллоҳу таолога, пайғамбар ва чорёрларга чексиз ишонч ва эътиқод руҳида тарбияланган одамлар бошларидаги саллаларининг тўрт ўрамида тўрт чорёрнинг руҳи яшайди, деб ишонар эдилар. Шиалар шу чорёрларнинг учтасини тан олмай ҳақорат қилишар, уларнинг ўн икки ўрамлик саллалари эса Абубакир, Умар ва Усмоҳларнинг авлодларига қарши курашган шиа имомларини улуғлар эди.

Шиаликни муқаддас чорёрлардан юз ўгириш, диндан чиқиб, рофизий бўлиш деб ўрганган кекса Қосимбекка олтин баркашдаги салланинг майин йилтираган ипаги — илон терисининг йилтирашидек кўринди. Қосимбекнинг назарида саллага қадалган ёқутларнинг чўғдай ёнши заҳарли илоннинг қизғиш кўзлари қонга тўлиб ёнишига ўхшарди.

Муҳаммаджон эшик оғаси Бобурга яна бир марта таъзим қилди-ю, Шоҳ Исмоил шахсан бериб юборган шу муқаддас дасторни кўлига олиб бошига кийишини ундан илтимос қила бошлади.

Ўнлаб кўзлар Бобурга «Не қиларкин?» — деб тикилди. Қосимбек Хўжа Халифага таҳлика билан шивирлаб:

— Макру ҳийла билан ҳазратимни шиа мазҳабиға ўтказмоқчиларми? — дегани Бобурнинг қулоғига чалинди.

Бобур агар шу дасторни бошига кўйса шиа мазҳабиға ўтгандай кўриниши мумкинлигини энди пайқади. У ичган

чоғиридан дурустгина кайф қилган эди. Ҳозир вазият унга Қосимбек қўрққанчалик ваҳимали туюлмаc эди. Чорёрлар ҳам, ун икки имом ҳам Бобур учун бундан тўққиз аср бурун ўтган тарихий шахслар эди. Узоқ ўтмишга айланган қонли душманликни бугун давом эттириш кимга керак?

Қизилбош бек ҳамон Бобурнинг қаршисида тиз чўкиб, олтин баркашдаги саллани унга тутиб турибди. Шоҳ элчиси унга илтимоскорона таъзим қиляпти. Улар орқали Шоҳ Исмоил гуё Бобурга ҳамкорона қўл чўзяпти. Бобур бу қўлни қайтарса, шоҳ билан орани узиши керак бўлади. Кейин шайбонийзодалар шоҳ билан иттифоқ тузишади-ю, Бобурнинг ватанга қайтадиган йўлларини яна бекитишади. Бобур эса ҳозир бутун вужуди билан ватанига қайтишни истади. Бу истаги йўлида тоғ келса кемириб, сув келса симириб ўтмоқчи бўлади.

Бобур элчига мулойим кўз ташлаб:

— Шоҳ Исмоил ҳазратларининг инъомлари биз учун беҳад азиз,— деди ва баркашдаги саллага қўл чўзмоқчи бўлди.

Шунда Қосимбек оғзини унинг қулоғига яқинлаштириб, хавотир билан шивирлади:

— Ҳазратим, зинҳор бошингизга кийманг! Зинҳор!

Бу сўзлар элчига ҳам эшитилди ва уни ранжитгани авзойи ўзгариб кетганидан сезилди.

Сув куйгандай жимжитликда Бобур Муҳаммадjon эшик оғасига майин кулимсираб қаради:

— Олий меҳмонимиз имомия¹ мазҳабиданлар, шундайми?

Элчи тасдиқ маъносида бош ирғади. Бобур яна ўшандай мулойимлик билан сўзида давом этди:

— Имомиялар ҳам Муҳаммад алайҳиссаломнинг умматларими?

— Алҳамдулилло! — деб элчи дарҳол калима келтирди.

Шундан кейин Бобур Қосимбек томонга ўгирилди.

— Сиз ҳам Муҳаммад умматимисиз, жаноби амирул умаро?

Қосимбек ҳам калима келтирди-ю, охирида:

— Ҳазратим, сизни илоҳа чоҳорёри босафолар қўллаб-қувватласинлар! — деб қўшиб қўйди.

Чорёрлар тилга олиниши билан элчининг ранги ўчиб, лаби асабий пирпиради.

— Жаноб Муҳаммадjon эшик оғаси! — деди Бобур тез.— Қуръон шарифда айтилганки, «қулли муслиминна

¹ Имомия — шиа мазҳабининг расмий номи.

ихватун». Яъни, барча мусулмонлар оға-инилардир. Биз ҳаммамиз бир диндамиз. Демак, ҳаммамиз оға-инилардек яқин бўлмоғимиз керак. Биз сизнинг мусулмонлик эътиқодларингизни ҳурмат қилганимиз каби, сиз ҳам бизнинг,— деб Бобур икки қўлини ёйиб, барча бек ва мулозимларини кўрсатди,— мусулмонлик эътиқодларимизни ҳурмат қилурсиз деб ишонамиз!

Элчи энди бир оз юмшаб устма-уст бош ирғади:

— Ушбу муқаддас армуғон ҳам бизим сизлара буюк эҳтиромимиз аломатидир!

Бобур энди Қосимбекка юзланди.

— Ҳазрати Алини сизу биз ҳаминша бошимиз устида олиб юрибмиз, шундоқми?

Қосимбек — салласидаги тўрт ўрамнинг бири — Ҳазрати Алининг руҳига макон эканини ўйлаб, қўлини кўксига қўйди:

— Шундоқ, ҳазратим.

— Муҳаммад алайҳиссаломнинг ягона фарзандлари бўлган Биби Фотима биз учун ҳам муқаддас волидадирлар, шундоқми?

— Шундоқ, ҳазратим!

— Шундоқ бўлса, Ҳазрати Али билан Биби Фотиманинг азиз авлодлари бўлган имомларни биз ҳам эъзозласак, мусулмончиликка тўғри келурми, йўқми?

Боя Бобурга жон куйдириб ҳалиги гапни унинг қулоғига шивирлаган Қосимбек подшони ниятидан қайтаролмаслигини, шохнинг бу махсус совғасини Бобур қабул қилмай иложи йўқлигини энди сизди. У кўпчиликнинг олдида Бобурга тан бергандай бўлиб, аслида уни ёқлагиси келиб бош эгди:

— Подшоҳ ҳазратлари, сиз ҳақсиз, қулингизни густоҳлигим учун афв этинг!

Бобур Қосимбекка мамнун кўз ташлаб:

— Маъзурсиз,— деди. Сўнг дастор солинган оғир баркашни тутиб туравериш қўллари толиб кетган қизилбош бек томонга ўгирилди. Бобур дасторни дадил бир ҳаракат билан икки қўллаб баркашдан олганда унинг ўнлаб бек ва мулозимлари ваҳима билан: «о!» деб юборишди. Бобур дасторни қўлида тутган ҳолда:

— Шох Исмоил ҳазратлари ўз муборак иликлари билан юборган бу армуғонни биз кўзга сургаймиз! — деди-ю, дасторни кўзи аралаш пешонасига теккизиб олди.

Муҳаммаджон эшик оғасининг юзи қувончдан балқиб кетди:

— Муташаккирам, подшоҳ ҳазратлари, муташаккирам!

Лекин Бобурнинг бек ва мулозимлари орасида, хусусан, яқинда унга келиб қўшилган мўғул беклари орасида

хайрат, кўркув ва койиниш оҳангларига тўла бир шовур-шувур эшитилди.

Бу ғовурдан Қосимбекнинг ранги оқариб кетди. Муҳаммаджон эшик оғаси эса Бобурни шиа мазҳабига ўтказиб, катта ғалабага эришгандай шодланиб гапирди:

— Подшоҳ ҳазратлари, биз умид эдюрмизки, сиз шоҳ ҳазратларининг буюк мададлари ила яна Самарқанд тахтига чиққанингизда азиз бошингизда шу муқаддас дасторни кўришга муяссар ўлурмиз!

— Тангри бизни сиз айтган бахтиёр кунга еткизса, бу дасторни тож ўрнида кюрмиз. Шоҳ Исмоил ҳазратларига шу аҳдимизни бориб айтгайсиз!

Бу гаплардан сўнг мўғул беклари орасидаги асабий шовур-шувур яна кучайди. Шоҳ элчиси эса Бобурнинг дадил одам эканига, Шоҳ Исмоил билан мустақам иттифоқ тузиш учун суннийпараст бекларининг ҳар қандай каршиликларини енгиб ўтиши мумкинлигига энди ишонди.

Мана шу ишонч Бобурнинг шоҳ элчиси билан эртаси кунни олиб борган музокараларини анча енгиллаштирди.

Шоҳ Исмоилнинг Бобур билан иттифоқ тузишдан мақсади — Мовароуннаҳрга у билан бирга қўшин тортиб бориш ва шайбонийзодаларни бирга тор-мор қилиш эди. Бобур шайбонийзодалар устидан ғалаба қилишни нечоқлик истамасин, Мовароуннаҳрга ўз қўшини билан мустақил кириб боришни истарди. Чунки агар у асосий ғалабани ўзи мустақил қўлга киритмаса, ватанига обрў билан қайтелмаслигини, ёвлари уни «Шоҳ Исмоилнинг найзасига миниб кириб келди!»— деб маломат қилишларини сезиб турарди.

Бобур Шоҳ Исмоилнинг Марвда эришган ғалабаси етарли эканини, энди улар дам олишлари кераклигини, шайбонийзодаларни Ҳисордан, сўнгра Самарқанддан қувиб чиқаришни энди Бобур зиммасига олиши кераклигини элчига қайта-қайта айтиб кўрди. Лекин Шоҳ Исмоил ҳам Самарқандга интилмоқда эди, агар унинг бу интилиши амалга ошмаса Бобур билан иттифоқ тузишнинг қизиғи қолмас эди. Элчининг гапидан буни сезган Бобур музокарани бошқа йўналишга бурди.

Шоҳ Исмоилнинг аскарлари тоғ йўлларида қийналиб, минглаб чақирим ортиқча йўл юриб, Қундуз ва Ҳисорга келиб юриши не керак? Шоҳ қўшини карвон йўли билан Термиз ва Бойсун орқали Самарқандга қараб отлансин. Бобур эса ҳозир Ҳисорга яқин турибди. Бир ҳамла билан Ҳисорни кўчманчи султонлар қўлидан тортиб олишга кучи етади. Кейин у Самарқандга жануб томондан йўл оча-

ди ва Шоҳ Исмоилнинг қўшини билан Шаҳрисабз — Қарши атрофларида учрашади.

Мантиқан асосли бўлган бу фикрга шоҳ элчиси эътироз қилолмади-ю, Бобурнинг таклифини қабул қилди.

4

Бобур элчи билан тузган бу битимни Шоҳ Исмоилнинг тасдиғидан ўтказиш учун Мирзохонни Табризга вакил қилиб юборди-ю, ўзи Ҳиндикуш тоғининг шимоли-ғарбий этакларига тўпланган қўшинларини жангга тайёрлай бошлади.

Баҳор охирлаб қолган кунларнинг бирида Бобур Қосимбек билан адир йўлидан мўғул бекларининг қароргоҳларига отлик кетмоқда эдилар. Шунда Қосимбек Бобурни йўлдан четроққа бошлаб чиқиб, бир шумхабарни айтди.

Шоҳ Исмоил юборган шиа дасторини Бобур кўзига суриб элчига қуюқ ваъдалар берганидан мўғул беклари қаттиқ ранжиган эмишлар, уни «чорёрлардан воз кечиб, имония мазҳабига ўтди», деб фитна уюштирган эмишлар. Бундан беш-тўрт йил бурун Кобулда Эгу Салим, Шерқули деган мўғул беклари Бобурга суиқасд қилмоқчи бўлган пайтларида қўлга тушган, Бобур уларни яқин тарафдорлари билан қатл эттирган эди. Шайбонийзодалардан айниб, яқинда Бобурга келиб қўшилган мўғул бекларининг орасида ўша ўлдирилганларнинг уруғдошлари бор экан, улар кек сақлаб юрган эканлар. Энди шу беклар яширинча тил бириктириб, Бобурни Қундузда ўлдирмоқчи ёки Кобулга қувиб юбормоқчи эмишлар. Унинг ўрнига Бобурнинг қўлида ўсган тоғаваччаси, марҳум Олачахоннинг ўн етти яшар ўгли Саидхонни тахтга чиқармоқчи эмишлар.

— Кимлар шундай қилмоқчи? Кимлар?! — деб Бобур ғазабдан титраб сўради.

Қосимбек орқасига ўгирилиб қаради. Мулозим ва хос навкарлар узоқда қолган, овоз уларга эшитилмайди. Шундай бўлса ҳам Қосимбек товушини пасайтириб:

— Қамбарали Саллоҳ, Сайидали Шакма,— деб бир қанча фитначиларнинг номларини айтди.

— Иблислар! Қачонгача булар менинг елкамга тиғ урурлар?! Андижондаги Аҳмад Танбал ҳам шу тоифадан эди! Бас! Ҳаммасини туттиринг! Пора-пора қилиб, гўштарини қузгунларга ташлатурмиз!

Қосимбек отининг жиловини тортиб, тоғ этакларидаги

минглаб ўтовларга хавотир билан кўз югуртириб чиқди.
— Ҳазратим, қаранг, булар жуда кўп. Навкарлари билан йиғирма минг!

Кўп асрдан бери Мовароуннаҳрда яшайдиган, туркий тилда сўзлашадиган, мусулмон динини қабул қилиб, унинг хурофотига қаттиқ берилган бу мўғул беклари ва навкарларининг касби ҳарбий иш эди. Қайси подшоҳ улуфани кўпроқ берса, қайси жангдан ўлжа яхшироқ тушадиган бўлса, буларнинг кўпини ўша подшоҳ ва ўша жанг ўзига жалб қилар эди. Хисравшоҳ хизматидан Шайбонийхонга ўтган, унинг маглубиятидан сўнг Бобурга келиб қўшилган бу ёлланма аскарлар беқарорликка ўрганган эдилар.

Агар Бобур фитначи бекларни туттириб жазолатадиган бўлса, уларнинг уруғ-аймоқлари аразлаб кетиб қолиши, сўнг қасд олишининг пайига тушиши аниқ эди. Агар ички уруш бошланиб кетса, кейин Бобур шайбонийзодалар қаршисида заифлашиб, енгилиши муқаррар эди.

Бобур шуни ўйлаганда қалбидаги ғазаб ўрниши оғир хавотирлик туйғуси эгаллади.

— Мудом инсофу имонга хилоф хиёнатлар шу мўғул бекларидан содир бўлур! Яна булар дину мазҳабни химоя қилмоқчиларми?!

— Бутун жаҳолат ана шундоқ нодонлардан чиқади-да, ҳазратим! Қулингиз ана ўша жоҳилларнинг кайфиятини сезиб, дасторни олманг, деган эдим.

— Лекин олмай иложим бормиди?

— Йўқ эди, ҳазратим, сиз мутлақо тўғри қилдингиз! Энди буни ҳаммага яхшилаб уқтириш керак. Мўғулларнинг орасида ҳам яхшилари бор, фитна тайёрланганини менга мўғул авлодидан чиққан тоғаваччангиз Саидхоннинг ўзи келиб айтди. «Ҳазратимдан илтимос қилинг, иложи бўлса мени Андижонга юборсинлар», деди.

— Лекин Саидхон...берган тузимизни оқлабдир...Дуруст!

— Бошқа инсофлик мўғуллар ҳам кўп, ҳазратим. Сиз бир пора ёмон бекларнинг фитнасида кўп маъюсланманг. Фақир чорасини ўйлаб қўймишмен.

— Ҳўш, қани?

— Саидхон сизга садоқатини исбот қилди. Уни хон кўтармоқчи бўлган беш-ўнта фитначи бекларга бир-икки минг навкарлари билан рухсат берайлик. «Бор, Андижонни шайбонийзодалардан химоя қилиб ол!»— дейлигу ҳаммаларини Қоратегин орқали жўнатиб юборайлик. Шу билан биз ҳам фитначилардан халос бўлурмиз, улар ҳам истаган хонларининг хизматига ўтиб тинчирлар.

— Қолганлари яна бир кун хиёнат йўлига ўтса-чи?

— Қолганлари билан кейин мен ўзим яккама-якка гаплашиб чиқурмен. «Подшоҳдан гуноҳларингни сўраб олдим, бир марта шафе бўлдим, иккинчи марта бўлмасмен», деб тушунтирурмен. Бу ҳам кифоя қилмаса, шубҳалироқларининг кетига зийрак махфийлардан қўйиб қўйгаймен. Агар яна бузқлик қилсалар, унда тутиб келтирурмен, кейин истаганингизча жазо берурсиз!

* * *

Нихоят, барча режалар гаплашилган тарзда амалга ошди-ю, Бобурнинг мўғуллар билан биргаликда йигирма беш мингдан ошадиган қўшини ёз кунларида Амударёнинг Панж деб аталадиган юқори оқимидан ўтиб, Кўлоб орқали Вахш водийсига йўналди.

Шайбонийзодалар Шоҳ Исмоил қўшинининг Термиз томондан келаётганини, улар Бобур аскарлари билан қўшилса, енгини мушкул бўлишини билар эдилар. Шунинг учун улар Убайдулла Султон бошлиқ бир қисм қўшинларини Қарши ва Самарқандда қолдиришиб, асосий кучларини Ҳисорга йиғиб келдилар. Темур Султон, Жонибек Султон, Ҳамза Султон ва Мамак Султон бошлиқ ўттиз минг отлиқ қўшин чўл ва водийлардан чиқиб, баланд тоғ ораллиқларига шитоб билан кўтарилиб келмоқда эди. Улар Бобур қўшинини Вахш дарёсидан ўтказмасликка интилар эдилар.

Бироқ юқоридан тез тушиб келаётган Бобур бутун аскарлари билан Вахш бўйига душманидан анча олдин етиб борди ва Пули Сангин¹ деган кўприкдан ўтди. Сўнг одам оёғи тегмаган тик қоятошлар ва зовлар орасидаги баҳайбат даранинг даҳанасини² ва ҳарбий жиҳатдан қулай баландликларни эгаллаб олди. Пастдан ёпирилиб чиқиб келган ёв қўшини торгина йўл билан даранинг ичига киришга журъат этолмай тўхтади.

Султонлар от устида туриб анча вақт кенгашганларидан кейин Темур Султон бошлиқ ўн минггача аскар даҳанинг ўнг томонига ўтди-ю, Бобур турган баландликка орқадан айланиб келмоқчи бўлди. Темур Султоннинг орқадан чиқиб келиб тўлғама ишлатишини Сарипул жангида кўрган Бобур унинг ниятини фаҳмлаб қолди. Дарҳол Мирзохон бошлиқ ўн минг отлиқни ёв айланиб ўтаётган

¹ Пули Сангин — «Тош кўприк». Ҳозирги Норақ шаҳрининг яқинида бўлган.

² Даҳана — даранинг оғзи, кириб-чиқиладиган жойи.

томонга жўнатди. Айланиб ўтаётганлардан кўра тўғридан бораётганлар мўлжаллаган жойга тезроқ етдилар ва балоқликнинг Вахш дерёсигача бориб тақаладиган ҳамма муҳим нуқталарини ишғол қилдилар. Вахш учуримли қоялар орасидан шундай даҳшат солиб оқар эдики, унинг қирғоғини ёқалаб ўтиб бўлмас эди. Темур Султон қаршисидан чиққан аскарларнинг сафини ёриб ўтмоқчи бўлиб, пешингача жанг қилди, лекин муҳолиф томон юқоридан тош юмлатиб, ўқ ёғдириб, уларга йўл бермади.

Очиқ чўлларда ўсган, текис водийларда дадил ҳаракат қиладиган султонлар ҳаммаёғи бекик даралар ва тик қоятошли тоғлар орасида жуда қийналиб қолдилар. Уларнинг даштий отлари ҳам тоғда дуруст чополмас эди. Баъзилари тик ёнадан тушаётганда тоғда юришга мўлжалланмаган қуюшқон ва айиллари узилиб кетар, эгалари отларидан йиқилиб тушишар эди. Шундай йиқилиб тушганлардан бирини тутиб олиб, Бобурнинг олдига «тил» тариқасида келтирдилар. Бобур «тил»ни сўроқ қилдириб, шайбонийзодалар орасида уларнинг энг истеъдодли саркардаси бўлган Убайдулла Султон йўқлигини, бошқалари дурустроқ олишишнинг эпини тополмай, чекинишга ҳам журъат этолмай, иккиланиб турганини аниқлади.

Бобур ёв қўшини сафланиб турган пастликнинг яқинида сув йўқлигини билар эди. Ҳаво иссиқ. Кунни бўйи югуриб-елиб чарчаган одамлар ва отлар ҳализамон чанқаб, сув қидиришга тушиши муқаррар. Сув эса ёв турган жойдан беш-олти чақиримча орқада эди.

Кеч кириб, кун бота бошлаганда Бобур одамларига: «Бугун энди жанг бўлмади, эртани кутамиз», дегандай қилиб, отидан тушди. Тепаликда Бобурнинг ёнида турган мингдан ортиқ аскарлар ҳам отдан намоийшкорона туша бошладилар.

Буни даранинг ташқарисидаги шайбонийзода султонлар кўриб турар эдилар. Лекин даранинг ичида — султонларга кўринмайдиган жойда Бобурнинг асосий кучлари отдан тушмай, саф тортиб, ҳужумга шайланиб турар эдилар.

Тепаликда турган Бобур ён-веридаги барча навкарлари билан кечки пайтда отдан тушганини ва навкарлар сафини тарқатиб юборганини кўрган султонлар «бугун чиндан ҳам жанг бўлмайди» деб ўйлаган бўлсалар керак. Улар ҳам сафларини бузиб, баъзилари отларини етаклаган ҳолда орқага бурилишди ва сув излай бошлашди.

Бобурга шу керак эди. У сакраб отига минди-ю, дара ичида ёвга кўринмай тайёр турган бек ва навкарларига қағаб қичқирди:

— Ёғий чекинди! Зафар бизники бўлур! Таъқиб этинг!

Бу буйруқ оғиздан-оғизга ўтиб, бир лаҳзада бутун сафларга тарқалди. «Ёв қочса ботир кўпаяди» деганларидек, ёв чекинганига ишонган дарадаги аскарлар даҳана ташқарисига шердай дадил ҳамла қилиб чиқдилар. Бобур ҳам қилич яланғочлаб, тепадаги тугбардорлари ва хос навкарлари билан пастга отилди.

Шайбонийзодалар дара ичидан ва тепадан тоғ кўчкисидай отилиб тушиб келаётган ўн беш минг кўшин қаршисида шошиб қолдилар. Улар бузилган сафларига қайтадан тартиб беришга улгуролмай, ваҳима ичида қочишга тушдилар.

Бу қочишни ўнг томонда Мирзохон билан олишяётган Темур Султоннинг одамлари ҳам кўрдилару яккаланиб, қуршовга тушиб қолишдан кўрқиб, нариги бир дарага қараб чекиндилар.

Бобур хос навкарлари билан бирга ёвнинг асосий кучларини таъқиб қилиб бормоқда эди. Ғира-шира коронғилик тушганда унинг Муҳаммад Султон Дўлдай деган беки Ҳамза Султоннинг кўшинини тор-мор қилиб, ўзини асир олиб келди. Хуфтон кечроқ Хўжа Калон бошлиқ навкарлар Маҳди Султонни ҳам кўлга тушириб келдилар.

Қорақўл ва Андижонда бўлган кўпгина қирғинларнинг сабабчилари мана шу султонлар эди. Бобур уларни ўлимга ҳукм қилди.

5

Тиниқ куз осмонида оқ ипақдан ҳам нафис мезонлар учади. Самарқанд боғларида катта дона анорлар етилган, соҳиби узумлар ва нақш олмаларнинг энг ширинлари қолган пайт. Шаҳарнинг барча дарвозалари очик, кирди-чиқди бемалол. Ўн кундан бери Самарқандда на кўшин бор, на бир ҳокимият. Шайбонийзодалар Вахш бўйида Бобурдан енгилганларидан кейин Ғузор ва Қарши атрофларида яна астойдил бир жанг қилмоқчи бўлиб, куч тўплаб кўрдилар. Бироқ Бойсун тоғларидан нарида Бобур кўшинига Шоҳ Исмоил юборган ўттиз минг қизилбош аскари келиб кўшилгани маълум бўлгандан кейин султонлар иккинчи марта мағлубиятга учрашдан кўрқдилару Қарши, Бухоро ва Самарқандни жангсиз ташлаб чиқдилар. Фақат улар душманларига заҳира қолдирмасликка тиришиб қўлларига тушган ҳамма от-улов, мол-ҳол, дон-дунни талаб олиб кетдилар. Шу муносабат билан кўчманчи қабилаларнинг яна

бир талон-торожини бошдан кечирган ва уларга қарши нафрати бениҳоя ошган ўтроқ аҳоли энди бутун нажотни Бобурдан кутиб, унинг йўлига умид билан кўз тика бошлади.

Бобур иттифоқдошлари билан Ғузордан Қаршига, ундан Бухорога ўтган, бу кўрғонларга ишончли одамларини қўйиб, энди Самарқандга келмоқда эди. Бундан хабар топган самарқандликлар Чорраҳа дарвозасини, унга келиб кирадиган Бухоро йўлининг икки четини дорпеч, гилам ва палаклар билан безатдилар. Йўл бўйига ўнлаб муваққат дўконлар қурилди, ҳайит кунларидаги каби сайил бошланди.

Шаҳарнинг энг обрўли одамларидан йигирма-ўттизтаси кўрғон калитлари ва қимматбаҳо пешкашлар билан Бобурни бир кунлик йўлда пешвоз олдилар. Эртаси куни Бобур саф-саф отлиқ қўшин олдида мулозимлари билан Самарқандга яқинлашар экан, йўлнинг икки бўйини халойиқ тутиб кетганини, ҳаммаёқ байрам тусини олганини, том устларида, дарвоза олдиларида карнайлар ва нақоралар чалинаётганини кўрди.

Бобурнинг Ҳисордаги ғалабаси шарафига ёзилган шеърий тарихлар¹, унинг Самарқандга келишини қутлайдиган сатрлар хаттотлар томонидан йирик-йирик ҳарфлар билан оқ ипак матоларга ёзилиб, йўл бўйларига, дўкон тепаларига, кўрғон ичининг кўзга кўринарли жойларига осиб қўйилган эди. Бобур хор-зор бўлиб чиқиб кетган ватанида бунчалик иззат-икром билан қарши олинишини хаёлига келтирмаган эди. У мавкаби билан шаҳарнинг марказий хиёбонидан Кўксаройга қараб ўтаётганда Улуғбек мадрасасининг баланд пештоқи ва миноралари устида қўшкарнайлар чалиб, нақораларни сайратиб, қувонч билдираётган ватандошларини кўрди. Шунда бирдан эти жимирлаб, кўзига ёш келди. Ёнида бораётган Қосимбекка қараб:

— Ишонгим келмас, тушимми бу, ўнгим? — деди.

— Ўнгингиз, ҳазратим! Ўнгингиз!

Хос навкарлардан сал кейинроқда саллаларига қизил ўтағалар қадалган Шоҳ Исмоилнинг беклари Аҳмадбек сўфи ўғли, Шохруҳбек Афшар, Муҳаммаджон эшик оғаси ўз мулозимлари билан бир тўп бўлиб келмоқда эдилар. Улар от устида ғолибларга хос виқор билан ўтиришар, юзларидан: «Биз бўлмасак Бобур Самарқандга қайтиб кўрсин эди!» — деган бир маъно англашилар эди.

Самарқандликлар эса бутун карнай-сурнайларини Бобур-

¹ Шеърий тарих — махсус бир шеърий жанр бўлиб, ҳарфларидан абжод ҳисоби билан маълум йил ва ой келиб чиқади.

га қаратиб чалишарди. Шоҳ Исмоилнинг бек ва навкарлари халойиқ олдидан ўта бошлаганда карнайлар ва нақоралар бирин-кетин тиниб қолар эди. Қизилбошларнинг шафқатсиз ишлари ва шиа мазҳабини зўрлик билан тарқатиш борасидаги ҳаракатлари Самарқандга жуда ваҳимали овозалар тарзида етиб келган эди. Шаҳарнинг сунний аҳолиси саф-саф бўлиб ўтаётган қуролли шиаларга хавотирли, нохуш назар билан қарар эди. Халойиқнинг совуқ муносабатидан қизилбош бекларининг қовоқлари осилиб борар, Бобурга кўрсатилаётган иззат-икромлар уларнинг гашларини келтирар эди.

Бундай мураккаб ҳолатлар Қарши ва Бухорода ҳам бўлган эди. Бобур ватандошларининг меҳмондўстлик туйғусини уйғотиш учун шу кунгек Самарқанднинг майдон ва кўчаларига жарчи чиқартириб: «Шоҳ Исмоилнинг гозийлари бизнинг муътабар меҳмонларимиздандир!»— деб эълон қилдирди. Сўнг қувончли айём муносабати билан меҳмонларга ва шаҳар аҳолисига уч қушгача ош беришни буюрди.

Бобур ва унинг одамлари бундан ўн йил муқаддам қамалда қолиб, очликдан интиҳосиз машаққатлар чеккан Бўстонсаройда, маҳалла ва гузарларда, боғ ва сайргоҳларда юзлаб тандирларда осиеги нонлар, ширмойлар, патирлар, чаватилар ёпилди, минглаб товок ошлар тортилди, беҳисоб кўп кўйларнинг гўштларидан қовурдоқлар, кабоблар, шўрвалар тайёрланди, асл чоғирларга тўла хумлар очилди.

Бобур ҳар куни меҳмонлари ва мусоҳиблари билан чоғир ичиб хурсандчилик қилар эди. Тўй-томоша устига яна тўрт тарафдан хушхабарлар келиб турарди. Андижон, Марғилон, Ўш ва Ўзгант ҳаммаси бирин-кетин шайбонийзодалар ҳукмидан чиқиб, Бобур томонига ўтган эди. Жанубда Қундуз, Кобул, Ғазни барчаси энди Бобурнинг қаламравидаги ягона мамлакатга айланган эди. Унинг назарида, ҳаётининг энг бахтли даври бошланган, барча орзулари энди бекаму кўст рўёбга чиқиши керак эди.

Бироқ бу бахтнинг жуда омонат, жуда муваққат эканлиги энг аввал масжид билан бозорда билинди.

* * *

Самарқанд қўрғонининг Оҳанин дарвозаси яқинидаги улкан мрамор масжиднинг текис тош тўшалган саҳнига йигирма минг намозхон тўпланган. Бугунги жума намози-

да хутба қандай ўқилишини кўпчилик самарқандликлар ўз кулоклари билан эшитгилари келади. Чунки: «Бобур подшоҳ шиалар томонига ўтганмиш, чорёрлардан юз ўгириб, ўн икки имомни тан олганмиш!» — деган мишмишлар кўпайган, Бобурни қувониб қарши олган сунний мазҳабидаги одамлар, бу овозага ишонгилари келмас, бироқ унинг мухолифлари аҳолининг асабига тегадиган мишмишларни тобора кўп тарқатишар эди. Бугун жоме масжидида ўқиладиган хутба бу овозаларнинг қанчалик рост, қанчалик ёлгонлигини аниқлаб бериши керак эди — қоидага биноан, хутбага ёки чорёрларнинг номи, ёки ўн икки имомнинг номи, албатта, кўшиб ўқилар эди. Буни биладиган одамлар жоме масжидининг ич-ташини тўлдириб юборган эдилар. Хутба ўқилишига бир соат қолганда масжид саҳнида бўш жой қолмади. Шундан кейин эшик ва дарвозалар олдида турган қуролли соқчилар ичкарига ҳеч кимни киргизмай қўйдилар.

Бир вақт масжиднинг орқа эшигидан садрлар судури Хўжа Халифа, Бобур, Қосимбек ва уч-тўртта қизилбош беклар кириб келишди. Бобур масжиднинг ич-ташига одам бениҳоя кўп тўпланганини кўриб, юраги изтироб билан «шиғ» этди. Бу одамлар унинг ҳозир қилмоқчи бўлган қалтис иши — муваққат бир чора эканини тушунишарми-кан? Самарқандга у билан бирга келган ўттиз минг қизилбошни меҳмон қилиш, ҳар куни зиёфат бериб боқиш осон эмас. Ўттиз минг қизилбошнинг элик-олтмиш минг отига ҳам ем-хашак топиб бериш керак эди. Куз охирлаб, қиш яқинлашмоқда. Шайбонийзодалар хазинани шипшийдам қилиб, бор заҳираларни ҳам олиб кетган эдилар. Бозорда нархи наво кўтарилиб бормоқда эди. Агар Бобур ҳозирдан эҳтиётини қилмаса, қиш ва баҳорда худди аввалги галлардагидек танқислик ва очлик балосига учраши мумкин эди.

Мана шу вазиятда энг тўғри йўл — ўттиз минг кишилик шоҳ қўшинини «отанг яхши, онанг яхши» деб силаб-сыйпаб, ватанига жўнатиб юбориш эди. Аввалдан келишилган шартларга биноан, Бобур Шоҳ Исмоилни олий ҳоким деб эълон қилиши, хутбага унинг ва ўн икки имомнинг номини кўшиб ўқитиши, кейин шоҳнинг номидан пул зарб қилиши керак эди. Шу шартлар бажарилса, Шоҳ Исмоилнинг беклари ўз қўшинларини Мовароуннаҳрдан олиб чиқиб кетишга кўнар эдилар. Ўттиз минг қизилбошни боқаман деб абгор бўлунча, юқоридаги шартларни хўжа кўрсинга бўлса ҳам бажариб, бегона қўшиндан тезроқ халос бўлиш тўғрироқ эканини Қосимбек ҳам, бошқа сирдош аъёнлар ҳам тушунган эди. Хўжа Халифа ҳам бугунги хут-

бани Бобур истаган тарзда ўқишга рози бўлган эди. Дежага биноан, Хўжа Халифа самарқандлик сунний намозхонларнинг газабига қолмаслик учун чорёрларни умумий бир тарзда номларини тилга олмай айтиб ўтиши, ўн икки имомни эса қизилбош бекларни қониқтирадиган оҳангда номма-ном тилга олиши керак эди.

Узун мош-гуруч соқоли киидигига тушадиган Хўжа Халифа барча қавмларнинг олдида туриб, жума намозини ўқиди-ю, кейин кўлига ҳассасини олиб, масжид тўридаги мрамар зинапояли минбарга кўтарила бошлади.

Йигирма минг намозхон ҳаммаси жим. Масжид саҳнини тўлдирган одамларнинг ҳаммаси гўё ўзларининг сунний мазҳабларини намойиш қилмоқчи бўлгандек бошларига тўрт ўрамлик саллалар ўраган эдилар. Сунний саллаларнинг саноксиз кўплигидан ғаши келган элчи Хўжа Халифанинг бошидаги дасторга қаради. Ўрамлари тўрттадан кўп, аммо ўн иккита ҳам эмас. Санаб бўлмайди. Муҳаммаджон эшик оғаси Бобур ва Қосимбекнинг бошларидаги саллаларга қаради. Буларнинг ўрамлари ҳам тўрттадан кўп, аммо ўн иккитадан оз. Бу саллалар шундай ўралганки, ўрамини санаш мумкин эмас. Муҳаммаджон эшик оғаси бунда қандайдир маъно борлигини сезиб, сергакланди. Наҳотки Бобур Қундузда берган ваъдасини бажаришдан бош тортмоқчи бўлса?

Муҳаммаджон эшик оғаси Хўжа Халифанинг ҳаракатларини сергак туриб кузата бошлади. Масжид саҳнидаги одамлар ҳам нафасларини ичларига олиб хутбанинг бошланишини кутмоқда эдилар. Умумий жимликда Хўжа Халифанинг йўғон товуши алланечук титраб, изтиробга тўлиб эшитилди:

— Бисмилла-аҳу раҳмо-онур-раҳим!

Минбарда турган Хўжа Халифа йигирма минг сунний намозхоннинг ўзига сергакланиб тикилаётганини кўрди-ю, тиззаси ҳам қалтирай бошлади. Мана, у оллоҳ шаънига, пайғамбар шаънига битилган сураи ўқиб тугатяпти. Энди чорёрлар тилга олиниши керак. Наҳотки, Хўжа Халифа — ёшлиқдан сунний мазҳабида чорёрларга зўр эътиқод билан тарбияланган одам энди шунча намозхоннинг умидини пучга чиқарса? Унинг қаршисида йигирма минг салла турибди. Бу саллалардан ҳар бирининг қатларида чорёрларнинг руҳи яшашига Хўжа Халифа болалиқдан ишонади. Ҳозир намозхонларнинг бошлари сабрсизлик билан қимирлаганда Хўжа Халифага салла ўрамларидаги арвоҳлар қимирлагандай туюлди. Агар у чорёрларга ҳурматсизлик қилса, арвоҳ уриб кетадигандай бўлди.

Йўқ, Хўжа Халифа чорёрларнинг арвоҳидан қўрқадди. Шунинг учун:

— Чорёри босафолар Ҳазрати Абубакир! Ҳазрати Умар!— деб ҳозир айтиши керак бўлмаган номларни бирдан хутбага қўша бошлади.

Бобурнинг орқасида турган минглаб намозхонларнинг қувонч билан енгил нафас олгани эшитилди. Муҳаммаджон эшик оғасининг эса ранги ўчиб кетди. Унинг нариги ёғида турган Шоҳруҳбек Афшар қиличининг сопини чангаллаб, минбарга томон интилди.

Шиалар Абубакир, Умар ва Усмонни бугунги тирик душманларидек ёмон кўришар, масжидда уларни улуғлаган ҳар бир суннийни чошиб ташлагилари келар эди. Хиротнинг жоме масжидида чорёрларни улуғлаган Зайниддин деган хотибни қизилбошлар намозхонларнинг кўзлари олдида қилич билан чошиб парчалаб ташлаганини Бобур эшитган эди. Ҳозир у Шоҳруҳбекнинг билагидан олиб, илтимоскорона товуш билан:

— Бек жаноблари, сабр қилинг, сабр! — деди. Бу орада Хўжа Халифа чорёрларнинг номини айтиб бўлди-ю, қизилбошлар севадиган имомларни хутбага қўша бошлади:

— Ҳазрати Имом Ҳасан! Ҳазрати Имом Ҳусайн! Ҳазрати Зайналиддин Али!

Шоҳруҳбек Афшар бу номларни эшитиб қўлини қиличининг соpidан олди-да, қаторга қайтиб кирди. Аммо орқадаги намозхонлар орасида шундай бир асабий шовур-шувур бошландики, Хўжа Халифа қолган имомларнинг номини бақриб айтишга мажбур бўлди.

Орқадан кимдир:

— Э, бас, бас! — деб қичқирди. Бироқ намозхонлар орасига тартиб ўрнатиш учун қўйилган девқомат навкарлардан бири «бас!» деб қичқирган одамнинг оғзини улкан кафти билан бекитиб, бўйнидан судраб олиб чиқиб кетди.

Хотиб ўн икки имомни номма-ном санаб бўлиб, уларнинг муқаддас ишhini бугун давом эттираётган соҳиби замон Шоҳ Исмоил Сафавийни мақтаб сўзлай бошлаганда, масжид саҳни яна ҳам асабийроқ жунбушга келди. Фақат Хўжа Халифа Бобурни Мовароуннаҳрнинг подшоси деб эълон қилганда шовқин хиёл босилди.

Хутбадан сўнг уй-уйига тарқаган намозхонларнинг баъзилари: «Бобур мирзо Мовароуннаҳрнинг подшоси бўлди, тахтини келгиндига бермади», деб тасалли топмоқчи бўлса, бошқалар:

— Пок мазҳабимизга рофизийлик аралашди,— деб шивирлади.— Ҳаром бўлдик! Чорёрларнинг қарғишига қолдик! Яна қимматчилик бўлмай! Яна очарчилик бошлангай!

Бобур қизилбошларнинг шартларини адо этиб, уларни тезроқ жўнатиб кўйиш учун Шоҳ Исмоил инъом қилган ўша машҳур дасторни тахтга чиққанда бошига кийиб кўриниш берди. Сўнг Шоҳ Исмоилнинг тамғаси билан бир неча минг танга пул зарб қилдириб, бу пулларни қизилбошларнинг ўзларига таркатди.

Шу муносибат билан шаҳару қишлоқларда ҳар хил миш-мишлар аввалгидан ҳам кўпайиб кетди. Гуё афсонавий китобларда битилган Яъжуж-Маъжужлар мана шу қизилбошлар эмиш. Бобур қизилбошларнинг салласини Кўктошга кийиб чиққанда муқаддас тошнинг бир чети ёрилиб кетган эмиш. Энди Шоҳ Исмоил Самарқандга келиб мана шу Кўктошга чиқармиш. Ўшанда қиёмат-қойим бошланармиш.

Шайбонийзодалар Самарқандда қолдириб кетган мулла ва дарвеш кийимидаги хуфиялар маҳалла-кўйларда, бозорларда ваҳимали овозалар тарқатиб, шиа-сунний низоларини мумкин қадар алангалантиришга тиришар эдилар. Бозорда нарх-наво ошиб кетаётганини ҳам шиаларнинг касофатидан кўраётган оми кишилар қизилбошларга нафрат билан қарар эдилар.

Битимдаги шартлар бажарилгандан кейин қизилбошлар юртларига қайтиб кетишга ҳозирлана бошладилар. Уларнинг беш-олтитаси Самарқанднинг Чорсусидаги атлас дўконига совға сотиб олиш учун келди.

Бозор куни, Чорсуда одам жуда кўп. Қизилбош навкарлар етти хил ранг билан товланаётган Самарқанд атласига харидор бўлиб қолишди. Мулла ёқа кўйлак кийган семиз баззозга қараб, тўрт кийимлик атлас кесишни буюришди.

Баззоз ёғоч газни қўлига олди-ю, қизилбош навкарларга истеҳзоли кўз ташлаб:

— Аввал пулингни кўрсат,— деди.— Ақчанг қандоқа? Танганг?

Катта чўгирма кийган бир йиғит чарм ҳаменидан уч-тўртта кумуш танга олиб, баззозга берди.

Баззоз тангаларининг олд томониغا Шоҳ Исмоилнинг тамғаси, орқа томониغا шиа имомларининг номи зарб берилганини кўрди-ю, кўрқиб кетди. У сунний муллаларнинг: «Шиа пули ҳаром, уни олган одам чорёрларнинг қарғишига учрайди», деган гапларини эшитган эди. Шунинг учун қўлига тангани эмас, захарли чаёнларни олгандай жирканиб ва шошиб тангаларни эгасига қайтарди.

Белига қилич ва ханжар таққан девқомат қизилбош нав-

кар аввал кафтидаги янги кумуш тангаларга, сўнг баззозга таажжуб билан тикилди.

— Не ўлди?! Бу оқчада не иллат ва-ар?

— Бизда бу тангалар ўтмайди. Ҳеч ким олмайди.

— Нечун олмассан? Нечун? — куйиб-пишиб сўради қизилбош навкар.

— Ўтмайди.

— Нечун ўтмас?!

Бу саволга четроқда турган безоринамо бир йигит жавоб берди:

— Келгиндиларнинг пули ҳаром!

— Ҳаром?! — деб қизилбош навкар ҳалиги йигитга қараб интилди. Аммо у йигит ўзини бозор тўла халойиқнинг орасига урди. Шунда дўконлар орасидан кимдир қизилбош навкарга тош отди:

— Рофизийлар, кет юртингга! — деган товуш эшитилди.

Кўзларидан олов чакнаётган иккинчи қизилбош баззоздан таҳдид билан чўзиб сўради:

— Бизим ақчани олмас-са-ан?!

Баззоз энди унинг ғазабидан кўрқиб, мулойимроқ гапирди:

— Олсам куйгаймен, меҳмон. Биз эски ақчада савдо қилишга ўтганмиз.

— Эски ақча? Шайбонийхоннинг ақчаси керакми?

Ҳозир Самарқанд бозорида чиндан ҳам Шайбонийхон чиқарган тангалар яхши ўтарди. Бу тангаларга суннийлар сиғинадиган чорёрларнинг номи битилган эди. Савдогарлар учун бундан ҳам муҳими — Шайбонийхон тангаларининг вазни оғирроқ, демак қиймати баландроқ эди.

Шайбонийхон ўлимидан уч-тўрт йил бурун Ҳиротдан то Тошкент ва Туркистонгача бўлган вилоятларда пул ислоҳоти ўтказган, рақибларидан молия соҳасида ҳам устун келиш учун ўз тангаларининг оғирлигини темурийлар чиқарган тангаларнинг вазнига нисбатан бир данг¹ оширган эди. Шунинг учун ҳозиргача бутун Хуросон ва Мовароуннаҳр бозорларида Шайбонийхон тангаларининг харидори кўпроқ эди. Лекин баззоз ғазаби келиб турган қизилбош навкарига буни очик айтмади:

— Шайбонийхон йўқ, ўлган,— деди.

Шу пайт кимдир узокдан:

— Самарқандни бўшат, келгинди! — деди-ю, дўкон олдида турган қизилбошга кесак отди. Кесак унинг телпагига тегиб

¹ Бир данг — «олтидан бир» демакдир. Темурийлар тангасининг вазни 4,6 грамм бўлса, Шайбонийхоннинг тангаси 5,2 грамм бўлган.

ушалди-да, чанги юзига тушди. Халойиқ орасидан аллакимларнинг кулгани эшитилди. Қизилбош навкар эгри қиличини қинидан суғуриб, кесак отган одамни кўзлари билан қидирди, ammo тополмади. Сўнг яна семиз баззозга юзланди. Сўзининг охириги бўгинини чўзиб сўради:

— Шоҳ Исмоилин ақчасин алмас-сан?

Баззоз унинг қиличидан кўрқиб, титраб гапирди:

— Мен олсам балога қоламен.

Қизилбош яна бир марта:

— Алмасса-ан?! — деб чўзиб сўради-ю, кейин четдан отилган тош ва кесакларнинг аламини ҳам баззоздан олиб, унинг елкасига бор кучи билан қилич урди. Ўткир қилич баззознинг гўштдор елкасини бўйинининг олдидан киндигигача кесиб тушди. Шунда иккинчи қизилбош ҳам қиличини яланғочлади-ю, чўккалаб қолган баззознинг бошини бир зарб билан танасидан жудо қилди. Семиз баззознинг бошсиз бўйнидан шариллаб отилган қон дўкон ичидаги атласлар ва ипак матоларга сачради.

Буни кўрган одамлар қий-чув кўтариб, ваҳима ичида қоча бошладилар.

6

Шиасунний низолари бундай қонли тўқнашувларни тобора кўп келтириб чиқараётгани қизилбош бекларни ҳам ташвишга солиб қўйди. Бобур ўзининг Шоҳ Исмоил билан тузган иттифоқига содиқ эканини уларга қайта-қайта уқтириб, нуфузли бекларга қимматбаҳо саруполар, отлар, олтин-кумуш пуллар инъом бериб, ниҳоят, қиш чилласи чиққанда ўттиз минг кўшинни Мовароуннаҳрдан Эронга жўнатиб юборди.

Шундан сўнг Самарқанд анча тинчиб қолди. Тошкент, Хўжанд, Ўратепа ҳам шайбонийлар ҳукмидан чиқиб, Бобур томонига ўтганлиги ҳақида хушxabарлар келди. Қизилбошларни уч ой давомида боқиб ва қимматбаҳо совғалар билан кузатиш пайтида анча бўшаб қолган хазина ўша шаҳарлардан келган пешкашлар билан яна анча тўлишди.

Самарқанд боғлари оқ-пушти бодом гуллари билан безана бошлаган илк баҳор кунларида Бобур бир тўп яқинлари билан отланиб, Улуғбек расадхонаси томонга сайрга чикди.

Ўнтача кўрчи навкарларни тўриқ қашқа от минган Тоҳир бошқариб бормоқда эди. Оқ отлиқ Бобурнинг икки ёнида Қосимбек билан марғилонлик Хўжа Калонбек. Улардан

орқарокда ўтган ҳафта Хиротдан келган мавлоно Фазлиддин ювош қора отга миниб ўйчан келмоқда. Ички беклар орасида муноси ҳам, мактаб-мадраса ишлари билан шуғулланувчи бир мударрис ҳам бор. Отлиқлар Обираҳмат ариғига етмай Боғи Майдон томонга бурилдилар. Улуғбек замонида жуда обод ва машҳур бўлган, бундан ўн беш йил олдин ҳам файзлиқ турган Боғи Майдон шайбонийлар даврида қаровсиз қолиб, ички ариқлари бекилиб кетган, сувсизликдан кўпгина дарахтлар қуриб қолган эди. Икки қаватлик нақшин кўшк — Чиннихонанинг шифтидан томчилар ўтиб ажойиб расмларнинг анчаси ўнгиб кетган эди.

Бобур бунинг ҳаммасини кўриб чиққач, мавлоно Фазлиддинга юзланди:

— Мавлоно, биз сизни Хиротдан чорлаб келтирганда янги қасрлар, чорбоғлар қурдириш умидида эдик. Аммо оламга машҳур қадимий обидаларимизнинг бу аҳволини кўриб, ўзингиз ҳам таассуф этсангиз керак!

— Ҳазратим, Улуғбек мирзонинг оламда ягона расадхонаси ҳам мана шу Чиннихона каби ташландиқ аҳволдадир,— деди мавлоно Фазлиддин.— Кеча кўриб кўнглим вайрон бўлди. Олтмиш йилдан бери қаровсиз. Нодир асбоб-олотлари таланган. Деворларидан кошинлари, мармар тошлари кўчириб кетилган. Шу аҳволда ташлаб қўйилса уч ошиёнлик мухташам расадхона кўп вақт ўтмай харобага айланур.

— Демак, шешилиш чоралар кўрмоғимиз даркор, жаноб Қосимбек. Бизнинг хос меъморимиз мавлоно Фазлиддин қандай маблағу кўмак талаб қилсалар берайлик, Улуғбек мирзодан ёдгор қолган Чиннихонаю расадхоналар дарҳол таъмир этилиб, аслидек тиклансин.

Қосимбек енгил бир таъзим билан:

— Ҳазратим, амришгизни жоним билан адо этгаймен!— деди.— Чиннихонани таъмирлаш унча мушкул эмас. Боғнинг кўмилиб кетган ариқларини ҳам очгаймиз, гуллар ўстирурмиз.

— Наврўз байрамигача улгургаймисиз?— сўради Бобур.— Бу йилги наврўз базмини мана шу Чиннихонада ўтказайликми, а, жаноб Калонбек?

Ичкилик базмларини яхши кўрадиган Хўжа Калонбек мамнун жилмайди:

— Доно фикр айтдингиз, ҳазратим! — деди.— Самарқандда боғбонлару наққошлар етарлик. Ҳамма ҳунарпешаларга мавлоно Фазлиддин саркор бўлурлар. Наврўзгача бу боғ обод қилинмоғи керак.

Мавлоно Фазлиддин кўлини кўкенига қўйиб, Бобурга юзланди:

— Чинниҳонани тиклаш мумкин, ҳазратим, аммо расадхонани не килурмиз?

— Уни ҳам тикламоқ зарур, жаноб Қосимбек,— деди Бобур.

Қосимбек расадхонани тиклашдан кўрқарди. Чунки шайхлар сўнги ўн йилликлар давомида расадхонани динсизлар мақони деб лаънатлаб, авом халқни шунга ишонтириб қўйган эди. Агар Бобур расадхонани қайта тиклаб, яна ишга солиб юборса, Улуғбекнинг бошини еган қора кучлар унинг жонига ҳам қасд қилиши мумкин эди. Қосимбек шуни ўйлаб:

— Ҳазратим, ётган ишонинг думини босмайлик,— деди.— Расадхонани таъмирлаганимиз билан унда иш олиб борадиган етук олимларни қайдан топгаймиз? Олтмиш йилдан бери кекса авлод олимлар ўлиб, ёшлари бошқа юртларга кетиб қолмишдир.

— Кетганларни чорлаб келтириш мумкин, жаноб Қосимбек,— деди Бобур ва муншига юзланди:— Бизнинг номимиздан қадағалар битинг.

Мунши дарҳол қўнидан дафтар-калам олиб, тикка турган кўйича ёза бошлади.

— Улуғбек яратган фалакиёт илимидан хабардор олимлар Ҳиротдами, Румдами, Табриздами, қаердаки бўлсалар, бизнинг номимиздан уларни Самарқандга таклиф этинг. Расадхонани қайта очмоқчи эканлигимизни, кимда-ким Мирзо Улуғбекнинг буюк ишини давом эттирмоқчи бўлса барча имкониятларни яратиб беражагимизни маълум қилинг. Агар келсалар йўл харажатларини биз зиммамизга олурмиз. Бу қадағаларни элчиларимиз орқали Ҳиротга ҳам, Румга ҳам тезда жўнатмоқ сизга топширилди, жаноб мунши!

Мунши Бобур айтганларини дафтарига ёзиб бўлиб:

— Амрингизни бажаришга дарҳол киришурмен! — дея таъзим қилди-да, Чинниҳонадан пастга тушиб кетди.

* * *

Мавлоно Фазлиддин саркор бўлиб, Боғи Майдоннинг кўмилган ариқларини қайта кавлатишда, қуриган дарахтларни олиб ташлаб, ўрнига майса ва гуллар ўстиришда, Чинниҳонани таъмирлаб ораста қилишда унча қийналмади — инсоф билан ҳақ тўланса ишлаб чарчамайдиган хунарпешалар, боғбон ва деҳқонлар жуда кўп эди. Лекин усталарни расадхонага олиб бориб ишлатиш ва уч қаватли улуғвор доира-шакл бинонинг нураган, бузилган жойларини таъмир этиш бениҳоя мушкул бўлди. Тепадан ер қаърига тушиб кетган ярим доира шаклидаги зинапойларга яқин борган

усталар худди ҳозир жаҳаннам қаърига қулаб тушадигандек кўрқа бошларди. Диндорлар расадхонани: «Дўзахийлар макони, ким унга кирса жин чалиб, арвоҳ уриб кетади!» деб, аҳолининг катта бир қисмини бунга ишонтириб қўйган эдилар. Улуғбекнинг вафотидан сўнгги олтмиш йил ичида Самарқандда жуда кўп мактаб ва мадрасалар бекилган, саводсиз жоҳил кишилар кўпайиб кетган, уларга нақшбандий шайхларининг таъсирлари бениҳоя кучайган эди.

Шундай бўлса ҳам мавлоно Фазлиддин ишсиз юрган уста ва коргарлар¹га яхши ҳақ тўлаб, дастлабки кунлари элликтача одамни расадхонадаги таъмир ишларига олиб чиқди. Иккинчи-учинчи қаватнинг шифт ва деворларидаги нураган жойларини тузатиш учун ҳавозалар қурилди. Лекин ўша кундан башлаб расадхона атрофларида нақшбандий қаландарлар тўдаси ҳам кўпайиб кетди. Улар давра тортиб, зикр тушиб, «Ҳақ дўст ё олло!»ни муттасил такрорлаб, чор-ёрларнинг руҳига шак келтирганларни арвоҳ уришини шеърга солиб, «каромат» қила бошладилар. Бу қаландарлар орасида шайбанийзодаларнинг жосуслари ҳам бор эди. Ана шу жосуслардан бири коргар бўлиб ёлланиб, расадхонанинг ичида гишт ташиб ишламоқда эди. Бу жосус уч-тўрт кун таъмирчилар ичида юриб, уларнинг энг дадили ва Бобур мирзога ихлосманди қирқ бешлардаги бир кошинкор уста эканини аниқлади. Нақшбандий жосус мана шу устани учинчи қаватда ҳавоза устида ишлаётган пайтида киши билмас қилиб ҳавозадан пастга итариб юборди. Учинчи қаватдан тош уюми устига боши билан қулаб тушган уста ўша заҳоти жон берди.

Кўчаларда зикр тушиб юрган қаландарлар: «Устани арвоҳ урди!», «Худо ғазабини кўрсатди!»— деб вайсай бошладилар. Бу фалокатдан сўнг қолган уста ва коргарлар расадхонага келмай қўйишди. Мавлоно Фазлиддин ишга зор бўлиб ярим оч юрган башқа уста ва коргарларни ёлламоқчи бўлса, нуқул: «Расадхонада ишлаб топилган пул ҳаром эмиш! Борган одамни арвоҳ уриб ўлдирармиш!»— деган ваҳимали гаплар эшитар, оми одамлар ундан балодан қочгандай қочар эди...

* * *

Бўстонсаройнинг тиллакори қабулхонасида Амударё бўйидаги Урганч ва Қорақўл шаҳарларидан хушхабарлар билан келган бек ва аъёнлар шарафига зиёфат берилмоқда

¹ Коргар — қурувчи ишчи.

эди. Шайбонийзодалардан кўп жабр кўрган бу шаҳарлар ҳам Бобурни ўзларига олий ҳукмдор деб тан олишган ва қимматбаҳо совгалар бериб юборишган эди. Ўз вақтида Шайбонийхон Қорақўл ва Урганчни забт этиш учун ойлар давомида жанг қилган, беҳад кўп қон тўкиб уларни олган эди. Мана энди бу шаҳарлар жангу жадалсиз элчи юбориб, Бобур томонига ўтганлиги унда зўр бир ифтихор туйғуси уйғотди. Бобур ёшлиқдан кўнглига туккан орзусига — бутун Мовароуннахрни бирлаштириш, Улуғбек давридаги улкан давлатни қайта тиклашга мана энди муяссар бўлаётганидан бениҳоя шод. Қундузда биринчи марта бошланган ичкилик базмлари Самарқандда давом этиб, авжига чиқмоқда. Эришилаётган ғалабалар шарафига бек ва аъёнлар навбатма-навбат зиёфат беришиб, Бобурни деярли ҳар куни таклиф қилишади, унга энг нодир, энг ажойиб майларни ичириб, хурсанд қилишда бир-бирларидан ўзишга интилишади.

Фақат Қосимбек ҳамон ичкиликни оғзига олмас, пайтини топса Бобурни ҳам хушёрликка ундар, мамлакат ичида қора кучлар бош кўтараётганини, шимолдаги даштда эса шайбонийзодалар ҳаёт-мамот жангига тайёрланаётганини такрор-такрор эслатар эди.

Лекин Бобур унга жавобан сўнги пайтда ёзган бир ғазалидан тўрт сатр ўқиб берди:

Ёз фасли, ёр васли, дўстларнинг суҳбати,
Шеър баҳси, ишқ дарди, боданинг кайфияти.
Ёз фаслида чоғир ичмакнинг ўзгача холи бор,
Кимга бу нашъа муяссар бўлса бордир давлати.

Бу ғазалга куй басталаниб, қабул маросимларида ҳам айтиладиган бўлган эди. Ширакайф Бобур:

— Жаноб Қосимбек!— деди.— Эшитдингизми, Самарқанд мактабларида болалар мен ихтиро қилган хат билан жуда тез саводхон бўлмоқда эмишлар. Мана, мударрис жанобларидан сўранг...

Бошида саллаю қўлида май тўла қадаҳ билан таъзим қилиб турган мударрис:

— Жаноб Қосимбек,— деди,— халқимизни жаҳолат панжасидан қутқариб олишда ҳазратим ихтиро қилган Хатти Бобурий ажойиб бир восита бўлиши аниқ! Қуръон хати гарчи биз учун азият, аммо зеру забарлари, шикаста усуллари савод чиқаришга беҳад мушкул. Хатти Бобурий эса зеру забарсиз, ўрганишга осон.

Қосимбек Бобурнинг бундан уч йил олдин Кобулда ихтиро қилган хатти Сирдарё бўйидаги Сирноқдан топилган қадимий

туркий ёзувга¹ асосланганини билар эди. Араб ёзувини «Қуръон хати муқаддас», деб ҳисоблайдиган руҳонийлар ислом динидан олдин тарқалган қадимий ёзувларни қаттиқ қоралаб, тошилган жойида ўчириб ташлашни буюрар эдилар. Бобур эса буни жаҳолат ҳисоблар, қадим замонда ихтиро қилинган туркий ёзувнинг динга алоқаси йўқлигини айтар, Хатти Бобурийни шунинг учун халқ орасида тарқатмоқчи бўлар эди.

Ичкилик базми пайтида бу мураккаб мавзуларда гапиришни ёқтирмайдиган Қосимбек орадан икки кун ўтгач, девони хосда ўтирган Бобурнинг ҳузурига мавлоно Фазлиддин билан Хатти Бобурийни тарқатиб юрган мударрисини бошлаб кирди.

Уларнинг учови ҳам алланарсадан жуда безовта эканини сезган Бобур:

— Тинчликми, жаноблар? — деди.

— Ҳазратим,— деди мударрис.— Хатти Бобурийни тарғиб қилиб мактаб очган бир мактабдорни авбошлар тошбўрон қилиб ўлдирмишлар.

— Ўлдирмишлар?! — деб Бобур ўрнидан туриб кетди.— Бу не жаҳолат, жаноб Қосимбек? Бизга қарши ғулуми?!

— Ҳазратим, нақшбандий шайхлар билан қаландарлар ҳамма жойда бизга қарши иш олиб бормоқдалар. Расадхонада бир уста ҳавозадан йиқилиб ўлгандан бери таъмир ишларига одам ёллаш мумкин бўлмай қолди. Масжидда ваъз айтган муллалар Хатти Бобурийни «Шоҳ Исмоил юборган шиалар хатти» деб эълон қилган эмишлар. Шу овоза бутун шаҳарга тарқалиб, охири халиги мактабдорнинг тошбўрон бўлишига олиб келмишдир.

— Бу ёлғон овозани тарқатганларни нега ҳибсга олмадингиз? — қаҳр билан сўради Бобур.— Ахир бу хатнинг Шоҳ Исмоилга мутлақо алоқаси йўқ-қу.

— Хўжа Халифа шуни масжиди жомеда минбарга чиқиб айтмоқчи бўлган экан, «Ёлғон! Кофирлар хатти ҳаром! Қуръон урсин сен Халифани!»— дейишиб, жоҳиллар уни минбардан тортиб туширмишлар. Агар Тохирбек бошлиқ соқчиларимиз Хўжа Халифани қутқариб қолмасалар, жоҳиллар уни ҳам ўлдиришлари мумкин экан. Авбошлардан йигирма-ўттизтасини ҳибсга олдик. Аммо Хўжа Халифага қарши ваъз айтган муллалар Хўжа Аҳрори валийнинг авлодларидан экан. Уларни сиздан бемаслаҳат ҳибсга олишга журъат этмадим.

Бобур аҳволнинг нақадар жиддийлашиб кетганини энди

¹ Бу ёзув аслида Ўрхун-Енисей руник ёзувнинг Бобур даврида Сигиоққа стиб келган бир тури бўлиши керак.

сезди. Хўжа Аҳрор авлодини ҳибсга олиш — ёнай деб турган оловни пуфлаб алангалатиш билан баробар эди.

— Қўшиннинг кайфияти ҳам яхши эмас, ҳазратим,— деб давом этди Қосимбек.— Ҳозир ичак узилди пайт, нарх-наво кўтарилган. Шайбонийзодалар чиқарган олтин-қумуш тангаларнинг вазни биз чиқарган тангалар вазнидан ортиқ бўлганлиги учун уларнинг бозори чаққон. Беку навкарлар улуфани оширишни талаб қилмоқдалар. Уларга улуфа оширилса, хазинада пулимиз етмас.

— Ундоқ бўлса таклифингиз недур?

— Таклифим шуки, ҳазратим, бекларни дарҳол машваратга тўплаб, фавқулодда чоралар кўрмоқ лозим.

— Биламен, беклар даштда изғиб юрган шайбонийзодаларга қарши урушмоқ қасдидалар. Янги вилоятлар олинса, беку навкарлар ўлжадор бўлулар. Беш ойдан бери Самарқандда жангсиз туриб қиличлари қонсираган.

— Уларнинг касблари уруш бўлгандан сўнг бекор тургилари келмайди-да. Ҳозир шайбонийзодалар шимолдан Бухорога яқинлашиб келмоқда эмишлар.

— Аниқ ахборот борми?

— Кўрган одам келиб айтди. Саркардалари Убайдулла Султон эмиш. Ўнг минг қўшини бор эмиш. Буни Самарқанддаги шайху қаландарлар ҳам эшитган бўлсалар керак. Шайбонийзодалар ташқарида жонланган сари ичкарида булар бизни «Шиғага сотилган рофизийлар!» — деб халққа ёмонлаб, қора кучларни кўзғатмоқдалар.

Бобур мавлоно Фазлиддин билан мударрисига афсусли бир назар ташлади-да:

— Жаноблар, маърифат муаммоларини бу аҳволда ҳал этолмайдиган кўринамиз,— деди.— Хатти Бобурийни мактабда ўқитиш ҳозирча тўхтатилсин. Расадхонани ҳам кейинроқ тиклагаймиз... Биз энди бутун эътиборни ҳарбий ишларга беришга мажбурмиз.

Мударрис билан мавлоно Фазлиддин маъюс қиёфада орқалари билан юриб чиқиб кетдилар. Қосимбек билан Бобур Убайдулла Султонга қарши Бухоро томонга қўшин тортиб боришнинг маслаҳатини қила бошладилар...

* * *

Бухорога ҳужум қилган Убайдулла Султоннинг ўн минг кишилиқ қўшини Бобурнинг Самарқанддан ўттиз минг қўшини билан келаётганидан хабар топиб, Қизилқум саҳросига қараб чекинди. Бобур қўшини Бухоро атрофида тўхтаб, душманининг яна қайтиб келишини кутиши мумкин эди. Лекин душман

аскарлари сон жиҳатдан уч баробар кам бўлгани учун Бобур уни дадил таъқиб этишга қарор берди-ю, қўшинини қумтепалар орасига бошлаб кирди. Убайдулла Султонга шу керак эди. Бобур қўшинининг энг садоқатли қисми тоғлиқ жойда яхши жанг қилиб ўрганган, отлари чўлда, қумтепалар орасида дуруст чополмайдиган жангчилар эди. Бундан ташқари шиа-сунний зиддиятлари Бобурга Қундузда қўшилган йигирма минг кишилик мўғул қўшинининг руҳига ёмон таъсир қилган эди. Уларнинг орасига кириб борган суннийпараст нақшбандий муллалар: «Бобур шоҳ шиалар билан иттифоқ тузиб, пок мазҳабини булғади, энди пайғамбаримиз уни эмас, суннийни пок тутган шайбонийзодаларни қўллаб-қувватлағай», деган эътиқодга кўпларни ишонтирган эдилар.

Барханлар ичида замбарак ортилган аравалар қумга ботиб, отлар яхши чополмай, Бобур қўшинининг сафи чувалиб кетди. Пайтдан фойдаланган беш мингга яқин қундузлик мўғуллар Убайдулла Султон томонига қочиб ўтиб кетди.

Қизилқумда кўп юриб, унинг пасту баландини биладиган, Қўли Малик¹ деган жойда отлик жанг учун энг қулай ўринларни эгаллаб ётган Убайдулла Султоннинг қўшини яна тўлғама усулини ишлатиб, Бобур қўшинининг икки қанотини букди-ю, орқасига ўтиб олди. Тўрт томондан берилаётган зарбалар устига беш минг хоиннинг бирдан ёв томонига ўтиб кетиши жанг тақдирини бир неча соатдаёқ ҳал қилиб қўйди.

Бобур Қизилқумда мағлубиятга учраб, қолган-қутган аскарлари билан Самарқандга, ундан Ҳисорга чекиниб борганда қаршисидан Шоҳ Исмоил юборган Нажми Соний олтмиш минг қизилбош аскари билан таҳдидли суратда чиқиб келди.

Оғизда Нажми соний Бобурга ёрдамга келган эди.

Бироқ аслида у Бобурга жазо бермоқчи эди. У қизилбош қўшинларининг Самарқанддан тез қайтариб юборилганидан порози эди. Бобур Мовароуннаҳрда мустақил давлат тузаётганини, унинг шиаларга ён босиши — муваққат чоралигини хуфиялар Шоҳ Исмоилга аллақачон етказган эдилар. Шоҳ Исмоил Мовароуннаҳрга оид ҳамма ишларни Нажми сонийга ишониб тоширган эди. Нажми соний шайбонийзодаларни бартараф қилгандан кейин Бобурни ҳам ҳокимиятдан четлатиши ва Самарқанд тахтига бошқа ишончли одамни ўтқазиб, Мовароуннаҳрда қизилбошлар ҳокимиятини узил-кесил барқарор қилиши керак эди.

¹ Қўли Малик — ҳозир қуриб қолган. Бухоро областининг Хайробод деган жойида.

Бу режа қаттиқ сир тутилар, Бобур билан иттифоқ ҳозирча давом этар, аммо калондимоғ Нажми соний Бобурни ҳам, унинг ўн мингтагина қолган аскарларини ҳам назар-писанд қилмаслиги ошкора сезилар эди.

Бобурни икки томондан чирмаб келган икки даҳшатли килич Ғиждувонда бир-бирига зарб билан урилди. Нажми сонийга қўшилиб жанг қилган Бобур шайбонийзодаларнинг кўли баланд келаётганини сизди-ю, қонли қиличлар орасидан чиқиб, яна Ҳисор томонга чекинди.

Босқинчи қўшин саркардаси Нажми соний Ғиждувон жангида ўлдирилди. Қизилбошлар тор-мор бўлди, олтмиш минг қўшиннинг бир қисми ўлди, бир қисми асир олинди, омон қолиб қочганларини эса ғолиблар Амударёгача қувиб бордилар ва дарёга чўктириб юбордилар.

7

Бундан бир ярим йил аввал Хонзода бегим ёлғиз ўғилчаси билан Балхдан Қундузга келаётганда унинг юрагини титратган номаълум хавф-хатарлар гўё мана шу оғир чекиниш пайтини кутиб ётган экан.

Тун ярмидан ошган эди. Бойсун орқали Ҳисорнинг Қоратоғига чекиниб келган Бобур етти минг аскар ва угруги¹ билан сайхон бир ўтлоқда тунамоқда эди. Хонзода бегим ўғли ва канизини билан ухлаб ётган ўтов Бобурнинг чодирига ёнма-ён эди.

Сахарга яқин бирдан тўполон кўтарилди. Хонзода бегим отларнинг тасир-тусир қилиб чопиши ва итларнинг асабий ҳуришидан чўчиб уйғонди. Ғазабли товушлар:

— Ур! Ур!

— Рофизийларни аямай қир! — деб қичқирар эди.

Хонзода бегим санчиб турди. Ўтов тўрида хира қорачирок липиллаб ёнмоқда эди. Бегим қаттиқ ухлаб ётган ўғли Хуррамшоҳни кучоқлаб оёққа турғизди.

— Ёғий босди! Ёғий! — деб, ўғлига этигини кийдириб, тўнининг енгига қўлларини тикаётганда ўтовнинг кигизига алланарса «тарс» этиб урилди. Ёй ўқининг чархланган учи кигизни кесиб ўтди, лекин қаноти кигиз жунига ўралиб туриб қолди. Қўрқиб кетган Хонзода бегим ўғлини бағрига босди.

Бу йил ўн бирга қадам қўйган Хуррамшоҳнинг бўйи онасининг елкасидан ошиб қолган эди. У учи пастга осилиб қолган ёй ўқига қизиқиб қараб турарди.

¹ Уғруг — оила аъзолари, кўчлари.

Ташқаридан Бобурнинг саросимали товуши эшитилди:
— Тўфангандозлар қани? Хўжа Калонбек! Тўфанг
отилсин! Қосимбек! Тоҳирбек! Ҳарамга қаранг! Болалар
тезроқ олиб чиқилсин!.. Тўфанг!

Ўша замоннинг чақмоқли милтиғи бўлган тўфанг яқин
бир жойда гумбурлаб отилди. Бобур қизилбошлар билан
иттифоқ бўлиб орттирган бир нарсаси — ўша даврнинг энг
замонавий қуроли бўлган мана шу тўфанглар эди. Ҳали
жуда кам тарқалган тўфанглар фақат Бобурнинг хос навкар-
ларида бор эди.

Бир нечта тўфангнинг, устма-уст отилгани эшитилди.
Хонзода бегим энди сал дадилланиб, ўғлининг тўни устидан
бежирим ханжарчаси осилган камарини ҳам боғлатди.

Хуррамшоҳ ўтовнинг бир четига ўнтача ёй ўқи солин-
ган кичкина соқдоғини осиб қўйган эди. Онасининг қўли-
дан чиқиб шу соқдоғини елкасига осди-да, камонини қўлига
олди.

Онасини ваҳимага солган жанг болада қўрқув аралаш бир
мароқ уйғотган эди. У кичиклигидан жанговар руҳ билан
ўсган, тезроқ катта бўлиб, урушда ботирликлар кўрсатгиси
келар эди. Самарқандда турган пайтларида Хуррамшоҳ
Бобур тоғасининг Бухоро томонда қилган жанглирига қат-
нашмоқчи бўлиб, онасининг олдидан қочиб ҳам кетган эди.
Лекин Бобур уни беқ аткасига қўшиб, йўлдан қайтариб
юборган эди. Хонзода бегимнинг Бобурга қўйган меҳри ўг-
лига ҳам юккан эди. Болага дарс берадиган ва ҳарбий машқ
ўргатадиган кишилар ҳаммаси Бобурнинг ихлосмандлари
эдилар. Хуррамшоҳ онасидан ва мураббийларидан Бобур
ҳақида жуда кўп яхши гаплар эшитар, ўзи ҳам тоғасини
ҳар кўрганда унга болаларча жўшқин бир меҳр ва ишонч
билан қарар эди. У тоғасини оғир аҳволларга солаётган
шайбонийзодаларни — гарчи ўзининг Шайбонийхонга ўғил
бўлишини билса ҳам — кун сайин ёмон кўриб борар эди.
Унинг тасавурида, ҳозир Бобур қароргоҳига ҳужум қилиб
келган, «Ур, кир!» деб қичқираётганлар ҳам ўша кўчманчи
султонлар эди. Хуррамшоҳ соқдоғида бор ўқларини тоғасининг
мана шу душманларига қараб отгиси келди-ю, ўтов эшигини
очиб чиқа бошлади.

— Ҳой, шаҳзода, тўхтанг!

Хонзода бегимнинг кекса канизини югуриб бориб болани
камаридан тутди-да, ичкарига тортди. Бола қаршилиқ қилиб
кирмади. Уни узоқда бўлган жангларга юбормаган эдилар.
Энди жанг ўзи Хуррамшоҳ ётган жойга етиб келганда яна
қўйишмайдими?

— Кўйворинг мени! Ҳазрат тоғойимга кўмак берамен!
Кўйворинг!

Бу орада Бобурнинг хос навкарлари тўфанг ота-ота, ёв отлиқларини аёллар ва болалар ётган ўтовлардан узоққа суриб ташлаган эдилар. Тоҳир Хонзода бегимнинг ўтовни олдига иккита от етаклаб келди:

— Ҳазрат бегим! Шаҳзода! Тезроқ чиқинглар!

Хонзода бегим сандиқ ва бўғчаларига қаради.

— Кўч-кўронлар қолурми?

— Э, жон омон бўлса, буюм топилар! Чиқинг тезроқ!
Ҳазратим буюрдилар!

Хонзода бегим канизи билан чиққунча Хуррамшоҳ отларнинг кичикроқ кўринган биттасига миниб олди.

Осмонда шом еган саккиз кунлик ой бор эди. Шунинг ёруғида оқ ўтовдан беш яшар Ҳумоюнни бағрига босиб чиққан Моҳим бегим кўринди. От устида турган Қосимбек тез энгашиб болани онасининг кўлидан авайлаб олди-да, елкаларини чакмани билан ўради.

Бегимнинг ёнида ўн яшар ўғилчаси Сафарни кўлидан етаклаб келаётган Робия ҳам бор эди. Тоҳир ўғли билан хотинини тез бир бияга мингаштирди.

Қосимбек бошлиқ элик-олтмишта хос навкарлар аёллар ва болалар минган отларни ўртага олиб, жануб томонга йўналдилар.

Уч томонни ёв ҳалқаси ўраб олган, фақат жануб томон очикроқ эди. Тўфанг гумбурлаши, ярадор бўлганларнинг додлаши, отларнинг пишқириши ва кишнаши орасидан кимларнингдир асабий бақириқлари эшитиларди:

— Ҳаммамиз шу подшонинг касофатига қолдик!

— Шиаларга сотилиб бизни хароб қилди!

— Йўқолсин Бобур!

— Уруғини қурит! Қир ҳаммасини!

Хонзода бегим ҳеч нарсага тушунолмаётган ёнида бораётган Қосимбекдан сўради:

— Бу қанақа ёғий?

— Ўзимиздан ўт чиқди, бегим! Бурноғи йил Қундузда шайбонийзодалардан бизга қочиб ўтган мўғул беклари исён кўтарди! Қузғунлар ҳазратимни уйқуда тутиб ўлдирмоқчи эканлар. Хайрият, Тоҳирбекнинг қўрчилари пайқаб қолибди!

— Фалокат устига фалокат!

— Ҳа, булар биздан икки баробар кўп. Ҳаммаси олдиндан тайёрланиб чиққан! Ўртада юринглар! Ўртада!

Шу пайт исёнчи отлиқлар жануб томонга ҳам чошиб ўтдилар. Ўша томондан Бобурнинг овози эшитилди:

— Устод Али! Тўфангандозларни олдинга бошланг! Олдинга!

Тўфанглардан отилган ўқлар жиба ва дубулгаларни бемалол тешиб ўтар, шунинг учун фитначилар тўфанг қарши-сида туриш беролмас эди. Бобур тўфанглар ва энг ишонган хос навкарлари ёрдамида ёв ҳалқасини жануб томондан ёриб ўтмоқчи, сўнг Боботоғнинг шарқидаги Ҳисор қалъасига етиб олмоқчи эди. Бироқ фитначи беклар уни қалъага ўтказмоқчи эмас эдилар — улар бу мустақкам қўрғонни ўзлари эгаллаш мақсадида исён кўтарган эдилар.

Уч-тўрт марта ўқ отилгандан кейин тўфангларнинг қувурлари қизиб кетиб, иш бермай қўйди. Ёв сафлари шарқ томонда сал сийраклашганини кўрган Бобур Хўжа Калонбек бошлиқ мингтача навкарини ўша томонга ташлади.

Хос навкарлар қуршовида бораётган Хуррамшоҳ гоҳо қиличларнинг бир-бирига шақ-шўқ урилганини эшитиб қоларди. Бу тунги жанг унга жуда қўрқинчли туюлса ҳам, аммо у ваҳимани енгишга тиришарди. Тоғасига шундай пайтда суиқасд қилган хоинларнинг ҳеч бўлмаса биттасини соқдоғидаги ўқлари билан отиб йиқитгиси келар эди.

Ёв қуршовини ёриб ўтаётганларида болалар ва аёлларни ўраб бораётган навкарлар ҳам жангга тушишга мажбур бўлдилар. Шунда Хуррамшоҳ уларнинг ёнига кирди-ю, отининг жилловини қўйиб юбориб, камонидан устма-уст учта ўқ отди. Хонзода бегим тунги тўполонда уни бир лаҳза қўздан йўқотиб қўйди. Кейин боланинг навкарлар ёнида ўқ отаётганини кўриб, отини унга томон чоптирди. У ўғлига етиб борган ҳам эдики, қаршидан отилган бир дайди ўқ боланинг ўнг биқинига «шарт» этиб санчилди. Хуррамшоҳ инграб, камонини қўлидан тушириб юборди ва эгардан оғиб туша бошлади.

— Вой, болам! — деб Хонзода бегим қичқириб ўғлига томон интилди.

Тоҳир ҳам шу яқин жойда эди, отидан сирғалиб тушаётган Хуррамшоҳни ушлаб қолди, сўнг уни эгари устига кўтариб ўтказди.

Бола беҳуш эди. Тоҳир билан Хонзода бегим уни Бобурнинг овози келаётган томонга олиб чопдилар. Бу томонда ёв қолмаган, Хўжа Калонбекнинг навкарлари подшоҳ учун йўл очиб, унинг кетидан ҳарам аҳлини ҳам олиб ўта бош-

лаган, орқадан таъқиб этишга уринган душманларнинг эса йўлини тўсган эдилар.

Бобур Ҳисор кўрғонидан воз кечиб, Вахш водийси томонга йўл олганини сезган фитначилар уни бошқа таъқиб этмай, орқага қайтдилар ва шохона чодирлар ичида эгасиз қолган бойликларни талашга тушдилар.

Тонг ёришиб қолган эди. Бобур ярадор жиянини қўлига олар экан, унинг биқинидан иссиқ қон оқаётганини сизди.

— Табибни чақиринг! — қичқирди у. — Табиб!

Подшоҳнинг хос табиби болани чакман устига ётқизиб, ярасига дори қўйиб боғлади. Хуррамшоҳ ҳамон ҳушига келмас, фақат ўқтин-ўқтин инграб эди.

Унинг биқинига санчилган ўқ ўлка ва қорин оралиғидаги пардани йиртиб, ички аъзоларига ёмон зарар етказган эди. Табиб унга мўмиёйи асилдан сув билан ичирмоқчи бўлди. Бироқ беҳуш боланинг томоғидан сув ҳам, дори ҳам ўтмади. Хонзода бегим буни кўрди-ю, боласини қучоқлаб, қичқира бошлади:

— Хуррамжон! Ёлғизим! Хуррамим!

Боланинг кўзлари ола-кула бўлиб бир очилди, кейин қорачиқлари тепасига қараб кетди-ю, киприклари ярим юмук ҳолда тўхтаб қолди.

Бобур боланинг жон берганини сизди-да, опасини қучоқлаб, жасаднинг тепасидан олиб кетмоқчи бўлди. Лекин Хонзода бегим унинг қўлидан юлқиниб чиқди. Ўғлининг ўлганига ишонгиси келмас эди. У боласини қучоқлаб даст кўтарди-ю, дод солиб, яна уни чақира бошлади:

— Хуррам! Хуррамжон, қанисан? Қанисан, болам! Болам қани?!

Бобур ҳўнграб йиғлар экан, болани опасининг қўлидан олди-да, яна чакман устига ётқизди. Қосимбек боланинг ярим очиқ қолган кўзларини юммоқчи бўлиб, қошларини силади, киприкларини ётқизишга уриниб кўрди. Лекин киприклар ётмади, мурғак кўзлар ярим очиқлигича қолди. Хонзода бегим ўғлининг ўлганига энди ишонди-ю, ўзининг чаккаларига мушт уриб йиғлади:

— Сени бу ерларга олиб келмай онанг ўлсин, болам! Сени асраб қололмаган онагинанг ўлсин!!!

Бобур опасининг мушт бўлиб тугилган қўлларини икки қўлига олди-да, юзини юзига қаратди.

— Қарғаш керак бўлса мени қарғанг! — деди. — Сиз яна меннинг қасофатимга қолдингиз! Ажалда адолат бўлса бу бегуноҳ боладан аввал мен гуноҳқорни олсин эди! Буни икки қилич орасига мен олиб кирдим! Сизларни дину мазҳаб балосига мен гирифтор қилдим!

Қосимбек Бобурнинг елкасидан кучоклади. У бурноғи йил Қундузда мўғул бекларининг Бобурга қарши фитнаси илк бор маълум бўлганда орага тушиб хато қилганини, бугунги ғулу — ўшанда кесиб ташламаган яраннинг патоси эканини ўйлади:

— Гуноҳқорни изласангиз, ҳаммамиз ҳам айбдормиз, ҳазратим! Дунё ўзи шундоқ яратилган бўлса биз қандоқ қилайлик?!

Хонзода бегим яна ўғилчасининг жасадини кучоклади:

— Тўйдим бу дунёдан! Бас! Тўйдим! Мени болам билан бирга кўминглар!..

Хуррамшоҳнинг жасадини арчадан ясалган тобутга солиб, шу куни кечгача қўлма-қўл кўтариб бордилар. Кейин уни Помир тоғининг этакларидаги кўкалам бир тепаликка кўмдилару қабри устига оқ байроқча қадаб қўйдилар.

Тирик мурдага ўхшаб қолган Хонзода бегимни бир амаллаб Қундузга, ундан Кобулга олиб кетдилар.

КОБУЛ.

ТОШГАН ДАРЁ ЎЗАН ИЗЛАЙДИ

1

Кечки пайт Кобул қалъасининг жанубидаги қўлдан бир тўп ўрдак учди. Қўл бўйидаги бўлиқ ўт-ўланлар орасида писиб ўтирган мирзо Ҳумоюн камондан кетма-кет иккита ўқ отди. Осмонга кўтарилиб бораётган тумшуғи узун ўрдаклардан бири тўпидан айрилиб пастлай бошлади, сўнг қанотларини мажолсиз ёйиб, қўлнинг нариги четига қулаб тушди.

Қўлнинг ўша томонида подшоҳнинг саккиз эшқакли, соябонли кемаси сузиб юрган эди. Ҳумоюн бу ёқдан то отланиб, атқаси ва мулозимлари билан қўл соҳилини айланиб ўтиб боргунича кемадагилар ўқ теккан ўрдакни сувдан олиб, қирғоққа чиқдилар.

Уларнинг орасида Бобур ҳам бор эди. Ҳумоюн ўзи отган ўрдакни отаси қўлига олиб қараётганини кўрди-ю, отидан сакраб тушди ва анча бериди таъзим қилиб тўхтади.

Бобур ўрдакнинг тўшига қадалиб қолган ёй ўқини кескин бир ҳаракат билан суғуриб олди-ю, ўғлига кўзларини сузиб қаради:

— Бу ўқ сеникимми?

Ҳумоюн отасининг кайфи борлигини сизди. Бобур сўнги

пайтларда кўп ичадиган бўлган, бугун ҳам улфат беклари билан кемада чоғир ичиб ўтирган эди. Ҳумоюн кўл ва унинг атрофлари подшоҳнинг дахлсиз, хос ерлари эканини эслади. Отаси олдида одобсизлик қилиб қўйгандай кўзлари жавдираб:

— Ҳазратим,— деди,— афв этинг, бемаврид ўқ отмишмен.

— Аммо ўқни яхши отмишсен,— деб Бобур ўғлига энди кулимсираб гапирди.— Ма, ҳалолнинг бўлсин!

Ҳумоюн чап кўлини кўксига қўйганича, ўнг кўли билан овини отасидан олди-ю, мулозимларидан бирига берди.

Бобурдан орқароқда турган кўзлари катта-катта озғин қора йигит — Ҳиндубек тигиз оқ тишларини очиб кулди:

— Амирзодам мерганликда ҳазрат оталарига тортмишлар.

Ширакайф Ҳўжа Калонбек бу гапга дарҳол қўшилди:

— Падари бузрукворга муносиб ўғил!

Бобур эса бир четда жим кўл қовуштириб турган Қосимбекка мамнун назар ташлади. Ёши олтмишдан ошиб, эшик оғалик лавозимидан кетган Қосимбек ҳозир Ҳумоюнга атқалик қилмоқда эди. Бобурнинг ўзига шунча йил содиқ хизмат қилган бу одам энди бўй етиб келаётган Ҳумоюнни ҳам оталарча меҳр билан тарбиялаётгани билиниб турарди.

— Жаноб Қосимбек Ҳумоюнга мерганликдан яхши таълим бермишлар,— деди Бобур.— Бироқ амирзодам чавандозликда нечуклар?

Қосимбек Ҳумоюнга «жавоб беринг!» дегандай қилиб қаради. Ҳумоюн кўзлари гўё илҳом билан ёниб:

— Ҳазратим, ижозат беринг,— деди-да, отларни кўли билан кўрсатди. Бобур унинг сўнгги йилларда ўрганган чавандозлик машқларидан бирини кўрсатмоқчи эканини сизди.

— Қани, қани,— деди мароқ билан.

Ҳумоюннинг ёши ўн учга бориб, бўйи отасининг бўйига стай деб қолган. Юриш-туриши ҳам Бобурнинг ўсмирлик пайтини эслатар эди. Қосимбекнинг ишораси билан навкарлар иккита ювошроқ отни бир четга етаклаб чиқдилар-да, ён-ма-ён тутиб турдилар. Ҳумоюн ўзининг серёл қора қашқа отига сакраб минди, жиловни кескин буриб, хиёл орқага кетди. Сўнг нариги икки отга шитоб билан яқинлашди-да, жиловни қўйиб юборди. Отлар жипс келганда иккинчи отнинг эгаридан икки кўллаб тутганича, эгардан-эгарга сакраб ўтди. Шунда учинчи от жойидан кўзғалиб кетди. Ҳумоюн минган отининг жиловини тез кўлга олаётиб, учинчи отнинг юганидан тутган навкарига:

— Маҳкам ушланг!— деди.

Сўнг тагидаги отни наригисига жипс келтирди-ю, иккинчи эгардан учинчисига сакраб ўтди.

Ширакайф беклар даврасидан:

— Офарин! Тасанно!— деган хитоблар эшитилди.

Хумоюн хансираб отдан тушди-да, отаси томонга кела бошлади. Бобур ўзининг ўсмирлик пайтида Андижон чорбоғида эгардан-эгарга сакраб ўтолмай оёғи ерга тапиллаб тушганини эслади-ю:

— Тангрим Хумоюнни ёмон кўздан асрасин,— деди.— Чавандозликда биздан ўтадиган кўринадир.

— Ҳазратим, мирзо Хумоюн ҳар ншда сиздан ибрат олишга интилулар,— деди Қосимбек.

Бобур ўнғайсизланиб бош чайқади:

— Менинг шахзодага ибрат бўлгудек ҳолим йўқ.

Хумоюн отасининг маънос юзига таажжуб билан тикилди.

— Нечун, ҳазратим! Аткам менга барча жанглариңизни айтиб бердилар. Рустаму Сухроблар ҳам, Гўрўглию Алпомшлар ҳам сизчалик кўп жанг кўрган бўлмасалар керак!

— Жанг ҳисоб эмас, амирзодам, жангнинг натижаси ҳисоб,— деди Бобур ўзининг маълубиятларини эслаб.

Лекин Хумоюн учун энг муҳими — отасининг мислсиз даҳшатларга дуч келиб, барча ўлимларни енгиб ўта олгани ва ҳамма қиргинлардан омон чиққани эди. Бобурга астойдил ихлос қўйган Қосимбек: «Ҳазратимга дуо кетган, у кишини ўқ олмайди, тиф кесмайди», дерди ва бу содда эътиқодини Хумоюннинг қалбига ҳам сингдирган эди. Хумоюн отасининг Кобул билан Хирот оралиғидаги баланд тоғлардан одам зоти ўтолмайдиган қаҳратон киш кунларида юрак ютиб ўтганини кўпчилик бек ва навкарлар ҳолдан кетиб, отлар ҳам юролмайдиган бўлиб қолган пайтларда Бобур ўзи олдинга чиқиб, кўкрагигача қорга ботиб, ҳаммага йўл очиб борганини, ўшанда унинг қулоғини совуқ олиб, юзи кўмирдай қорайиб, таниб бўлмас аҳволга келганини Қосимбекдан яқинда эшитган эди.

Хумоюн ўша пайтларда бўлган бир ғалати ҳодисани отасидан тасдиқлатиб олгиси келди:

— Ҳазратим, Кобул чорбоғида Дўст деган бир паҳлавон навкар сизни танимай қилич билан чоғгани ростми?

— Рост. Кейин таниб қолиб, қиличини ташлаб қочди. Шукурки, ҳеч шикаст етмади. Бўлмаса Дўст паҳлавон тиф урган одам ҳаргиз тирик қолмагай эди.

— Худонинг қудратини қаранг-а!— деди эшик оға Муҳаммад Дўлдай хушомад оҳанги билан.

Хумоюн унинг кайфдан қизариб, кўпчиб турган юзига нохуш назар ташлади-ю, яна отасига юзланди. У фақат отаси билан гаплашишни истарди. Бобур тўғрисида Қосимбекдан ва бошқа одамлардан шунча ғаройиб ҳикоялар эшитиб ўсган бола энди унинг ўзи билан юракдан яқинлашишни истарди.

Лекин Бобур доим давлат ишию ёзиш-чизиш билан банд бўлар, бўш қолганда беклари чоғир мажлисини бошлашар, Ҳумоюнга эса улар ҳали ҳамсухбат бўлолмайдиган ёш бола деб қарашар эди. Бироқ Ҳумоюнда отаси билан сухбатлашини иштиёқи кун сайин ортиб бормоқда эди.

— Ҳазратим, бултур Сид дарёсининг бўйида йўлбарс билан олишган экансиз...

— Қайдан билдингиз?

— Ҳазратимнинг хонаи хосларида йўлбарс терисини кўрдим.

Бобур кетида турган бекларга ишора қилди:

— Йўлбарсини биз кўплашиб енганмиз.

Ҳиндубек кулиб эътироз қилди:

— Ҳазратим бўлмаганларида биз йўлбарсга рўбарў бўлолмас эдик.

Ҳумоюн Ҳиндубекнинг гапини маъқуллаган каби бош иргачи ва отасига болаларча соф бир ифтихор билан қараб қўйди.

Бобур Бухоро атрофларида ва Ҳисорда бошига тушган кулфатларни ҳамон унутолмас, ўшандаги мағлубиятлар алами аввалгиларига қўшилиб, юрагини ҳалигача тимдалар, дунё ғамларини хаёлидан узоқлаштириш учун ҳам у тез-тез чоғир ичар эди. Унинг руҳи тушиб, ўз тақдиридан ихлоси қайтиб юрган мана шу кунларда ўғли Ҳумоюн отаси қилган яхши ишларни бунчалик эъзозлаб тилга олиши Бобурга ғалати таъсир кўрсатди.

Бир лаҳза у ўзини ўсмир ўғлининг кўзи билан кўргандай бўлди. Ҳумоюн фахр билан тилга олган воқеалар чиндан ҳам бўлган воқеалар эканлиги тўсатдан Бобурнинг кўнглини кўтарди. Шу дақиқагача унга бутун ҳаёти қоп-қоронғи бир тун бўлиб туюлган бўлса, энди у бу тунга гўё Ҳумоюннинг кўзи билан қаради-ю, қоронғи осмоннинг у ер-бу ерида юлдузлар милтиллаётганини кўрди.

Ҳумоюн отаси билан яккама-якка гаплашгиси келиб, овозини пасайтириб:

— Ҳазратим,— деди,— инъом қилган девонингиздаги барча шеърларни ёд олмишмен. Лозим кўрсаингиз, имтиҳон қилинг.

Бобур орқароқда жим турган бек ва мулозимларга ўгирилиб қаради. Улар Бобурнинг ўғли билан гапини тезроқ тугатишини ва кемага қайтишини кутмоқда эдилар. Лекин Бобурга энди чоғир мажлисидан кўра ўғли билан бирга бўлиш ёқимлироқ туюла бошлади.

— Жаноблар,— деди у бекларига юзланиб,— бугун бизга кема сайри бас. Энди мирзо Ҳумоюн билан шеър машғулоти ўтказмоқчимен. От келтирилсин!

Бобур отлангандан кейин Ҳумоюн ҳам отига қувонч билан сакраб минди. Ота-бола ёнма-ён Кобул аркига қараб йўл олдилар. Қосимбек ва бошқа мулозимлар орқароқда одоб сақлаб жим бормоқда эдилар.

Бобур кемада ичган чоғирнинг тафти ва карахтлиги унинг алтираган сузук кўзларидан билинар эди.

— Қани, амирзода, эшитайлик,— деди у Ҳумоюнга кайф аралаш кулимсираб қараркан.

Отаси бирга кетаётганидан ўзида йўқ қувонган Ҳумоюн Бобурнинг девонидан ёд олган бир рубоийни шошилброк ўқиди:

Озор ила печа гуфтигў¹ қилғайсиз
Озурда бўлурни жустижў² қилғайсиз.
Мунчаки кўнгулларга етишди озор,
Май била магарки шустишў³ қилғайсиз.

Ҳумоюн бу шеър билан отасининг май ичиш сабабини тушунишлигини ва ҳозир кайфи борлиги ҳам узрли эканини айтмоқчи эди. Бобур буни фаҳмлади-ю:

— Маъқул, маъқул,— деб кулди.— Фақат аввалги икки сатрнинг вазнини бузиброк ўқидинг. Афтидан, сен бу сатрлардаги кинояни яхши фаҳхламагансен.

— Қадоқ... киноя?— деб бу сатрларни камоли жиддият билан ўқиган Ҳумоюн таажжубланди.

— Кинояки, одамлар бир-бирларига озор берадиган гапни кўп гапирурлар. Гоҳо озор берадиган нарсани ўзимиз жустижў қилиб топурмиз. Ундаи кейин бу озорни кўнгиладан май билан ювмоқчи бўлиб ичишга ружу қилурмиз.

Отаси ўзининг май ичишига киноя билан қарашини Ҳумоюн энди сизди ва яна ҳайрон бўлди:

— Нечун шундай?

— Сенинг ёшингда бунинг сабабини тушуниб бўлмас. Мен ҳам ўттиз ёшимгача чоғирга эҳтиёж сезган эмасмен. Сен қалайсен?.. Кўнглингда чоғирга иштиёқ борми?

Ҳумоюн уялиб бош чайқади. Сўнг отасининг ичкиликдан шишган қовоқларига жиддий бир қараб олди-да:

— Мен чоғирни ёмон кўрамен,— деди.

Ўн уч ёшида Бобур ўзи ҳам ичкиликдан ҳазар қилишини эслади-ю, ўғлининг жавобини маъқуллаб бош ирғади.

¹ Гуфтигў — гаплашиш.

² Жустижў — қидирши.

³ Шустишў — ювиш, яъни май билан дил губорини ювиш.

— Хўш, неларни яхши кўрурсен?

— Менми?— деб Ҳумоюн бир лаҳза ўйланиб олди. Унинг яхши кўрган нарсалари кўп эди:— Сафарда юришни, саёхатни яхши кўрурмен, яхши китоб бўлса эртаю кеч ўқигим келур...

«Бу жиҳатлари менга ўхшабдир», деди Бобур ичида ва ўглининг қамчи дастасини тутган қўлларига қаради. Ҳумоюнинг юз-кўзи ҳам, қўллари ҳам Бобурникидан қорароқ эди. Балки жанубда туғилиб ўсаётгани учун шундайдир? Лекин панжасининг шакли отасиникига жуда ўхшаш. Бобур ўглини билагидан олиб:

— Қани, кафтингни оч,— деди.

Ҳумоюн қамчини тақимига қистирди-да, кафтини отасига очиб кўрсатди. Бобур унинг кафтидаги чизикларга қаради-да, кейин ўз панжасини очиб, ўглининг кафтига кафтини ёнма-ён тутди. Катта ва кичик ҳар икки кафтдаги қўндаланг чизиклар бир-бирининг айнан такрори эди. Отасига ўхшашни жуда-жуда истайдиган Ҳумоюн мамнун жилмайди. Бобур чуқур тин олди-да:

— Илоҳим, мен кўрган балоларни сен кўрмагин!— деди.

— Лекин мен сизнинг барча ишларингизни ўрганмоқчимен.

Бобурнинг яхши-ёмон ишлари хаёлидан аралаш-қуралаш бўлиб ўта бошлади. Бераҳм муҳит уни ҳам шафқатсиз бўлишга ўргатарди. Мана шу Кобул вилоятининг ўзида хирилчи қабиласига мансуб талай одамлар қарвон йўлларида талоччилик қилганликлари учун Бобур аскарлари томонидан аёвсиз ўлдирилган, ҳазора қабиласининг ўнлаб жанговар йигитлари чоққи найтида қириб ташланган эди... Бобур бу қонли лавҳаларни умр китоби бўлмиш «Вақоиг»га бирма-бир ёзиб борар эди. Аммо ҳали балоғатга етмаган ва оламга болаларча мусаффо бир ишонч билан қараётган Ҳумоюни бундай шафқатсизликлардан мумкин қадар узоқ тутгиси келарди.

— Сен хушёр бўл,— деди Бобур,— менинг ҳавас қилиб бўлмайдиган ишларим ҳам бор!

— Қайси ишларингиз, ҳазратим?

— Қайғули, фожиали ишларим. Бутун тақдирим...

— Буни бир ғазалда ҳам айтмишсиз.

Ҳумоюн яна ёддан отасининг сатрларини айта бошлади:

Ҳар ёнгаки азм этсам, ёнимда борур меҳнат,
Ҳар сорики юзлансам, ўтрумга келур қайғу,
Юз жавру ситам кўрган, минг меҳнату ғам кўрган,
Осойиши кам кўрган мендек яна бир борму?

Шеърнинг гамгин ва сеҳрли оҳангидан таъсирланган Бобур:

— Яхши ўқидинг,— деди ўғлига.— Истайменки, мен кўрган қайғулару шафқатсизликларни илоҳим сен кўрмагин.

— Хўп, ҳазратим, мен фақат сиз билган ажойиботларни билсам бас!

Ота-бола суҳбатга берилиб аркка қандай этганларини сезмай қолдилар. Кейин улар даричалари Шоҳи Кобул тоғига қараб очиладиган хушҳаво хонаи хосда ўтирганларида Ҳумоюн қўлига қоғоз ва қалам олди-ю, отаси ихтиро қилган Хатти Бобурий ҳарфлари билан бир байт шеър ёзди:

Турклар хатти насибинг бўлмаса, Бобур, не тоғ,
Бобурий хатти эмасдур, хатти Сигноқийдурур¹.

Бобур сўнги дафъа Самарқандда юз берган машъум воқеаларни ва Хатти Бобурийни мактабда болаларга ўргатган муаллимнинг тошбўрон қилиб ўлдирилишини эслаб «ух» тортди.

Бир вақтлар Улугбекни ҳалок этган ёвуз кучлар унинг расадхонасини қайта тикламоқчи бўлган Бобурни ҳам динсизликда ва рофизийликда айблаб, ҳатто қўшиннинг кўп қисмини шунга ишонтиргани Қизилқумдаги мағлубиятга замин яратган эди. Шундан бери Бобур ўзи ихтиро этган хатни жорий этиш фикридан бутунлай қайтган эди.

— Сенга буни қайси муаллимнинг ўргатди?— сўради Бобур Ҳумоюннинг ёзувига кўз югуртириб.

— Мирбадал хаттотдан ўргандим...

Ҳумоюннинг ёзувида хато бўлмаса ҳам, лекин ҳали бу хатга қўли ўрганмаганлигидан ҳарфлар нотекис чиққан эди.

— Сенга манзурми?

— Жуда! Белгилари оз. Тез ёзиш мумкин. Ўқиши жўн.

— Ундай бўлса кўпроқ машқ қил. Минбаъд менга мактуб ёзсанг, шу хат билан бит. Мен ҳам сенга шу хат билан жавоб ёзурмен. Махфий тутмоқ осон бўлур.

Ҳумоюн подшоҳ отаси билан махфий хатлар ёзишишини кўз олдига келтирди-ю, кўнглида яна иссиқ бир ифтихор туйғуси мавж урди. Отасига меҳри товланиб, унинг кўнглига ёқадиған яна бир иш қилгиси келди.

— Ҳазратим, лозим бўлса, энди мусиқадан бир имтиҳон қилиб кўринг.

¹ С и г н о қ — Туркистондан шимолроқда Сирдарё яқинида жойлашган қадимий шаҳар.

— Қани, қани!

Ҳумоюн савдарбошига афгон рубобини келтиришни буюрди. Сўнг дур ва садаф билан безатилган, тоғлар садосини эслатувчи улуғвор товуш берадиган бағри кенг рубобни созлаб, аввал наво йўлида бир куй чалди, кейин савтга ўтди. Бобур қулоғига жуда ёқимли туюлган бу савтни дарҳол таниди.

«Чоргоҳ савти» деб аталган бу куйни бултур Бобурнинг ўзи басталаган эди. Ҳумоюн буни ҳам излаб топибди-да! Ёки мураббийлари унга атайлаб отаси ёзган шеърларни ёдлатиб отаси басталаган куйни ўргатиб, шу йўл билан подшоҳдан таҳсин эшитмоқчимикинлар?

Мураббийларда шундай бир хушомад бўлганда ҳам Ҳумоюннинг ўзи куйни самимий ихлос билан чалаётгани билиниб турарди. Бола ўзининг бояги сўзини — отасининг ижодидан ибрат олишга ҳаваси зўрлигини ҳозир чиндан исбот қилмоқда эди.

Бобур ўғли чалаётган гўзал куйга қулоқ солиб туриб, кўнгли завқли туйғуларга тўлиб кетди.

Энди ўзининг ҳаёти ҳам унга энг ёруғ ва тиниқ томонлари билан кўрина бошлади. Ахир у ҳам бир вақтлар Ҳумоюн каби бегубор, мусаффо ёшлик дамларини бошдан кечирмаганмиди? Унинг ҳаёти ҳам тиниқ бир булоқ бўлиб оқмаганмиди? Кейин бу булоқнинг устига жарлар қулаб, уни лойқалатди. Лекин ҳали бу булоқ қуриган эмас, унинг обиҳаёти Ҳумоюннинг қалбини ҳам обод қилгани мана ҳозир билиниб турибди.

Бобур ўзи билан ўғлининг орасида ажиб бир боғланиш борлигини бугун биринчи марта аниқ сизди. Отанинг ҳаёти ўғлининг ҳаётида айнан такрорланмаса ҳам, лекин янги бир тарзда давом этиши мумкинлигига, агар ўгил астойдил отага содиқ бўлса, унга тортса, отанинг умри ўғилнинг умрига уланиб кетишига Бобурнинг энди кўзи етди. Шундай бўлгач, Ҳумоюнни атқаси, онаси ва мураббийлари Бобурга ихлосманд қилиб тарбиялаганлари, унга отасининг фазилатларини саралаб олиб беришга интилаётганлари катта бир неъмат эмасми? Бобурнинг ўзи ҳам ўғлига фақат фазилатларини раво кўради-ку. Фақат шундагина ўгил у қилган хатоларни қилмаслиги, у тортган азобларни тортмаслиги мумкин.

Фазилатлар... Бобур ўз фазилатларини бугун ўғли орқали алланечук сараланган ҳолда кўриб, кўнгли кўтарилди, ўзига бирдан ҳурмати орғди.

Кейин у Ҳумоюннинг атқаси Қосимбекни саройга чақиртириб, унга бош-оёқ сарупо ва от инъом қилди. Шаҳзоданинг бошқа мураббийлари ва муаллимлари ҳам катта-катта ҳадялар олдилар.

— Сенга не инъом қилай, айт!— деб Бобур ўғлига кулим-сираб тикилди.

Хумоюн китоб йиғишни яхши кўрарди. Унинг алоҳида бўлмаши эгаллаган хос кутубхонасидан ташқари, хобгоҳида ҳам китоб тўла жавонлар бор эди. Тўшагининг бош томониغا хушбуй сандал дарахтидан ишланган жавон қўйилган, отасининг шеърӣ девони жавоннинг алоҳида тоқчасида ёлғиз турар эди.

— Яна янги шеърӣ китоблар ёзсангиз,— деди Хумоюн отасига уялиқираб кўз ташларкан,— мана шу алоҳида тоқча сизнинг асарларингиз билан тўлса... Ўғлингизнинг тилаги шу!

Бобур завқ билан қаҳ-қаҳ уриб:

— Э-ҳа, сенинг бу тилагингни ўрилатмоқ учун мен бир умр меҳнат қилмоғим керак-ку!..— деди.— Майли, яхши инят — ярим давлат дерлар. Бугундан бошлаб сен учун бир шеърӣ китоб бошлагаймен. Қани, дафтарингни бер...

Хумоюн муқоваси олтин суви билан зийнатланган, нафис барақларига ҳали ҳеч нарса ёзилмаган янги дафтарини отасига икки қўллаб тутди.

Бобур хона тўридаги миз ёнига келиб ўлтирди-ю, бирдан ўғлига меҳри тобланиб, ҳаяжон ичида:

«Жигарим билан жонимга пайванд фарзандим!»—деб ёзди.

Ўзидаги оталик меҳри ва Хумоюндаги фарзандлик садоқати тождор оталар ва валиаҳд ўғиллар орасида жуда кам учрайдиган нодир туйғулар эканини, Улуғбек билан Абдуллатиф орасида бўлиб ўтган фожиаларга солиштирганда, у ўз ўғлидаги самимиий ҳисларни қанчалик қадрлаши, қанчалик асраб-авайлаб, камолга етказиши зарурлигини шу лаҳзада бутун вужуди билан ҳис қилди. Қалбини тўлдирган оталик туйғуси шеърӣ оҳанг билан қоғозга туша бошлади: «Давлату бахт била Хумоюн бўл, комрон бўл, жаҳонда, юз туман обрўйи иззат кўр!»

Бобур ёзишдан тўхтаб ўрнидан турди:

— Давомини кейин битгаймен!.. Китобнинг номи сенинг исминга қофия бўлғусидир!..

Бобур ўша йили ёзиб тугаллаган шеърӣ китоб — «Мубаййин» — Хумоюннинг номига чиндан ҳам қофиядош эди. У ўғлининг дафтарига битган эзгу тилақларини ҳам шу китобга шеърӣ сатрлар шаклида жойлаб, ҳаммасини санъаткор хаттотга кўчиртирди-да, Хумоюнга тақдим қилди.

Хумоюн шу вақтгача отасидан олган совгалар орасида энг улкани ва бебаҳоси — мана шу шеърӣ китоб эканини сезиб, уни қайта-қайта кўзларига сурди...

У араб тилида ёзилган, мураккаб фикҳ китобларини тушунолмай қийналиб юрар эди. Отаси тақдим қилган «Мубаййин»

фиқҳининг қонуи-қоидаларини равои туркий тилда гузал мас-навийларда ифодалаб, Ҳумоюн учун ҳам дарслик вазифасини бажарар, ҳам унга шеърый завқ берарди. Энг муҳими, унинг отасига бўлган меҳри, ихлоси шу китоб туфайли янги бир куч билан ўсиб борарди.

Ҳумоюн ўн беш ёшга кирганда унинг китоб жавонида отасининг яна бир асари — аруз илмига бағишланган «Мухтасар» пайдо бўлди. Ҳумоюннинг эндиги истаги — отасининг ўсмирлик йилларидан бери ёзиб юрган «Вақоийъ» номли китобини ўқиш эди. У отасининг энг катта, энг мароқли асари мана шу эканини отаси Моҳим бегимдан эшитган эди.

Ҳумоюн ўн олти яшарлигида отаси унга Бадахшон вилоятини бериб, аскар ва савдари билан Кобулдан кузатиб қўйди. Ҳумоюн тоғлар орасида отаси билан хайрлашаётганда оила аъзолари ўзаро «Бобурнома» деб атаётган бошлаган ўша «Вақоийъ» китобидан бир нусха кўчиртириб юборишни илтимос қилди.

Ўглининг бошқа кўп илтимосларини сўзсиз қабул қилган Бобур бу гал ерга қараб бош чайқади:

— Ҳали у китоб битган эмас. Ўлда-жўлда ётган асарни кўчиртириб бўлмас.

— Қачон биткурурсиз, ҳазратим? Мен интизормен!

Бобур ўглининг юзига хомуш назар билан тикилди.

— Кўп интизор бўлма. Чунки у китобнинг битиши учун менинг умрим тугаши керак.

Ҳумоюн сесканиб тушди:

— Нечун бундай дейсиз?

«Бобурнома»нинг давоми анча вақтдан бери ёзилмай юрар эди. Қизилбошлар билан тузилган иттифок, Бобур ватанига бегона қўшинни бошлаб бориб, мағлубиятга учраганлари... буни ёзиш у ёқда турсин, ҳатто эслашдан ҳам юраги бўзилар эди. Наҳотки умр китобининг сўнгги боби шу бўлса? Бобур энг йирик асарини бу тарзда ёзиб тугатолмаслигини сезарди. Уни қўнгилдагидек тугаллаш учун эса ўша мағлубиятлар захрини ювиб кетадиган катта ғалабаларга эришиши керак эди. Мана энди ўгли Ҳумоюн улгайиб, ёнига қиряпти.

У Ҳумоюннинг сўнгги гапдан изтиробга тушганини сезиб:

— Менинг сўзимдан ташвишланма,— деди.— Мен «Вақоийъ»ни умрим бўйи ёзмоқчи бўлганим учун шундай дедим. Орузийим борки, унинг келгуси бобларига сенинг ҳам яхши ишларинг битилгай. Зора ўзим ҳам... бу китобнинг поёнига ёруғ юз билан етсам.

— Ҳазратим, ундоқ бўлса, илоҳим «Бобурнома»ни яна эллик йил ёзинг, юз йил ёзинг!

— Ўшангача кутишга сабр-тоқатинг етурмикин?— деб кулди Бобур.

Хумоюн жиддий туриб:

— Тангрим олдида онт ичиб айтаменки, сабр-тоқатим умрим етгунича етур!— деди.

2

Кобул дарёсининг бўйида Бобур эгачиси Хонзода бегим учун курдирган Боғи Дилқушонинг кўк мармар кўшиқда мавлоно Фазлиддин чўкка тушиб ўлтирибди. Ундан паст-роқда мавлононинг соқол-мўйлови кўзга кўриниб қолган ўғли одоб билан қўл қовуштириб, ердан кўзини олмай сукут сақлайди.

Нафармон қабо кийган, юзига оқ ҳарир парда тутган Хонзода бегим сишиқ тозуш билан тўхтаб-тўхтаб сўзлайди:

— Ҳаммадан кўра... ўлган одамга қийин экан, мавлоно. Ўлган қайтиб келмас экан... Тириклар... оҳ-воҳ қилиб, минг куйиб-ёнсалар ҳам, ахири бир кун... тасалли топар эканлар. Мана, ўзимдан қиёс...

— Бегим, бу замонда тирикларга ҳам осон эмас. Менинг Андижондан бош олиб чиқиб кетганимга йигирма уч йил бўлди. Шундан бери сизнинг бошингизга қанча кулфатлар тушди! Биз қанча балоларни кўрдик.

Хонзода бегим Андижонда қолиб кетган ёшлик йилларини кўз олдига келтира бошлади. Мавлоно Фазлиддин ўшанда қанчалик кўҳлик йигит бўлганига ҳозир ишониш қийин. Азоб-уқубатларга тўлиб-тошган сўнгги ўн йилликлар унинг бўйишларига ҳам ажинлардан тўр солиб кетган, қўлларини суюкдай қотириб, томирларини бўрттирган, елкасини букчайтиб, олтмиш ёшлик мўйсафидга ўхшатиб кетган. Ҳолбуки, у энди эллик уч ёшга киргани Хонзода бегимга маълум эди. «Ўзимчи?» деб бегим ҳар куни кўзгуда кўрадиган аксини хаёлидан ўтказди. Хонзода бегимнинг олд тишларидан уч-тўрттаси тушиб кетиб, лаблари буриша бошлаган, сочи сийраклашиб, кулранг тусга кириб қолган эди.

Гўзал ёшликлари энди ҳеч қачон қайтиб келмаслиги, умрларининг энг яхши йиллари очилмай сўлган гулдай умрбод хазон бўлганлиги Хонзода бегимнинг юрак-бағрини тимдалаб ўтди.

— Мавлоно, ўғлингиз неча ёшдалар?

— Йигирма бирда, бегим.

Хонзода бегим ҳалок бўлган ўғли Хуррамшоҳнинг тирик бўлса ҳозир йигирма икки ёшга киришини эслади. Бу йўқо-

твшининг унутилмас алами кейинги дарди устига кўшилди-ю, кўзига ёш қўйилиб келди:

— Ишкилиб, ўглингизнинг умри узоқ бўлсин. Мен кўрган мусибат сизнинг бошингизга ҳеч вақт тушмасин, мавлоно. Мен энди тирик қолмаймен деган эдим. Ёлғиз ўғлимнинг кетидан кетамен деган эдим. Лекин жоним қаттиқ экан:

Мавлоно бегимнинг йиғисидан саросимага тушиб ўғлига бир қараб олди. Сўнг бегимнинг хаёлини бошқа ёққа буриш учун ўзининг бошига тушган азоб-уқубатлардан сўзлашга гувиди:

— Ҳиротлар ҳам жуда нотинч бўлиб кетди, бегим. Шоҳ Исмоил шаҳарни олиб, сунийларни қувғин қилди. Кейин яна шайбонийзодалар шаҳарни босиб олиб, шиа тарафдорларини қатағон қилди. Шиа мазорларини очириб, Марвада Шайбонийхонни ўлдиртирган рухонийларнинг суякларини тўпларга солиб оттирдилар. Кейин кўп ўтмай, Ҳиротни яна қизилбошлар улардан тортиб олишди. Қасд олиш қайтатдан бошланди. Ҳаммаёқ алғов-далғов. Камолиддин Бехзод Ҳиротдан Табризга шоҳ саройига хизматга олиб кетилди. Мавлоно Хондамир шаҳардаги тўполонлардан бешиб, ота юртларидаги узоқ бир қишлоққа чиқиб кетдилар. Бизга ўхшаган мусофирларнинг аҳволи бундан ҳам баттар бўлди... Ўғлимиз Аловиддин Ҳиротда сангтарошлик санъатини ўрганган эди. Лекин санъат билан кимнинг иши бор? Ахири, шоир Муҳаммад Султон билан маслаҳатни бир жойга қўйдигу Бобур мирзодан паноҳ истаб Кобулга келдик.

Бу гаилар давомида Хонзода бегим кўз ёшларини артиб, ўзини анча босиб олди:

— Келиб беҳад яхши қилгансиз, мавлоно... мен сизга бир омонатингизни қандай қайтаришни билмай юрган эдим.

Мавлоно Фазлиддин кўзлари пирпираб:

— Қайси омонатим?— деди.

Хонзода бегим маъюс кулимсираб:

— Ҳозир,— деди-ю, ўрнидан кўтарилди ва тўрдаги ўймакор эшикдан ичкарига кириб кетди.

Кўп ўтмай у бир хизматкорга оқ ипак матога ўралган нарсани кўтартириб қайтиб чиқди. Бегимнинг ишораси билан хизматкор ҳалиги нарсани мавлоно Фазлиддиннинг олдига қўйди-да, таъзим қила-қила орқаси билан юриб чиқиб кетди.

— Мавлоно, очиб кўринг,— деди Хонзода бегим.

Мавлоно Фазлиддин ўрамни секин очди-ю, четлари саргайиб кетган чизмакашлик қоғозларини кўрди. Сўнг уларни авайлаб варақлар экан, ўзининг Андижонда қурмоқчи бўлиб, Хонзода бегим билан бамаслаҳат чизган лойиҳаларини таниди. Йиғитлик орзулари хаёлида қайтадан уйғониб, кўзлари чакнаб

кетди. Андижонда қурилмай қолган обидаларнинг лойиҳасини шунча йилдан бери асраб олиб юрган Хонзода бегим унга ҳозир ўша ошиқлик пайтидагидек нафис ва жозибали кўринди. Ўшда, қоятош устида ноҳосдан бегимнинг белидан олган пайтидаги ширин туйғулари уйғонди-ю, юрагини завққа тўлдирди:

— Ҳазрат бегим, сиз менга жонимни қайтариб бергандек бўлдингиз! Мўъжизани қаранг! Орада шунча йиллар! Шунча йўллар! Шунча тоғу дарёлар!

Мавлоно Фазлиддинни тўлқинлантирган завқ ва қувонч Хонзода бегимга ҳам ўтди. Унинг товушида шодлик жаранги эшитилди:

— Ростдан, бу лойиҳалар менга қўшилиб жуда кўп балоларни бошдан кечирди. Мен қанча жойга борган бўлсам, булар ҳам бисотлариму жавахирларим орасида мен билан саргардон бўлиб юрди. Фақат охириги марта Қундуздан Самарқандга жўнаганимизда тоғлару дарёлардан кўп юк олиб ўтиб бўлмади. Сандиқларимдан бир қисми Қундуз қўрғонида қолди. Шуларнинг ичида бу лойиҳа ҳам қолган экан. Самарқандга бориб кўп ачиндим. Ёз келса Қундузга одам юбориб олиб келтирмоқчи эдим... Кейин ҳалиги фалокатлар бўлди... Қундузда қолгани яхши бўлган экан. Бошқа сандиқларимнинг ҳаммаси Ҳисорда фитначи мўғулларнинг илкида қолди... Мавлоно, қаранг-чи, ҳамма варақлари жойидами?

Шундай деб, Хонзода бегим юзидан ҳарир пардасини боши устига кўтариб қўйди-ю, лойиҳаларга тикилиб қаради.

— Ҳаммаси жойида!— деди мавлоно Фазлиддин унинг юзига миннатдорона кўз ташлаб.— Самарқандда фақир сизнинг ҳузурингизга киришга журъат этолмаган эдим.

— Ўзим сизни чорламоқчи бўлдим. Аммо лойиҳалар Қундузда қолганлиги учун андеша қилдим...

Мавлоно Фазлиддин Андижонда Хонзода бегимнинг суратини ҳам чизганини, ҳозир лойиҳалар орасида ўша сурат йўқлигини бегимга эслатгиси келиб:

— Балки... Суратлар йўқолиб кетгандур?— деди.

Хонзода бегимнинг юзига нафис қизиллик югурди:

— Ҳали ҳам мусаввирлик қилмоқдамисиз, мавлоно?

— Ҳазрат бегим, кўп йил машқ қилинмаса қўл мусаввирликдан чиқиб қолар экан... Ҳозир фақат меъморлик билан машғулмен.

— Андижонда чизган суратларингизни мен алоҳида сақламоқдамен,— деб Хонзода бегим мавлононинг ўглига ийманиб кўз ташлади.

Бўй етиб қолган бу йигит олдида ўзларининг ёшлик муҳаббатларини эслатувчи суратни Хонзода бегим атайлаб олиб чиқмаганини мавлоно Фазлиддин энди сизди.

— Лутфан сиз ҳақсиз! ҳазрат бегим... Ўша суратлар энди умрбод сизники бўлмай!

Буни жуда нотаб турган Хонзода бегим:

— Саховатингиздан тоабод мишнатдормен!— деди.

Мавлоно Фазлиддин қўлини кўксига қўйиб, одоб билан бош эгди. Сўнг гапни яна очиқ турган эски лойиҳалари устига бурди:

— Мен энди буларни Хиротда ўрганган янгиликларим билан тўлдиргаймەن. Ана ундан сўнг бемалол амалга оширсам бўлур... фақат... бу мадрасаю қасрлар қаерга қурилмоғи мумкин? Андижон... узоқда қолди. Кобулгами?

Хонзода бегим маънос бош чайқади:

— Кобул — биз орзу қилгандек қудратли давлат эмас, мавлоно. «Улуғ меъморлик обидалари қурмоқ учун улкан давлатнинг қудратига суяноқ керак» деганлар ҳақ эканлар. Начора?..

Мавлоно Фазлиддин олдида очиқ турган тарҳларга ғамгин кўз тикиб:

— Ҳа, тақдир бизни нотабон қилиб яратмишдир,— деди. Овози кексаларникидек ғижирлаб эшитилганини ўзи ҳам сезди-ю, қўшиб қўйди:— Мен энди қариб қолдим. Қирғинлар, тўполошлар, фаторатлар билан умрим ўтди. Лекин нахотки бу ҳаммаси узлуксиз давом этаверса? Ахир бир мен эмас, ўнлаб заковатли олимлар, ҳунарпешалар, шоирлар жаҳолат довули билан Мовароуннаҳру Хуросондан қувилмишлар. Илгари қора кучлар бизни Андижондан қувсалар, Самарқанддан навоҳ тоғар эдик. Самарқанд жоҳиллари кун бермасалар Хиротдан нажот излар эдик. Энди Андижону Самарқанд ҳам, Бухорою Хирот ҳам — барчаси кўчманчи султонлару диний адоватлар довулидан зир титрамоқда. Довул учирган ҳазондай ватанидан қувилган қанча маърифатлик олиму санъаткорлар, қанча подир истеъдодлар беҳуда ҳайф бўлиб кетмоқдалар. Бизнинг ватандан айрилишимиз — дарёнинг ўзанини йўқотиб, дашту биёбонга тошиб чиқиб кетишига ўхшайдир. Амударё бир вақтлар шу кўйга тушган экану то ўзига янги йўл солиб, бошқа бир денгизга бориб қуйилгунча у ёқдан-бу ёққа бош уриб, тошиб юрган экан. Биз ҳам умр бўйи у ёқдан-бу ёққа бош уриб муносиб ўзанимизни тополмаймиз. Энди бу кажрафтор фалак ҳеч бўлмаса фарзандларимизга раҳм қилсин! Биз бўлмасак, булар ўзларига муносиб ўзан тошиб, янги бир маданият денгизига бориб қуйилсинлар!

Умр бўйи ўз ижодий режаларини амалга оширолмай қўйиб юрган истеъдоднинг бу аламли илдоси Хонзода бегимни титратиб юборди.

— Мавлоно, фақат сиз эмас, Бобур мирзо ҳам ўзанини йўқотган дарёдек безовталар!

— Биламен, тақдир ул ҳазратга ҳам ўгайлик қилмишдир!
— Аммо Бобур мирзо саргардон бўлиб юрган истеъдодлар дарёсини бир жойга йиғмоқчилар, насиб бўлса, илму санъатнинг янги бир денгизини барпо қилмоқчилар.

— Биз учун сўнги умид ҳали ҳам Бобур мирзодирлар. Шунинг учун ўғлим билан Кобулга келдик.

— Қаерга жойлашдиларингиз, мавлоно?

— Жияним Тохирбекникига тушдик. Ўзи сафарда экан...

Ота-бола икковлари ҳам эски кийим кийишган, рангларини жуда олдириб қўйган. Уларнинг моддий жиҳатдан ҳам қийналиб юрганларини сезган Хонзода бегим яна ўрнидан туриб, ичкари хонага кириб кетди. Қабосининг чўнтагидан калит олиб, тоқчада турган пўлат сандиқни очди.

Иниси Бобур мирзо Хонзода бегимга энг нуфузли аёнлари қатори улуфа тайинлаган эди. Ҳар ойда хазинадан чарм ҳамёнга солинган минг дирҳам олтин келиб турар эди. Хизматкорлар бегимга берилган мулкнинг экин-тигини билан тирикчилик ўтказишарди. Бегимнинг бир ўзига кўп пул кетмас, шунинг учун хазинадан келган олтин тўла ҳамёнларининг анчаси пўлат сандиқда тахланиб турар эди.

Хонзода бегим мавлоно Фазлиддиннинг кичикроқ бир ҳовли ва от сотиб олиши, кийим-кечаги, уч-тўрт ойлик тирикчилиги учун қанча пул кетишини чамалаб кўрди-да, минг дирҳамлик ҳамёнлардан иккитасини олди. Сўнг уларни бояги хизматкорга бериб, олтин барқашда кўтартирганича ота-боланинг олдига қайтиб чиқди.

Мавлоно Фазлиддин ҳамённи кўриб, хижолат чека бошлади. Хонзода бегимдан пул олиш унга оғир эди.

— Мавлоно, бу ҳамёнлар Бобур мирзонинг хазиналаридан келмишдир. Ўзлари бўлмаганликлари учун улуфаларини мен сизга топширмоқчимен. Бирини — ўғлингиз Аловиддинга. Марҳамат! Олингиз!

Аловиддин қўлини кўксига қўйиб, энди биринчи марта оғиз очиб гапирди:

— Раҳмат, ҳазрат бегим, биз сиздан беҳад миннатдормиз!

Унинг ёқимли товуши ва сўзларни майин талаффуз қилиши мавлоно Фазлиддиннинг йиғитлик пайтини эслатар эди... Шу туфайли ота-бола иккови ҳам бегимга бениҳоя азиз кўринарди.

3

Амударё томондан тоғ ошиб учиб келган турналар Кобулнинг устидан жануб-шарқ томонга ўтмоқда эдилар. Арқнинг тиллакори айвонида Моҳим бегим билан нонушта қилиб ўтир-

ган Бобур турналарнинг қисқа ва сирли товуш билан «кур-ей»лашини эшитди-ю, ўрнидан туриб, айвон четига борди ва осмоннинг овоз келаётган томонига тикилди... Кўкда эгилиб-чайқалиб келаётган бир шода қора маржонни кўзлари билан қидириб топгандан кейин турналарнинг товуши унга гўё аниқроқ эшитила бошлади.

Гўзал ва тиниқ «кур-ей», «кур-ей»ларда қандайдир ҳорғичлик оҳанглари борга ўхшарди ва турналарнинг узоқ-узоқлардан учиб келаётгани эсга тушар эди. Балки улар шу келишда Андижоннинг устидан учиб ўтгандирлар? Ёки Тошкент ва Самарқанд атрофларидаги сокин сувлар бўйига қўниб дам олгандирлар?

Бу ўйдан Бобурнинг қалбини аламли бир соғинч туйғуси чулғаб олди. Ҳатто шу турналар кўриб келаётган жойларни у энди бориб кўролмайди. Кўли Маликда ва Гиждувонда енгилиб, Ҳиротда фитначилар хиёнатидан абгор бўлиб қайтганига, мана, ўн уч йил бўляпти. Бобур шундан бери қалтис ҳарбий юришлардан ўзини тийиб юрибди. Мўғул бекларининг хиёнатларини Қундуздаёқ била туриб, яна ўшаларга ва қизилбошларга таваккалчилик билан суяниб иш қилгани унинг ватанига қайтадиган барча йўлларини бекитиб ташлаган эди.

Турналарнинг узоқлашиб сўниб бораётган товушлари таъсирида Бобурнинг кўнглига: «Энди туғилиб-ўсган юртингга умрбод қайтолмайсан!»— деган аламли ўй келди-ю, юзи бирдан тундлашди. Орқасига ўгирилиб, савдарбошига чоғир келтиришини буюрди.

Моҳим бегим дастурхон ёнидан Бобурга томон келар экан:

— Ҳазратим, эрталабдан чоғир?— деб таажжубланди.— Ҳозир фарзандларингиз саломга келурлар... Ана, мирзо Ҳиндол аткалари билан келмоқдалар.

Бошига кичкина ипак салла ўраган, мурассаъ камарига кичкина қилич тақилган саккиз ёшли мирзо Ҳиндол айвоннинг баланд зинапоясидан катталардай қўл қовуштириб, таъзим қилиб чиқди. Отаси буни кўриб беихтиёр жилмайди. Ҳиндолни елкасидан қучиб эркалатди, кейин уни ёнига олиб, зарбоф кўрпача устига ўлтирди.

— Қилич тақиб олибсиз, амирзодам, жангга бормоқчимисиз?— деб ҳазиллашди.

Ҳиндол катта-катта кўзларини чақнатиб Моҳим бегимга бир қараб олди. Моҳим бегим «Айтинг!» дегандай бош ирғади. Шунда Ҳиндол бурро тил билан отасига:

— Мени ҳам олиб бординг,— деди.

— Қаерга?

— Ҳин... Ҳиндистонга.

— Ҳиндистонда нима қилмоқчисиз?

— Йўл... йўлбарсни кўрамен...

— Ана холос!— деб Бобур кулди.— Биз сизга Ҳиндол исми берсак, сиз фақат Ҳинд йўлбарсини томоша қилмоқ-чисиз холосми?

Бола қизариб:

— Йўқ,— деди ва жажжи қиличининг сопини қисимига олди.— Агар йўлбарс... «сйман» деса, мён мана шу қилич билан уни урамен!

Бобур Ҳиндолни яна елкасидан қучиб эркалатди:

— Баракалло! Ундай бўлса сизни Ҳиндистонга албатта олиб борурмиз...

Шу пайт айвон зинапоясидан олтин кўзачада чоғир олиб чиқаётган шарбатчи кўринди. Моҳим унга кўли билан «Қайтинг!» ишорасини қилди. Шарбатчи Бобурга кўрқа-писа кўз ташлади-да, унинг ўгли билан овуниб, чоғирни эсидан чиқарганини сизди ва зинадан секин қайтиб тушиб кетди.

Бобур Ҳиндолдан хат-саводни қанчалик ўрғанганини, қанақа шеърлар ёд билишини сўради.

— Мен қуръон оятларидан ёд билурмен. Қулху оллоху аҳад...

— Ҳиндолнинг шеърга унчалик ишқи йўқ,— деб изох берди Моҳим бегим.— Бунга ўйин бўлса, ёйдан ўқ отса, от чопса бас. Китобга хуши йўқ.

— Балки ёши кичик бўлгани учундур?

— Гулбадан бундан уч ёш кичик. Аммо саводи Ҳиндолдан яхши. Ҳозир кўрурсиз... Қизча китобга шунчалик ўчки, таажжубдан ёкамни ушлаймен.

Бобур ўйчан товуш билан:

— Наҳот Ҳиндол ўша тоғаларига тортса?— деди.

Бобурнинг бу сўзларида қанчалик мураккаб маъно борлигини фақат Моҳим бегим тушунарди. Чунки Ҳиндол Моҳим бегимдан эмас, Бобурнинг кичик хотини Дилдор оғачадан туғилган эди. Шариат берадиган рухсат бўйича Бобур ҳам уч хотинлик бўлиб олган, авлоддан-авлодга ўтиб келаётган бу бераҳм одат Моҳим бегимни қанчалик эзмасин, аламини ичига ютиб чидаб келар эди. Бобурнинг иккинчи хотини Гулруҳ бегимдан мирзо Комрон ва мирзо Аскарӣ отлиқ икки ўғил туғилди. Булар Ҳумоюндан кейинги тахт ворислари эдилар. Гулруҳ бегим шу сабабли Моҳим бегимга кундошларча совуқ муомала қилар эди. Уч хотин Кобулниң уч чеккасида ҳар бири алоҳида кўшкда турса ҳам бир-бирларининг аҳволларидан хабардор эдилар. Дилдор оғача беш йилда икки қиз туғди. Моҳим бегим эса уч марта фарзанд доғини бошдан кечирди. Унинг Ҳумоюндан кейин туққан икки ўғил, бир қизи бирин-кетин ўлиб кетди. Кейин умуман бўйнда бўл-

май қолди. Бунинг ҳаммасидан Моҳим бегим жуда каттиқ куйиб юрганини сезган Бобур унга қандай тасалли беришни билмас эди. Бир куни мана шу айвонда ўтирганларида Моҳим бегимнинг ўзи: «Дилдор оғача яна ҳомиладор эмишлар,— деб қолди.— Мен куйиб адо бўлдим. Энди... Дилдор оғача шу гал ўгил туғса ҳам, қиз туғса ҳам, агар менга берсангиз ўз фарзандимдек тарбиялаб ўстирар эдим».

Дилдор оғача ўз фарзандини кундошига ишониб топширишини тасаввур қилиб бўлмас эди. Лекин Моҳим бегим Ҳумоюнни қанчалик яхши тарбиялаганини ҳамма билар, унинг яна фарзанд ўстириш иштиёқи зўрлигини Бобур ҳам сезар эди.

Дилдор оғача Кобулнинг Боғи Йўлғичқасида мана шу Ҳиндолни туққанида Бобурнинг махсус фармони билан уч кунлик чақалоқни арқда турадиган Моҳим бегимнинг тарбиясига келтириб бердилар.

Бу болани туққиз ой қалби тагида кўтариб юрган Дилдор оғача: «Ўғлимдан тириклай жудо бўлдим»,— деб анча вақт йиғлаб-сиқтаб юрди. Бобур унга:

«Азалдан удум шундоқ,— деб важ кўрсатди.— Подшоҳ оиласида ўғилларни катта хотин тарбият этмоғи керак. Моҳим Ҳумоюнни қандоқ вояга етказди, кўрдингми? Ҳозир Бадахшонда энг обрўлик ҳоким! Худо хоҳласа, Моҳим Ҳиндолни ҳам шундоқ вояга еткизгусидир!»

Моҳим бегим Ҳиндолни ўз фарзандидан ҳам зиёда тарбия қилаётгани Бобурга маълум эди-ю, лекин боланинг тоға авлодлари жоҳил ва маърифатсиз одамлар эди. Дилдор оғача Ҳисор ва Самарқандда кўп ёмон ишлар қилган Султон Маҳмуд мирзонинг авлодларидан эди. Шайбонийхон томонидан ўлдирилган Султон Али мирзога ҳам хешлиги бор эди. Бобур Самарқандга сўнгги гал галаба билан борганда ва қизилбошлар билан май ичиб юрган кунларида Дилдор оғачанинг хусини, хусусан, дутор чалиб ашула айтгандаги ширин овозини ёқтириб қолиб, кайф устида уни ҳарамига олган эди. Бунинг ҳаммасидан хабардор бўлган Моҳим бегим Бобурнинг «Ҳиндол маърифатсиз тоғаларига тортмасин, тагин!»— деган ҳадигини тарқатишга интилди:

— Ҳазратим, Ҳумоюннинг кўп фазилатлари Ҳиндолда ҳам бор. Қалби тўла меҳр. Ишонаменки, Ҳиндол ҳам сизга тортгай. Эгачингиз Хонзода бегимдан эшитганмен. Сиз ҳам мана шу ёшда «уруш-уруш» ўйнашни беҳад яхши кўрар экансиз.

Бобур яна Ҳиндолга юзланди:

— Мен сенга китоблар совға қилсам ўқурмисен?

— Ўқу... ўқурмен!— деб Ҳиндол тутилиброқ жавоб берди. Бобур муншини чақириб, Кобул кутубхонасидан Ҳиндолга

керакли китобларни Моҳим бегимга келтириб беришни буюрди. Шундан кейин савдарбоши ички хонадан болаинг бўйбастига мослаб ишланган олтин дастали Камони Шоший олиб чиқди. Чиройли соқдоқда ўн иккита олтин безакли ёй ўки ҳам бор эди. Бундай чиройли ўк-ёйни биринчи марта кўраётган бола нодир совгани қўлига олганда кўзлари қувончдан ялтираб кетди.

— Ана, тирандозликни машқ қил, аммо китоб ўқишни ҳам унутма! — деб тайинлади Бобур.

Ҳиндол таъзим билан отасига қуллуқ қилиб, зинапоядан пастга тушиб кетди. Орадан сал ўтмай айвоннинг ички эшигидан эллик ёшлардаги энага аёл кичкина Гулбаданни қўлидан етаклаб чиқди. Бу истараси иссиқ аёл — Тоҳирнинг хотини Робия эди. Авваллари Қутлуғ Нигор хоним хизматида бўлган Робия ҳозир Моҳим бегим ҳузурда беш яшар Гулбаданга энагалик қилмоқда эди.

Бобур ўз оиласига йигирма тўрт йиллик қадрдон бўлган Робиянинг таъзим билан берган саломига алик олиб, у билан илик сўрашди. Сўнг қизчаси Гулбаданга юзланди.

Қўғирчоқдай ясантирилган жажжи қизчанинг қош-қўзи беихтиёр Дилдор оғачани эслатди. Гулбаданни ҳам ўша гўзал жувон тукқан эди. Моҳим бегим Ҳиндолни оналарча суйиб парвариш қилаётганини йиллар давомида кузатиб юрган Дилдор оғача бу аёлнинг тантилигига қойил бўлган ва Гулбаданни унга ўзи фарзандликка берган эди. Бу икки аёл энди калондимоғ Гулруҳ бегимга қарши гўё болалар орқали иттифок тузган эдилар. Гулруҳ бегим эса бир эмас, икки ўғли бўй етиб келаётганидан беҳад мағрурланар, Комрон мирзо ва мирзо Аскарыйларни тахт вориси Ҳумоюнга қарши рақобат туйғуси билан тарбиялар эди. Шу сабабли Бобур ҳам Гулруҳ бегимдан кўп ранжир, лекин орадаги кундошлик балосини бутунлай даф қилиш қўлидан келмас эди.

Мурғак қизчасини кўрган заҳоти эсига тушган бу мураккабликлар Гулбаданнинг эгилиб таъзим қилиши ва ширин «ассаломи» билан хаёлидан узоқлаша бошлади. Бобур қизчасини қўлида кўтариб олиб, пешонасидан ўпди, сўнг дастурхон олдига келиб, уни тиззасига олиб ўтирди. Дастурхон тўла ноз-неъматларни, Одинапурдаги Боғи Вафода ўсган чиройли норинж¹ларни кўрсатиб:

— Не ейсан? — деб сўради.

Гулбадан одоб билан бош чайқади — у подшоҳ отасининг олдига овқат чайнаб ўтиришдан ийманар эди. Лекин дадаси-

¹ О д и н а п у р — Афғонистоннинг жанубидаги шаҳар, ҳозирги Жалол-обод. Н о р и н ж — апельсин.

нинг зар қўшиб тўқилган қимматбаҳо абосидаги олтин тугмалар уни жуда қизиқтириб қўйди. Бу тугмалардан бирининг юз томонига кичкина қилиб йўлбарс шакли ўйилган. Йўлбарснинг қўзлари ўрнига зиғирдан ҳам кичик ёқут доналари ўрнатилган. Иккинчи олтин тугманинг юзида афсонавий бир қуш қанотларини ёзиб, тумшугида кичкина гавҳарни олиб учиб боряпти. Умрида бундай ғалати тугмаларни кўрмаган қизча уларнинг биттасини қўлчаси билан секин ушлаб кўрди.

— Сенга тугмалар маъқулми? — деб сўради дадаси. Гулбадан «ҳа», деб жилмайди. Бобур қизчаси ушлаб кўрган юқориги тугмани юлиб олмоқчи бўлиб бир тортиди. Лекин тугма жуда маҳкам тикилган экан, узилмади.

— Ҳазратим, не қилмоқчисиз? — хайратланиб сўради Моҳим бегим. — Қўйинг, тугмани узманг, ахир бу сизнинг шоҳона либосингиз!

— Ҳечқиси йўқ. Заргарга буюрсалар, яна битта шундоқ тугма ясаб бергай.

Бобур камарига осилган қиндан кичкина қаламтарош олди-ю, ўша тугмани ипидан қирқиб олиб, қизчасига берди:

— Лекин йўқотма. Бу қуш — Ҳумо. Илоҳим сенга бахт келтирсин.

Гулбадан қувониб ва ҳаяжонланиб:

— Раҳмат, ҳазрати... оли... — деди-ю, лекин жумланинг охирини унча келиштиролмади.

— Мени ота дея қол қизим.

Гулбадан онаси Моҳим бегимга савол назари билан қаради. Моҳим «ҳа, айт!» дегандек бош ирғади. Шунда Гулбадан қўлчалари билан отасининг бўйнидан кучди-да:

— Отажон! — деб унинг ёноғидан ўнди.

Бобур кўндан бери ҳис қилмаган болаларча бир поклик ва маъсумлик борлиғига гўё нур бўлиб таралди.

— Гули, — деди Моҳим бегим, — энди ҳазрат отангга битта ҳикоя айтиб бергил.

Гулбадан секин отасининг тиззасидан пастга тушди-да, худди муаллимга жавоб бераётган талабадек тик туриб, тошбақа ва чаён ҳақидаги машҳур ҳикоятни айтиб берди. Хусусан, тошбақа чаёнга яхшилик қилиб, уни дарёдан ўтказиб қўймоқчи бўлганда, чаён унга захар солишга тиришиганини, сўнг бу ёмонлиги учун дарёга чўкиб ўлганини шундай келиштириб айтдики, Бобур завқ қилиб кулди-да:

— Сиз сўзлаб берганмидингиз? — деб Моҳимдан сўради.

— Йўқ, ўзи «Тўтинома»ни бемалол фаҳмлаб ўқиди. Беш ёшга етмай савод чиқарган қизчани мен биринчи кўришим.

— Гулбаданга кўз тегмасин, аехну муҳофазаси беназир.

— Саъдийнинг «Гулистон»дан хийла хикоятларни ёд билур. Ашъорга унча ўч эмас. Аммо насрий хикоя хотирасига сўзма-сўз нақшланиб қолур. Боғда, кўчада кўрганларини ҳам келиштириб хикоя қилур. Мен ўзимча орзу қилурменки, Гулбадан шонра бўлмаса ҳам ҳазрат оталарининг насрнавислигини мерос олса не ажаб?

— О, наср ёзмоқ учун қанчалик кўп савдоларни бошдан кечирмоқ керак, Моҳим!

Гулбадан ота-онасининг гапларига яхши тушунаётгандай сергакланиб қулоқ солмоқда эди. Унинг катта-катта шахло кўзларида қандайдир умид, айни вақтда, хавотирлик борга ўхшарди. Гўё унинг отасидан кутган умидлари пучга чиқса кўнгли қаттиқ озорланишини сезиб хавотирланаётгандек кўринарди.

— Зукко қизим, ҳазрат онанг сендаги ажиб бир қобилиятни яхши пайқабдир. Агар Гулнинг насрга ишқи зўр бўлса,— деб Бобур Моҳим бегимга қараб давом этди,— «Вақоит»нинг осонроқ бобларидан берай, хаттот қизчамизга бир нуسخа кўчириб берсин.

— Мен ҳам сиздан шуни илтимос қилмоқчи эдим. Гул туркий тилини ҳазрат оталарининг китобларидан ўргангани яхши. Мен, ожизангиз, орзумандменки, фақат Ҳумоюндек ўғилларингиз эмас, Гулбадандек қизларингиз ҳам тарихда сизга муносиб ном қолдирсалар¹.

Бу сўзларнинг самимийлигини бутун вужуди билан сезган Бобур ноҳосдан тўлқинланиб кетди. Моҳим бегим кундоши Дилдор оғачанинг бир эмас, икки фарзандини шунчалик меҳр билан тарбиялаши учун ва уларнинг келажагига шу даражада жон куйдириши учун қанча катта бардош, тангилик, бағри кенглик керак бўлганикин? Бобур ёши қирқдан ошган сари келажак авлод ҳақида кўп ўйлар, фарзандлар айниқса шу ёшда одамнинг ҳаётида ҳал қилувчи кучлардан бирига айланишини сезарди. Шу сабабдан ҳам Моҳим бегимнинг биргина Ҳумоюни эмас, мана, Ҳиндол билан Гулбаданни ҳам оталарига садоқатли ва меҳр-оқибатли фарзандлар қилиб тарбиялаётгани хотин кишининг ўз эрига қилиши мумкин бўлган энг улуғ яхшилиги эканини ҳозир бутун борлиғи билан ҳис қилди. Бобур подшоҳлик удумига ён бериб,

¹ Олдинроққа кетиб айтиш мумкинки, Моҳим бегим Гулбаданни чиндан ҳам Бобур насри руҳида тарбиялади. Гулбадан бегим вояга етганда «Бобурнома»нинг энг яхши фазилатларидан ибрат олиб, ўзининг машҳур «Ҳумоюннома» асарини ёзди. Уша замонларда аёлларни камситувчи диний ақидаларга қарши бориб ёзилган «Ҳумоюннома» тарихимизнинг нодир маданий обидаларидан бирига айланди.

Моҳим бегимнинг устига яна икки хотин олган бўлса ҳам Моҳим бунд бағри кенглик билан кечиргани, яна ўзини унга шунчалик фидо қилаётгани — тенгсиз бир муҳаббат ва садоқатнинг нишонлари эмасми?

Бобур тез ўрнидан туриб, кўрпачада ўлтирган Моҳим бегимнинг устига энгашиди-ю, сочидан, пешонасидан, юзидан ўна бошлади.

— Моҳим, сиз менинг беназир малагимсиз! — деб эҳтирос билан шивирлади:— Мен шоҳ бўлсам ҳам улуғ қалбингиз ўтрусида қулмен!

Моҳим ҳам тез ўрнидан кўтарилди. Гулбадан ота-оналарига нйманиб қараб турганини кўрди-ю, атрофга олазарак бўлиб кўз ташлади.

Робия уларни холи қолдириб ичкарига кириб кетган. Савдарбошилар ҳам йўқ. Бобур Моҳим бегимнинг кўзларидан ҳам ўпиб:

— Буюринг,— деди,— неки истасангиз мен бажо келтирай!

Моҳим бегим уялиб шивирлади:

— Гулбаданга жавоб берайлик...

Бобур яна савдарбошини чақирди ва Гулбаданга Ҳиндистондан келтирилган тўтиқушларни ҳада қилишни буюрди.

Чиройли олтин қафасларга солинган тўтиқушларнинг камалакдай товланган патлари Гулбаданнинг эътиборини дарҳол ўзига тортди. Тўтиқушлар сўзлашни билар эди, катта-роғи шағи товуш билан:

— Ассалом, бегим! — деди.

Гулбадан бундан завқ қилиб болаларча соддалик билан:

— Ассалом, тўти! — деди.

Шунда ҳаммалари беихтиёр кулиб юбордилар. Гулбадан дадасининг олдига чолиб келди, бу ажойиб совгаси учун унинг қўлини ўпди. Бу орада ичкаридан чиққан Робия қизчани секин қўлидан олди-да, тўтиқуш солинган қафас билан бирга зинапоядан настга олиб тушиб кетди.

Бобур ва Моҳим бегим икковлари ичкари хонага йўналдилар. Катта танобий уйнинг тўридаги шахнишига эроний гиламлар ва зарбоф кўрпачалар тўшалган эди. Бобур Моҳим бегимнинг ҳинча белидан кучиб, ўша томонга бошлаб борар экан:

— Ҳали ҳам келинчаклик пайтларингиздагидек сарвқоматсиз, Моҳим,— деди.

— Чунки сиз мен учун ҳамон йигирма ёшлик йигитсиз!

Моҳим бегим шундай деб, ички уйнинг очиқ эшигидан кўриниб турган шоҳона тўшакларига оловли бир нигоҳ ташлаб олди. Бугунги эҳтиросли тун, икковлари худди аланга тилла-

ридек гоҳ бутун борлиқлари бирлашиб, гоҳ яна ажрашиб, сўнг қайтадан олов мавжида бирлашиб, икки тан бир вужудга айланган пайтлари хаёлига титроқ солиб ўтди. Ўша дақиқаларда Моҳим эрининг қулоғига: «Сиз менинг кўз очиб кўрган ягона ёримсиз, сочингиздан-тирноғингизгача бутун борлигингиз менга жонимдан ҳам азиз, энди сизни бошқа ҳеч кимга бермасмен!» — деб шивирлаган эди. Бобурнинг ҳозир уни ўпиб: «Мен шоҳ бўлсам ҳам сизнинг улуғ қалбиңгиз ўтрусида кулмен!» — дегани Моҳимнинг ўша тунги сўзларига жавобдек эшитилди. Бу сўзлар ва ўпичлар Моҳим бегимнинг борлигини шундай яйратиб юбордики, ёши ўттиз еттига борган бўлса ҳам ҳозир йигирма ёшли жуводек ҳусни жамоли очилиб, кўзларидан ўт чақнаб, шўх оҳангда сўради:

— Мен ҳозир неки тиласам бажо келтирурмисиз?

Бобур Моҳимнинг янги бир кўшк қуриб беришини ёки катта ҳаражатлар учун хазинадан қўшимча олтин сўрашини кутган эди. Унинг бунақа истаklarини сўзсиз бажаргиси келиб турган Бобур:

— Сиздан молу жонни аямасмен, буюринг! — деди.

Моҳим бир лаҳза тарадудланиб турди-ю, паст ва жиддий товуш билан деди:

— Сиздан молу жон эмас, фарзандимиз Ҳумоюнни... Кобулга қайтаришингизни илтимос қилмоқчимен.

Бобур ҳам энди жиддийлашиб:

— Нечук? — деди. — Бутунлай Кобулга қайтсинми?

— Ҳа, сиздан ўтинамен!

— Моҳим. Ҳумоюн ёнимизда бўлишига мен ҳам ташнамен. Бироқ шимолий чегараларимизни Ҳумоюндек ишончли одам кўриқлаб турмаса, шайбонийзодаларни ўзингиз билурсиз...

— Билганим учун туну кун хавотирдамен. Икки йилдан бери Ҳумоюн Бадахшонда. Мен уни шунчалик соғинаменки, турган хоналарига кирсам, ўқиган китобларини варақласам, кўзимга ёш келур.

— Моҳим, сиз билурсизки, тождорлару валиаҳдларга она бўлишининг машаққати беҳисоб... Шукр қилинг, менинг раҳматлик онам тортган азобларни худо сизнинг бошингизга солган эмас. Ҳумоюн мирзонинг ишлари жуда тараққийда. Бадахшонлик содиқ йиғитлардан тўрт-беш минги уни асраб-авайлаб юрурлар. Шайбонийзодалар ҳам биз билан муроса қилишга мажбур, чунки ҳозир улар ички низоларни тинчи-толмай, ўзлари билан ўзлари овора.

— Ундоқ бўлса, Бадахшонга энди Комрон мирзони юбора қолинг. Ахир у киши ҳам ўн олтига кирдилар. Гулруҳ бегим доим ўғилларининг эр етганидан фахрланиб гапирурлар.

Бобур хотинларининг орасидаги рақобатни жуда ёмон кўрарди. Чунки кундошлик рақобати болаларга таъсир қилса, улар бора-бора бир-бирларига душман бўлиб қолишлари мумкинлигини биларди.

— Сиз Гулрух бегимнинг ганига эътибор берманг деган эдим-ку, Моҳим!

— Эътибор бермай иложим йўқ, ҳазратим! Чунки Гулрух бегимнинг икки ўгли ҳам ёнларида. Мен бўлсам узоқдаги Ҳумоюнни соғиниб қон ютурмен!

— Оббо!.. Майли, мен сизнинг тилагингизни бажо келтирамен деб сўз бердим. Сўзимда турмоғим керак. Ҳумоюнни жуда соғинган бўлсангиз, иккй-уч ҳафтадан сўнг уни албатта кўрурсиз.

— Қаерда кўрурмен? — овози титраб сўради Моҳим.— Кобулдами?

Бобур овозини пасайтириб:

— Одинапурда,— деди.

Одинапур Ҳиндистон чегарасига яқин жойда эди, Моҳим бегим Бобурнинг ўша жойда қўшин тўплаётганини эшитган эди. Афтидан, Ҳумоюннинг Кобулга келиб юрмасдан, бор қўшини билан Бадахшондан тўғри Одинапурга ўтиб бориши ҳарбий мақсадларга мувофиқроқ келар эди.

Моҳим бегим энди хавотирли овоз билан сўради:

— Ҳазратим Ҳумоюнни ҳам Ҳинд юришига олиб бормоқчиларми?

Сир сақланаётган мавзуда гап очилгани учун Бобур атрофга кўз ташлаб, бир лаҳза жим кулоқ солди. Айвонда ҳам, ички уйларда ҳам икковларидан бошқа одам йўқ эди.

— Сиз билурсиз, мен Мовароуннаҳрдан умидимни узганимдан берли ёруғ бир истиқболни Ҳиндистон томондан изламоқдамен. Ўн йилдан бери бир неча қайта ишончли одамларимни Ҳиндга элчиликка юбордим.

— Ўзингиз ҳам Ҳиндга тўрт қайта бориб келдингиз-ку.

— Лекин тўрт мартасида ҳам Дехлига етолмадим. Лахўр атрофларидан қайтдим.

— Ҳиндда ватанларини жон-жаҳд билан ҳимоя қиладиган ботир йигитлар кўп экан-да.

— Ҳа, хусусан, рожпут йигитлари жасур қиличбоз келурлар.

— Улар жангда нечоғлик беомон эканини биз ҳам эшитдик. Шунинг учун ҳар гал ҳинд юришига кетганингизда хавотирлик оловида қоврилиб, тунларни уйқусиз ўтказурмен. Ҳар икки томондан қанча бегуноҳ одамлар жанг қилиб ҳалок бўлгани хаёлимдан нари кетмайдир. Ҳатто Бажур

кўрғонида ўлдирилган уч минг ёғийнинг бошидан қалла-мишо-
ра ясадибсизлар!

— Сиеват учун... зарур бўлди.

— Аммо бундай сиеват сиздек сиймо учун маъзур эмас, ҳазратим! Шаккокклигим учун мени кечиринг! Ҳинд юриши энди бас!

— Йўқ, бас қилолмасмен. Ҳиндистон рожалари менга элчи юбормишлар. Улар Иброҳим Лодининг¹ зулмидан безор эмишлар. Мамлакатлари вайрон, улуслари пароканда, ўзаро урушлардан ҳамма безган. «Ҳиндда қудратли давлат тузиб, қадимий маданиятни тикламоқ учун бизга сиздек маърифатли тождор керак» деб, панжоблик Давлатхон ўз ўғли Диловархонни бизга вакил қилиб юборибдир.

Моҳим бегим Бобурнинг Давлатхон билан иттифоқ тузганини билар эди. Бобурни Иброҳим Лоди зулмига қарши чорлаётганлар орасида ҳиндистонлик машҳур рожа Раю Санграм Синх ҳам бор эди. Бундан уч кун олдин Бобур шу рожанинг элчисини қабул қилган, лекин унга нима жавоб берганини ҳали кўпчилик билмас эди. Моҳим эрига майин тикилиб:

— Бир саволга ижозат беринг,— деди.

— Марҳамат.

— Раю Синх билан ҳам иттифоқ туздингизми?

Бобур тасдиқ маъносида бош ирғади.

— Мен Ҳиндга борсам, уни талаб келиш учун эмас, балки умр бўйи интилиб етишолмаётган орзуларимни ўша ерда рўёбга чиқариш учун бормоқчимен! Ҳозир шу мақсадга етишиш учун қулай фурсат келди.

— Бироқ бу мақсадингиз йўлида даҳшатли бир чоҳ — қонли уруш бор!

— Биз бу чоҳдан от сакратиб ўтмоғимиз мумкин.

— Ҳазратим, сиз от сакратиб ўтганингизда ҳам, бу чоҳга минг-миг беваю сағираларнинг кўз ёшлари тўкилмай! Бегона юртнинг оналарию бевалари сиз билан урушда ўлган фарзандларию эрларининг ўлимини кечирармикинлар?

— Ўшал оналару беваларнинг фарзандларию эрлари пароканда юртнинг ички урушларида озмунча ҳалок бўлмоқдами? Иброҳим Лоди гоҳ Панжоб билан, гоҳ Гвалиор билан, гоҳ Бангола билан жанг қилур. Наригилар ҳам бир-бирлари билан тахт талашиб урушурлар. Ҳар йили қирқ-эллик минг навкар бу ўзаро урушларда беҳуда ҳалок бўлмоқда. Мамлакат бизнинг Мовароуннаҳрдек хароб. Бу тўполонлардан безган ҳинд беклари қочиб келиб мenden папоҳ тондилар.

¹ Иброҳим Лоди — афғон қабилаларидан чиққан подшо.

Шулардан бири Ҳиндубек беш йилдан бери менинг нуфузли амирларим каторида юрганини билурсиз. Улар ҳам мени Ҳинд сари чорлайдирлар, мамлакатни обод қилишни, илму маърифатни юксалтиришни ўйлайдилар.

— Агар бундай маърифатли подшоҳ ўз юртларидан чиқса эди, улуғ давлат тузиш йўлида ноилож тўкиладиган қонлар осонроқ унутилмоғи мумкин эди. Аммо бошқа юртдан борган фотиҳларнинг тўккан қонлари, фотиҳлик қиличидан отган дил яралари асрлар давомида унут бўлмагай, тузалмагай! Мен ана шундан хавотирдамен, ҳазратим!

Моҳимнинг сўнги сўзлари Бобурнинг дилидаги энг оғрийдиган ярани тирнагандай бўлди. У озорланиб ўрнидан турди:

— Тақдир қиличи бизнинг дилимизни озмунча яраладимиз? Қани бу яраларнинг унут бўлгани? Қани тузалгани?!

Бобур кафтини кафтига қаҳр билан уриб, савдарбошини чақирди:

— Мен боя айвонда чоғир келтиришни буюрган эдим! Нечун келтирмади?!

Унинг авзойи кескин ўзгарганини, ҳозир савдарбоши кирса бирон жазо олиши мумкинлигини Моҳим бегим сездию тез ўрнидан турди.

— Ҳазратим, чоғир ичгингиз келса, марҳамат, мен сақлаб қўймишмен,— деб инак парда билан тўсилган тоқчадан олтин кўзача тўла май ва икита нафис чинни пиёла олди. Бошқа тоқчада гулдор дастурхон билан бир лаган норинж турган эди. Дастурхонни аниқ-тапиқ шаҳнишинга ёзиб, норинжни унга қўйди-да, Бобурни таклиф қилди. Кўзачадан чинни пиёлага хушбўй майни қуяр экан:

— Ижозат берсангиз, мен ҳозир соқийлик қилсам! — деди.

Бобур ўтирар экан, ижозат маъносида бош ирғади.

Моҳим пиёлага ярмидан ошириброқ май қўйди-ю, чап қўли кўксига, ўнг қўли билан Бобурга узатди:

— Олинг, ҳазратим, сизга узоқ умр, бахту саодат ёр бўлгай!

Пиёладаги тиниқ хушбўй ичимлик Моҳимнинг қўли билан бирга хиёл титраб турибди. Бобур пиёлани олар экан, хотини илиқ бир гап кутаётганини сизди. Лекин ҳозир унинг қалбида қандайдир совуқ изғирин хуруж қилмоқда эди. Ҳарбий ва сиёсий ишларнинг қорбўрони хаёлларини чирмаб, гоҳ ҳазора қабилалари билан бўлган қонли тўқнашувларга олиб кетар, гоҳ Панжобга боғлиқ чигал муаммолар, гоҳ карвон йўлларида талончилик қилган қароқчиларни жазолаш

ташвишлари эсига тушар, гоҳ оғир замбаракларни синовдан ўтказиш пайтида уларнинг йўғой мис қувури ёрилиб кетгани ва тўпчилардан беш киши ўша жойда ҳалок бўлгани кўз олдига келар эди. У совуқ изғирин чангалидан чиқиб кетишга ва аввалги илиқ руҳий ҳолатига қайтишга интилиб, дардли товуш билан деди:

— Моҳим, узоқ умру бахтли ҳаёт мен учун ушалмайдиган орзу бўлса керак.

— Нечун? Агар тангрим насиб қилса, ушалиши ҳеч гап эмас. Илоҳим насиб қилсин!

— Айтганингиз келсин...

Бобур майини сипқорди-ю, пиёлани Моҳим бегимга қайтариб берди. Норинждан биттасининг пўчогини қўли билан арчиб, ярим палласини еди. Сўнг Моҳим бегимга «Яна кўйинг!» ишорасини қилди.

Иккинчи пиёладан кейин вужудига майин бир илиқлик таралди, бояги совуқ изғирин хаёлидан узоқлашгандай бўлди-ю, Моҳимга кўнглини очиб гапиргиси келди:

— Бу амирлар, элчилар, иттифоқдошлару ёғийлар, яна юз хил давлат ишлари қалбимни юз бўлак қилиб, юз томонга тортадир, Моҳим! Гоҳо менинг кўнглим ҳам парчаланиб кетган, ўзаро урушларда азоб тортаётган мамлакат каби алғов-далғов бўладир! Ҳаётимда гўё шундай бир қутб борки, унга барча амирлару элчилар, чопкинлару урушлар тўпланмишдир. Бу қутбда мен совуққонликка ўрганмишмен, чунки сиёсат бобида одамларга худди шатранж тахтаси устидаги пиёдаю сипоҳийларга қилган шафқатсиз муомалани қилмасанг, уларни ақлу фаросат, ҳисобу китоб билан идора этмасанг, муродга етолмассен. Аммо бу шафқатсиз сиёсатнинг совуқ изғиринидан ўзим ҳам тўнғиб кетурмен. Сўнг май ичиб, исингим келур. Бу совуқ қутбда шеър ёзишга ҳам ҳафсалам қолмас!

— Ўшал нохуш қутб ўтрусида бошқа илиқ маконингиз йўқми. ҳазратим?

— Бугун... мана ҳозир яна бир марта пайқадимким... мен учун оламда энг илиқ қутб — Сиз, Хумоюн, Гулбадан... Сизлар билан бўлганда туйғуларим жўшиб, ижод қилгим келур.

— Ундоқ бўлса, доим биз билан бирга бўлинг! Бундан биз ҳам беҳад бахтиёр бўлурмиз!

— Қани эди!.. Аммо бунинг учун мен давлат ишларидан бутунилай воз кечмоғим керак.

— Бутунилай воз кечишингизга ҳожат йўқ, ҳазратим. Ахир сиз Кобулда катта давлат барпо этдингиз. Қундуздан Қандаҳоргача, Бадахшондан Синд дарёсигача бўлган пароканда ўлкаларни бир марказ атрофига бирлаштир-

дингиз. Кобул ўз тарихида биринчи марта шундай улкан мамлакатнинг пойтахтига айланди. Бу ерда сиз янги кўшклар қурдирдингиз, янги боғлар барпо этдингиз, янги ариқлар қаздириб, кўп жойларни обод қилдингиз. Шу ҳаммаси сиз учун азиз эмасми?

— Ношукрлик бўлмасин, мен Кобулда кўп масъуд кунларни кўрдим. Бироқ катта орзуларимни рўёбга чиқаришга ҳамон ожизмен. Шу менга тинчлик бермайдир. Кобул атрофидаги кўп жойлар ҳали қаламий эмас, сайфий...¹ Ана, Ғазнида неча асрдан бери бузилиб ётган улуғ банд² бор. Маҳмуд Ғазнавий банди дерлар. Агар шу банд тикланса, чўл бўлиб қолган катта бир водий яна яшнаб кетгай. Мен шу бандни тузаттирмоқчи бўлдим. Лекин сарфини ҳисоблаб кўрсам, хазинам етмас экан... Бу аҳволда мен Камолиддин Бехзоддек улуғ истеъодларни қайси давлатимга таклиф этамен? Бехзодни Шоҳ Исмоил Табризга олиб кетмишдир. Чунки ҳозир шоҳ мендан қудратлироқ. Қанчадан-қанча илму ҳунар аҳли, меъморлару муҳандислар бор, агар чорласам, кўплари келурлар. Лекин... Кобулга ўзи келган меъмор мавлоно Фазлиддинга муносиб иш тониб берганим йўғу бошқаларни қандоқ чорлай?

Мохим бегим Бобурнинг Ҳиндистонга интилишига нақадар кўп ва мураккаб сабаблар борлигини сезиб:

— Хоразмлик ватандошингиз Беруний ҳам Ҳиндистонга борган,— деди.— Ҳазратим, сиз унинг «Ҳиндистон» отлиқ китобини қандай ўқиганингиз эсингиздами?

Бобур Ғазнидан топиб келинган бу китобнинг эски араб тилидаги нусхасини қийналиб ўқиган бўлса ҳам мазмунини жуда ёқтирган эди.

— Ҳа, Ҳинд ҳаётини Берунийчалик тераи таҳлил этган олим кам бўлса керак. Беруний ҳам менинг Ҳиндни кўриш иштиёқимни оширди.

— Биламен. Ҳиндда сизни оҳанрабодай ўзига тортган яна бир сиймо Ҳисрав Дехлавийдир.

— Сўзингиз чин, Моҳим. Мен Дехлавийнинг кўп ашъорларини «Мухтасар» китобимда келтирмишмен. Дехлавийнинг отаси амир Маҳмуд Қарши билан Шаҳрисабз оралиғида яшаган Лочин исмли туркий қабиладан экан. Мен буни яқинда билдим. Лочин қабиласи Чингизхон истилосидан қочиб, Ҳиндга бориб қолган экан. Ҳисрав Дехлавий Давлатноз исмли ҳинд муслимасидан туғилмишдир.

¹ Қ а л а м и й — амри фармон билан солиқ тўлайдиган қаламрав ерлар.

С а й ф и й — ҳали бўйсунмаган, қилич кучи билан солиқ тўлайдиган ерлар.

² Б а н д — сув омборининг тўғони.

— Ҳазратим, — деди Моҳим Бобурга мулойим тикилиб, — сиз ҳам шоирсиз, ҳам олимсиз. Мен орзу қилардимки, барча эл-улуслар сизни ҳам Берунийдек, Деҳлавийдек фақат яхши сўзлар билан тилга олсалар.

Бобур Моҳим бегимнинг ботиниб айтолмаган сўзларини тушунди-ю, юзи тундлашди. Хаёлида яна ўша совуқ изғирин кўзгалди.

— Сиз менинг подшоҳ ҳам эканимни нечун эслатмоқчи эмассиз?

— Чунки, мен сизни ижодингиз олови ёнган шлик қутбда муқим туришга чорламоқчимен!

— Мен ижод қутбида умрбод қолмоқчи бўлиб, Даҳкатда, Осмон Яйловда яланг оёқ юрганимда нечун учрамадингиз? Энди кеч!.. Подшоҳни барча эл-улуслар фақат яхши сўзлар билан тилга олиши — ушалмайдиган бир орзу. Мен одамларнинг мақтовига ҳам, таънаю маломатига ҳам роса тўйганмен!

Бобур яқинда ёзган бир ғазалидан икки сатрини жўн сўзга ўхшатиб оҳангсиз, айтди:

— Улуснинг таъну таърифи¹ менга, Бобур, баробардур, бу оламда ўзимни чун ёмон-яхшидин ўтқардим.

— Рост, бизнинг ҳеч биримиз дунёнинг аччиқ-чучугини сизчалик кўп татиб кўрган эмасмиз... Оламнинг бераҳм дағал жабру жафоларини бунчалик кўп кўра туриб шу қадар нафис шеърлар битишингиз, шунчалик назокатли оҳангда куйлашингиз мени доим бир мўъжизадек ҳайратга солур. Ҳазратим, сиз улуғ шоирлар даврасидан жой олмоғингиз керак. Мен гоҳо қўрқаменки, жаҳонгирлик, фотиҳлик сизнинг шоирлигингизга соя ташлаб қўймасмикин?

— Ҳинд юришидан воз кечинг демоқчимисиз?!

Моҳим бегим Бобурни бу ниятидан қайтаролмаслигини энди аниқ сизди.

— Ҳазратим, ҳеч бўлмаса Хумоюнни Кобулда қолдириш! Ахир сиз Ҳиндга кетсангиз, кимдир Кобулни бошқариши зарур-ку!

— Мен йўғимда Кобулни сиз идора этгайсиз, бегим!

— Наҳот! Ахир мен аёл кишимен! Шариатга биноан хотиннинг мавқеидан ўғилларнинг мавқеи баландроқ бўлур, Кобулда ўғилларингиз мирзо Комрон билан мирзо Аскарӣй борлар.

Бобур бу муаммони бирпасда совуққонлик билан ҳал қилди:

— Мирзо Комронга Қандаҳорни бергаймен. Аскарӣй иккаласи шу ҳафта Қандаҳорга кетурлар.

¹ Таъну таъриф — таънасию мактови.

Қандаҳор бу ердан отда бир ҳафталик йўл. Ўғиллари кетса, Гулруҳ бегимнинг ҳовури пасайиб қолиши аниқ.

— Кобул менинг хос шаҳрим,— деб давом этди Бобур.— Уни ҳаргиз ўғилларга бермасмен, фақат сизга топшириб кетгаймен. Қосимбек қавчин хизматингизда бўлур. Барча ҳарам аҳли мен йўғимда сизга бўйсунғусидир!

Кутилмаган бу июндан Моҳим бегим энди ҳаяжонга тушди. Подшоҳ ўз хотинига бунчалик катта ишонч билдириши жуда кам учрайдиган ҳодиса эди. Айниқса, бутун ҳарам, ҳатто Гулруҳ бегим ҳам Бобур йўғида Моҳим бегимга бўйсунди, бунга халақит бериши мумкин бўлган мирзо Комрон ва мирзо Аскаррийларнинг Қандаҳорга жўнатилиши Моҳим бегимни қийнаб юрган ишқал тутунини бирдан ечиб юборадигандек енгиллик берди:

— Ҳазратим, июнтингиздан бошим кўкка етди! Аммо билурсизки, ожизангиз ҳокимликка ташна эмасмен.

— Кимки ҳокимликка ташна бўлмаса, мен ўшал зотга кўлроқ ишониб ҳокимият бергаймен. Барча ташқи ишларга Қосимбек мутасади бўлғай. Ҳиндол ёнингизда. Сиз унинг номидан ҳам амру фармон берсангиз, шариатга мос келур.

Моҳим бегимнинг бояги изтиробли ўйлари бир лаҳзага бўлса ҳам хаёлидан узоқлашди. Бобурнинг катта ишончи қалбига шунчалик ёқиб тушгани бегимнинг ўзини ҳам хиёл таажжублантирди. Қандаҳорга ҳоким бўлиш Комрон мирзога ҳам ёқиб тушишини ўйлади. Бобур икки томонни ҳам тинчитадиган нозик бир сиёсат юргизаётганини бегим энди сездди. Одамлардаги ички манфаат туйғусини беҳато толиб, шу туйғуга суянган ҳолда уларни моҳирона бошқара билиш катта бир санъат экани, Бобур йиллар давомида мапа шу санъатни қанчалик яхши эгаллаганини бегим ҳозир жуда яқиндан кўрди ва гўё ўз тажрибасидан ўтказди. Комрон мирзони Қандаҳорга жўнатиш, Моҳим бегимга Кобул ихтиёрини бериш бошқа кўп амиру бекларнинг кўнглидагини толиб, ўринларини алмаштириш — бу ҳаммаси шатранж доналарини уларга жуда мос келадиган бир маҳорат билан суриш ва ўринларини алмаштиришга ўхшаб кетарди. Шундай бўлса ҳам Бобур Моҳим бегимнинг кўнглидаги энг нозик дардни пайқаб, уни кундоши Гулруҳ бегимнинг қўли етмайдиган юксак мартабага муносиб кўргани беҳад ёқимли эди.

— Ҳазратим, сизнинг улуғ ишончингиз менинг танимга янги бир жон ато қилди! Бироқ... не қилайки, мен дунёдаги барча неъматлардан, ҳатто ўз жонимдан ҳам сиз билан Ҳумоюнни ортиқ кўрурмен. Сиз ҳозир раҳнамолик санъатида беназирсиз. Шундай бўлса ҳам фотиҳларнинг ғаними кўп

бўлур. Ҳинда беадад эл. Беадад ёғий. Ўйласам, ваҳмим келур!

— Жанг хатарсиз бўлмас. Сиз мунча изтиробга тушмоқдасиз, Моҳим? Сизга не бўлди?

— Мен Ҳумоюн учун ҳам изтироб чекмоқдамен... Ҳеч бўлмаса Ҳумоюн Кобулда қолсин, сиздан ўтинамен, ҳазратим!

Бобур Моҳим бегимга энди озорланиб кўз ташлади: нахотки у «эрим хатарли жангда ўлса ҳам ўғлим ёнимда тирик қолсин» демоқчи?

— Ҳумоюн тахт вориси,— деди Бобур ранжиган товуш билан.— Шунинг учун қўшинда мен билан бирга бориши шарт... Эскидан одат шундайлигини нечун унутдингиз?

Бу одатнинг маъноси шу эдики, агар узоқ юртдаги жангда подшоҳ ҳалок бўлса, тахт вориси дарҳол қўшинга бош бўлиши керак эди, акс ҳолда, қўшин бошқа даъвогарлар томонига ўтиб кетиши мумкин эди. Бобур бу одатни эслатиш билан «мен агар оламдан ўтсам, ўрнимга Ҳумоюн қолишини истаб, уни бирга олиб кетмоқчиман», демоқчи эди.

Моҳим бегим Бобурнинг гапидаги бу маънони фаҳмлади-ю, изтиробни баттар ошди. Назарида, Бобур Ҳиндистондан умрбод қайтиб келолмайдигандай, олдиндаги юриши «борса келмас» юриши бўладигандай туюлди. Моҳим бегимнинг юраги эзилиб, кўзлари жикқа ёшга тўлди.

— Э худойим! Дунё нечун бундай беомон яратилган? Қачон беҳатар кунларга етгаймиз?

Бобур жим эди.

ЛАХЎР. ПАНИПАТ. ДЕҲЛИ.

ЯНГИ ҚИРҒОҚЛАР

1

Қўшин илгарилаган сари ўрмон қалинлашиб борар эди. Чинордай баланд банъян дарахтларининг очиқ илдизлари шохларидан пастга осилиб тушиб, ерга кириб кетган. Йўгон чирмовуқлар дарахтдан-дарахтга ўтиб, ҳаммаёқни ўраб-чирмаб ташлаган. Оёқ тагида ўсиқ буталар. Ҳаво дим ва рутубатли.

От устида келаётган Бобур енгил шоҳи кўйлак кийган бўлса ҳам терлаб-пишиб кетган. У банъянларнинг шамолдан шовуллаётган баланд шохларига термилиб қарайди. Тепада эсиб турган шамол чангалзор ўрмон ичида бораётганларга шабадасини ҳам теккизолмайди.

Ўрмондан маймунарларнинг шўх кий-чувлари эшитилиб

туради. Гоҳо товусларнинг «қў-ў-ўв» деб кескин ва нохуш овоз билан қичқиргани кулоққа чалинади.

Бир пайт ўрмон ичида туя етаклаб пиёда кетаётган навкарлардан аллақайсисининг жон аччиғи билан чинқиргани эшитилди. Сўнг сафдан-сафга:

— Илон чақибди!

— Кўзойнакли илон! — деган шивир-шивир тарқалди.

Тўп ортилган аравалар томондан оти лойга ботган уста Аликул ташвишланиб чиқиб келди-ю, Бобурга арз қилди:

— Подшо ҳазратлари, оғир тўпларни бу чаңгалзор ўрмондан ўтказиб бўлмас! Оёқ тағи лой! Тўп ортилган аравалар ҳаммаси тикилиб қолди!

Бобур орқароқда келаётган Тоҳирга ўгирилиб қаради:

— Раҳнамони чорланг, бек!

Йўл бошловчи Лаъл Чанд олдинда фил миниб бормоқда эди. Тоҳир уни чақириб келганда Бобур минган саман от филдан хуркиб асабий пишқирди. Лаъл Чинд филини тўхта-тиб, унинг қулоғига бир нима деган эди, фил хартумини юқорига чўзиб, эгасини пастга тушириб қўйди.

Лаъл Чанд кафтларини бир-бирига қўйиб, кўзи аралаш пешонасига теккизди-да, Бобурга таъзим қилди. Бобур унга форсча гапирди:

— Бу йўл бизга тўғри келмади. Бошқа йўл топиш керак.

— Ҳазрат олийлари, бошқа йўлларни сув босган. Бу ер Панжоб. Бешта дарёмиз бор. Ҳаммаси тошган.

— Панжобда аравалар ўтадиган йўл кўп деб эшитганмиз. Бу йўлда аравалар тикилиб юролмай қолди. Биз адашдикми?

— Адашганимиз йўқ, ҳазратим. Аравалар қаерда тикилди?.. Рухсат беринг, фил билан чиқарай. Бугун юрсак, эртага яхши йўлларга чиқамиз. Лахўр яқин.

— Филни бошлаб боринг, араваларни чиқариб берсин, — деди Бобур уста Алиқулга. Кичкина жуссали озғин Лаъл Чанд тоғдай баланд қора филга яна унинг хартуми ёрдамида минди. Сўнг филнинг супрадай катта қулоқларига тиззалари билан ниқтаб, қўлидаги учи қайрилган темир хилла — кажак ёрдамида уни ўнгу сўлга йўналтириб, тўп ортилган араваларга қараб кетди.

Туялар тортолмай қолган араваларни фил бирпасда балчикдан чиқариб берди.

Араваларнинг бирида оёғини илон чаққан навкар кўм-кўк кўкариб, инграб ётибди. Унинг тирик қолиши гумон

бўлса ҳам яланг оёғининг илон заҳар солган жойига дори-вор барглар қўйиб боғлашган, заҳар баданга кўп тарқалмаслиги учун тиззасини ола чилвир билан танғиб ташлашган эди.

Аравалар кўзгалди. Фил миңган йўл бошловчи яна олдинга ўтиб кетди. Йўл юрганлари сари рутубат кучайиб, нафас олиш оғирлашиб борар эди.

Кун оққанда Рави дарёси томондан юзтача қуролли одами билан Ҳиндубек чиқиб келди. Хос навкарлар уни яхши билишарди. Асли деҳшлик сипоҳийлардан бўлган Ҳиндубек Иброҳим Лоди билан келишолмай бундан етти йил олдин Кобулга борган ва Бобурнинг хизматига кирган эди. Қирк ёшлардан ошган бу йигит Бобурнинг Ҳиндистонга қилган аввалги юришида кўп жасорат кўрсатган эди. Бобурга унинг довиюраклиги билан бирга ватанидаги ички парокандаликни тугатиш йўлида кўп қон тўкмасликка, иложи бўлган жойларни жангсиз олишга астойдил интилиши ҳам жуда маъқул тушган эди. Ҳиндубек туркий, форсий тилларни ҳам мукаммал ўрганган, илмли, маърифатли, дилкаш киши бўлганлиги учун Бобурнинг энг яқин мусоҳиб беклари қаторига кирган эди. Бундан олдинги юришда Кашмирдан оқиб келадиган Жилом дарёси бўйидаги Бҳира Ҳиндубекнинг ҳаракатлари билан жангсиз олинганда Бобур бу обод вилоятга Ҳиндубекнинг ўзини ҳоким тайинлаб, Кобулга қайтиб кетган эди. Ҳозирги юришда Бобур Лахўрни ҳам қон тўкмасдан жангсиз олиш умидида эди ва Ҳиндубекни воситачи қилиб Лахўр амирлари билан музокара олиб бормоқда эди.

Бобур Ҳиндубекни узокдан таниди ва у билан яккама-якка гаплашиш учун отини йўлдан четроққа бурди. Ҳиндубек отдан тушиб, таъзим қилди.

— Сўзланг, бек!

— Ҳазратим, Давлатхоннинг авзойи бузуқ. Мени туттирмоқчи бўлганини сезиб қочиб келдим.

— Нечун? Ахир Кобулга ўғли Диловархонни юбориб, биз билан иттифоқ тузган эди-ку. Мен уни отам деган эдим! Қанча яхшилиқлар қилган эдим!

— Давлатхон ҳаммасини унутган. Белига иккита қилич тақиб олган. Мен бунинг сирини ўғли Диловархондан сўраб билдим. Бир қилични Дехли султони Иброҳим Лодига қарши таққан эмиш. Иккинчи қилични сизга қарши.

— Ўғиллари ҳам ёғийлик мақомидами?

— Диловархон сизга хоҳон, келиб мулозимат қилмоқчи, Лахўрни жангсиз бермоқчи. Отаси мени туттирмоқчи эканини Диловархон айтиб, бир фалокатдан қутқарди. Лекин катта ўғли Ғозихон отаси томонида.

— Оламхон-чи?

— Оламхон Иброҳим Лоди билан урушиб мағлуб бўлгандан бери қайта урушишга журъати йўқ. Лахўрга борганингизда чиқиб мулозамат қилишга сўз берди. Агар Ғозихон шикаст еса, кўпчилик беклар бўйин эгурлар, Лахўр жангсиз олинур. Лекин... ҳазратим, нечун Лахўрга бундай ёмон йўллардан бормоқдасиз?

— Панжоблик иттифоқдошларимиз пешвоз чиқарган раҳнамо бизни шу йўлга бошлади.

— Қани ўшал раҳнамо? Ижозат беринг, мен бир тафтиш қилиб кўрай.

Фил минган йўлбошловчини яна чақириб келдилар. Лаъл Чанд филини чаңгалзорга яқинроқ бир жойда тўхтатди ва яна жуфтланган қўлини пешонасига қўйиб, эгилиб саломлашди. Ҳиндубек ҳам кафтини жуфтлаб, пешонасига теккизди-да, ўзини осойишта тутиб, ҳиндча гапириша бошлади:

— Асли қаерликсиз?

— Аграликман, соҳиб.

— Панжобга қандай келиб қолгансиз?

— Иш излаб келганман.

— Шундай зўр филингиз бор экан, Иброҳим Лоди сизга иш топиб бермадимми?

— Иброҳим Лоди хасис. Бутун мамлакатнинг олтинларини йигиб, хазинасига яшириб қўйган. Қурилишга сарфлаш йўқ. Одамларни ишлатиб, рози қилиш йўқ! Безор бўлдик!

— Тўғри айтасиз,— деди Ҳиндубек.— Мен ҳам Лодиларнинг зулмидан қочиб келганман. Искандар Лоди¹ менинг отамни саркашликда айблаб, кутурган филнинг оёғи тагига ташлаб ўлдирган.

Филбон Ҳиндубекка мароқ билан тикилди-ю:

— Кшатрий²ларданмисиз? — деди.

— Ҳа, асли отим Индри. Бобур ҳазратлари Ҳиндубек деб атадилар. Бу ном ҳаммага маъқул бўлди. Ҳўш, сизнинг отингиз нима?

— Лаъл Чанд.

— Сиз ҳам Иброҳим Лодининг зулмидан қочиб келган экансиз. Энди бу зулмдан бизни ким кутқаради деб ўйлайсиз?

— Худо.

— Бандаларидан-чи?

Лаъл Чанд ўйланиб қолди:

¹ Искандар Лоди — Иброҳим Лодининг отаси. 1517 йилда ўлган.

² Кшатрий — ҳиндлардаги асосий тўрт табақанинг бири, ҳарбийлар.

— Давлатхонми? — деди Ҳиндубек.

— Давлатхон сахий одам. Ғозихон ҳам Иброҳимдан яхши.

Ҳиндубек овозини пасайтириб сўради:

— Ростини айтинг, сиз бу қўшинни нега бу йўлдан бошлаб боряпсиз?

— Ғозихон айтган йўл шу.

— Ғозихон нега ўтиб бўлмайдиган ёмон йўлдан юргин деган, биласизми?

— Булар учун яхши йўл шу.

— Нега? Булар сизга нима ёмонлиқ қилди?

— Битта золим подшоҳ — Иброҳим бизга озмиди? Яна биттаси келяпти!

— Ғозихон сени алдаган!

Лаъл Чанд филини чангалзор томонга кескин бурди-ю, қичқирди:

— Булар босқинчилар! Булар Бажур қўрғонида уч минг йигитимизни қиличдан ўтказган! Шаҳару қишлоқларимизни талатган!

Лаъл Чанд шундай деяр экан, филини чоптириб, ўрмон ичига қараб қочди.

— Ҳазратим, бу раҳнамони туттиринг! Бу ёғий кишиси! Сизни хароб қилмоқ учун ёмон йўлга бошлаган!

— Тутинг уни! — қахрланиб қичқирди Бобур.— Нобакорни олдидан тўсиб чиқинг! Тез!

Отлиқлар филнинг кетидан интилдилар. Улардан учтаси катта баньян дарахтини айланиб ўтиб, филнинг йўлини тўсиб чиқдилар. Филбон қўлидаги темир кажак билан филни қаттиқ хиллалаб, бир нарса деб қичқирди. Фил отларнинг бирини оёғи билан тепиб йиқитди, иккинчи отнинг бўйнига хартумини ўраб, силтаб итқитиб юборди. Бунни кўрган учинчи отлиқ дарахт панасига қочиб, зўрға қутулиб қолди.

Қаҳри келган фил баҳайбат товуш билан наъра тортиб, йўлида учраган йўғон чирмовуқларни узиб ўтар, катта-катта шохларни қарсиллатиб синдирар ва отлиқлар киролмайдиган қалин чангалзорда тобора узоқлашиб борар эди.

— Ўқланг! — деб қичқирди Бобур.

Лаъл Чанд филнинг улкан бўйнига бағрини бериб, унинг баланд сағриси ва қулоқлари панасида биқиниб ётар эди. Орқадан ёғдирилган ёй ўқларидан кўпчилигини дарахтларнинг шохлари ва чирмовуқлар ўтказмади. Уч-тўртта ўқ шохлар орасидан ўтиб филнинг орқасига урилди,

лекин пўлатдай қаттиқ ва қалин фил терисига ботолмай, ерга учиб тушди.

Уста Алиқулнинг тўфангандозлари милтиқларини ўрмонга тўғриладилар. Бироқ барқандозлар чақмоқ чақиб, то милтиқ пилтасини ёндиргунларича Лаъл Чанд минган фил йўғон ва қалин дарахтлар панасига ўтиб кўзга кўринмай кетди. Фил зарбасидан йиқилган ҳар икки от ердан туролмай уялаб ётар, уларнинг устидаги навкарлар ўлган бўлмаса ҳам оёқ-қўллари шикастланган эди.

— Ярадорлар аравага олинсин! — буюрди Бобур.— Бизни адаштириб халок қилмоқчи бўлган нобакор жазоланмоғи керак! Тўфангандозлар отланиб, ўрмонни айланиб ўтсинлар!

Тўфангандозлар шоша-пиша отланиб, айланма йўл излай бошладилар. Аммо ҳаммаёқ чангалзор, ботқоқлик эди.

— Қани, Ҳиндубек, энди бизга сиз раҳнамолик қилинг!

— Бош устига, ҳазратим!

Ҳиндубек кечки пайт уларни кенг бир кўкаламзор водийга бошлаб чиқди. Беҳад чарчаган Бобур шу кўкаламзорга чодир тикдирди.

Ўрмонда кийимлари тирналиб йиртилган, отлари лойга беланган тўфангандозлар Лаъл Чандни тополмай қайтдилар. Шунинг устига Лахўрдан амир Давлатхон, унинг ўғли Диловархон эллик-олтмишта мулозим ва навкарлари билан Бобурнинг қароргоҳига яқинлашишди. Диловархоннинг аввалдан хайрихоҳлигини яхши биладиган Бобур хиргоҳда уни ўрнидан туриб кутиб олди ва ўнг томонда ўтирган эътиборли беклари орасидан жой кўрсатди.

— Жаноб Диловархон, падари бузрукворингиз нечун иттифоқни бузиб, бизга ёғийлик мақомида қилич қайрамишлар?

— Ҳазрати олийлари, отамни оғам Ғозихон йўлдан урди. «Ёт қўшин келса Лахўр биздан кетади, булар ҳам бизга Иброҳим Лодийдай душман», деб ишонтирди.

— Шунинг учун Давлатхон алдамчи раҳнамо юбориб, бизни ўрмон ичида адаштирган экан-да?

— Аммо бу фитнадан отамнинг хабарлари йўқ, ҳазрати олийлари! Бу — Ғозихоннинг иши. Агар отам шундай қилганларида бу ерга ўзлари келмас эдилар. Лахўрда қон тўкилма-син деб, сиздан иноят истаб келдилар.

— Бизнинг иноятларимизга фақат сиз муносибсиз, жаноб Диловархон! Аммо отангиз қилмишларига яраша жазо олгусидир! — Бобур шиғовулга юзланди:— Давлатхон сўнгги пайтларда белларига иккита қилич тақиб юрган эмиш.

Қани, ўша қиличларини биз ҳам бир кўрайлик... Ҳар икки қилични бўйнига осиб киритинглар!

Кўп ўтмай икки зўр навкар оппоқ соқолли кекса Давлатхонни икки биллагидан маҳкам ушлаб чодирга олиб кирди. Чол навкарларнинг қўлидан бўшамоқчи бўлиб асабий силтанар, унинг бўйнига осилган иккита узун қилич кўкрагига урилиб селанглар эди. Давлатхон Бобурга алам билан тикилиб деди:

— Подшоҳ ҳазратлари, мен асир олинган эмасман, ўзим келдим! Бу қандай шафқатсизлик?

— Сиз мендан элчи бўлиб борган Ҳиндубекни туттирмақчи бўлибсиз! Агар ниятингизга етганингизда, Ҳиндубек омон қолмас эди! Кейин биз ҳам чангалзорда балчиққа ботиб, Ғозихоннинг қопқонида жон берармидик? Бизга шафқат қилганларинг шуми? Шафқатсизларга биз ҳам шафқатсизмиз! — Бобур шиғовулга буюрди:— Бу одам оиласи билан бирга Лахўрдан Бхирага бадарга этилсин. Бхиранинг Милват кўрғонида ҳибсда сақлансин!

Бўшашиб ҳеч нарса деёлмай қолган Давлатхонни олиб чиқиб кетдилар.

2

Куз ва қиш ўтиб бораётган бўлса ҳам, дарахтлар яшил либосини ечмас, «дун» деб аталадиган бағри кенг, сайхон Ҳинд водийлари йил бўйи баҳордагидай кўкалам бўлиб турар эди.

Жамна дарёси бўйлаб жанубга томон ҳаракат қилиб бораётган Бобур қўшини Деҳлидан эллик чақиримча шимолдаги Панипат шаҳрига келиб тўхтади. Деҳли султони Иброҳим Лоди юз мингга яқин аскар ва бир ярим минг ҳарбий фил билан Агра томонидан яқинлашиб келмоқда эди. Иброҳим Лоди шу филлари ва аскарлари билан бултур Деҳли бўсағасида Оламхон, Диловархон ва бошқа душманларининг қирқ минг кишилиқ қўшинини тор-мор келтирган эди. Бобурнинг қўшини эса ўн икки мингдан ошмас эди. Ёвнинг сон жиҳатидан беқиёс даражада устунлиги кўпчилик бек ва навкарларнинг қалбига ғулғула солар эди. Агар мағлуб бўлишса, атроф ҳаммаси нотаниш ерлар, бегона юрт, қаерда жон сақлашади?

Ички беклар орасида юрган Тоҳир кўпроқ Бобурнинг ҳарбий тажрибасига ва уста Алиқул бошлиқ тўфангандозлар ва тўпчиларнинг қуролларига умид боғлаган эди. Жаҳонда ҳали жуда кам тарқалган бундай қурооллар Иброҳим-

нинг қўшинида йўқ эди. Бобур ўзида йўқ харбий филлар хужумини мана шу қуроллар кучи билан бартараф қилиш фикрида эканини Тоҳир билар эди.

Улар Панипат шаҳри билан Жамна дарёсининг оралигидан тўфанг ва тўп отиш учун қулай бўлган бир жойни топишди-ю, яқин-йироқлардан олиб келинган барча араваларни ярим доира шаклида саф қилдиришди. Етти юздан ортиқ арава бир-бирига занжирдай маҳкам тиркишлар¹ билан боғланди. Араваларнинг олди ва ораларига ёй ўқи ўтмайдиган темир қалқонлар ўрнатилди. Тўфангандозлар ва тўпчилар шу қалқонлар ортига бекиниб ўқ отишни машқ қилдилар.

Аравалар баланд бир тепаликнинг этагига — олди нишаб жойга келтирилди. Улар ўз-ўзларидан юриб кетмаслиги учун ғилдиракларнинг тагига ёғоч тўсиқлар тираб қўйилди.

Харбий машқлар ўтказилган кун Бобур аравалар ортидаги тепаликда отлиқ туриб, ғилдираклар олдидаги ёғоч тўсиқларни бирваракайига олишни ва барча араваларни баробар юргизиб кўришни буюрди.

Мулозимлар қаторида юрган Тоҳир аравалар сафининг нариги четига от чоптириб бориб, саркарданинг буйруғини Мустафо тўпчига етказди. Ҳамма пиёдалар, тўпчилар, зарбзан ва барқзанлар² буйрукни бажаришга ҳозирландилар. Ҳаммага кўринадиган жойда турган уста Алиқул:

— Аравалар сурилсин! — деб қичқирди.

Аравалар баъзиси ҳадеганда ўрнидан жилмади, баъзилари эса бирдан тезлаб кетди. Аравалар сафи эгри-бугри бўла бошлади, ора-орага боғланган тиркишлардан бир қанчаси узилди, темир қалқонлар қулаб тушди.

— Тўхтанг! — буюрди Бобур. — Машқни такрорлатинг, жаноб Алиқулбек, токи бирорта тиркиш узилмасин, бирорта қалқон ҳам қуламасин!

Одамлар терлаб-пишиб, араваларни юқорига судраб чиқа бошладилар.

Бу оғир ишдан баъзи навкарлар ўзларини четга олса, ўнбошилар аямай сўкар, ҳатто урар эдилар.

— Машқ пайтида навкарни аяманг, — деди Бобур Алиқулбекка. — Ҳозир аясангиз, жангда мағлуб бўлиб ўлиб кетур.

Бобур тепаликдан тушиб, дарё томонга йўл олди. У ёқда фил ўтолмайдиган чуқур хандақлар қазилган, энди баъзи жойларга шох-шабба босиб, ихота яшашмоқда эди.

¹ Тиркиш — ҳўкизнинг хом терисидан эшилган арқонсимон нарса.

² Барқзан — чақмоқ чақиб, милтиқнинг пилтасини ёндирадиган одам.

Хизмати юзасидан Бобурга эргашиб, уни қўриқлаб юрадиган Тоҳир хандақлар ва шох-шаббаларга қараб ўзича ўйланди: «Шунча тайёргарликларга яраша ёғий тўғримиздан келса яхши-я! Агар шаҳарни айланиб ўтиб орқадан келса ҳаммаси беҳуда-да!»

Бироқ шаҳарнинг нариги томонига бориб келган чигдовуллар у ёқдаги ботқоқлик ва чангалзорлардан катта қўшин ўтолмаслигини аниқлаб келдилар. Ўнг томонда Жамна дарёси. Чапда Панипат шаҳрининг аҳолиси тигиз маҳаллалари. Иброҳим Лоди бу маҳаллаларни қўшинига топтатиб, шаҳар оралаб келмас. Демак, уни фақат тўғридан кутиш мумкин. Лекин салкам ўн баробар катта куч билан келаётган ёвга бу аравалару хандақлар туриш берармикин?

Бир вақтлар Кобулда юрганда Андижон ва Қуваларни эсласа юраги эзиладиган Тоҳир, энди Кобулни эсласа юраги соғинчдан орзиқади. Кобулда унинг ўн беш йил истиқомат қилган уйи бор, хотини Робия, мадрасада ўқиётган ўғли Сафарбек, ёлғиз тоғаси мавлоно Фазлиддин бор. Олдиндаги жанг таҳликасидан кўнгли безовта бўлиб юрган Тоҳир: «Ишқилиб ўлим бўлмасин-да,— дейди ўзича.— Агар шу гал ҳам тирик қолсам, синоҳийликини бас қилардим-да. Ёш ҳам элликка бориб қолди. Қачонгача бегона юртларда тентираб юрамен? Сафарбек катта йигит бўлиб қолди, бу йил мадрасани хатм қилиб, муҳандис¹ бўлади. Кейин бошини иккита қилиб қўйсам... Э худо! Ўғлимнинг тўйини кўриш менга насиб қилганмикин-а? Робияни яна кўрарманмикин-а?»

Юракка гўлгула солувчи бу изтиробли ўйларни ичкилик бир оз босар эди. Тоҳир кўндан бери беклар даврасида юриб, кўнглининг чигалини ичкилик билан тарқатишга анчагина одатланиб қолган эди. Ҳиндистонда узум кам, шунинг учун чоғир танқис, лекин маҳва деган дарахтнинг баргидан олинадиган ўтқир ароқ учраб турар эди.

Иброҳим Лоди билан жанг бўлишидан бир кун олдин Тоҳир шу ароқдан кўпроқ ичган эди! Саҳар палла бадани тиришиб уйғонди. Оғзи тахир, боши лўқиллаб оғрийди. У ёқ-бу ёққа ағдарилиб, яна ухламоқчи бўлиб кўрди, лекин ухлай олмади. Шундан кейин туриб, сопол кўзанинг тагида қолган ароқдан уч-тўрт қултум ичди-да, сабуҳий қилди.

Шу пайт бирдан довуллар ва нақоралар чалиниб, ҳаммани сафланишга чорлай бошлади.

Чигдовуллар Иброҳим Лодининг бостириб келаётгани хақида хабар берган эдилар.

¹ Х а т м қ и л и ш — т у г а т и ш . М у х а н д и с — и н ж е н е р .

Сабухийдан яна кайф қила бошлаган Тоҳир этиги билан жибасини анча вақт имиллаб кийди. Бир қулоғи Самарқандда кесилган Мамат сўнгги йилларда Тоҳирнинг отбоқарига айланган, лекин эски кадрдонлиги ва бир-икки ёш катталиги туфайли гоҳо уни койиб ҳам қўяр эди.

— Саҳари мардондан ичиб нима қилар эдингиз, бек! — деб пўнғиллади Мамат.

— Гапни қўпайтирмай кўк отни тезроқ келтиринг! — буюрди Тоҳир.

Сўнгги йилларда хийла озиб, юз-кўзлари аввалгидан ҳам ортиқроқ бўртиб қолган Мамат отлар боғланган томонга чопиб кетди. Ёв яқинлашиб келаётгани ҳақидаги хабардан қўп одам жонсарақ бўлиб у ёқдан-бу ёққа югурмоқда эди.

Мамат кечаси ечилиб кетган кўк отни тутиб олгунча анча овора бўлди. Одатда от кечаси эгарлоғлиқ қолса, айили, қоринбоғи бўшатиб қўйиларди. Тўполонда Мамат шошилиб айилни маҳкамлашни хаёлидан қочирди.

Тезроқ Бобурнинг ҳузурига етиб бориши керак бўлган Тоҳир узангини излаб ўтирмади-ю, отнинг бўйнидан олиб, устига сакраб минди. Шунда эгар бир чайқалди. Тоҳирнинг кайфи бўлмаганда эҳтимол, эгарнинг яхши урилганини тез сезган бўларди, отдан тушиб айилни маҳкамлаб олар эди. Лекин у эгарда чайқалганини сабуҳийдан кўрди-да, оёқ тираб, отни тез орқага бурди.

Анчадан бери боқувда ётиб кучи танасига сиғмай кетган кўк бедов орқа оёқларига тикка туриб, оғзидан қўпик сочиб, бурилди. Шунда бирдан эгар оғиб отнинг қорнига тушди-ю, Тоҳир елкаси билан ерга гурсиллаб йиқилди.

Мамат чопиб келиб, бир қўли билан отнинг жиловидан олди ва иккинчи қўли билан Тоҳирни суяб турғизди. У Тоҳирни кайфи борлиги учун йиқилди деб ўйлаб кулиб гапирди:

— Тоҳиржон, бек бўлдингизу ичадиган ҳунар чығардингиз-да! Бу сабилни қўп ичманг демаганмидим!

Тоҳир юмшоқ ерга йиқилгани учун ҳеч қаери лат емади. Лекин катта жанг арафасида шундай аҳмоқона йиқилиши унга машъум бир фалокатнинг хабарчисидек туюлди. У қаҳр билан сўкиниб, Маматга эгарни кўрсатди.

— Айилни ким бўшатиб қўйган эди?

Мамат кечаси от дам олсин деб бўшатиб қўйган айилни эрталаб маҳкамламаганини энди пайқади.

— Тўполонда эсимдан чиқибди-я! Ҳей, мен хомкалла!

Мамат энди ўзидан кулиб, айилни торта бошлади. Тоҳирнинг ароқдан лойқаланган тасавурида Мамат уни йиқитиб, устидан кулиш учун айилни атайлаб бўшатиб қўйгандай кўринди. Илгари иккови ҳам навкар бўлган пайтларида

Тоҳир бундай ҳазилларга кулиб кетаверар эди. Лекин ҳозир...

— Сен менинг бек бўлганимга бахиллигинг келиб шундай қилгансан! — деб у бирдан Маматни сенсираб сўка бошлади:— Сен менга ўлим тилаганингми бу?

Тоҳир ғазабдан титраб, белини пайпаслади-ю, қамчисини қидирди. Қамчи ерда ётар эди.

Гуноҳ қилган навкарларни сўкиш, уриш беклар орасида кенг тарқалган одат эди. Бу одат Тоҳирга ҳам озми-кўпми юққан эди. Лекин у ўттиз йиллик қадрдони Маматга ҳали бирор марта мушт кўтармаган эди.

Мамат ерда ётган қамчини олиб Тоҳирга узатди:

— Манг, гуноҳим учун қамчиланг, лекин бундай гапларни айтманг! Мен сизга ўлим тилайдиган бахиллардан эмасман!

Мамат яна Тоҳирдан кулаётгандай, ўзини ундан олижаноброқ қилиб кўрсатаётгандай туюлди. Тоҳир:

— Шундай кунда йиқитганинг — ўлим тилаганинг эмасми? — дедию унинг пешонаси аралаш бошига қулочкашлаб мушт урди.

Мамат уч-тўрт қадам нарига учиб кетди ва кўзи тиниб ерга ўтириб қолди.

Пешона суяги Тоҳирнинг кўлига тошдай қаттиқ тегди, бош бармоғи «қирс» этди-ю, ўткир бир огриқ миясига чиқиб борди.

«Бошмалдоқ синди-ёв!— деди Тоҳир ичида.— Қилич тутадиган ўнг кўлнинг бошмалдоғи... Бунга ҳам мана шу сабабчи!»

Бу ўйдан унинг ғазаби яна бир даражада ошди. Ўрнидан туришга интилаётган Маматни чап кўли билан ҳам уриб ерга йиқитди.

Орқадан етиб келган барваста бир йигит орага тушди.

— Кўйинг, бек оға, бир марта кечиринг! Мамат оға сиз учун жонини беради-я! Айилни мен бошқатдан тортиб берай! Мана, ҳозир, ҳозир...

Тоҳир айили тортиб боғланган отга минганда қаттиқ оғриётган кўлига тикилиб қаради. Бош бармоғи шишиб кетган, қимирлатса огриғига чидаб бўлмас эди.

«Мендан омад кетди!»— ўйлади Тоҳир мулозимлар тўпланаётган томонга от чоптириб борар экан.

Унинг кетидан эргашган йигирматача отлиқ навкарлари орасида пешонаси ғурра бўлган, юзи бўздай оқарган Мамат ҳам бор эди. Бек минг уриб-сўкканда ҳам навкар унинг кетидан қолмаслиги керак эди.

Жамна дарёсининг чап томонидан чиққан офтоб найза бўйи кўтарилганда ёв кўшинининг тиғиз сафлари аниқ кўрина бошлади. Охири уфққа бориб тақалган беҳисоб кўп кўшинининг ҳар ер-ҳар еридан ҳарбий филларнинг улкан гавдалари чўққиларга ўхшаб чиқиб турарди. Энг катта оқ филнинг устидан ўтирган Иброҳим Лоди атрофга худди тепалик устидан қараётгандек ҳаммаёқни баҳузур кўрар эди.

Бобур бир-бирига боғлаб ташланган аравалар ортидаги тепаликда туриб, ёвнинг яқинлашишини кутмоқда. Унинг ўнг қанотига ўғли Ҳумоюн жавобгар эди. Хўжа Калонбек, Ҳиндубек каби энг синалган беклар барча навкарлари билан Ҳумоюннинг ихтиёрига берилган. Марказни тўпчилар ва тўфангандозлар эгаллаган. Ҳар икки қанотнинг икки четида тўлғама учун ажратилган отликлар тайёр турибди. Иброҳимнинг ҳарбий филлар ҳимоясига таяниб урушадиган кўшинида пиёдалар кўплиги ва сафлар тиғиз бўлиши маълум эди. Бундай ҳолларда Шайбонийхон тажрибадан ўтказган тўлғама усули қўл келишини Бобур яхши биларди. У ҳам Шайбонийхонга ўхшаб тўлғамага ажратилган аскарларга отларнинг энг чопқирларини саралаб берган эди.

Тоҳир ички беклар ва хос навкарлар билан бирга подшоҳдан орқада турибди. Бобурнинг икки ёнини алоқачи беклар, ясовуллар ва чопарлар эгаллаганлар. Бобур уларга иш буюрар экан, овози ички бир куч ва ишонч билан жаранглаб эшитиларди. «Шу одамнинг паноҳида неча қирғинлардан омон чикдинг,— деди Тоҳир ўзига-ўзи тасалли бериб.— Бобур мирзо бор экан, сенга ҳеч нима қилмайди».

Дарё билан шаҳар оралиғини тўлдириб ваҳимали қора булутга ўхшаб келаётган Иброҳим Лодининг кўшини қаршисида ҳаракатсиз тек туриб кутиш оғир эди. Кўпчилик бек ва навкарлар фурсатни бой бериб қўяётгандек сабрсизланишар, лекин Бобур:

— Ҳеч ким буйруқсиз кўзгалмасин! — деб ҳаммани каттиқ тутиб турарди.

Иброҳим Лоди Бобурнинг кўзгалмасдан кутиб турганини, икки орада юзлаб аравалардан ясалган мустаҳкам девор ва чуқур хандақлар борлигини кўрди-ю, кўшинини тўхтатди. Лашкарбошиларни чақириб, асосий зарбани ёвнинг ўнг қанотига бериш ва шаҳар томондан айланиб ўтиш ҳақида буйруқ берди. Бироқ юз минг кўшинга то янги буйруқни тарқатиб, уни шаҳар томонга бургунча анча вақт ўтди.

Бобур дарҳол маана шу вақтдан фойдаланди. Унинг буйруғи билан тўлғамага ажратилган икки минг отлик

жойидан қўзғалди. Чопқир отлар ёв қўшинининг икки қанотига тегмай ўтди-ю, бежавотир келаётган орқадаги отликлар ва пиёдаларга ҳамла қилди.

Хумоюн бошлиқ тўрт минг отлик ўнг томондан ёвнинг йўлини тўсиб чиқди. Чап қанот ҳам жангга тушди. Марказдаги араваларнинг ора-орасидан тўплар устма-уст ўқ ёғдира бошладилар.

Тўрт томондан яшин тезлигида бирваракайига қилинган ҳамлани тепадан кузатиб турган Тоҳир Бобурнинг саркардалиқ тажрибасига ўзича қойил бўлиб қўйди. У ҳарбий санъатни фақат дўстларидан эмас, душманларидан ҳам ўрганган эди. Бобур тўп ва милтиқ ишлатишнинг аҳамиятини биринчи марта иттифоқдош Шоҳ Исмоилга қараб билган бўлса, тўлғама ишлатишда ашаддий ёвлари Шайбонийхон ва Убайдуллахоннинг тажрибасини ўзлаштирган эди. У аччиқ мағлубиятлар жараёнида орттирган барча ҳарбий тажрибаларини бугун гўё ягона бир муштга тугиб, майдонга усталик билан ташлади-ю, ташаббусни дарҳол қўлга олди.

Бобурнинг бутун режаси — ёв қўшинини тўрт томондан ўраб олишга ва қанотларини ичкарига қайриб ташлашга қаратилган эди. Лекин ўраб олинган ёв Бобур қўшинига нисбатан етти-саккиз баробар кўп эди, чопқир отлар баҳайбат филларнинг бир зарбасидан умбалоқ ошиб йиқилиб кетарди. Шу сабабли Иброҳим Лоди аскарлари ҳали ўнгда, ҳали сўлда Бобур қўшинининг ҳалқасини ёриб чиқарди. Бобур ёнида турган алоқачи беклар ва ясовулларни кетма-кет жанг майдонига чоптирар, ёвнинг қўли баланд кела бошлаган қанотларга марказдан кўмак юбортирар эди. У марказни ёвга атайлаб очиқ қолдирмоқда эди, чунки ҳали ҳаракатсиз турган аравалар ва тўфанглар марказга қўйилган эди.

Икки томондан ва орқадан устма-уст зарба берилавергандан кейин Иброҳим Лодининг асосий кучлари ва ҳарбий филлари марказга ташландилар. Шунда Бобур араваларнинг гилдираклари тагидаги ёғочларни олишни буюрди.

Етти юз арава жойидан қўзғалиб ёв қўшинининг рўпарасидан чиқди. Аравалар устидан тўплар, ора-орадан эса тўфанглар яқин келиб қолган ёвга ўқ ота бошлади. Тўпларнинг гумбурлаши, милтиқларнинг қарсиллаши, борут тутуни, ҳар қандай қалқонни тешиб ўтадиган оловли ўқлар зарбаси ва яна бунинг ҳаммаси беҳисоб аравалар шаклига кириб ўз-ўзидан юриб келаётгани ёв қўшинини даҳшатга келтирди. Филлар ярадор бўлиб бўкира бошлади. Филбонлар талвасига тушиб, филларни орқага бурдилар. Орқада эса ғуж-ғуж отликлару пиёдалар бир-бирига аралашиб кетган эди. Итар-итар,

ур-сур бошланди. Яраланиб кутурган филлар отлиқларни йиқитиб, пиёдаларни босиб-янчиб ўта бошлади.

Тўплар ва милтиқлар ҳамон ўқ отмоқда. Тўп ўқи теккан филлардан бир қанчаси пиёдалар устига ағанаб тушди. Орқадан келаётган отлар ва филлар ўзларини тўхтатолмасдан ағанаб ётган филларга суришиб йиқилишарди. Кетма-кет бири-бирини итариб, суриб келганлари олдин йиқилганларнинг устига қулашар ва ўтиб бўлмайдиган тўсиққа айланишарди.

Бу қиёмат ур-йиқитдан қочиб қутулишнинг иложини топган филбонлару отлиқлар жон-жаҳдлари билан қочишга тушдилар. Орқада тўлғама ишлатган отлиқларнинг сафи анча сийраклашиб қолган эди. Филлар бу сафни бирпасда ёриб ўтдилару Деҳли томонга интилдилар.

Тепалик устидан бунинг ҳаммасини кўриб турган Бобур: — Ёғий Деҳлини бекитмоқчи! — деди ва алоқачи беклари турадиган ўнг томонга ўгирилди. Бироқ алоқачи беклар, чопарлар ва ясовуллар ҳаммаси бирин-кетин жанг майдонига махсус топшириқлар билан юборилганича қайтиб келишмаган эди. Эҳтимол, уларнинг баъзилари ўлгандир ёки яраландир — жанг бусиз бўлмайди. Бобур отини буриб, ички беклари ва навкарлари томонга юзланди. Шунда унинг кўзи Тоҳирга тушди. Тоҳир махсус фармонларни ҳамиша яхши адо этиб келганини эслади:

— Тоҳирбек, Иброҳим Лоди қочдимми ёки жанг майдонида қолдимми, шунини аниқламоқ керак. Агар қочган бўлса хосса тобин¹дан қувғинчи юборгаймиз.

Тоҳир чанг-тутунга бурканиб жаҳаннам бўлиб ётган жанг майдонига кўзи жавдираб қаради-ю, синган бошмалдоғини эслаб, овози қалтираб деди:

— Бош устига, ҳазратим!

Шу пайт жанг бўлаётган томондан оёғига ўқ тегиб, узангисидан қон сиркиб оқаётган бир ясовул от чоптириб келди.

— Ҳазратим, зафар бизники! — деди у хансираб. — Ёғий қочди!

— Иброҳим ҳам қочдимми?

— Қочган филлар орасида Иброҳимнинг оқ филини кўрдим! Қочди!

— Бўлмаса дарҳол изига тушмоқ керак! Тоҳирбек, сиз тўхтаг! Жаноб Қосимтой мирзо!

— Лаббай, ҳазратим! — деб қирқ ёшлардаги норғул бек сафдан олдинга чиқди. Туркистонда туғилиб-ўсган бу бекнинг Улуғбек мирзога узоқ қариндошчилиги бор эди. У ўн беш йилдан бери Бобур хузурида хизматда эди.

¹ Т о б и н — резерв.

— Агар Иброҳим Лоди Дехли ёки Аграга етиб, бу қалъаларни бекитса, муҳорибаю муҳосора қайтатдан бошланур,— деди Бобур Қосимтой мирзога.— Ҳолбуки, биз Дехли билан Аграни жангсиз олиш умидидамиз. Ёғийнинг бизга ҳамла қилиш эҳтимоли энди бартараф бўлди. Жаноб Қосимтой, хосса тобиндан минг кишини олинг. Беклардан Бобочухра... Тоҳирбек, навкарлари билан... Иброҳимни қувланглар. Агар Дехлида тўхтамай яна қочса, Аграгача кетидан қолманглар, токи бу шаҳарларни беркита олмасин. Кетларингиздан биз ҳам изма-из етиб борурмиз!

— Фармони олийга жонимиз фидо! — деди Қосимтой мирзо.

— Сиз бизнинг илғоримизсиз. Тангрим ёрингиз бўлсин! Енгиңгу енгилманг!

— Омин!

Шундай ғолибона жангда илғор сафда бўлиш Тоҳирнинг кўнглини кўтарди-ю, синган бошмалдоғини оғриги ҳам сезилмай қолди. У навкарларини ёнига олиб, жанг майдонига ҳаммадан олдин кириб келди.

Офтоб тиккага келган. Кун иссиқ. Чекинаётган ёв беш-олти бўлакка бўлиниб кетган. Баъзиларини Ҳумоюннинг одамлари, баъзиларини Хўжа Калонбекнинг навкарлари таъқиб этмоқда. Лекин уларнинг отлари эрталабдан бери у ёқдан-бу ёққа чоғиб, чарчаб қолган. Тоҳирларнинг тобинда дам олиб турган отлари жангдан толиқиб қолган отлиқлардан ўтиб, ёвга бирпасда етиб олди.

Енгилган кўшин бўлиниб-бўлиниб қочаётган бўлса ҳам чўғи жуда катта экани Тоҳирга яқин борганда билинди. Ҳар тўпда етти минг-саккиз минг келадиған кўшин. Уларга нисбатан қувиб келаётганларнинг тўпи жуда кичик. Ёвнинг ҳар тўпида қатор-қатор филлар келяпти. Лекин уларнинг орасида оқ фил йўқ. Балки Иброҳим филдан тушиб, от миниб кетаётгандир?

Қосимтой билан Тоҳир ўзаро маслаҳатлашишди-ю, ёвнинг кичикроқ кўринган бир тўпини икки ёнидан айланиб ўтиб, олдиларидан тўсиб чиқишди ва бир сурув филни эгалари билан асир олишди. Уларнинг орасида Иброҳим Лоди йўқ эди.

Қосимтой филбонларни ҳинд таржимон орқали сўроқ қила бошлади.

— Айт, Иброҳим Лодининг қайси тўпда кетаётганини кўрсатиб берса озод қиламен!

Филбонлардан бири орқада қолган жанг майдонини кўрсатиб, куйиб-пишиб алланарса деди:

— Иброҳим минган фил яраланиб йиқилган эмиш, унинг ўзи ўлганмиш,— деди таржимон.

Лекин Қосимтой бунга ишонмади:

— Бизнинг одамлар Иброҳимнинг қочганини кўрган. Сўра, ростини айтсин, бўлмаса боши кесилгай!

Биринчи филбон яна аввалги гапини такрорлади. Чиндан ҳам Иброҳим жанг майдонида ўлган эди. Лекин Қосимтой филбоннинг гапидан кўра боя Бобурга ахборот берган ясовулнинг гапига кўпроқ ишонар эди. Қосимтой сиқинштира бергандан кейин бошқа бир филбон тусмол билан Иброҳимнинг дарё бўйлаб кетиб бораётган катта тўпда эканини айтди. Учинчи бир филбон ўнг томонда кетаётган тўпни кўрсатди.

Қосимтой ҳамма филбонларни филлари билан бирга махсус навкарларга топшириб, Бобурнинг ихтиёрига юборди. Кейин дарё бўйлаб чекинаётган тўпнинг кетидан тушдилар. Бу тўпда фил минган, от минган ва Лоди қўшинининг энг жанговар қисми ҳисобланадиган ражпутлар кўп эди. Қосимтой дарё томонда, Бобобек билан Тоҳир ўнгдан айланиб ўтиб, уларнинг йўлларини тўсиб чиқдилар. Ражпутлар таъқиб этаётганларининг нисбатан оз эканлигини кўрдилару камонларига ўқ ўрнатиб, қилич яланғочлаб, дадил жанг қила бошладилар.

Тоҳир камонига ўқ ўрнатиб отаётганда синган бармоғининг жонсизланиб, ишламай қолганини сизди. Ўқнинг учини бошқа бармоқлари билан тутиб, камонни тортиб отди. Ўқ қилич яланғочлаб келаётган қора бир одамнинг кўзи аралаш юзига тегди. Ўқ еган ражпут бир қўли билан юзини чапгаллаб, отдан йиқилиб тушди. Бу орада полвонтахлит бир ражпут Тоҳирга яқин келиб қолди. Тоҳир камонига қайта ўқ ўрнатишга улгурмаслигини сизди-ю, қиличсини суғурди. Ражпут полвони олтига кескир тиғи бор чакра деган қуролини кўтарди. Тоҳир унинг чакра тутган қўлига қараб қилич сермади. Қилич чакрага қарсиллаб текканда Тоҳирнинг синган бошмалдоғидан баданига шундай оғриқ тарқалдики, вужуди зирқираб кетди. Шишиб кетган бошмалдоқ қиличнинг дастасини қўлидан қандай чиқариб юборганини билмайди. Фақат қилич ерга учиб тушганини кўриб, белидан ханжарини олмоқчи бўлди, лекин улгурмади. Олти тиғли кескир чакра унинг бўйни ва ўнг елкасига шундай бир зарб билан урилдики, кифтидан энгагигача ҳамма жойини қиймалаб ташлагандай туюлди. Тоҳир кўзи тиниб отнинг ёли устига кўкраги билан тушганда чакранинг яна бир зарбаси унинг зирҳли кийимига қарсиллаб урилди. Тоҳир даҳшатли оғриқ ичида: «Энди бу мени отдан йиқитмагунча қўймайди!» — деб ўйлади. У отдан йиқилса жасади туёқлар тагида қандай мажакланишини тасаввур қилди-ю:

— Тезроқ хушимдан кетсам эди! — деди.

Шу пайт Мамат етиб келиб, дастаси узун ойболтани чакра кўтарган ражпутнинг қўлига урди. Чакра ерга тушиб кетди. Мамат қонга беланиб, эгардан сирғалаб туша бошлаган Тоҳирни тез ўнгариб олди-ю, жанг майдонидан қочиб чиқди.

3

Деҳлига отасидан олдин кириб келган Хумоюн Жамна дарёсининг ўнг қирғоғидаги қизил деворли улкан қалъани жангсиз эгаллади. Иброҳим Лодининг қалъадаги хазиналарини муҳрлаб, ишончли посбонларга топширди-да, уч юзтача хос навқари билан шаҳарни айланишга чиқди.

Унда-бунда учрайдиган паст-баланд тепаликларни ҳисобга олмаганда, Деҳли — кўкалам бир текисликка жойлашган ва четларини кўз илғамайдиган катта шаҳар эди. Тигиз жойлашган уйлар, маҳалла-қўйлар беҳисоб, лекин кўчаларда одам кам — нотаниш фотиҳлардан чўчиб, уйларидан чиқмай ўтирганлар кўп.

Хумоюн қайси кўчадан ўтмасин, бесаранжом бир синчковлик билан эшик-деразалар тирқишидан, девор тепаларидан қараб турган ўнлаб кўзларни кўради.

Муқаддас дарё ҳисобланган Жамна бўйида тўп-тўп одамлар дафн маросими ўтказмоқдалар. Улар ўликларни хушбўй ўсимлик мойи сепилган ўтинлар устига қўйиб куйдирадилару кулини секин дарёга оқизадилар. Нариги дунёга оид бу иш билан бўлиб, бу дунёнинг ташвишларига, ҳатто шаҳарни эгаллаётган бегона қўшинга ҳам кўпда эътибор бермасликка тиришадилар.

Чорсу бозорида билакларига ва бўйинларига шода-шода гул осган ялангоёқ болалар, аёллар кўринади. Ҳатто соч-соқоли оқарган баъзи бир кексалар ҳам билакларига қизғиш-сарик рангли гулшодалар солиб олишган эди.

— Бу — Чандни Чоук бозори, — деб изоҳ берди Хумоюннинг ёнида бораётган Ҳиндубек. — Ойдин Чорсу деган маъноси бор.

— Бугун хайитми, гул кўп? — сўради Хумоюн.

— Ҳа, баҳорги экинларнинг униб чиқишини қутлаб ўтказиладиган хайит. Ҳиндистонда хайит кўп. Бирон ой хайитсиз ўтмайди.

— Фаройиб эл! — деди Хумоюн ўйчан кулимсираб.

Эски бир қасрнинг том ва деворлари устида оёқ-қўллари узун маймунлар бемалол сайр қилиб юрар эди. Юзлари,

қўллари қора, қоринлари сарғиш, башқа ҳамма жойлари оқиш-кулранг. Жажжи маймун болалари томдан баньян ва ним дарахтларининг шохларига сакраб ўтишар, бир-бирлари билан қувлашиб, дарахтдан ерга ҳам тушишар эди. Қасрнинг ич-ташида одамлар юрибди, лекин маймунлар билан ҳеч кимнинг иши йўқ.

Ҳумоюннинг кетидан бораётган юзбошининг кўзлари бирдан овчилик эҳтироси билан ёна бошлади. У камонини қўлига олаётганини кўрган Ҳиндубек:

— Маймуннинг уволи ёмон бўлади,— деди.— Буни овлаган одам бахтсизликка учрагай.

Ҳумоюннинг ўнг ёнида бораётган Хўжа Калонбек кулиб сўради:

— Сигирни ҳам шунақа эъозлашимиз керакми, жаноб Ҳиндубек?

— Неки тансиқ бўлса, элга азиз кўринур,— деди Ҳиндубек.— Бу ернинг иссиқ иқлимида сигир асраш осон эмас.

— Ҳар қалай,— деб Ҳумоюн Ҳиндубекка ён босди,— подшо ҳазратлари махсус фармон чиқардиларки, ҳинд халқининг азалий удумларига ҳурмат билан қаралсин, эл-улуснинг нафсониятига тегадиган ҳаракат содир бўлмасин.

Хўжа Калонбек ўнг қўлини кўксига қўйди:

— Амирзодам, бу фармони олий биз учун қонун! Мен фақат Ҳиндубекка сал тегишдим.

— Бекнинг густоҳлиги маълум-ку,— деб энди Ҳиндубек ҳам Хўжа Калонга ҳазил қилди.

Олдинда баланд дарахтлар орасидан бўй чўзиб чиқиб турган ёнлари қиррадор минора кўринди.

— Қутб Минора! — деди Ҳиндубек.

Ҳумоюн минора олдида отдан тушди, сўнг беклар билан миноранинг тепасига чиқди. Минорадан юз қадамча нарида терак бўйи келадиган ёлғиз бир қора устун кўринди. Устун атрофида одам кўп эди.

— Бу недур? — сўради Ҳумоюн Ҳиндубекдан.

— Бу устун яхлит темирдан ясалган. Билганларнинг айтишича, уч юз йилдан бери бир зайлда турган эмиш. Кимки устунни қучиб, илкини бир-бирига теккизолса, ўйлаган муроди ҳосил бўлар эмиш.

Шу вақтгача ўзини босиқ тутиб келаётган Ҳумоюн энди ўсмирларча бир қизиқиш билан:

— Қани кўрайлик! — деди ва чаққонлик билан зинадан чошиб тушиб кетди.

Темир устун атрофидаги одамлар шахзодани кўриб, ўзларини четга олдилар.

— Жаноб Ҳиндубек, қани, устунни не тавр кучиш керак?

Устуннинг тепаси ва пасти қорайиб кетган. Фақат ўртаси — беҳисоб одамларнинг қўл ва елкалари теккан жой оппоқ бўлиб, маъдани йилтираб чиқиб турар эди.

Ҳиндубек устунга тескари туриб, елкасини унга тиради-да, қўлларини орқага чўзди. Устун анча йўғон эди. Ҳиндубек уни тескари қучиб, қўлини бир-бирига чўзди, лекин етки-золмади. Бутун кучи билан чиранди, бари бир қўли қўлига тегмади.

Буни кўрганлар хахолаб кула бошладилар.

Ҳумоюн ҳам кула-кула Ҳиндубек удалай олмаган ишни қилиб кўрди. Лекин у ҳам қўлини қўлига теккизолмади. Бек ва навкарлардан яна беш-олтитаси куч синаб кўрди. Шулардан фақат биттаси — қўллари узун, ўзи озғин самарқандлик йигит — устунни тескари қучиб, қўлини қўлига теккизишга муваффақ бўлди.

Ҳумоюн унга бир сиқим қумуш танга мукофот берди.

* * *

Деҳлида тўп-тўп бўлиб айланиб юрган ғолиблар орасида ёғли ўлжа излаётганлари ҳам бор эди. Синд дарёсининг бўйидан Бобур аскарларига қўшилиб келган Ёр Ҳусайнбек илгари Хайбар доvonининг жанубида йўлтўсарлик қилган қароқчилардан эди. Ҳозир унинг навкарлари шаҳар четидаги бир ибодатхонага киришиб, ҳиндлар сиғинадиган худоларнинг ҳайкалларига ўрнатилган қимматбаҳо тошларни кўчириб олишга тушдилар.

Деворлари оқ-сарғиш мрамардан ишланган ибодатхонада кекса бир бараҳман¹ кўзларига ёш олиб, Будданинг улкан тош ҳайкалидан нажот сўрамоқда. Ибодатга келган аёллар, чоллар, ўсмирлар худолари олдида бош эгиб жим туришибди.

Ёр Ҳусайнбекнинг навкарлари эса тўрт қўллик худо Шиванинг баланд ҳайкалига нарвон қўйиб чиқишган, худонинг пешонасига катта қизил холга ўхшатиб ўрнатилган ёқутни ханжар билан кавлаб олишга уринишарди.

Шу ҳодисанинг устига келиб қолган Ҳумоюн нарвондаги навкарга қаҳр билан қичқирди:

— Подшоҳ ҳазратлари номидан буюрамен. Ҳайкалга тегма! Туш пастга!

Ёр Ҳусайнбек нимқоронғи ибодатхона ичида Ҳумоюнни аввал танимади:

¹ Бараҳман — ҳиндларнинг рухонийси.

— Кофирларнинг ҳайкалини ҳимоя қиладиган подшонг ўзингга! — деди-да, нарвондаги навкарга буюрди:— Олавер!

Навкар ханжар билан ҳайкалнинг пешонасини кавлашда давом этди. Шунда Ҳумоюн отган ёй ўқи унинг билагига тегди. Ханжар ерга тушиб кетди. Навкар билагини чангаллаганича орқага ўгирилди.

Ёр Ҳусайнбек қиличини суғуриб:

— Ким у? — деб ўшқирди-ю, Ҳумоюн томонга ҳамла қилди.

Ҳиндубек ҳам қиличини суғуриб олдинга чиқди:

— Сиз Ёр Ҳусайнбек бўлсангиз, бу олий зот Бобур подшоҳнинг ўгиллари мирзо Ҳумоюндирлар!

Ёр Ҳусайнбек бу гапга ишонгиси келмай Ҳумоюнга кўзларини олайтириб тикилди. У энг аввал Ҳумоюннинг эғнидаги арғувоний тўнни таниди. Ёқаларига дурлар қадалган бу тўн — Бобурники эди. Ҳумоюн Панипат жанги арафасида Иброҳим Лодининг Ҳамидхон деган лашкарбошиси билан олишиб, уни енгган, уч юздан ортиқ одамини асир олиб келган эди. Бобур ўғлининг бу жасоратига қойил бўлиб, эғнидаги шохона тўнини ўғлига кийдирган, буни ҳамма беклар, шу жумладан, Ёр Ҳусайнбек ҳам кўрган эди, Ўша тўн ҳозир ҳам Ҳумоюннинг эғнида эди — унинг ҳипча гавдасига бир оз катта келиб, елкалари осилиброқ турар эди.

— Амирзодам, мен сизни танимабмен! — Ёр Ҳусайнбек кўлида қиличи билан бир қадам орқага чекинди.

— Қилични топширинг! — буюрди Ҳумоюн.

— Амирзодам, мен ҳазрат отангизга содиқ хизмат қилган бекларданмен!

— Ибодатхонада суғурилган қилични мен подшоҳ ҳазратларига элтиб топширишим керак! — деди Ҳумоюн.— Сиз йўлтўсарликдан тавба қилиб, ҳазрати олийнинг хизматига кирган экансиз. Бугун яна талончилик кўчасига қайтмишсиз. Подшоҳ ҳазратлари зиёратгоҳларда ноҳўя ҳаракат содир бўлмасин деб буюрмаган эдиларми? Нечун назарни бунчалик паст қилдингиз, бек? Ёғий хазиначаридан барча жангчилар ўз улушларини олгайлар! Бу хазина сизга ҳам етиб ортгай! Иброҳим Лодининг одамлари шу ҳайкалнинг пешонасидаги ёқутга тегмаган эканлар. Улар қилмаган пасткашликни қилиш бизга иснод эмасми? Олинг қиличини! Мана бу нокас йигитларни тутиб, ҳибсга элтинг! Токи бошқа йигитларимизга ибрат бўлсин!

Хос навкарлар бу буйруқни бажарганларидан кейин Ҳумоюн Ҳиндубекка бараҳманни ва унинг қавмларини кўрсатди-да:

— Жаноб бек, подшоҳ ҳазратлари бизга тайинлаган гапларни буларга таржима қилиб беринг,— деди.— Буларнинг дини бошқа. Лекин биз барча ғайридинларни бир худонинг бандалари деб билурмиз. Биз Ҳиндистонга яхши ниятлар билан келдиж. Бу муаззам кишварни ҳиндлар билан бирга обод қилмоқчимиз. Кимки бизга ҳамкор бўлса, ҳамкорлик қилурмиз!

Ҳиндубек таржима қилган бу сўзларни бараҳман ва унинг қавмлари бош ирғаб, таъзим қилиб эшитдилар. Шаҳзода ва унинг одамлари чикиб кетгандан кейин эса бараҳман яна будданинг ҳайкали олдига ибодатга келиб, бутун миннатдорчилигини унга айта бошлади. Муқаддас ёқутни олмоқчи бўлган ноқаснинг қўлидан ўқ еб жазоланиши Будданинг иродаси билан бўлганига бараҳман ўз қавмларини ишонтириши зарур эди.

4

Узоқ Сирдарё воҳаларида энди лола барг ёзадиган салқин ҳамал ойида Жамна бўйлари авжи саратон пайтидагидек иссиқ эди. Куни бўйи офтобда отлиқ юриб бадани мисдай қизиб кетган Бобур кечки пайт салқинроқ жой излаб Жамна дарёсининг бўйига келди.

Куннинг иссиғидан ташқари пешиндан сўнг ичилган ароқнинг тафти ҳам унинг ичини ёндирмоқда эди. Кобулда кўп ичиб ўрганган беклар Панипатдаги ғалаба шарафига ҳар куни бир-икки жойда зиёфат беришиб, уни таклиф қилишарди. Иссиқ ва сернам ҳавода устма-уст ичилаётган чоғир ва ароқлар Бобурнинг юрагини беҳаловат қилиб, кечалари уйқусини қочириб юборарди. Кўп ичиб ётган кунлари эрталаб туриб йўталса балғамга гоҳо қон аралашиб чиқарди. Бунни кўрган ҳиротлик хос табиб Юсуфий:

— Ҳазратим, ўтинамен, ичкиликни ташланг! — дея ялинарди.

Бобурнинг ўзи ҳам уйқусиз беҳаловат бўлиб ётган кечалари «энди ташламасам бўлмас», дерди. Лекин кундуз бирон ташвишдан кўнгли ғаш бўлса ёки аксинча, кайфини чоғ қиладиган яхши воқеа юз берса, яна ичгиси келиб қоларди. Айниқса, илк қадахларни ичиб, кайфи энди кўтарилиб келаётган пайтларда беклари бундан кейинги ичкилик мажлисига таклиф қилсалар осонликча розилик бериб кўярди. Бугун пешиндаги ўлтиришда ҳам худди шундай бўлган, «кечаси кемада базм қилурмиз» деб бекларни ўзи зиёфатга таклиф қилган эди.

Холбуки тушда ичилган майнинг ғубори ҳалигача тарқамасдан борлигини лоҳас қилмоқда эди.

Бобур мулозимлари ва хос навкарлари билан Жамнага яқинлашганда дарё бўйидаги кўкалам ялангликда дафн маросими ўтказаетган бараҳманлар, аёллар, кекса-ёш юздан ортиқ одамларни кўрди. Бобур дафн маросимини яқинроқдан кузатмоқчи бўлди-ю, отини ўша томонга бурди.

Панипатдаги жангнинг даҳшатли тафсилотларини эшитган одамлар отлиқлардан кўрқиб, маросимни бузиб қоча бошладилар. Бобур яқин борганда ёндиришга тайёрлаб қўйилган ўлик олдида битта мотамсаро келинчак, кекса аёл ва мункайган бир бараҳман чол қолган эди. Ўтин устида чалқанча ётқизиб қўйилган жасаднинг пешонасини тўфангдан мерганларча отилган ўқ қорайтириб тешиб ўтган эди.

Бу ражпут йигитни Бобур қаердадир кўргандай бўлди. Ҳа, Панипат жангидан бир кун олдин Ҳумоюн Ҳамидхон деган афғон саркадасини енгиб, унинг уч юз навкарини асир олиб келган эди. Иброҳим Лоди билан бўладиган жанг ҳали олдинда. Унинг қўшини саккиз баробар кўп. Шунинг таҳликаси таъсирида Бобур асирларга нисбатан аёвсиз бир сиёсат ишлатганини эслади.

Иброҳим Лоди қўшинларида тўфанг йўқ. Асир олинганлар ҳам тўфангдан одамни отиб ўлдириш мумкинлигини билишмайди. Улар кўпроқ ҳинд худоларидан бўлмиш Шиванинг қаҳридан кўрқишади. Ражпутларнинг эътиқоди бўйича, агар Шива астойдил ғазабланса, икки кўзидан ташқари пешонасида учинчи кўз пайдо бўлади. Шива кимгаки шу учинчи кўзининг қип-қизил оловини сочса, ўт теккан одам тил тортмай ўлади...

Бобур мана шу диний эътиқоддан ҳарбий мақсадда фойдаланмоқчи бўлди-да, асирлардан юзтасини бир четга саф қилдирди. Уларнинг қаршисига юзта тўфанганзорни қўйди ва йигирма қадам жойдан ўт очишни буюрди. Ўша тўфанглардан отиб ўлдирилган асирларнинг бири — пешонасидан ўқ теккан мана шу йигит эди.

Тирик қолган асирлар тўфангдан отилган оловли ўқ одамни қандай ўлдиришини умрларида биринчи марта кўриб даҳшатга тушдилар. Улардан бири осмонга қўл чўзиб:

— О Шива! Раҳм қил, Шива! — деб бақирди.

Бобур ваҳимадан титраётган юзта асирга таржимон во-ситасида мурожаат қилди:

— Ҳа, бизда Шиванинг кўзидай шафқатсиз олов сочадиган қурол бор! Сизларни ҳозир озод қилгаймиз. Бориб юртдош-

ларингизга айтинглар! Биз билан урушганлар мана шу оловнинг зарбидан ҳалок бўлурлар! Урушмай таслим бўлганлар сизлар каби омон қолурлар!

Тирик қўйиб юборилган юзта асир бу гапларни шахару қишлоқларга тарқатдилар. Ҳозир Жамна бўйида дафн этилаётган жангчи йигитнинг яқинлари ҳам унинг Шива оловини эслатадиган бир балодан ҳалок бўлганини эшитган эдилар.

Марҳум жангчининг ёшгина хотини ўзини эрининг жасади билан бирга оловга ташлаб куйдиришга тайёрланмоқда эди. Бобур сочлари ёйилиб елкасига тушган келинчакнинг юзидан ўлим шарпасини кўрди-ю, ҳиндлардаги сати одатини эслади.

Агар келинчак тирик қолса, умр бўйи азадорлик кийимида юриши, кунига фақат бир марта овқат еб, бошқа эр қилмай, то ўлгунча азоб-уқубатда яшаши керак эди. Мабодо келинчак бундай забун ҳаётни ўзига муносиб кўрмаса, сати одатига бўйсуниб, эрининг мурдаси билан бирга оловда ёниб кетиши керак эди...

Кекса бараҳман жасаднинг тагидаги ўтинларга бирдан ўт қўйиб юборди. Махсус мой сепилган ўтин ловиллаб ёниб кетди. Келинчак олов ичида қолаётган жасадга қараб бир талпинди-ю, лекин жони ширинлик қилиб, орқага чекинди.

Бобур Ҳиндубекка юзланди:

— Наҳотки шундай гўзал келинчак ўзини оловга ташласа? Бу не жаҳолат?! Бараҳманга бизнинг буйруғимизни айтинг! Келинчакни олиб кетсин!

Ҳиндубек отини чу-чулаб бараҳман билан келинчакка яқинлашди-да, ҳиндчалаб бир нарсалар деди. Келинчак Бобурга тез ўгирилиб қаради:

— Фотиҳларнинг подшоси шуми? Менинг эримга Шиванинг оловини шу одам сочганми? — келинчак икки қўлини Бобур томонга чўзди: — Агар сенда Шиванинг қудрати бўлса эримни тирилтириб бер! Ўшанда мен ҳам тирик қолурмен! Сен Шива бўлсанг, энди бизга раҳм қил! Тирилтир!

Ҳиндубек бу илтижони таржима қилганда Бобур саросима бўлиб:

— Ҳуши жойидами? — деди. — Мен Шива эмасмен! Ўлган одам энди тирилмагай! Келинчакни кутқаринг!

Бу гапларнинг таржимасини эшитган келинчак бирдан газабланиб қичқирди:

— Шива бўлмасанг, нечун ёлғон овоза тарқатдинг? Нечун менинг эримни ўлдирдинг?! Энди менинг ўлимимга ҳам сен сабабчи бўлурсен!

Келинчак оловга яқинлашар экан, Бобур Ҳиндубекка:

— Ушланг, ушланг! — деди.

Ҳиндубек от устидан келинчак томонга интилиб, уни

ўнгариб олмоқчи бўлди. Аммо келинчак Бобурга қарата:

— Кет босқинчи! Йўқол! Юртингга кет! — деб қичқирди-да, Ҳиндубекка чап бериб, ўзини оловга отди ва эрининг ёнаётган жасадини кучоқлаб олди.

Ловуллаб ёнаётган олов дарҳол келинчакнинг ҳарир кийимларига ва елкасида ёйилиб ётган қора сочларига илашди. Бобур унинг олов ичида аччиқ оғриқдан чинқириб юборганини эшитди, шунда ҳам жангчи эрининг жасадини кучоғидан қўймаётганини кўрди-ю, ларзага келиб, отини орқага бурди.

У Жамнанинг сокин қўлтиғида лангар ташлаб турган икки ошиёнлик кемага томон отини елдириб бораётганда, орқадан эсан шамол оловда куйган одам танасининг кўнгилни айнитадиган чучмал ҳидини олиб келди.

Кеманинг пастки қаватида баковул ва ошпазлар подшонинг тушлик таоми учун кабоб пиширмоқда эдилар. Бобур кеманинг «толор» деб аталадиган болохонасига кўтарилаётганда, мангалда пишаётган кабобнинг тутуни ва ҳиди бояги оловнинг чучмал ҳидини эслатди-ю, бирдан кўнгилни беҳузур қилди. У баковулга ўгирилиб:

— Манғални ўчиртиринг! — деди.

— Ҳазратим, сизга тушлик...

— Тушлик керак эмас.

— Аммо кечқурунги зиёфат...

— Зиёфат қолдирилсин!..

Бобур ғамгин юз билан толорга бир ўзи чиқиб келди. Ҳадемай пастки қаватга ҳам жимлик чўкди. Шу жимликда ўзини оловга ташлаган келинчакнинг чинқириғи гўё қайта эшитила бошлади... Панипатдаги ҳарбий ғалаба бу чинқириқ таъсирида Бобурга маънавий мағлубиятдек туюлиб кетди. Шива ҳақидаги ривоятдан сиёсат учун фойдалангани илгари ҳарбий ишда хатарли аснода жоиз бир чорадек кўринган бўлса, энди оловда ёнган гўзал келинчак бунинг қанчалик ғайриинсоний шафқатсизлик эканини унинг кўзига баралла кўрсатди.

Панипат зафари... Тақдир унга шундай улкан ғалабани нега Мовароуннаҳрда бермади? Ватанида жанг қилса, ҳеч ким уни босқинчиликда айблай олмас эди-ку!

Ўзоқларда қолган Моҳим бегим эсига тушди. Кўрмаганига олти ойдан ошяпти. Сўнги марта суҳбатлашганларида Моҳим бегим бугунги даҳшатларни олдиндан сезгандай, қанчалик изтиробга тушган эди!..

Бояги келинчакнинг: «Кет, босқинчи! Кет!» деб қичқиргани унинг қулоғи остидан кетмас эди. Бобур ичида: «Ёраб, бу

не кўргилик!» — деди-ю, хаёлини бошқа бирон нарса билан банд қилиш учун дафтар-қалам олди. Севган ёридан ва туғилиб-ўсган диёридан узоқда у ўзини беҳад толесиз, бахтсиз сезган пайтлари кўп бўлар эди. Ҳозир ҳам шу оғир туйғу юрагини чулғаб олди. Бобур кўнглини дафтарига бўшатгиси келиб, биринчи сатрни ёзди:

Толё йўқи жонимга балолиғ бўлди.

У кенг қирғоқлар орасидан товушсиз жим оқиб ўтаётган Жамнага тикилди. Ботиб кетган қуёшнинг қуюқ шафағидан дарё суви қизғиш кўринади. Бобурнинг назарида, дарё сувини шафақ эмас, жангларда тўкилган қонлар қизартириб юборгандай туюлди.

У изтироб билан кейинги сатрларни ёзди:

Ҳар ишники айладим хатолиғ бўлди,
Ўз ерни қўйиб Ҳинд сори юзландим,
Ераб, нетайин, не юз қаролиғ бўлди!

* * *

Гира-шира қоронғиликда ўнг қирғоқдан катта бир қайиқ чиқиб, кемага қараб кела бошлади. Кеманинг пастки каватидан қўрчибоши:

— Ким у қайиқдаги? — деб сўраганини Бобур ҳам эшитди-ю, қайиққа тикилиб қаради.

Қайиқнинг олтитами-саккизтами эшкаги бор эди.

— Мирзо Ҳумоюн ҳазрати олийларининг ҳузурларига ижозат сўрайдилар! — деб жавоб берди қайиқдан йўғон бир товуш.

Ҳумоюн билан кўпдан бери яккама-якка суҳбатлаша олмаган Бобур бугун ўғли билан бир дардлашгиси келди-ю, пастдан савдарни чақирди:

— Айтинг, Ҳумоюн толорга чиқсин!

Кўп ўтмай толор зинасида вазмин қадам товушлари эшитилди. Ҳумоюн эшикдан кирганда Бобур унинг чақнаган навқирон кўзларига, энди лаб устини қоплаган нозик мўйловига, кучга тўлиб турган хипча, соғлом гавдасига ҳаваси келиб тикилди. Бобурни қийнаётган изтиробли туйғулар, уни беҳаловат қилган иссиқлар Ҳумоюн учун гўё йўқ эди. «Ўн саккиз ёшимда мен ҳам шундай йигит эдим-а, энди нима қолди?» — деган ўйдан Бобурнинг кўнгли қаттиқ эзилди.

Ота-бола кўришиб-сўрашганларидан сўнг, Хумоюн отасининг рўбарўсига чўкка тушди-да, кулимсираб кўйнидан чиройли садаф қутича олди.

— Ҳазратим, шуни бир очиб кўринг.

Бобур қутичани кўлига олиб шошилмай очди. Қора бахмал мато орасидан олмосга ўхшаш сержалва бир тош юлдуздай чарақлаб кўринди. Лекин тошнинг ёнғоқдай катталигига қараб, Бобур унинг олмослигига ишонгиси келмасди. Жуда кўп хазиналарни ва хилма-хил жавоҳирларни кўрган Бобур бунчалик катта олмосни хали учратмаган, олмос донасининг бу қадар улкан бўлишини тасаввур ҳам этмас эди.

— Бу қандай жавоҳир? — деб сўради Бобур ўғлидан.

— Олмос эмиш.

Бобур нур жилвасига чўмиб ўйнаётган тошни кўлига олиб салмоқлаб кўрди:

— Вазни етти-саккиз мисқол келур. Наҳот шунчалик катта олмос бўлса?

— Мен муқаййим¹ни чақириб кўрсатдим. Машҳур Қўҳинур² олмоси шу, деди. Оламда бундан катта олмос йўқ эмиш. Баҳоси сандиқ-сандиқ олтинлардан баланд эмиш.

— Мен Бангола подшоси Султон Аловиқдинда улуғ бир олмос бор деб эшитган эдим. Таъриф қилган эдиларки, шу битта олмос катта бир мамлакатнинг бир ойлик сарфу харажатини кўтаргай.

— Муқаййимнинг айтишича, мана бу олмоснинг қиймати тамоми оламнинг икки ярим кунлик сарфига баробар экан.

— Сен буни қаердан олдинг?

Хумоюн ўнғайсизланиб жилмайди-ю:

— Гвалиор рожасининг хайлхонасида пешкаш қилдилар,— деди.

— Нечун?

Хумоюн воқеани ҳикоя қилар экан, Бобур Гвалиор вилоятида юз йилдан бери ҳокимлик қилиб жуда катта бойлик орттирган рожа Бикрамадитъянинг ҳашаматли қасрини кўз олдига келтирди. Бикрамадитъя Иброҳим Лодиға бўйсунмасдан, у билан узоқ вақт уруш қилган, охири Гвалиорни Иброҳимга бериб, ўзи Шамсобод деган жойга кўчиб кетган ва кўп ўтмай вафот этган эди. Панипатдаги ғалабадан ке-

¹ Муқаййим — жавоҳиршунос заргар.

² Қўҳинур — «нур тоғи» демақдир. Ўша замонда бу олмос — одамзод тошган олмосларнинг энг улкани бўлган. Олимлар Қўҳинур олмосининг 1304 йилдан бери борлигини аниқлаганлар. Ҳозир бу олмос Лондонда сақланади.

ийин Ҳумоюн бошлиқ илғорлар Дехлидан ўтиб бориб кўп қасрларни ишғол қилдилар. Шу қасрлардан бирида ўлиб кетган ўша рожанинг буй етган икки қиз, бир ўгли ва уларнинг оналари яшаб турган эди.

Рожанинг йигирма ёшлардаги ўгли Ҳумоюнни яхши қарши олди:

— Сизларнинг душманларингиз бўлган Иброҳим Лоди бизнинг ҳам душманимиз эди, унинг мағлуб бўлганидан биз шодмиз,— деди.— Энди рухсат берингизлар, биз Шамсободдан она юртимиз Гвалиорга қайтиб кетайлик.

Ҳумоюн ҳам ёш рожа билан илиқ муомала қилди-ю, лекин Гвалиорга кўчиб кетиш учун ўзи рухсат бера олмаслигини, подшоҳни кутиш кераклигини айтди. Ўша кеча Вайс деган бир бек эликтача йигити билан рожанинг қасрида тунади. Ҳумоюннинг ўзи қасрнинг ҳовлисидаги боққа чодир тиктириб, кечаси чодирда ухлаб ётганда ичкарида кўтарилган туполонни эшитиб уйғониб кетди. Қўрчиларини ёнига олиб, қаср ичига чолиб кирса, Вайсбекнинг йигитларидан бири эшик олдида қонга беланиб ўлиб ётибди. Қандилларда шамлар ёниб турибди. Иккинчи қаватнинг зинапоясида турган ўн саккиз ёшли гўзал қиз чувалиб ётган ипак сарисини титроқ қўллари билан олиб, яланғоч елкасига ёпишга уриняпти. Рожанинг ўглини беш-олтита навкарлар ўртага олиб, қўлидаги қиличини уриб туширишди.

Маълум бўлишича, Вайсбек рожанинг шу қизини ёқтириб қолиб, навкарлари ёрдамида ўз бўлмасига куч билан олиб келтирмоқчи бўлган. Қизнинг акаси қилич яланғочлаб ҳимояга чиққан. Қизни кўтариб кетмоқчи бўлган навкарни қилич билан уриб йиқитган. Энди бунинг қасдига навкарлар ёш рожанинг ўзини ўлдирмоқчи эдилар.

Ҳумоюн гап нимадалигини суриштириб билгач, навкарларга:

— Рожани бўшатиңг!— деб буюрди.— Ўз сингилларини бунчалик мардона ҳимоя қилган йигит эҳтиромга сазовор. Подшоҳ ҳазратлари бундай кишилар билан яхши муомалада бўлишни буюрган эдилар. Фармони олийни унутган шаҳватпараст Вайсбек ҳибсга олинсин! Қизни иликламоқчи бўлган навкарлар ўн дарра калтаклансин!

Хос навкарлар бу буйруқни бажармагунларича Ҳумоюн уларнинг тепасидан кетмай турди. Бу орада зинапоядан ёш рожанинг онаси қўлида кичкина садаф қутича билан туриб келди. У олий табақанинг ўқимишли аёлларидан эди, кўп тилларни биларди, Ҳумоюнга форсчалаб гапирди:

— Шаҳзода, менинг бисотимдаги энг катта бойлигим — мана шу қутичанинг ичида. Менга фарзандларим

дунёнинг ҳамма бойликларидан азизроқ. Сиз ўғлимнинг жонини қайтариб бергандек бўлдингиз. Мана бу қутичадаги улуғ олмосни сизга пешкаш қиламан!

— ...Воқеанинг тафсили шу,— деди Ҳумоюн ва отасига «Бир навкарнинг ўлгани-ю, Вайсбекнинг жазолангани учун гап эшитмасмикинмен?»— дегандек термилиб қаради.

Бобур оғир тин олди-ю:

— Алқисса, бу гўзал олмос ҳам зўравонлигу хунрезлик балосини кўриб келмишми?— деди.

— Ҳазратим, мендан хатолик ўтган бўлса афв этинг. Мен ўйладимки, ўз ор-номусларини шундай бебаҳо олмосдан ҳам ортиқ қадрлайдиган одамлар ғайридин бўлсалар ҳам...

— Рост, бу мамлакатда шундай ор-номусли одамлар борлигини ўйласам, менинг ҳам кўнглим кўтарилур, ўғлим! Аммо бизнинг назари паст беку навкарларимиз зўравонлигу талончилик билан ҳинд элини биздан чўчитмоқдалар. Ахир бизнинг мақсадимиз фақат мамлакат олмоқ эмас эди-ку. Биз Ҳиндистонда катта давлат тузиш орзусини кўнглимизга тугиб келган эдик. Ягона қудратли давлат барпо этилишидан ҳинд эли ҳам манфаатдор эмасми? Барча ўлкалар бирлашса, элнинг тинқасини қуритган ички урушлар тўхтамасми? Улус тинчиб, илму санъатнинг равнақи осонлашмағайми? Буни сезган ҳиндистонийлардан Диловархон, Ҳиндубек кабилар биз билан ҳамкорлик қилмоқдалар. Биз энди бутун ҳинд элининг кўнглини олмоққа интилмоғимиз даркор, ўғлим!

— Ҳинд элининг кўнглини олмоқ?!— таажжуб билан сўради Ҳумоюн.— Қонли жанглар ваҳимасидан қўрқиб, шаҳару қишлоқларини ташлаб қочмоқда бўлган минг-минг одамларнинг кўнглини биз қандоқ олғаймиз?

Бобур Панжобда йўлни адаштириб, фотиҳларни хароб қилмоқчи бўлган филбонни ва боя «Кет, босқинчи!»— деб қичқириб ўзини оловга ташлаган келинчакни эслади:

— Ҳа, бу жуда мушкул муаммо!— Бобур миз устида турган садаф қутичани кўлига олди.— Умидвормен, шояд бу муаммони ечишга муяссар бўлсак. Ахир мана сен бир қанча ҳиндистонийларнинг кўнглини олмишсен-ку. Деҳлига келган кунинг ибодатхонада бу элнинг муқаддас туйғуларини ҳимоя қилмишсен. Бунинг ҳаммасига лойиқ мукофот мана шу олмосдир! Ол, ҳалолнинг бўлсин!

— Ҳазратим,— деб Ҳумоюн қутичани олмай кўлини кўксига қўйди,— бу олмосни мен сизга атаб келтирдим.

Бобур садаф қутичани яна миз устига қўйди-ю, овози хиёл товланиб:

— Сенинг бу саховатинг учун тангрига шукрлар қила-

мен,— деди.— Панипат жангида сен менга энг биринчи бўлиб зафар келтирдинг, қўшиннинг руҳини кўтаришга сабабчи бўлдинг. Мен ҳали бу хизматларингни кўнглимдагидек тақдирлаганим йўқ.

— Лекин сизнинг аввалги инъомларингиз менинг бутун умримга етгуликдир,— деб Ҳумоюн отасига «Мубаййин»ни эслатгиси келди.— Мен ҳам сизга арзирлик бир армугон келтириш орзусида эдим...

— Ундай бўлса, майли, мен бу армугонингни бир марта қабул қилай. Энди шу олмос меникими?

— Сизники!

— Лекин тақдир менга дунёдаги барча олмослардан қимматлироқ бир мукофот бермишдир. Бу мукофот — менинг сендек ўғлим борлигидир. Тождор, тахтдор ота-ўғиллар орасида қандоқ ёмон бахилликлар, қандоқ разил хунхўрликлар бўлганлиги сенга сир эмас. Мен истайменки, бу балолар сену менга ҳеч вақт ёвуқ келмасин. Худодан тилагим шуки, мендан сенга, сендан авлодларингга саховату мардлик, фидокорлигу олижаноблик мерос бўлиб қолсин. Бу фазилатлар бизни улкан тоғ силсиласидек доимо бир-биримизга боғлаб турсин. Ана ўшандагина биз Ҳиндистонга келиб кўзлаган улуғ мақсадларимизга етишгаймиз.

— Сиз айтган улуғ мақсадлар учун ўғлингиз жонини беришга ҳам тайёр!

— Бунга менинг ишончим комил. Шунинг учун бу ноёб олмосни мен фақат сенга муносиб кўрурмен. Ол!

Ҳумоюн энди ўриндан сакраб турди-ю, садаф қутичани таъзим билан отасининг қўлидан олиб, кўзига сурди.

Бобурнинг бояги беҳаловатлиги ва тушқун кайфияти энди тарқаб кетган, кўнглида яна яхши истиқболга ишонч туйғуси мавж урар эди. У Ҳумоюнга:

— Ўтир,— деди-да, қарсак чалиб савдарбошини чақирди:— Ҳиндубекни чорланг. Хўжа Халифа билан бирга кирсин.

Чақирилганлар келгунча Бобур Ҳумоюнга Аградаги аҳвол тўғрисида гапириб берди:

— Кўрғонни Иброҳимнинг онаси, ўғли, Малиқдод Короний отлиқ вазири мингдан ортиқ хос аскарлари билан беркитиб олмишлар. «Сўнгги одамимиз қолгунча жанг қилурмиз» деб аҳд қилмишлар. Бу аҳдни бизнинг қўшин бир ҳамла билан кўкка совурмоғи мумкин. Аммо яна хунрезлик бўлур, шаҳар бузилиб, бизга керакли қанча одамлар хайф кетур!

Хўжа Халифа ва Ҳиндубек толорга таъзим қилиб киришди. Бобур уларни қаршисига ўтқазгач:

— Сизлар Аграга биздан элчи бўлиб бормоқларингиз керак,— деди.— Мақсад — кўрғонни жангсиз олиш. Могу жон-

лари омон қолсин. Иброҳимнинг онаси Жамна бўйидан паргана¹ сўраган эмиш. Майли, берайлик, Иброҳимнинг ўғли арабча-форсча ўрганган илмлик ўспирин эмиш, уни саройдаги обрўли мулозимларим қаторига қўшай. Малиқдод Коронийни тадбиркор вазир деб эшитдим. Уни Ҳиндистон муаммолари бўйича ўзимга маслаҳатгўй қилиб хизматга олай. Бориб яхшилаб сўзлашинг. Яна қандай маъқул тилаклари бўлса қабул қилайлик. Хуллас, қирғин бўлмасин, бева-бечора кўпаймасин, деб шу йўлни тутмоқдамиз... Яъни, сизларнинг вазифаларингиз — қалъа олиш эмас, балки қалъадагиларнинг кўнглини олишдир!

Оғир жанглارнинг олдинги сафида қон кечиб юрган Ҳу-моюн билан Ҳиндубек Бобурнинг бу тадбиридан енгил тортишиб, бир-бирларига мамнун қараб олишди.

АГРА.

ТАҚДИР ТАҚЗОСИ

1

Иброҳим Лодининг онаси малика Байда Панипат жангида ўлдирилган ўғли учун аза тутиб, бошдан-оёқ оқ кийиниб юрар эди. Орага қўйилган одамлар унга истаган парганасини бериб, Аграни жангсиз топширишга кўндирдилар. Малика кўрғон дарвозаларининг калитини Жамна бўйида Бобурга топшираётганда кўзларидан тирқираб ёш чиқиб кетди.

Бобур бу салобатли кампирнинг кенг пешонаси ва бир-бирига қўшилган қошларини қаердадир кўргандай бўлди. Сўнг бирдан Панипат эсига тушди. Жанг тугагандан кейин бир бек минглаб ўлиқлар орасидан Иброҳим Лодининг жасадини излаб топган ва бошини кесиб олиб, узун найзага санчиб, Бобурга келтириб кўрсатган эди. Энди қирқ ёшларга борган Иброҳим Лодининг кенг пешонаси ва пайваста қошлари ҳам худди онасиникига ўхшар эди.

Бобурга бир лаҳза шундай туюлдики, гўё Иброҳим Лодини тўсатдан тирилиб, онасининг қиёфасига кириб келган. Бобур алланечук саросима бўлиб:

— Малика, йиғламанг, — деди. — Биздан яна қандай тилагингиз бўлса айтинг?

Малика Байда кўз ёшини кафти билан тез артди:

— Менга бошқа озор бермасалар бўлди.

¹ Паргана — кичикроқ вилоят.

Бобур мулозимлари томонга юзланди:

— Минбаъд маликага ҳеч ким озор бера кўрмасин, ҳамма уни муътабар онамиздек эҳтиром қилсин!

Мулозимлар бу топшириқни таъзим билан қабул қилдилар. Малика ҳам бош эгиб, миннатдорчилик билдирган бўлди. Аммо унинг йиғидан намланган кўзлари пўлат тигнинг совуқ жилосини эслатиб нафрат билан ялтираб кетганини ҳеч ким кўрмади.

Малика Байда ўғлининг кушандасини кечирадиган оналардан эмас. Панипатдан мудҳиш хабар келганда малика учун осмон ўпирилиб ерга қулагандай бўлган эди. У ўғлини сўнгги марта кўришни истар, унинг жасадини ўз қўли билан тупроққа қўйиб, қабрини кучоқлаб йиғласа кўнгли хиёл таскин топадиганга ўхшар эди. Шунинг учун малика энг ишонган одамларини Панипатга юбориб, Иброҳимнинг жасадини топиб келишни буюрган эди.

Лекин Агра билан Панипатнинг ораси уч-тўрт кунлик йўл. То ўлим хабари Аграга етиб келгунча, сўнг Аградан малика юборган одамлар Панипатга боргунча орадан бир ҳафтача ўтган, унганча ўликларнинг бир қисми кўмдирилган, бир қисмини мечкай қузғунлар суюқларигача тозалаб еб кетган эдилар... Малика Байда юборган одамлар султон Иброҳимнинг жасадини тополмадилар, фақат жанг куни унинг калласини найзага санчиб Бобурга элтиб кўрсатганлари ҳақида хабар топиб келдилар... Ўғлининг жасади қандай хор бўлганини эшитган онанинг қайғу-аламлари аввалгидан ўн ҳисса ошди. У ҳатто жойнамоз устида намоз ўқиб ўтирганда ҳам: «Иброҳимжон, энди бу оламда сенинг қабринг ҳам йўқ, худо менга жасадингни ҳам кўп кўрди! — деб нола қилар: — Илоҳим, сенга ўлим келтирган Бобурнинг ўзи ўлсин, бундан минг ҳисса ортиқ хор бўлиб ўлсин!» — деб қарғар эди.

Маликанинг канизлари ва хизматкорлари кўча-кўйдан унга таскни берадиган гаплар топиб келишарди. Бобурнинг аскарлари ем-хашакдан қийналиб, деҳқонларнинг экинларини отларига едирган экан, деҳқонлар ғалаён кўтариб, навкарлардан бир қанчасини болта ва паншахалар билан уриб ўлдирибди. Фотиҳларни Ҳиндистоннинг иссиқлари ҳам жуда қийнаб қўйган эмиш. Салқин тоғ ҳаволарига ўрганган от ва одамлар бу ернинг аёвсиз иссиғига бардош беролмай ўлаётган эмиш. Вабо ва қора безгак ҳам уларнинг сафларини сийраклаштириб қўяётган эмиш...

Малика овозаларнинг қанчалик ростлигини Бобур саройида хизматда юрган невараси Баҳодирдан суриштириб билмоқчи бўлди. Баҳодир ҳафта-ўн кунда келавермагач, малика

«уни саройдан чиқаришмаса керак», деб ўйлади-ю, канизини подшоҳ маҳкамасига юборди. «Мен бетобман, неварамга рухсат берсинлар, мени келиб кўриб кетсин», деган маънода мактуб юборди.

Ўн етти ёшли Баҳодир форсчани ва санскритни яхши билар, Бобур учун зарур бўлган баъзи ҳужжатларни таржима қилар эди. Саройда бошқа таржимонлар ҳам бор эди. Баҳодирга кўп иш буюришмас эди-ю, лекин уни ўзича эркин ҳам қўйишмасди. Бобур уни қаттиқ қўриқлаб юришни буюрган эди. Бу қўриқчилар Баҳодирни ташқи хатарлардан эҳтиёт қилиб юргандай кўринсалар ҳам аслида улар шахзодани «Иброҳим тарафдорлари томондан уюштирилиши мумкин бўлган бирон фитнага бош қўшмасин» деб синчиклаб кузатишарди. Шу сабабли Баҳодирни саройдан кўп чиқаришмасди.

Бироқ эшик оға Муҳаммад Дўлдай малика Байданинг «Касалман, неварам келиб кетсин» деган мазмундаги хатини олгач, Бобурнинг «Маликани муътабар онамиздай эҳтиром қилинг» деган буйруғини эслади-ю, Баҳодирга жавоб берди. Фақат унинг ёнига аввалгидан икки баробар кўпроқ навкар қўшди-да, шу бугуноқ қайтиб келишни тайинлади.

Невараси келганда малика Байда дарё бўйидаги мраммар қўшқнинг нимқоронғи ички хонасида хасталардай шифтга тикилиб ётган эди. Йўлда иссиқдан терлаб-пишиб кирган неварасига ёнидан жой кўрсатди-ю, мажолсиз бир аҳволда ўрнидан туриб ўтирди. Неварасининг бўғриққан юзларига қараб ҳол-аҳвол сўрашди. Ёз бу йил ҳар йилгидан ҳам иссиқ келганини айтди.

— Фотиҳлар иссиққа бардош беролмай ўлаётгани ростми?— деб сўради.

— Бирда-ярим ўлаётганлари бор,— деди Баҳодир.

— «Ҳиндистонда турмаймиз, салқин жойларга қайтиб кетамиз» деяётганлари-чи?

— Подшоҳлари кетгани қўйгайми? Кўпчилик унинг изидан чиқмас экан. Ўзи ҳам жуда гапга уста нотик одам экан. «Кетамиз», деб юрганларни саройга тўплаб, шундай бир гаплашдики, ҳаммаси жим бўлиб қолди.

— Сен отангнинг қотилини... мақтаяпсанми?

Баҳодир эшикка хавотирли кўз ташлаб қўйди. У ўзи билан бирга келган ҳамроҳларидан хавотирда эди. Бунни сезган малика овозини пасайтириб сўради:

— Кетингга одам қўйганларми?

— Ҳа, ҳеч ким билан яккама-якка гаплашолмайман. Ҳамиша ён-веримда қўриқчилар... Ёмонласам, дарров етказадиганлар кўп.

— Кўркма, бу хонада фақат биз иккаламиз... Илгари бизга хизмат қилган одамлардан саройда ҳеч ким борми?

— Отамнинг вазири Маликдод Короний бор... Кейин... бизнинг кутубхонада ишлаган тўртта олим ҳам хизматга олинди. Билишимча, Бобур ҳиндистонликларни ўзига эл қилмоқчи, уларнинг ишончини қозонмоқчи. Шунинг учун отамнинг барча ошпазларини саройга тўплаб, тўрттасини ўзи учун танлаб олибди.

— Шу бизнинг ошпазлар пиширган овқатларни Бобур ҳам ермишми?

— Ҳа, кўрганлардан эшитдим. Бобур ҳиндистоний таомларни ейиш билан ҳам ўзини бизнинг элга яқин кўрсатмоқчи бўлса керак.

Малика илгари ўзининг итоатида бўлган ўша тўртта ошпаздан бирортасини қўлга олиш мумкинлигини ўйлади-ю, кутилмаган бир бардамлик билан ўрнидан туриб кетди. Унинг қалбини ўртаб юрган қайғу-аламлар энди бирдан янги йўл топгандай бўлди. Зўр интиқом туйғуси унинг ҳаёлларини бир нуқтага тўплаб, вужудига куч-қувват бергандай бўлди. «Агар Бобур ўлдирилса, унинг одамлари бу ерда туrolмайди: кетади, мамлакат яна ўзимизга қолади!»— деган ўй ҳам унинг ошпазларини қўлга олиш ҳақидаги қарорини мустаҳкамлади. Малика оғзини неварасининг кулоғига яқинлаштириб сўради:

— Ўша ошпазларни сен кўрдингми?

— Кўрдим.

— Уларнинг орасида Аҳмад чошнагир йўқми?

Баҳодир бувисининг авзойи ўзгарганидан алланечук чўчиб:

— Йўқ,— деди.— Аҳмад чошнагир Аградан Атовага кетган.

Малика Баҳодирнинг эшикка яна хавотир билан кўз ташлаб қўйганини кўрди-ю, кинояомуз илжайди: «Бу неварам бўшроқ, айгоқчиси ҳам кўп экан, сир бериб қўйса жувонмарг бўлади, мен ҳам ниятимга етолмайман», деди ўзича ва кўнглидаги қалтис ниятни унга билдирмай гапни бошқа ёққа бурди.

— Бизга шунчалик содиқ кўринган одамлар ҳозир душманларимизга хизмат қиляпти-я! Э, бевафо дунё! Маликдод Короний ҳам, ошпазлар ҳам ҳаммаси сотилган! Лекин сен... душманлар билан тил учиди муроса қилу дилингни отангга содиқ тут!

— Ҳали ҳам шундай, бувижон! — пичирлаб деди Баҳодир.

Невараси кетгандан кейин малика Байда хасталик тўшагини йиғиштирди, илгариги фиғон чекишлар ва қарғашларни ҳам бас қилди. Унинг фикру зикри — энг садоқатли ва тадбиркор одамларини ишга солиб, Бобурни захарлаб ўлдиришга қаратилди. Маликанинг атрофида фотиҳлардан қасос олишга ташна одамлар кўп эди. Бобур аскарлари билан тўқнашувларда бирининг акаси, бирининг иниси ўлган, бири илгариги макони ва мавқеидан ажралиб хонавайрон бўлган... Малика ана шундай қасоскорларнинг энг ишончлиларини излай бошлади. Бобур ишга олган тўрт ошпаздан бирининг ёлғиз иниси Панипат жангида ҳалок бўлган эди. Малика зимдан суриштириб буни билганда қувониб кетди. Бироқ ўзи бу ошпаз билан бевосита алоқа қилишни лозим топмади. Чунки маликани ҳамма танийди. Бобур одамлари сезиб қолишлари мумкин.

Илгари султон Иброҳимнинг саройида бу ошпазлар билан бирга ишлаган ва уларга қадрдон бўлиб қолган энг ишончли одам — Атовага кетиб қолган Аҳмад чошнагир эди. Малика Аградан анча узоқ бўлган Атовага махсус одам юбориб, Аҳмад чошнагирни ўз ҳузурига таклиф қилди.

Аҳмад чошнагир Аградаги ҳовлиси ва молу мулкидан айрилиб фотиҳларга қарши ғазабга тўлиб юрар эди. Малика Байда уни ўз парганасига ишга олди, уй-жой ва маош берди, сўнг аста-секин кўнглидаги ниятини айтди. Аҳмад чошнагир аввал «уддалай олмайман» деб кўрқди. Лекин малика унга далда берди, «иниси Панипатда ўлдирилган ошпаз билан гаплашиб берсанг бўлди, қолган ишни ўзимиз қиламиз», деди. Аҳмад чошнагир саройга қандай киришини билмас эди. Бунинг йўлини ҳам малика ўзи топди. Малика Байда неварасидан хабар олиш учун саройга бориши мумкин эди. Малика нафис шоҳи ва парчалардан совғалар тайёрлатди, сўнг бу совғаларни Аҳмад чошнагирга кўтартириб саройга борди... Малика подшо қабулига кириб чиққунча Аҳмад чошнагир эски қадрдони бўлган ўша ошпазни топган ва у билан эртаси куни саройдан ташқарида учрашишга келишган эди. Орадан бир ҳафтача ўтгач, Аҳмад чошнагир ошпаз билан тил бириктирганини маликага келиб айтди.

— У ҳам келгиндиларни даф қилишнинг йўлини билмай юрган экан. Подшоҳлари ўлса ҳаммаси даф бўлади деб ишонтирдим!

— Агар ҳамма иш ўйлаганимиздай бўлса, отасининг тахтини Баҳодиржон олади. Ўшанда сизга катта бир паргана берамиз. Ошпаз ҳам катта мукофот олади.

— Илоҳим шу ниятимизга етайлик! Ватанимиз бераҳм фотиҳлардан халос бўлсин!

— Омин!

Аҳмад чошнагирнинг сарой ошпази билан келишувига биноан, Бобурнинг овқатига солиниши керак бўлган захарни малика ўзининг энг ишончли бир канизидан бериб юбориши керак эди. Энди улар мана шу нозик ишни қайси канизга топширишни ўйлай бошладилар...

2

Уч ойдан бери муттасил кўтарилиб бораётган жазирама иссиқлар ҳиндча ашора деб аталадиган тўртинчи ойга¹ келиб жуда авжига чиқиб кетди. Ёмғир фаслининг бошланишига ҳали салкам бир ой бор. Тўрт ойдан бери нам кўрмай қуриб ётган ер иссиқнинг зўридан тарс-тарс ёрилиб кетган.

Жамна дарёсининг чап қирғоғига — илгариги ташландиқ ерлар ва чакалакзорлар ўрнига қурилаётган Зарафшон боғида ҳали соя жойлар кам. Бобур қурилишни отлиқ айланиб кўрар экан, узанги темирининг иссиғи этикдан ўтиб, оёғини жизиллатиб узиб олаётганини сезади. Олтин қопланган эгарнинг офтобда ялтираётган қошини ушлаганда чўғни ушлагандай бўлиб, қўли куяр эди.

Шундай бўлса ҳам у иссиқдан беҳаловат бўлаётганини кетидан эргашиб келаётган бекларига сездирмас эди. Чунки бу беклар ўлжа тушган хазиналардан катта-катта улушлар олгандан бери салқин жойларга кетиб, роҳат-фароғатда яшашига интилишар, Агра ва унинг атрофида янгидан иморат қуриб, боғ-роғ қилишга тоқатлари йўқ эди.

Кобул ва Ғазни каби салқин жойларга тезроқ қайтиб кетишнинг йўлини излаётган беклардан бири марғилонлик Хўжа Калонбек эди.

Бобур унга узун оқ яқтак кийган, кичкина оқ салла ўраган мўсафид меъморни кўрсатди-ю:

— Танидингизми? — деди.

— Андижонлик мавлоно Фазлиддинми?

— Ҳа, Кобулдан биз билан кетма-кет келсин деб тайинлаган эдим. Сангтарош ўғли билан етиб келиб, мана шу

¹ Ашора — жавзо ойига тўғри келади. Ҳиндистинда ёз фасли баҳорда хут ойдан бошланиб, тўрт ой давом этади. Кейин «Пашкол» деб аталадиган ёмғирлар фасли бошланиб, бу фасл мезон ойигача давом этади.

боғнинг тарҳини чизди. Шундоқ кекса одам идаган иссиқ-ларга наҳотки биз бардош бера олмасак?

— Лекин межозига иссиқ тўғри келмайдиган одамлар ҳам бор-да, ҳазратим. Кечаги боди самумда¹ менинг навкарларимдан учтаси тап-тап йиқилиб жон берди.

— Ажали етган бўлса, самум бир сабаб бўлган, холос,— деди Бобур ва таъзим қилиб пешвоз чиққан, мавлоно Фазлиддинга юзланди.— Ҳорманг, мавлоно... Қани арзингиз бўлса эшитгали келдик.

— Арзим шуки, ҳазрати олийлари, бизга фил билан ишлайдиган филбонлар керак. Боғ ўртасидаги мрамар қаср учун Деҳалпурдан жуда оғир тошлар олиб келмоқчимиз. Бундай тошларни катта аробаларга фақат филлар ортиб беришлари мумкин.

Бобур Панипат жангида филбонлари билан асир олинган сурув-сурув филларни эслади. Сўнг девонхонага ишга олинган ҳиндистонлик маслаҳатчиси Маликдод Коронийга юзланди:

— Жаноб Короний, ҳарбий филларни меҳнатга ўргатиш мумкинмикин?

— Мумкин, ҳазратим. Фил жуда зийрак жонивордир. Филбонлардан эшитганим бор. Филлар қонли жанглардан кўра осуда меҳнатга тезроқ ўрганар эмишлар.

— Бизнинг қўшинлар фил ёрдами билан жанг қилишга одатланган эмаслар. Шунинг учун Панипатда ўлжа олинган ҳарбий филларни қурилишларда ишлатмоқ мумкин. Жаноб Короний, бу фармонни шу бугуноқ барча филбонларга етказинг!

— Жоним билан.

Короний буйруқни тезроқ бажариш учун ҳозир кетмоқчи эди, Бобур уни тўхтатди:

— Яна шаҳару қишлоқларга махсус тавочилар юборинг. Биз Иброҳимдан ўлжа олинган бойликларни ободончилик йўлида сарфламоқчимиз. Шунинг барча вилоятларга маълум қилинг. Қурилишларда ишлаш учун сизга ўн беш минг коргар етарликми, мавлоно?

— Етарлик. Лекин ҳазратим мрамар қаср билан тош войни²ни бир йилда қуриб битиришни буюрган эдилар. Сангкорлик — тез бўладиган иш эмас...

— Сангтарошларни қўпайтирсак-чи? — деди Бобур.

— Мен ҳам шуни илтимос қилмоқчи эдим. Ҳиндистон-

¹ Боди самум — энг иссиқ гармсел шамол.

² Войни — катта ҳовуз.

нинг ҳавосига Ҳироту Самарқанддаги гишту кошиндан кўра тошу мармар мосрокдир.

— Ҳозир қурилишларимизда канча сангтарош уста бор, мавлоно?

— Агранинг ўзида олти юз саксон сангтарош ишлатмоқдамиз. Секрида, Деҳалпурда, яна бошқа жойларда — жами минг тўрт юз тўқсон бир сангтарош...

— Бу оз эмас! — деди Бобур. — Амир Темур Самарқандда энг катта иморатлар қурдирганда турли мамлакатлардан икки юз сангтарош бориб ишлаган экан. Тарихчи мулла Шарафиддин¹ буни фавқулодда мақтаб таърифлаган эканлар. Лекин Ҳиндистон хунарпешаларга шу қадар бойки, биз юзлаб эмас, минглаб уста-сангтарошларни ишга таклиф этишимиз мумкин. Жаноб Короний, бизнинг қаламравимиздаги барча шахарларга жарчилар чиқаринг. Ёлон қилсинларки, бизнинг қурилишларимизга келиб ишлайдиган коргару усталарга истаганларидан ҳам зиёда ҳақлар тўланур, имтиёзлар берилур. Дину миллат айириш йўқ. Барча усталар аввало худонинг, ундан сўнгра бизнинг ҳимоямизда бўлурлар!

Короний таъзим билан:

— Фармони олийга жонимиз фидо! — деди-да, отини буриб, Агра томонга йўл олди.

Бошқа бек ва мулозимлар тобора кучайиб бораётган иссиқдан бетоқат бўлиб, дарёда лангар ташлаб турган кемаларга қараб-қараб қўйишарди. Улар қурилишни кўриб бўлганларидан кейин подшоҳ билан бирга шу кемаларга чиқиб дам олишлари мумкинлигини билишарди. Шунинг учун қурилишга оид гаплар тугашини сабрсизлик билан кутишмоқда эди.

Лекин Бобур меъмордан бўлажак қаср билан дарё оралиғига тушадиган мармар ҳаммомнинг гумбази ва ичи қандай бўлишини сўради.

— Ичи худди Самарқанддаги Улуғбек мирзо ҳаммомидек сангфарш қилинур, — деди мавлоно Фазлиддин. — Лекин гумбази мирзо ҳаммомининг гумбазидан хийла улуғ бўлур. Деворлари қизил тошдан ишланур... Мармарнинг бир хосияти шуки, ёзда муздек салқинлик берур.

— Бўлмаса мармар иморатларни тезроқ қуришги, биз бу жазирамада куйиб кул бўлмайлик! — деди иссиқдан бўғриққан Калонбек.

— Мармар иморатлар тезроқ битсин десангиз, отдан тушиб ҳашар қилишинг, жаноб бек! — деб тегишди мавлоно.

Бобур унинг жавобидан мамнун бўлиб кулди-да:

¹ Яъни Шарафиддин Али Яздий.

— Қалай, мавлоно, иссиқ ўзингизни кўп қийнамадими?— деди.

— Қийнаса ҳам чидаймиз-да. Мана шундай катта обидаларни Андижонда курамен деб, қуролмадим. Ҳиротда курамен деб, қуролмадим. Чизган тархларим ўттиз йил сарғайиб ётди. Қарангки, бутун умр қилган орзуларим узоқ Аграга келганимда рўёбга чиқадиган бўлиб турибдир. Тақдиру насибим шунга тақозо қилса, иссиғи кўзимга кўринурми? Ҳиндистоний усталар салқин тутадиган мева шарбатларию енгил таомлар ейишар экан. Мен ҳам шунга ўргандим. Эрталаб салқинда туриб бир пахра¹ ишлаймен. Кун қизиганда бир пахра ётиб дам олғаймен. Иссиқнинг тафти пасайгач, яна бир пахра ишлагаймиз.

— Биз бўлсак, эртаю кеч сергўшт таомлар, қазию кабоблар еюрмиз,— деди Бобур Хўжа Калонга қараб.— Яна бу етмагандек, оловли майлар ичурмиз.

Хўжа Калон от устида офтобнинг тиғида туриб шундай терлаган эдики, юзи ва пешонасидан сирқиган тер томчилари мош-гуруч соқолидан оқиб, кўкрагига төммоқда эди.

Бобурнинг ўзи ҳам ҳар нафас олганда ичига ҳаво эмас, олов кираётгандай бўларди. У меъмор билан гапини тугатгач, отини дарёдаги кемалар томонга бурди-ю, елдириб кетди.

Отлар тез юрганда қаршидан шабада эсгандай бўлар ва нафас олиш енгиллашар эди. Шунинг учун Бобурнинг кетидан бошқалар ҳам отларини тез ҳайдай бошладилар. Шу тарзда дарё соҳилига яқинлашар эканлар, Хўжа Калоннинг навқари минган бадахшоний қора от суриниб йиқилиб тушди. Бадахшонлик навқар оёғини отнинг тагидан тортиб олди-да, юганини силкитиб, отини турғизмоқчи бўлди. Оғзидан қон аралаш кўпик келаётган от бир-икки талпиниб кўрди, лекин ўрнидан туролмади.

— Буни ҳам офтоб урди!— деди Хўжа Калон алам билан.— Кошки бу мамлакатда от топиш осон бўлса!

— Жаноби бек, бир от учун мунча изтироб чекманг, мен буюрай, навқарларингиз бизнинг тавиладан бир от олсин,— деди Бобур.

— Ғоят миннатдормен, ҳазратим! — деди Хўжа Калон-бек.— Лекин гап фақат отда эмас. Мен бу ўлимда ўз истиқболимни кўриб изтироб чекмоқдамен!

Бобур отдан тушди-ю, дарёда лангар ташлаб турган «Осойиш» нәмли икки ошиёнлик муҳташам кемани Хўжа Калон-бекка кўрсатиб ҳазиллашди:

— Ҳозир сизга мана бу истиқбол мунтазир! Юринг!

¹ Бир пахра — тўрт соат.

Қайиқларга мишиб кемага етганларида Бобур Хўжа Калонбекни кеманинг тумшуқ томонидаги хонаи хосга бошлади. Кема дарё бўйлаб сузиб борар экан, сувнинг шамоли энг аввал шу хонага тегар ва ажиб бир салқинлик берар эди.

Савдарлар дарёда совитилган поринж ва лиму¹ шарбатидан келтирдилар. Хўжа Калонбек муздай поринж сувидан бир чинни коса сипқарди-ю, нафасини сал ростлаб, Бобурнинг юзига қаради.

— Ҳазратим, сиз ҳам қорайиб, жуда озиб кетибсиз,— деди.— Бизга билдирмайсизу, лекин не чоғлик қийналиб юрганнингизни бошқалар сезмаса ҳам мен пайқаймен.

— Ҳа, энди... Сиз билан биз ўттиз йилдан бери биргамиз. Не ранжу не машаққатларни бошдан кечирмадик! Ўшал ғаму аламларга нисбатан ҳозирги азобларимиз — давосини тонса бўладиган дардлар-ку.

Хўжа Калонбекни яна тер босди. У қўйнидан ипак рўмолча олиб, пешонасидан кўзига оқиб тушган терларини арттар экан:

— Афсуски, ёшим кетиб қолди,— деди.— Йигитликда иссиқ-совуқни фарқ қилмас эдик. Ҳозир элликдан ошдик... Сезиб турибменки, Ҳинднинг боди хавосидан бир ҳафтада бир ёшга қаримоқдамен. Эски беклардан Қосимбек қавчин бор эди. Бу йил кексайиб, дунёдан кўз юмди. Бу аҳволда мен ҳам кўпга бормасмен, ҳазратим!

— Ундай деманг, жаноб Калонбек. Иссиққа ҳам одатланурмиз.

— Мовароуннаҳрдай салқин ўлкалардан чиққан одам ҳинд иссиғига ўрганишига ақлим бовар қилмайдир!

— Нечун! Асли Шаҳрисабзнинг лочин уруғидан бўлган Хисрав Дехлавий Ҳиндда етмиш йил умр кўрмиш. Бунисига не дейсиз?

Хисрав Дехлавий — Хўжа Калонбекнинг сеvimли шоирларидан эди. Дехлидан ўтганларида Калонбек ҳам Бобур билан бирга Хисрав Дехлавийнинг Низомиддин Авлиё мақбарасига қўйилган қабрини зиёрат қилган эди. Ўша ерда Калонбек Дехлавийнинг «рўй ба Ҳинд овардони соҳибдилон бечиз нест!»— деган машҳур сатрини эслаган, «биз ҳам энди Ҳиндга келган соҳибдилларданмиз» дегандек мағрурланган эди. У пайтда ҳали иссиқнинг тафти бунчалик баланд эмас эди, Хўжа Калонбекнинг Ҳиндистондан қайтиб кетиш истаги ҳам ҳозиргичалик кучли эмас эди. Бобур Дехлавийни

¹ Л и м у — лимон.

эслатиш билан Калонбекнинг аввалги аҳдида туролмаётганини айтмоқчи эди.

Хўжа Калонбек буни пайқаб, томоқ қирди:

— Ҳазратим, Деҳлавий улуғ одам бўлган.— деди.— Менинг улуғ одамларга тенглашадиган қудратим йўқ экан...

— Сиз яна аввалги эътиқодларингизга зид гапирмоқдасиз. Мақсад улуғ одамларга тенглашмоқ эмас, балки уларнинг пек ишларини давом этказмоқ эди-ку. Бизни мафтун қилган ҳодиса — Хисрав Деҳлавийнинг қалбида туркий улуснинг қудрати билан ҳинд элининг даҳоси бир-бирига пайванд бўлиб, улуғ натижа берганлиги эмасми?

Хўжа Калонбек эътирозга сўз тополмай тасдиқ маъносида бош ирғади ва дастурхонда турган лиму шарбатига қўл чўзди.

Улар Деҳлавий ҳақида илгари ҳам кўп сўзлашган эдилар. Лахўр, Деҳли ва Аграда Деҳлавийнинг ҳинд тилида битган кўшиқларини мусулмонлар ҳам, оташпараст ва будпарастлар ҳам тўю томошаларда куйлаб юрганларини гувоҳи бўлдилар. Деҳлавий Бобурдан икки юз йил олдин ўтган бўлса ҳам унинг ғазаллари, куйлари, кўшиқлари худди бугун битилгандай янги ва таъсирли эди. Бобур Деҳлавийнинг Ҳиндистондаги барча элларни аҳилликка даъват этиб кетганини, агар бу мамлакат дину иллат низоларидан баланд турса ва тарих майдонига яқдилу яқтан бўлиб чиқса, жаҳоннинг энг улуғ қитъасига айланиши мумкинлигини айта бошлади.

Бобурнинг бу гапларини айтишдан мақсади — Хўжа Калонбекни Ҳиндистонда олиб қолиш эди. Лекин Хўжа Калонбек дўстлари даврасида чоғир ичиб ўлтирганда: «Шу бу йил Ҳинддан кетмасам юзим қора бўлсин!» — деб қасам ичган эди. Энди у қасамхўр бўлиб қолмаслик учун ҳам Ҳиндистондан кетишга интилмоқда эди. У Бобурнинг нутқи ва маънаси жуда зўрлигини яхши билар, Бобур келтирган кучли далилларга жим туриб қулоқ солар, лекин эътироз учун қулай пайт пойлар эди.

— Ҳинднинг қадимий маданиятини Беруний қанчалик улуғлаб ёзганини билурсиз,— сўзида давом этди Бобур.— Бу элда истеъдоду салоҳият конлари ҳозир ҳам беадад. Фақат инқирозли даврлар бу конларни беркитиб кетмишдир. Биз бу конларни қайтадан очмоғимиз мумкин. Ҳунармандлар беҳисоб. «Иш топиб берсангиз қилғаймен», деб мунтазир турган қурур-қурур¹ захматкаши бор. Хазиналарини ўзингиз кўрдингиз. Аҳолисию бойлигининг улканлигини яна

¹ Қурур — юз лак, яъни ўн миллион.

шундан билса бўлурки, бизда йўқ рақамлар буларда бор. Юз курур — бир арб¹. Юз арбни карб дерлар. Юз карбни нил² дерлар. Юз нил — падам³. Биргина Дежли вилоятидан ҳар йили давлат хазинасига тушадиган даромад уч куруру олтмиш тўққиз лаку эллик минг тангадан ортиқ. Бундай вилоятлар Ҳиндистонда озми? Сиз шу вилоятлардан қайси бирини маъқул кўрсангиз, шунисини берайлик.

— Ҳазратим, менга Ғазнини иноят қилсангиз, маржама-тингиздан умрбод миннатдор бўлур эдим.

— Яна Ғазни дейсиз-а! Ғазнида нечоғлик тангдастлик билан кун кечирганларимиз эсингиздан чиқдими? Маҳмуд Ғазнавийнинг бузилган бандини тиклаймиз деб уддасидан чиқолмаган эдик. Одам топсак, маблағ топилмас эди, маблағ топсак, яна бирон нарса етишмас эди. Бу ерда ҳаммаси бор. Кучу қудрат уммондай чексиз!

— Лекин бу уммон мендек... мусофирни ном-нишон қолдирмай ютиб юборишидан қўрқамен!

Хўжа Калон «мендек мусофирни» деб фақат ўзи ҳақида гапираётгандай кўринса ҳам аслида у Бобур билан келган барча ватандошларини назарда тутмоқда эди. «Бу улкан мамлакатга биз урвоқ ҳам бўлолмаймиз, катта халққа ара-лашиб йўқ бўлиб кетамиз, ундан кўра оладиган ўлжамизни олиб, шимолга тезроқ қайтиб кетайлик», деб юрган беқлар ёлғиз Хўжа Калон эмас эди. Бобур шуни ўйлади-ю:

— Мақсад ном-нишон қолдириш бўлса,— деди,— одам шу мақсадга ўзини фидо қила билиши керакми-йўқми? Биз ўр-ганган салқин боғлар, равон ариқлар бу ерда йўқ. Узум йўқ, қовун йўқ, ях йўқ. Яхши от йўқ. Султон Иброҳим-дек подшонинг саройида шаму шамдон ишлатилмас экан. Юз-икки юз чароғбон давтийлар тирик шамдон бўлиб хиз-мат қилар эканлар. Чап иликларига сепоя бор чироғни тутиб. Ўнг иликларига ёғ солинган кадуни кўтариб, улуғларига чироғ керак бўлганда ўтруларида шамдонга ўхшаб турар эканлар... Мен буюрдимким, ҳунармандларга бизнинг шам-донлару қандилларни кўрсатиб, шундайларини ясатсинлар. Бир ой ўтмай саройга етгулик шамдону қандил тайёрланди. Шамгарлик ҳам жорий этилди. Ток эктирдим, насиб қилса ҳинд узумини ҳам ермиз. Бугун кўриб келган боғимизнинг ўрни қанчалик бесафо ерлар бўлганини кўрган эдингиз. Ўл-масак, ушбу ерда Самарқанду Ҳиротнинг энг машҳур бо-ғу чорбоғларидан ҳам гўзалроқ боғлар, кўшклар барпо этил-

¹ А р б — миллиард.

² Н и л — триллион.

³ П а д а м — квадриллион.

ганини кўрурмиз. Самарқанду Хиротда инқирозга юз тутган маданиятни биз энди хинд маданиятига қўшиб юксалтира олак... Шунинг ҳаммаси биздан ному нишон бўлиб, авлодлар хотирасида қолмасми, бек?

— Ҳазратим, ниятларингизнинг улуғлигига тасанно айтурмен. Лекин ватанимизда қилмаган нек ишларни бегона юртда қилсак, ким бунинг қадрига етур? Не қилсангиз ҳам биз нелгинди фотиҳлармиз. «Булар йигитларимизни жангда ўлдириб, кишваримизни зўрлик билан олган», деб таъна қилмасларми? Пайтини топганда қасос олмасларми?

Бобур оғир «уф» тортди-ю:

— Не қилай?— деди.— Мен шу орзуларни ватанимда рўёбга чиқарай деб озмунча олишдимми?

— Сиздан олдин Ҳиндистонни фатҳ этган Маҳмуд Ғазнавий катта ўлжалар олиб, керакли ҳунарпешаларни Ғазнига олиб кетиб ишлатган. Ана!..

— Наҳотки сиз менинг Маҳмуд Ғазнавийга ўхшашимни истарсиз?

— Густоҳлигим учун маъзур тутинг!

— Ахир биз мамлакатни талаб, бойликларинию ҳунарпешаларини олиб чиқиб кетадиган қароқчилар эмасмиз-ку!

— Бир шеърингизда ўз еримизни қўйиб Ҳинд сари юзланганимизни юзи қаролик деб атаган эмасмидингиз, ҳазратим?

— Атаган бўлсам, энди юзимизга теккан қарони ювиб ташлаш ҳаракатидамен! Агар биз ҳам Хисрав Дехлавийдек шу мамлакатга фарзанд бўлсак, бутун ақлу заковатимизни унга бахш этсак, аминменки, келажак авлодлар олдида юзимиз ёруғ бўлғусидир!

Хўжа Калонбек мунозара йўли билан Бобурга сўзини ўтказолмаслигини энди аниқ сезди.

— Ҳазратим, сизнинг метин иродангиз бор,— деб энди Бобурни мақтаб юмшатишга тириша бошлади.— Сизнинг бошингизга тушган кулфатлар бошқа одамнинг бошига тушса, бардош беролмас эди. Лекин сиз ҳаммасига бардош берибгина қолмай, яна шундай улкан ишлар қилмоқчисизки, бунга жаҳон таҳсин ўқиғусидир. Йиллар ўтган сари мен сизнинг улуғ бир сиймо эканлигингизни тобора аниқ сезмоқдамен. Мана ҳозир ҳам сизнинг ёнингизда худди улкан тоғ чўққисининг домонасидаги кичик бир теначадек, ўзимга-ўзим ожиз кўриниб кетдим.

Хўжа Калонбек овози ҳаяжондан титраб, кўзи аламданми, ўксинишданми чакнаб гапирмоқда эди. Буни кўрган Бобур унинг кўнглини кўтаргиси келиб, Дехлавийнинг бир сатрини эслатди:

— «Асли кас аз кас набошад кам чу жумла з ода манд»¹.

— Лекин беш қўл баробар эмас, ҳазратим... Менинг аҳ-волим ўзимга маълум. Сиз кўтарган улуг юкка елкамни тутсам, майиб бўлурмен. Мени беш-олти йил тирик юрсин десангиз, рухсат беринг, Ғазнига борай. Маҳмуд Ғазнавийдан қолган ўша эски бандни тиклатиб, қўлни обод қилай. Бу ишнинг бутун савобини сизга бағишлай.

Бобур бу сўзларга эътироз қилмай, ўйланиб қолди. Хўжа Калонбек кўзлаган мақсадига етказадиган йўлни энди тошганини сезди-ю, шоша-пиша сўзида давом этди:

— Ҳазратим, илтимосимни қабул этинг! Умримнинг охирида дуои жонингизни қилиб ором олай. Ўлсам, жасадимни Ғазнига қўйсинлар. Ҳарна ватанимизга яқинроқ бўл-гаймен.

Бобур Хўжа Калонбекнинг кўзи намланганини кўрди-ю, ўзининг Ҳумоюнга тайинлаган бир гапи эсига тушди: «Урушда қон кечиб юрибмиз, мабодо вафот этсам, мени Кобулга элтиб кўмгин» деган эди Бобур. Хўжа Калонбек кетса, улар яна дийдор кўриша олармикинлар? Шу ўй таъсирида Бобурнинг ҳам кўнгли бузилиб, овози товланиб эшитилди:

— Кетингиздан бошқа бек-навкарлар эргашса... мен ким билан қолгаймен?

— Ҳамма беклар билан ўзим гаплашурмен, «подшоҳ Ғазнидаги бандни тиклаш учунгина рухсат бердилар», дермен. Ҳеч ким менга эргашмайдиган қилиб кетгаймен, бунга ишонинг!

Бобур Ҳиротга, Табризга, Балхга, Андижону Тошкентга одамлар юборган, «кимда-ким бизга хайрихоҳ бўлса, Ҳиндистонга келсин, улүфалар берурмиз, не истаклари бўлса адо этурмиз» деган қадағалар йўллаган эди, Кобулдаги до-руғалар келувчиларнинг сарфу харажатлари учун махсус маблағлар олган эдилар.

— Бўлмаса, сиз ҳам... қаердаки қизилбошлар билан шай-бонийзодалардан безган олиму ҳунарманд, беку навкар кўр-сангиз, бизнинг номимиздан айтинг, келсинлар!— деди у Хўжа Калонбекка.

— Жоним билан айтурмен, токи мендек кетганларнинг бири ўрнига юзи келсин!

¹ Аслида одам одамдан кам эмас, чунки ҳамма ҳам Одам Ато фар-зандидир.

² Қ а д а ғ а — чақириқ хат.

Хўжа Калонбек Бобурга бу гапларни чин дилдан айтгандай кўринган эди. Аммо Ҳиндистондан кетишга ижозат олгандан кейин Бобурга ўзини аянч кўрсатиб ялингани учун алами келди. У бек дўстлари олдида ичган қасамини қойиллатиб бажарганини ҳаммага намоён қилгиси, Ҳиндда қолаётганларни куйдириб кетгиси келди-ю, Аграда яшаган уйнинг деворига бир байт шеър ёзиб қолдирди:

Агар бахайри саломат гузар ан Синд кунам,
Сийрўй шавам, гар хавойи Ҳинд кунам¹

Хўжа Калонбекнинг уйига кўчиб ўтган Ҳиндубек бир кун кечки пайт бу шеърни ёзиб келиб Бобурга кўрсатди ва байтти ўқиган одамлар ҳамма жойда шов-шув гап қилиб юрганини айтди.

Бобур Хўжа Калоннинг «Ҳеч ким менга эргашмайдиган қилиб кетгаймен!» деган сўзларини эслади-ю:

— Бу кудурат нечун?— деб хайрон бўлди.— Нахотки, Хўжа Калон бошқа бекларнинг ҳам Ҳинддан кетишини истаса?!

— Билмадим, бу ерда қолган бекларнинг фидойилиги Хўжа Калонбекнинг аламини келтирганми?

— Ҳа, ўзи шундай фидойи бўлмаганининг алами бу!— деди Бобур ва қарсак чалиб муншини чақирди.

Мунши келгунча ўрнидан туриб, хонаи хоснинг у бурчагидан-бу бурчагига асабий бир тарзда бориб келди. Бир кўнгли Хўжа Калоннинг кетидан чопар юбориб, уни Ғазни ҳокимлигидан бекор қилишга мойил эди. Лекин шунча йиллик кадрдонидан айрилиш, кейин Ғазнидаги вайрон бўлиб ётган бандни тиклаш учун яна бошқа одам излаш ташвиши уни бу фикрдан қайтарди.

Нима қилиш керак? Хўжа Калоннинг шеъри Ҳиндистондан кетгиси келиб юрган беку навкарларни баттар кўзғатиб қўйиши аниқ. Агар бу байт учун Хўжа Калон жазоланса, шеърнинг таъсири янада ошиши аниқ.

— Бу байт деворга ёзилганича турибдими?— сўради Бобур Ҳиндубекдан.

— Ўчиртириб ташладим.

— Бекор қилибсиз, бек. Сиз ўчирганингиздан сўнг бу байт одамларнинг хотирасига янада маҳкамроқ ўрнашур, Шеърнинг таъсирини фақат шеър билан кесмоқ мумкин.

¹ Яхшилик ва саломатлик билан Синд дарёсидан ўтиб олганимдан кейин, агар яна Ҳиндни ҳавас қилсам юзим қаро бўлсин.

Қўлида қалам-қоғози билан хипча бўй, ўрта яшар мунши таъзим қилиб кирди.

— Ёзинг! — буюрди Бобур унга.

Мунши гилам устига чўкка тушиб, жуздонни тиззасига қўйди, қоғозни кафти билан текислаб, ёзишга тайёрланди.

Бобур бадиҳа оҳангида гапирди:

— Юз шукр де Бобурки, кариму гаффор,
Берди сенга Синду Ҳинду кишвари бисёр.

«Кишвар» сўзи вазнга тушмай сакталиқ берганини сезди-да, иккинчи сатрни бошқача қилиб такрорлади:

Берди сенга Синду Ҳинду мулки бисёр.
Иссиқлиғига гар сенда йўқдур тоқат.
Совуқ юзини кўрай десанг Ғазни бор.

Мушоиранинг нозик қоидаларига мослаб бирпасда яратилган бу бадиҳа Ҳиндубекнинг завқини келтирди. У деворга совуқ гап ёзиб кетган Хўжа Калонбекнинг башараси ҳам Бобурга нечоғлиқ совуқ кўринганини ўзича тасаввур этиб, беихтиёр кулиб юборди. Бобур отган ўқининг нишонга текканини шу завқли кулгидан сезди-ю, енгил бир сўлиш олиб, муншига буюрди.

— Бадиҳани уч нусха кўчиринг. Бир нусхасини Хўжа Калонбекнинг кетидан жўнатсинлар. Ҳиндубек, бир нусхасини сиз олиб, Калонбекнинг байтини ўқиган беку навкарларга беринг. Кўрсинлар-чи, мушоирада ким ғолиб?

Бу бадиҳани ўқиган кўпчилик бек ва мулозимлар Хўжа Калонбекни кулги қилишиб, «Совуқ юзин кўрай десанг Ғазни бор!» — дейдиган бўлишди. Иссиқдан тоқатсизланиб нолийдиганларга ҳам: «Совуқ юзин кўрай десанг Ғазни бор!» — деб истехзо қилиш расм бўлди.

3

Панипатда оғир ярадор бўлган Тоҳир уч ойгача ўрнидан туролмай ётди. Саройдан юборилган табиб унинг этидаги яраларни дуруст муолажа қилди-ю, лекин қовурға ва қўл суякларининг майда-майда бўлиб синган жойларини эпакага келтиролмади. Синган суякларнинг оғриғи туну кун тинчлик бермас эди. Тоҳир Аграда ўша эски қадрдони Мамат билан кичик бир ҳовличада турар, «энди бу ердан ўлигим чикса керак», деб ўйлар эди.

Шунинг устига Кобулдан мавлоно Фазлиддин Тоҳирнинг мухандис ўғли Сафарбекни бошлаб келиб қолди. Улар қурилишда бирга ишлайдиган хинд сангтарошларидан сўраб-суриштириб, агралик бир жарроҳни топиб келдилар. Жарроҳ камбағалпарвар одам эканини эшитган мавлоно Фазлиддин жиянини унга таништирар экан:

— Соҳиб Байжу,— деди.— Тоҳир ҳам аслида захматкаш бир деҳқон эди. Мен бунинг навкар бўлишига қарши эдим...

— Ўшда сиз ҳақ гапни айтган экансиз, мулла тоға,— деди Тоҳир.— Мен бераҳмлар орасида юриб бераҳм бўлиб кетган эканмен... Бўлмаса, йигирма йиллик қадрдоним Маматга шунчалик шафқатсизлик қилармидим? Мана, ҳаммасининг қасоси қайтди. Ҳали ҳам Мамат одамгарчилик қилди. Бўлмаса отларнинг оёғи тагида қолиб мажақланиб кетардим!

Мавлоно Фазлиддин Маматнинг бу яхшилигини келган кунлари эшитган ва уни боғ қурилишига ишга олган эди. Мавлоно буни табибга форсча аралаш урдуча тилида ҳикоя қилиб берди-да:

— Жияним ҳам энди беклигу навкарликни ташламоқчи,— деди.— Сизу биздек тинч меҳнат билан кун кўрмоқчи. Бунга ёрдам берайлик!

— Биламан, сиз бизнинг юртимизга ободончилик қилиш учун келгансиз, соҳиб,— деди Байжу.— Сиз илтимос қилганингиз учун жиянингизга қўлимдан келганича ёрдам бераман!

Табиб айтганини қилиб Тоҳирни бир ой астойдил даволади. Байжунинг сезгир қўллари қайси суяк қаеридан қандай синганини беҳато аниқлаб, ҳаммасини мохирлик билан жўй-жўйига қўйиб чиқди. Бир ой давомида Тоҳир унинг кафти оқиш-қўқимтир, усти қора майин панжаларига худди ўз қўлларига ўргангандай ўрганиб кетди. Кейин тузалиб ўрнидан турган кун Байжунинг шу панжаларини қўлларига олиб, кўзига сурди:

— Айтинг, соҳиб, мен бу яхшилигингизни қандай қайтарай?

— Жарроҳнинг қўлини шунчалик эъзозлаб кўзга сурганингиз — яхшилигимнинг қайтгани эмасми?

— Йўқ, мен сиздан умрбод қарздормен!

— Ким билсин, балки мен ўзим ҳозир бىр қарзимни узгандирман?

Мавлоно Фазлиддин ҳам шу ерда турган эди. У табибнинг алланимани «Айтайми, айтмайми?» — деб иккиланаётганини кўрди-ю:

— Соҳиб Байжу, сиз нечун ўзингизни қарздор сездингиз? — деди.

— Бунинг тарихи узоқ... Фақат илтимос қиламан, бошқа ҳеч кимга айтмангизлар.

— Илтимо сингизни бажонидил қабул қилдик!

— Менинг бир филбон акам бор. Иброҳим Лоди замонид акам Аградан иш тополмай Панжобга кетган эди. Ўша ерда қўшинларингиз қанча одамларимизни қирганини эшитипти. «Буларни ватанимга киргизмайман», дебди-ю, қўшинларингизни адаштириб, чангалзор ботқоқликка бошлабди.

— Э, бўлди, бўлди! — деди Тоҳир филбон раҳнамо Лаъл Чандни эслаб. — Бизнинг иккита навкаримизни филига урдириб, майиб қилиб кетган эди... Аммо мен ўшанда унинг довиураклигига қойил бўлган эдим. Бир ўзи бир қўшиндан қўрқмай олишган эди-я!.. Биз уни чангалзор, ботқоқликдан чиқолмайди, деб ўйлаган эдик. Чиқибдими-а? Ҳозир тирикми?

— Тирик, лекин энди Аграга келишдан қўрқади... Акам ўша навкарларингни майиб қилгани... яхши бўлмаган... Эҳтимол, мен соҳиб Тоҳирни даволаганим — ўша гуноҳимизни ювиб кетгандир?

— Сиз акангиз қилган ишни гуноҳ деб атаманг, соҳиб Байжу! — эътироз қилди мавлоно Фазлиддин. — Ватанни бундай баҳодирона ҳимоя қилиш гуноҳ эмас, балки шарафдир!

— Яхши сўзларингиз учун раҳмат, соҳиб! Аммо ўша иши туфайли акам ҳамон ишсиз. Ўз ватанида бекиниб қочиб юрибди. Бола-чақаси оч-яланғоч.

— Акангиз қурилишда ишлаганми?

— Ҳа, фил билан доим қурилишда ишлар эди.

— Бўлмаса менга учрасин, иш топиб берай. Биз ҳатто ҳарбий филларни меҳнатга ўргатмоқдамиз-ку!

— Акам бунинг ҳаммасини эшитган. Иброҳим Лоди беки-тиб ётган олтинларни сизлар энди қурилишга сарфлаётганларингиздан мамнун. Аммо қўлга тушиб қолишдан қўрқади.

— Балки акангизнинг Аграга келмагани тўғридир. Бу ерда беку мулозимлар кўп, таниб қолиб, бир бало қилишлари мумкин. Акангиз аъёнлар кам борадиган чет жойдаги қурилишга келсин. Мен жума куни Дехалпурга бораман. Истаса, ўша жойга борсин.

— Соҳиб, сизни подшоларингиз ҳурмат қилар эмишлар, энг катта қурилишларнинг саркори экансиз. Подшоҳдан акамнинг гуноҳини сўраб, шафоат олиб беролмайсизми? Ўшанда биз бежавотир юрар эдик.

Мавлоно Фазлиддин ўйланиб турди-ю:

— Сизни бунга ишонтиролмайман, Байжу, — деди. — Чунки подшоҳнинг жонига қасд қилган одамларни аёвсиз жазолаш ҳақида махсус фармон чиқарилган. Бобур мирзо шу фармонга имзо чекканлар. Ўзлари соҳибдил шоир, маърифатлик инсон бўлсалар ҳам подшоҳлик билан фотиҳлик у кишини мураккаб зиддиятларга дучор қилган. Ўшанда Лаъл Чанд уни аскарлари

билан адаштириб, йўқ қилиб юбормоқчи бўлгани эсига тушса, қаҳр устида қатл эттириб юбориши мумкин.

— Бу рост,— деди Тоҳир тоғасининг сўзини маъқуллаб.— Ҳатто мен... энди саройга хизматга қайтишдан чўчиймен. Бобур мирзони чин дилдан яхши кўрсам ҳам унинг шафқатсиз муҳитидан узоқроқ юргим келади.

— Ундоқ бўлса, энди менинг акам нажотни фақат сиздан кутади, мавлоно Фазлиддин!

— Мен унга қўлимдан келган яхшилиқни қилишга тайёрмен. Келгуси жума Деҳалпурга келсин. Фақат... ўзини... Сизнинг номингиз билан атасин. Иложи бўлса қиёфасини сал ўзгартирсин.

— Акамнинг ўзи ҳам соч-соқол ўстириб, таниш қийин бўлган қиёфага кирган.

— Жуда соз. Балодан ҳазар дейдилар. Фили билан қурилишда ишлаб ўзини ўнглаб олсин, сўнгра яна кенгашиб кўрурмиз!

Табиб Байжу акаси Лаъл Чандни келгуси ҳафтада Деҳалпурга мавлоно Фазлиддин олдига юборадиган бўлиб кетди

4

Аграда сершамол ёмғир фасли бошланган саратон кунларининг бирида Тоҳир саройга — Бобурнинг ҳузурига келди.

Девони хоснинг мармар айвонида ўтирган Бобур уни зўрға таниди — Тоҳирнинг соч-соқоли оқариб кетган. Юзидаги чандикдан ташқари, энгаги аралаш бўйнига гўё катта бир ямок тушган.

— Хайрият, тузалиб кетибсиз,— деб Бобур унинг кўнглини кўтарадиган гап излади.

— Ҳа, мулла тоғам жонимга ора кирдилар...

— Энди қалай, аввалги хизматга қайтмоқчимисиз?

Тоҳирнинг ўнг қўли заиф, бўйни ҳам дуруст қайрилмайдиган бўлиб қолган, ён-верига қарамоқчи бўлса, бутун гавдасини буриб қарар эди.

— Мен энди кўрчиликка ярамасмен.

— Бўлмаса ички беклар қаторида юраверинг.

— Лекин мен бекликни эпломмадим... Панипатда ўзимдан ўтди.

— Нечун?

Тоҳир жанг бўладиган куни азонда қандай сабуҳий қилганини, отдан қандай йиқилганини ва қадрдон навқарини қандай шафқатсизларча урганини бир-бир айтиб берди.

— Бек бўлдим, деб мағрурланиб золим бўлиб кетган экан-

мен. Ўлим тўшагида ётиб ўзимни танидим. Менга беклик... тўғри келмас экан, ҳазратим. Ўзим ҳам энди майиб одаммен. Ижозат беринг, мулла тоғам тарҳини чизган боғда сувчими, гулчими бўлиб қолай... Бир вақтлар Қувада кичкина богчамиздаги дов-дарахтларни суғоришни яхши кўрар эдим...

Бобур айвоннинг жимжималик мраммар устунлари ортидан сузиб ўтаётган ёмғир булутларига тикилиб оғир хўрсинди. У Тоҳирга яхшилик қилмоқчи бўлиб беклик унвонини бергани, ахир оқибатда ёмонлик бўлиб чиққан эди.

— Сиз-ку, бекларнинг касофат муҳитидан сувчи бўлиб қутулмоқчисиз. Лекин мен қандоқ қутулгаймен?)

Бу савол Тоҳирни шошириб қўйди:

— Сиз... подшоҳсиз, ҳазратим. Беклар сизнинг итоатингиздалар.

— Итоатимда бўлиб итоат этдирурлар... Буларнинг шундай гирдоблари борки, сал беҳабар қолсангиз фарқ қилиб юборурлар... Мен Исфарада сизга айтган гапларим эсингиздами?

— Мен у сўзларингизни ҳеч вақт унутмасам керак...

— Ўшанда сиз, умрбод ҳузурингиздан кетмасмен, деган эдингиз-ку!

— Ҳазратим, мен у вақтда соғлом йигит эдим... Ҳозир ажволим бу...

— Саройда менинг хилватхонамга қарайдиган дуруст одам йўқ. Шу ишни сиз олсангиз.

Хилватхона — Бобурнинг ёлғиз ўтириб ижод қиладиган жойи эканини Тоҳир билар, Бобур ҳаётининг энг дилкаш томони унинг ижодида эканини сезарди. Лекин саройнинг мураккаб, бўғиқ муҳитидан кўнгли қолган Тоҳир боғда, тоғасининг ёнида ишлашни истарди.

— Ҳазратим, қўлингизни маъзур тутинг. Мен боғда ишлаймен, деб аҳд қилган эдим...

— Боғда ҳам хилватхона бўлур,— деди Бобур.— Қуриб битирилса унга ҳам сиз қарагайсиз. Маъкулми?

Энди «йўқ» дейишнинг иложи қолмади. Бобурнинг сўзини икки қилиб ўрганмаган Тоҳир қўлини кўксига қўйди-ю, розилик берди.

* * *

Агра қалъасидаги хилватхона девони хос билан подшоҳ ошхонасининг оралиғида эди. Бир ойдан бери давом этаётган ёмғир фасли ҳали-бери тугайдиганга ўхшамас, баъзи кунлари беш-ўн мартадан жала қўйиб ўтарди. Ёгин-сочинли кунларда Бобур кўпроқ Аграда ишлайди. Хилватхона — ичма-ич қурил-

ган уч хонадан иборат. Бу хоналарнинг майда-чуйда ишларини тўртта савдар қилади, лавозими «офтобачи» деб аталадиган Тоҳир уларга бошлиқ. Энг ички хонада қоғоз, қалам ва Бобур тайинлаган китоблар туради. Бериги хонага дастурхон солиниб, Бобур хуш кўрадиган гулоб, норинж шарбати, анба меваси¹, қайла², танбул барги³ ва мағзи қизил фуфал ёнғоғи қўйилган.

Бир кун Тоҳир дастурхонга энг тоза Ғазни чоғиридан ҳам бир кўзача қўйдирган эди, Бобур:

— Чоғир мажлиси хиргоҳда бўлди, бас,— деди.

Шундан кейин Тоҳир хилватхонага ичкиликни йўлатмайдиган бўлди.

Бобур ички уйда туши билан ишласа Тоҳир ҳам тонг отгунча ухламай, унинг тинчини кўриқлаб чиқар эди. Унинг ташқи хонада уйғоқ ўтиришини биладиган Бобур гоҳо ичкаридан чиқиб келиб, ғалати саволлар берарди:

— Бадахшонда арчазорларда нафис бир ўт бўлур эди, эсингиздами? Даҳқат атрофида, Осмон Яйловда ҳам мўл эди. Ранги ҳаворанг мен бир дафтарга ёзиб қўйган эдим... Кобулда қолганми? Йўқ.

— От ейдими?

— Ҳа, яхши ейди. Бўйи паст-паст, ердан тўп-тўп бўлиб чиқур.

— Бетакамикин?

— Ҳа, ҳа, бетака ҳам дерлар, лекин асли бутака! Бутталаб ўсгани учун бутака дер эканлар. Мен бунинг важҳи тасмиясини⁴ Бадахшонда эшитган эдим.

Бобур қидирган сўзини топганидан мамнун бўлиб ичкарига кириб кетди. У Тоҳир билан бирга кўрган жойлари, бирга бошдан кечирган воқеаларининг мана шунақа тафсилотларини сўраб, аниқлаб олган кунлари Тоҳирнинг ҳам кўнгли кўтарилиб юрарди. У Бобурнинг ўз кўрган-кечирганлари ҳақида катта китоб ёзаётганини эшитган эди. Энди Тоҳир ҳам шу китобнинг ёзилишига бир қадар иштирок этаётгани учун «ҳар қалай, бу ерда ўтган кунларим зое кетмайдиганга ўхшайди», деб кўярди.

Бир кун тун яримлаганда Бобур хилватхонадан хомуш бўлиб чикди-ю, ҳазин товуш билан бир тўртлик ўқиб берди:

¹ Анба — ананаснинг бир тури.

² Қайла — банан.

³ Танбул барги — апельсин баргига ўхшаб кетади. Фуфал ёнғоғи билан бирга оғизга солиб чайналса қайф беради, тишни мустаҳкамлайди.

⁴ Важҳи тасмияси — шундай деб аталиш сабаби, этимологияси.

Кўпдан бериким ёру диёрим йўқдир,
Бир лаҳзау бир нафас карорим йўқдир,
Келдим бул сори ўз ихтиёрим бирла,
Лекин боруримда ихтиёрим йўқдир.

Бу сатрлар Тоҳирнинг соғинч туйғуларини шундай қўзгатдики, кўпдан бери кўрмаган Робиясини кўмсаб, ўлкаси тўлди.

— Болалар билан қачон дийдор кўришаркинмиз-а, ҳазратим?

— Йўллар ҳали нотинч. Ҳарам учун хатар кўп. Бу ёқда Рано Санго биздан норизоларни атрофига тўплаб, куч йиғмоқда эмиш...

«Биздан норизолар» деган сўзлар Тоҳирга мана шу қалъа ҳовлисида ўтган куни юз берган бир фожиани эслатди.

Хинд усталари, пашкол пайтида ер қазиб бўлмайдди, ишни тўхтатайлик, дейишди. Лекин саркор бунга кўнмади: «Биз войинни олти ойда қуриб битиришга сўз берганмиз, ёмғир фасли икки ой давом этса, кейин қачон улгургаймиз? Подшо ҳазратлари бизни ёлғончи демасларми? Ёмғир писандмас! Қайтага салқин бўлди! Ишлайверинглар!» Хуллас, саркор ер қазувчиларни мажбур қилиб ишлата бошлади.

Муттасил ёғиб турган ёмғирлар ерни ивитиб, хилвирлатиб қўйган эди. Ўтган куни ер қазувчилар ўн қулоч чуқурликдаги чоҳнинг тубида ишлаётганларида жардай чуқур ҳавзанинг бир томони ўпирилиб тушди-ю, тўрт одамни босиб қолди. Уларни лой аралаш тупроқ тагидан кавлаб олгунларича учтаси аллақачон жон берган, тўртинчиси тирик бўлса ҳам бели синиб, майиб бўлган эди.

5

Хилватхонадан сал нарида — сарой ошхонасида овқат пишириб юрган Баҳлул исмли ўрта яшар бир ошпаз ҳам войиннинг чоҳи тагида жон берган ер қазувчиларни кўрган эди. Бу фожиа ошпазга Панипат жангида фотиҳларнинг қиличидан ҳалок бўлган йиғирма яшар суюкли инисини эслатган ва қалбидаги интиқом туйғусини яна жунбишга келтирган эди.

Аҳмад чошнагир малика Байданинг канизларидан бирини орага қўйиб, заҳарни шу Баҳлулга етказиб берган эди. Малика Байданинг яна бир канизи келиб, режани ҳозирги пашкол кунларда — Бобур бирон ёққа юришга кетиб қолмасидан олдин амалга ошириш кераклигини айтган эди.

Тўрт букланган оқ қоғоз ичида зираворга ўхшаб турган заҳар икки мисқолгина бўлса ҳам Баҳлулга зўр бир пулат қуролдек оғир туюларди. У жангда ватанини ҳимоя қилиб жон берган инисининг ўчини шу қурол ёрдамида олишни ва фотиҳларни бу ердан тезроқ қувишни истар эди. Агар Бобур ўлдирилса, фотиҳлар Ҳиндистонда туролмай кетиб қолишларига Аҳмад чошнагир Баҳлулни ишонтирган эди.

Подшоҳ ошхонасида ҳар бир таомни текшириб татиб кўрадиган махсус баковуллар бўлар эди. Қаттиқ ёмғир ёғаётган куни кечқурун шу баковуллар ароқ ичиб, маст бўлиб қолишди.

Қозонда карунди дарахтининг нордон мевасидан қўшиб тайёрланган мазали қайла пишиб турибди. Бобур бу қайлани яхши кўришини Баҳлул билар эди. У секин қўйин чўнтагига қўл солиб, тўрт буклоғлиқ, қоғозни олди. Ошхонада ҳеч ким йўқ. Баковуллар нариги хонада маест бўлиб ашула айтишяпти, шамол аралаш ёмғир ёғяпти.

Баҳлул заҳарни қозонга солмади — баковулларнинг ароққа қайлани газак қилиш одатлари бор, еб кўришса, заҳарланиб, билдириб қўйишлари мумкин. Шунинг учун ошпаз заҳарни Бобур овқат ейдиган чинни лаганга — юпқа лочира нон устига сеп бошлади. Бирдан шамол ташқи эшикни қарсиллатиб ёпти. Баҳлулга кимдир келаётгандай туюлди-ю, заҳарнинг қолганини қозон тагида ёниб турган оловга отди. Кейин чинни лагандаги заҳар сепилган лочира устига тез-тез қайлани солди.

Орадан сал вақт ўтгач, савдар кирди, қуён гўшtidан қилинган қовурдоқни ва қайла солинган чинни лаганни Бобур овқат еб ўтирган хўракхонага олиб чиқиб кетди.

Аҳмад чошнагир бу заҳарни таъмидан билиб бўлмаслигини, унинг таъсири аста-секин билинишини айтган эди. Баҳлул сир очилгунча қўрғон дарвозасидан чиқиб кетиш умидида эди. Аммо у ошхона эшигидан чиқаётганда ширакайф баковуллардан бирига дуч келди.

— Қани, қуён гўшtidан бизга ҳам қолдирдингми?

— Қайла бор, соҳиб.

— Йўқ, қуён қовурдоғи керак!

— Қовурдоқ оз эди, ҳаммасини ҳазратга бериб юбордим.

Қайла ей қолинг, газакка яхши.

— Йўқ! Қуён кўп эди-ку! Нега бизга қолдирмадинг?

— Ҳаммасини қовурганим йўқ эди...

— Бўлмаса ҳозир бизга қуён гўшtidан қовуриб бер! Тез!

Баковулнинг йўғон гавдаси эшикни тўсиб турарди.

Ошпаз орқага қайтди ва саросима ҳаракатлар билан ёғ доғлаб, қуён гўштини қовуришга тайёрлай бошлади.

Ёмғирли тун саройни чулғаб олган. Шу пайт бирдан хос

навкарлар табибга югуриб, баковуллар бир-бирини чакириб, ошхонанинг ич-таши туполон бўлиб кетди. Хилватгоҳда утирган Тоҳир ҳам хўракхонага чопиб келди. Бобур устма-уст қайт қилиб, юзи кўкариб кетган. У нафаси қайтиб, ташқарига интилди, аммо икки қадам кўйгунча бўлмай гандираклаб йиқила бошлади. Тоҳир чопиб бориб, уни қўлтиғидан суяб олди. Табиб Юсуфий Бобурнинг нариги қўлтиғига кирди. Жонсарақ бўлиб қолган савдарларга буюрди.

— Ичкарига жой қилинг!

— Равонга! — деди Бобур ютоқиб.

Унинг кўнгли беҳуд, боши гир-гир айланар, нукул ҳаво етишмаётгандай бўлар эди.

Бобурни равонга суяб чиқариб ётқиздилар. Табиб юракка қувват берадиган доридан ҳидлатди.

— Сизга не бўлди, ҳазратим? Майни кўп ичдингизми? Ё маъжун аралашдимиз?

— Овқатда бир сир бор! — деди Бобур ва яна кўнгли айниб, чинни тоз устига энгашди. — Ошпаз тафтиш қилинсин!

Шу пайт қайладан еган яна икки мулозим Бобурга ўхшаб қайт қилаётгани маълум бўлди. Баковуллар қайла пиширган Баҳдулни тутиб, саройнинг энг қаттиққўл терговчисига топширдилар. Терговчи уни турли қийноқларга солиб сўроқ қилишга киришди.

Бобур туни бўйи ўлим билан олишиб чиқди. Ҳар қайт қилганда юрак-бағри узилиб, парчаланиб чиқаётгандай оғрир, гоҳо нафаси ичига тушиб кетар эди. Табиб унинг тепасидан кетмай:

— Шифо топасиз, бердам бўлинг! — деб тасалли берар эди.

Тоҳир ҳам табибга қарашиб, туни бўйи мижжа қоқмай чиқди. У Бобурнинг бошини тутар, тер босган юзини, бўйинларини елпир эди. Бобурнинг захар азобидан тўлғанаётганини кўрган сари, ўзи ҳам захар ичгандай қийналар эди. Тонг пайти Бобур алаҳсирагандай бўлиб, Ҳумоюн билан Моҳим бегимни йўқлай бошлади.

Шимолий чегаралар яна нотинч бўлиб қолгани учун Бобур Ҳумоюнни ўтган ойда Бадахшонга қайтариб юборган эди. Моҳим бегим ҳамон Кобулда эди.

— Ҳумоюн мирзога чопар юборайликми? — деб сўради Тоҳир.

Бобур кўзини очиб, хиёл ўзига келгандек бўлди. Чопар Кобул ва Бадахшонга етиб боргунча камида бир ой вақт ўтади. Бу орада бирон кориҳол бўлса на Ҳумоюн, на Моҳим бегим етиб келолмасликлари аниқ. Бобур ғамгин бош чайқаб:

— Фойдаси йўқ, — деди.

Унинг аҳволи тобора танг бўлаётганини кўрган Тоҳир:

— Ҳазратим, бардам бўлинг! — деб илтижо қилди. — Биз сиз билан неча ўлимлардан қолганмиз! Дардга бўй берманг, енгасиз!

— Лекин... бундай фалокат... биринчи учраши!..

Бобур беҳол қўзғалиб яна тоз устига энгашди, оғриқ зарбидан кўзларига дув-дув ёш келди. Сўнг бошини яна ёстикқа қўйиб кўзини юмиб ётганда равонга терговчи кирди.

Юсуфий унга:

— Қисқа сўзланг, фақат ахборот! — деб шипшиди.

Терговчи Байдани ҳам сўроқ қилганини, нариги учовига шу бадбахт малика бош бўлганини, лекин ташқи душманлар билан, жумладан, Рано Санграм Синх билан алоқаси борлигини рад этганини, бошқа саволларга жавоб беришдан бош тортганини айтиб берди.

— Мальунлар!..— деди Бобур ётган жойида ғазабдан овози қалтираб.— Мен уларга шунчалик ишониб... илкидин таом есам... иззат-икром қилсам!..

— Ҳазратим, бу иблисларни минг қийноққа солиб ўлдирмоқ керак!

— Нариги учовини... қоидага биноан қатл эттиринг!.. Байда... кейин!

— Бош устига! — деб терговчи чиқиб кетди.

Қоидага биноан, подшоҳнинг жонига қасд қилганлар энг оғир қийноқларга солиб ўлдириларди. Ошпаз Бахлулнинг териси тириклай шилиниб олинди. Жаллодлар Аҳмад чошнагирнинг аввал қўл-оёқларини кесиб, кейин бошини танасидан узиб, вужудини парча-парча қилиб ташладилар. Икки орада воситачи бўлиб турган ва усталик билан саройга заҳар олиб кириб, ошпазга берган канизак қутурган филнинг оёғи тагига ташлаб ўлдирилди.

Малика Байда энг қаттиқ ҳибсда сақланар, энди одамлар унинг қандай қатл этилишини кўтар эди.

Табиб Юсуфий Бобурнинг ҳаёти учун икки кечаю кундуз тинмай курашди. Тоҳир ҳам икки кечаю кундуз беморнинг ёнидан жилмай, хизматини қилди. Ниҳоят, учинчи кун табиб:

— Худога минг қатла шукр, ҳазратим, бир ўлимдан қолдингиз! — деди.— Онадан қайта туғилгандай бўлдингиз. Энди озгина илиқ сут ичинг. Сўнгра ухланг!

Бобур бир пиёла илиқ сут ичгач, кўзини юмиб, ёстикқа бош қўйди. Лекин бошидан ўтган ўлим даҳшати ҳамон ҳаёлидан нари кетмасди. Унинг жони шунча вақт қил учида осилиб турганини ўйласа, беихтиёр ваҳми келарди. Шу қил узилса ўлим деб аталадиган зулмат қаърига қулаб тушишини икки кун давомида муттасил ҳис қилиш унда яшаш истагини беҳад кучайтириб юборган эди. Ҳаётнинг бир лаҳзаси, бир учқуни

дунёнинг барча бойликларини тожу тахтларидан ҳам азиз оқанлиги унга энди астойдил сезилди. Унинг азобдан толиққан вужуди ҳамон беҳол бўлса ҳам руҳида шмадир ўзгаргандек ва дунё кўзига бошқачароқ кўрингандек бўларди. Ҳар бир кишининг фақат биттагина умри бор экан ва умрининг ҳар лаҳзаси шу қадар ширин экан. Бобурнинг ёшига етмай ўлиб кетганларга осон тутиб бўладими? Иброҳим Лоди ундан тўрт ёш кичик эди. Малика Байда буни унутиши ва Бобур яхши муомала қилгани учунгина уни кечириб, фарзанди ўрнида эъозлаши мумкинмиди? Жангда эришган ғалабалари унга энг мушкул ишларни ҳам осон кўрсатиб қўйгани учун бўлса керакки, Бобур Иброҳим Лодининг онасига шунчалик ишонган ва унинг амрида бўлган ошпазларни ишга олган экан-да! Бу ошпазлар тайёрлаган ҳиндча таомларни ейиш билан эл-улуснинг кўнглини олмоқчи бўлгани ҳам, унинг ўз кучига ортиқ даражада ишонганидан келиб чиқмаганмикин? Қолбуки, кечаги душманларни бугун дарҳол дўстга айлантириш осонми? Хусусан, Байдадек фарзанд доғида қуйиб юрганлар ёки ошпаз Баҳлулдек инисининг қасдини олмоқчи бўлганлар билан муомалада эҳтиёткорроқ бўлиши керак эмасмиди? Кобулда Моҳим бегим айтган изтиробли гаплар яна унинг ёдига тушди. Бегона юртдан борган фотиҳни осонликча кечирмасликлари, унинг қиличидан пайдо бўлган яралар асрлар давомида битмаслиги рост бўлса... Бобур бу мамлакат халқининг кўнглини олиши учун қанча кўп йиллар керак бўлади? Бунга унинг умри етармикин? Умуман, бу ўзи эришиш мумкин бўлган мақсадми ёки сароб?..

Бу ўйлардан Бобур яна боши берк кўчага кириб қолгандай бўлди, келажак кўзига қоронғи кўриниб кетди.

Фақат танасига аста-секин қайтиб келаётган ҳаётий кучлар шу зулматни ёриб ўтиб келаётган ёғдулардай илиқ туюларди. Ўша кеча Бобур яхши ухлади. Эртаси қуни табиб унинг томиридан кўпроқ қон олмоқчи бўлди.

— Заҳарланган ҳаром қонни чиқариб юборгаймиз, ҳазратим. Яна бирор ҳафта қимирламай ётмоғингиз керак.

Бобур бунга эътироз қилди. Бусиз ҳам унинг дармони кетиб қолган эди. Агар табиб кўп қон олса узоқ ётиши аниқ. Қолбуки, «Подшоҳ ўлим тушагида ётган эмиш!», «Умид йўқ эмиш!» деган овозлар тарқалган, қулай фурсат кутаётган ғанимлар жонланиб қолган эди. Беклар ҳам Бобурнинг тезроқ кўпчиликке кўринишини истар эдилар.

Орадан яна икки кун ўтгач, Бобур тантанали маросимларда киядиган кийимларда девонномга чиқди. Баланд тахтнинг икки томонида тизилиб турган юздан ортиқ амирлар, саркардалар, вилоят ҳокимлари таъзим бажо келтириб бўй эгдилар.

Бобур тахтга шошилмай чиқиб ўтиргач, иккита навкар малика Байдани пойгаҳдаги эшикдан олиб кирди.

Кампир ҳали ҳам бошдан-оёқ оқ кийиб, ўғли Иброҳимга аза тутиб юрар эди. Фақат қадди аввалгидан бир оз букчайганроқ. Лекин кўзлари Бобурнинг юзига тушганда унинг оғир касалга ўхшаб сарғайиб қолганидан қаноат ҳосил қилгандай мамнун йилтиради.

Эшик оға Муҳаммад Дўлдай маликани сўроққа тутиб, суиқасдга яна кимлар иштирок этганини суриштира бошлади.

— Суиқасд эмас, бу интиқом! — деди малика. — Подшоингиз тўккан қонларнинг қасоси бу! Менга ёрдам берган ошпаз ҳам, Аҳмад чошнагир ҳам, каниз ҳам ботир қасоскорлар эди. Ҳаммаси мардларча жон берди. Энди навбат меники. Мен ўғлимнинг доғида куйиб кул бўлганман. Энди қўлларингдан келса кулимни кўкка совуринглар!

Малика саройда ҳамма тушунадиган форсий тилда гапирмоқда эди. Аъёнлар нафасларини ичларига олиб, ерга қарашди. Малика бир ўлимни бўйнига олиб келган, энди ҳар бир сўзни ўққа айлантириб ёвига дадил отар, Бобурнинг ғазабга тўлиб, жаллод чақиришини, қуролсиз онага қарши барча қуролларини ишга солишини истарди. Ўшанда маънавий ғалаба малика томонида бўлар, унинг довураклиги оғиздан-оғизга ўтиб, одамларнинг эҳтиромини қозонар эди. Буни Бобур ҳам сезди-ю, ўзини босиб, Маликдод Коронийга қаради.

— Бу қандай ёсуманлик! — деди Маликдод Короний Байдага. — Шунчалик ўч олиш ниятингиз бор экан, аълоҳазратнинг иноятларини нега қабул қилдингиз?

— Ниятимга етиш учун шундай қилишим керак эди!

— Аълоҳазрат сизни «Мўътабар онамиздек эъзозланг!» деганларида йиғлаб миннатдорчилик билдирганингиз бизнинг эдимиздан чиққан эмас!

— Мен у пайтда нафратим зўридан йиғлаган эдим! Ўғлимнинг кушандасига она бўлишдан қийналиб кўзим ёшланган эди!

— Ё алҳазар! Ахир сиз ҳам Муҳаммад умматисиз, муслимасиз-ку! Ўғлингиз буларга қарши неча баробар катта куч билан чиққанини билмасмисиз? Булар мағлуб бўлса ўғлингиз ёвларининг минг жонларидан бирини ҳам тирик қўймас эди. Сиз султон Иброҳимнинг қанчалик шафқатсиз бўлганини билар эдингиз. Агар сизда инсофу имон бўлса, қўлида қиличи билан очиқчасига жанг қилган саркардага яшириқча заҳар бермас эдингиз!

— Мен аёл кишиман, қилич кўтариб жанг қилолмайман! Ана ўша заҳар — менинг қиличим эди. Фотиҳлар Панипатда минг-миг одамларнинг ўлимига сабаб бўлди! Бу мамлакатнинг яна кўп жойларига ажал уруғини экди! Мен каби минг

лаб оңалар ҳозир мотам тутиб, кўз ёши тўкиб юрибди. Қанча-қанча келинчаклар бева қўлиб, ўзларини эрларининг жасадлари билан бирга оловда ёндирипти! Мен берган заҳар ана ўша ажалнинг уруғидан тайёрланган эди! Унга бева-бечораларнинг аччиқ кўз ёшлари ҳам қўшилган эди!

Маликанинг сўнги сўзлари фотиҳ бекларга ҳам тегиб кетди. Серсоқол бир бек ўрнидан сакраб туриб, Бобурга таъвим билан мурожаат қилди:

— Ҳазратим, бу ялмоғизнинг тилини оғзидан суғуриб олмоқ керак! Шундай малъунлиги устига яна бунча гап!

— Майли, мени қиймалаб ташласинлар! — деб қичқирди Байда. — Мен қўрқмайман!

Бобур Байдани беклар истагандек қийноқларга солиб ўлдиртирса эл-улус нима дейишини ўйлар экан, «лоп» этиб Ҳиротдаги Хадича бегим эсига тушди. Мақкорликда у ҳам Байдадан қолишмас эди, невараси Мўмии мирзонинг ўлимига сабаб бўлгани кўпчиликка маълум эди. Шунга қарамай, Шайбонийхон уни Мансур бахшининг ихтиёрига топшириб, дахшатли қийноқларга солгани жуда кўп одамларнинг нафратини келтирган эди. Бобурнинг ўзи бундан бир ҳафтагина олдин ҳилватхонада хогира ёзиб ўтирганда Шайбонийхоннинг бу ишини жирканиб қаламга олган эди. «...Беш кунлик ўтар дунёда Шайбонийхон мундоқ аблаҳона ишлари билан ёмон от қозонди» деган сатрларни ўз умр китобига битган Бобур энди мана бу қуроқсиз онага қандай чора кўриши керак? Қандай қилса одамларнинг нафратига эмас, хурматига сазовор бўлади?

Беклар ҳамон Байданинг ўлдирилишини талаб қилмоқда эдилар:

— Бу ялмоғизни қутурган филнинг оёғи тагига ташлаб қатл эттирмоқ керак!

— Ёки оёқ-қўлини чирмаб боғлаб, баланд минора устига ётқизиб қўймоқ даркор — гўштини қузғунлар еб, кўзларини чўкиб кетсин!

Маликага зимдан тикилиб турган Бобур сўнги таклифлардан Байданинг ранги ўчиб, юзи кўкимтир тусга кирганини кўрди. Шунда Муҳаммад Дўлдайнинг ишораси билан беклар жим бўлдилар. Бобур малика тушунадиган форсий тилда:

— Жаноб беклар таклиф қилган жазолар барчаси асосли,— деди.— Бироқ хиёнатчи маликага буларнинг ҳаммасидан ҳам оғирроқ бир жазо бор. Бу хонимнинг галига қараганда, ҳамма етиму есирлар учун жони ачир эмиш, заҳарни ўшаларнинг кўз ёшларидан тайёрлаган эмиш! Бироқ бунинг ўғли Иброҳим Лоди эмишга озмунча зулм ўтказганми? Озмунча одамни етиму есир қилганми? Иброҳим сабабчи бўлган ички

урушларда ҳар йили қанча одам ҳалок бўлган эди, жаноб Короний? Сиз билсангиз керак?

— Ҳазратим, менда ҳисоботи бор: сўнги уч йил давомида султон Иброҳим бошлаган ички урушларда биздан юз йигирма минг одам ҳалок бўлмишдир.

— Уч йилда бир юзу йигирма минг! — хитоб қилди Бобур.— Иброҳим Лоди эса ўн йилдан ортиқ тахтда ўлтирган! Ҳиндистонда одам кўп. Юз минги ички урушда ҳалок бўлса, Иброҳим яна юз мингини пулга ёллаган. Агар Иброҳимнинг онаси бўлмиш бу хоним ўлган навкарларгаю уларнинг етим-есирларига астойдил жон куйдирса, нечун юз минглаб одамларнинг беҳуда ўлиб кетишларига йўл қўйган? Нечун ўглини бундай ножўя қирғинлардан қайтармаган?!

— Мен фақат она эдим, подшоҳ ўғлимга амр-фармон беролмас эдим! — деб малика Байда энди ўзини ҳимоя қила бошлади.

— Ножўя ички қирғинларни тўхтатишга амр-фармон бермоқ учун мана, биз бел боғладик! — деди Бобур.— Тангридан умидимиз борки, бу улуғ мамлакат энди ягона марказий давлат атрофига жипслашгусидир. Биз Ҳиндни ободу қудратли қилмоқ орзусидамиз. Бизга ҳамкору ҳамнафас ҳинд беклари, фузалолари, хунарпешалари кўп. Бизни захарлаб ўлдирмоқчи бўлган бу маккор хоним учун энг оғир жазо шуки, биз мана, тирикмиз! Бу хонимнинг ўзию ўғли қилолмаган улкан ишларни биз қилмоқдамиз!

Маликдод Короний бирдан енгил тортиб:

— Ҳазратим лутф қилдилар! — деди.

— Бу малика,— деб девом этди Бобур,— шу даража бевабечорага жонкуяр бўлса... Абдукаримбек!

Байдага яқин бир жойда ўтирган шиғовул сакраб ўрнидан турди. Бобур унга буюрди:

— Бу маликанинг барча молу дунёсини мусодара қилиб, Жамна бўйида бир букъаи хайр¹ қурдилинг. Барча хизматкорлари ўша букъада хизмат қилсин, маликанинг бутун бойлиги, молу дунёсини етим-есирга хайр-эхсон қилиб улашсинлар.

— Бош устига! — деб Абдукарим бу фармонни таъзим билан қабул қилди.

— Маликани то умри етгунича тирик сақлаш ҳам сизга топширилур, жаноб Абдукаримбек!

— Тирик?! — ҳайрон бўлиб сўради шиғовул.

Бошқа аъёнлар ҳам таажжубланаётганини кўрган Бобур овозини кўтариброқ гапирди:

¹ Букъаи хайр — хайр-эхсон уйи.

— Малика бизнинг бундан кейинги зафарларимизни ҳам кўрсин. Ёмонликка яхшилик қилиш мард кишининг қўлидан келишига амин бўлсин. Агар маликада виждон бўлса, ўгли қилмай кетган ишларни биз қилганимизни кўриб виждони азоблансин. Агар виждони бўлмаса, ичида фақат бахиллик чаёнлари бўлса, бу чаёнлар ўзини чақиб ётаверсин. Маликага бундан ўзга жазо муносиб эмасдир!

Бек ва аъёнларнинг пичир-пичирлари орасидан аллақимнинг:

— Ҳазратим тантилиқ қилдилар! — деган қувончли хитоби эшитилди.

Ўз ўлимини ҳам ўткир бир қуролга айлантирмоқчи бўлиб келган малика Байда энди бу қуролидан айрилганини сизди. Шу пайтгача у ажали етганига шубҳа қилмас эди. Энди бирдан яна яшаш умиди пайдо бўлди. Маликанинг ўлим совуғидан музлаган қалбига ҳаётнинг илиқ нафаси тегди-ю, кўнглини бўшаштириб юборди.

Малика юзини қўллари билан тўсиб, елкалари силкина-силкина йиғлай бошлади.

СЕКРИ.

ҚАЙТА КЎЗ ОЧГАН БУЛОҚ

1

Бобурнинг махсус таклифи билан Ҳиротдан Аграга келаётган мавлоно Хондамир, шоир Шиҳоб Муаммий ва мударрис Иброҳим Қонуний уч ойга яқин йўл юрдилар.

Бадваҳима Хайбар довонидан ўтиб, серсув Синд дарёсидан кечиб, чангалзор ўрмонларни оралаб борар эканлар, мавлоно Хондамир оламнинг нақадар улканлигини энди биринчи марта астойдил ҳис қилди. Ҳафталар, ойлар давомида отмиқ сафар қилиб охирига етиб бўлмайдиган бағри кенг ўлкалар ҳаммаси энди яхлит бир давлат бўлиб бирлашганлиги, Балхдан Кобулгача, ундан Лахўр ва Деҳлигача ҳамма жойда Бобурнинг муҳри босилган фармонни бетўхтов адо этишларидан сезилар эди. Бу фармонга мувофиқ Хуросон ва Мовароуннаҳрдан, Бобурнинг таклифи билан келаётган илму санъат аҳлини, ҳунарпешаларни барча вилоят ҳокимлари, барча қўриқчи аскарлар ва бекат назоратчилари қўшни давлат элчиларига кўрсатиладиган иззат-икром билан кутиб олиб, кузатиб қўйишлари керак эди. Йўлларда ҳали қароқчилар тугатилмаган, тартиб ўрнатилмаган нотинч шаҳар ва қишлоқлар бор эди. Хондамир ва унинг ҳамроҳларини бундай жойлардан «бадрақа» деб

аталадиган икки юз-уч юз кишилик кўриқчи аскарлар ўтказиб кўйишарди.

Карвонсаройларда ҳам уларни «подшоҳнинг хос меҳмонлари» дейишиб, энг яхши хоналарга жойлаштиришар, қўлларидоги қоғозларига биноан кундалик таомлари учун бепул гуруч, гўшт, ёғ беришар, тағин майда харажатлари учун махсус улуфа ҳам тўлашарди. Чарчаган от-уловларини алмаштиришлари керак бўлиб қолса, ёмчилар боқувдаги от-уловларидан уларга биринчи навбатда беришар эди. Кобулдан Дехлигача бўлган минглаб чақирим йўл бўйидаги карвонсаройлар ва ёмлар Бобурнинг ҳаракатлари билан шунчалик обод ва шунчалик яхши ишлаб турар эди.

Хондамир йўлларда, бекатларда Ҳиндистонга бориб келаётган элчилар, сайёҳлар ва савдогарларни кўп учратарди. Бултур Аградан элик чақиримча ғарбдаги Секри деган жойда Бобур Рано Санго билан урушиб, Панипатдагидан ҳам улканроқ ғалабага эришгандан кейин уни астойдил тан олиб, элчи юбора бошлаган подшоҳлар кўпайиб қолган эди. Хондамир Лахўрда учратган қизилбошларнинг элчиси Шоҳ Тахмасп I¹ номидан ғалати совғалар олиб бормоқда эдилар. Бу совғалар орасида оқ туянинг зар уқали кажавасида парваришлаб олиб кетилаётган иккита гўзал черкас қизи ҳам бор эди. Шоҳ Тахмасп бу қизларни Бобурнинг ҳарамига атаб юборган эди.

Хондамир Дехлидан шимолроқдаги бир бекатда самарқандлик ва тошкентлик элчиларни ҳам учратди. Секридаги ғалабанинг шуҳрати атроф мамлакатларга ёйилганидан кейин Бобур Ҳиндистонда тузган янги давлатни унинг ашаддий душманлари бўлган шайбонийзодалар ҳам тан олган эдилар. Ҳозир Самарқанд тахтида ўлтирган Кўчкинчи хоннинг элчиси Бобурга Самарқанднинг сояки майизларидан, Конибодомнинг субҳони ўрикларидан, Бухоронинг ўткир майларидан, Мовароуннахрнинг бошқа ноёб неъматларидан етти туяга совғасалом юклаб, ёнига икки юзта яхши отни ҳам тортиқ қилиб кўшиб келтирган эди. Бобур бу элчини ўзининг Жамна бўйида қурдирган янги Ҳишт Биҳишт боғида хонлар ўтирадиган оқ кигиз устига ўтказиб, камоли эҳтиром билан қабул қилган эди. Бобурнинг қабулидан ва совға-саломларидан мамнун бўлиб қайтаётган хон элчиси Хондамирга мақтанди:

— Э, мавлоно, биз Ҳиндистонда кўрган хирмон-хирмон олтинларни ҳали ҳеч ким кўрмагандир. Бобур мирзо қуйма олтиндан қилинган тахтда ўлтирибдир. Тахтнинг пастига катта гилам тўшалган экан. Вилоят ҳокимлари ҳар йили

¹ Тахмасп I — Шоҳ Исмоилнинг ўғли. 1524 йилда Шоҳ Исмоил вафот этгач, Тахмасп унинг ўрнига шоҳ бўлади.

берадиган олтинларини шу гиламнинг устига келтириб тўқдилар. Бирпасда олтиндан катта хирмон кўтарилди.

Бобур шайбонийводаларнинг олтинга суқ одамлар эканини билгани учун элчининг кўзи олдида атайлаб шундай хирмон кўтарганини Хондамир ич-ичидан сезиб кўлди:

— Жаноб элчи бу хирмондан капсан олмадиларми?

— Подшоҳ бизга қимматбаҳо саруполар кийдирди. Гилам устидаги олтиндан ҳазрат Кўчкинчихонга атаб совға берилди. Олтин тангаларни санаб ҳам ўлтирмадилар. Икки юз эллик мисқолни бир кумуш тош билан тортиб бердилар-қўйдилар.

— Икки орада бирон шартнома тузилдими?

— Ҳа, бемалол борди-келди қиладиган бўлдик. Савдо-сотик тикланди. Алоқалар илгаригидан яхшироқ равноқ топғусидир. Биз булардан ипак, зиравор олурмиз. Буларга ҳўлу қурук мевалар, от-уловлар сотурмиз... Йўли узоқ бўлса ҳам карвонларимиз иштиёқ билан келиб кетади. Чунки Бобур мирзо бутун қаламравида тамға¹ солиғини бекор қилмишлар. Ўзбек, туркман, тожик, ҳинд, араб, ажам, форс — қўйингки, ҳамма бани башар² бу оғир солиқдан халос бўлиб, даромадлари ошибди. Ҳунарманду савдогарлар ҳам шунисидан жуда мамнун. Фақат Бобур подшонинг бир амри бизга маъқул келмади.

— Қайси амри? — қизиқиб сўради Хондамир.

— Бутун мамлакатаида май ичиш ман этилмишдир. Бобур мирзонинг ўзи ҳам «минбаъд ичмаймен», деб бутун эл олдида тавба қилибдирлар. Базмлари ичкиликсиз... муздаккина!

Кўчкинчихоннинг элчисини кўнгилсизлантирган бу янглик Хондамирнинг руҳини кўтарди. Ҳусайн Бойқарони ва унинг ўғилларини ичкилик балоси қай даражада хароб қилгани ҳали мавлононинг эсидан чиққан эмас эди. Бундан тўққиз йилча бурун Бобур Ҳиротга иккинчи марта борганда Хондамир унинг ҳам майхўрликка ружу қила бошлаганини кўрган. «Наҳотки, бу нодир сиймо ҳам бошқа кўп теурийлар сингари истеъдодини ичкиликка бой берса!» — деб ташвишланган эди. Элчининг ҳикояси унинг мана шу ташвишини тарқатиб юборди.

Хондамир бу узоқ ва машаққатли сафарга Бобурни орқа қилиб чиққан эди. Ёши элликдан ошаётган олим бу узоқ юртлардан Ҳиротга соғ-саломат қайта оладими, йўқми, ҳали ўзи учун қоронғи эди. У Бобур туфайли мана шу қоронғилиқни бўйнига олиб келмоқда эди. Энди йўлларда Бобурнинг иродаси ва ақл-заковатидан далолат берадиган нимақки учраса, ҳам-

¹ Тамға — қўшимча даромад солиғи.

² Бани башар — одам фарзанди.

маси мавлононинг қалбидаги машъум қоронғиликни қуваётгандай бўлар ва ёруғ бир истикболга ишонч уйғотар эди.

Хондамир Аграга келиб кирганда дарё бўйига қурилган Ҳишт Биҳишт ва Зарафшон боғларини, мрамрларига чиройли гуллар солиб ишлашган тош иморатларни, томлари майсалар билан безанган тиллакори толорларни¹, чаман-чаман гуллари кўзни қамаштирадиган гулзорларни кўрди. Бу улугвор гўзалликлар мавлононинг кела-келгунча кўрган ва эшитганларига қўшилди-ю, у Бобурни аввалгидан бошқача фавқулодда қудратли бир қиёфага киритиб тасаввур эта бошлади...

* * *

Лекин Бобур сўнгги йилларда кўп касал бўлиб, жуда озиб кетган, жуссаси хийла кичрайиб қолган эди. Хондамир унинг ўзини қанчалик олдириб қўйганини Секри тоғига сайрга чиққанларида офтоб ёруғида жуда аниқ кўрди. Бобур Секри тоғининг мўъжазлиги ва текис жойга тушганлиги Ўшдаги Буратоғни эслатиши ҳақида гапирар, тоғ этагидаги кўл ичига қурилаётган тошсупани кўли билан кўрсатар, пастда қулф уриб ўсган ям-яшил боғ ва дарахтлар орасидан кўриниб турган янги иморатлар қандай барпо бўлганини хикоя қиларди.

Хондамир эса унинг суяги бўртиб қолган озғин юзига, кўз атрофлари ва пешонасидаги қават-қават ажинларига, уйқусизликдан ичига ботиб кетган қовоқларига қараб, ич-ичидан унга куюнар эди.

Тоғдан кўл томонга тушиб бораётганларида Бобур Хондамирнинг бу куюнишини сезгандай бўлиб:

— Менинг тақдирим ғалати, мавлоно,— деди.— Атрофимни обод қилганим сари ўзим сўлиб бормоқдамен.

— Унчалик эмасу... ҳар қалай, ўзингизга ҳам кўпроқ ғам-хўрлик қилишингиз зурурмикин?

— Зарурликка зарур. Лекин мамлакат қанчалик улкан бўлса, уни идора этиш шунчалик қийинлашар экан. Мен зўр бир давлат тузиш мақсадини зиммамга олганимда бунинг қанчалик мушкул эканини тасаввур қилмаган эканмен. Туну кун меҳнат, ташвиш, ўт, олов... Худди ҳаракатдаги вулқонлар орасига тушиб қолгандекмен. Кўзлаган мақсадим амалга ошгунча умрим етгайми, йўқми, билмаймен.

— Ниятни бутун қилмоқ керак, ҳазратим. Сиз ҳали йигит ёшидасиз, алҳол қирқ олти ёшдасиз.

— Аммо Ҳиндга келганимдан бери ҳар йили беш-ўн йил-

¹ Т о л о р — шийпон.

лик умрим сарф бўлгандек туюлур. Иситма, уйқусизлик...

Хондамир Бобурнинг Ҳиндистонга келиб тузган янги девонини бугун эрталаб ўқиган эди. Шу девондаги бир рубоий хозир унинг эсига тушди:

Жисмимда иситма кунда маҳкам бўладур,

Кўздин учадур уйқу чу окшом бўладур.

Ҳар иккаласи ғамим бида сабримдек,

Борғон сари бу ортадур, ул кам бўладур.

Бобурнинг уйқусиз тунлардан киртайган кўзлари сал шамол тегса ёшланадиган бўлиб қолган эди.

— Табиблар уйқусизликнинг давосини билар эдилар-ку?

— Ҳиротлик хос табибимиз Юсуфий муолижа қилиб кўрди. Бўлмади. «Сизга ором керак», дейдир. «Давлат ташвишларини унутинг», дейдир. «Кечалари шеър ёзманг», дейдир. Аммо... давлат тепасида ўлтириб, унинг ташвишини қандай унутиш мумкин? Фақат шеър ёзганда, ижод қилганда бу ташвиш ҳаёлимдан кўтариладир. Лекин Аграда бўлсам ижодга ҳам фурсат тополмасмен. Кечаси ҳам, кундузи ҳам давлат ташвиши... Безор бўлиб, мана шу Секрига чиқиб келдим. Ижод учун бу ер тинчроқ... Анчадан бери маснавий ёзмоқдамен. Санасам, бир кеча-кундузда эллик байт маснавий битибмен.

Бобур хасталиги устига кўп ишлаб ўзини жуда толиқтириб қўйганини, уйқусизликнинг бир сабаби шу эканини, табиб кечалари шеър ёзишни ман қилиши тўғрилигини Хондамир сезиб борарди-ю, лекин буни айтишга андиша қиларди. Табиатан ором нималигини билмайдиган Бобур ўзини аямай ишлаб ўрганиб қолган эди, у бир кунда шунча шеър ёзганидан мамнун бўлиб юрганда уни бу мамнуниятдан ҳам маҳрум қиладиган насихат гап айтиш мавлонга ўринсиз туюлди.

— Ишқилиб, худо сизга қувват берсин,— деб қўя қолди.

Бобур мавзуни янгилагиси келиб:

— Мавлоно, «Ҳабиб уссияр¹»ни неча йил ёзгансиз? — деди.

— Ўн бир йил. Лекин ҳали хатм қилган эмасмен. Хотиржамлик бўлганда Ҳиротда хатм қилмоқчи эдим. Лекин йигирма йилдан бери сунний парастлар билан шиа парастлар Ҳиротни бир-бирларидан тортиб олиб, гоҳ ўтга урдилар, гоҳ сувга...

— Ҳў ўшанда... Унсиянинг минорасида туриб сўзлашга

¹ «Ҳабиб уссияр» — «Севимли дўстнинг таржимаи холи» демакдир. Хондамир ўзининг бу катга асарида Араб, Эрон, Ўрта Осиё, Хурошон тарихининг олам пайдо бўлганидан то XVI асргача ўтган энг муҳим давларлари ҳақида сўз юритади.

нимизда «Ҳиротнинг толе қуёши ботиб кетмасмикин?» — деб изтироб чеккан эдингиз. Шу изтироблар бари ўринли экан-да.

— Ҳиротдан толе кетганда Самарқанд бизга кучоқ очиб турса экан! Ши-сунний адовати Мовароуннаҳр билан Хуросу Эроннинг маданий алоқаларини узиб ташлади. Бу алоқалардан қанча авлодлар баҳра олган эди, қанча истеъдодлар камол топган эди. Жоҳил султонлар Мовароуннаҳрни биқик муҳитга солиб қўйиб, хурофот билан бидъатга ет қилмоқдалар. Самарқанддан келган бир олим йиғлагудай бўлиб айтиб берди. Обираҳмат бўйидаги уч ошиёнлик Улуғбек расадхонаси вайрон бўлмишдир. Шаҳар ҳокимининг парвойига келмас эмиш. Жоҳиллар нураб ётган расадхонанинг ғиштларини олиб кетиб, ўз ҳовлиларига ишлатмоқда эмишлар.

— Биз ўзга юртга келиб иморатлар қурганда улар ўз юртимиздаги обидаларни бузмқдалар! Чархнинг бундан аччиқ кинояси бўлурми, мавлоно? Шуни ўйласам, ўз еримизни қўйиб, Ҳиндга кўнгил берганим менга худди оқибатсизликдек кўринадир!

— Бироқ фалакнинг гардиши шуни тақозо қилса, одам илож тополмас экан-да. Маиа, мен ҳам сиздан ибрат олиб, Ҳиндга келдим-ку! Муаррих бўлганлигим учун тарихий зарурат биздан зўр бўлишини кўп сезмишмен.

Бобур Хондамирнинг сўнги гапига қизиқиб, отини унинг отига яқин юргиза бошлади.

— Дарҳақиқат, тарих алоҳида шахслар иродасига бўйсунмас экан,— деди Бобур.— Оёғингиз тагидаги тоғ пастга қараб кўчса, сиз юксакка қанчалик интиланг, тоғ кўчкиси билан бирга пастга қулаб кетар экансиз. Энди ўйлаб кўрсам, Мовароуннаҳрдаги кўчкилар мени худди шу кўйга солган экан. Бироқ сиз қадам қўйган тоғ ичдан кўтарилиб ўсиб борса, кўзлаган юксаклигингизга қандай кўтарилганингизни ўзингиз сезмай қолур экансиз. Ҳиндистон менга ичдан кўтарилиб ўсиб боровчи тоғдек туюладир, мавлоно. Шунинг учун Самарқанду Андижонда қилолмаган ишларимни бу ерда қилиш умиди-дамен!

— Менинг назаримда ҳам эндиги юксалиш асри Ҳиндга кўчганга ўхшайдир. Жаҳолат қувган жуда кўп илму санъат аҳли сиздан паноҳ истаб Ҳиндга келишлари бежиз эмасдир. Чунки фалакнинг гардиши ўзгарди. Ахир бир вақтлар Хуросу Мовароуннаҳр ҳам ичдан кўтарилиб ўсиб боровчи тоғдек юксалган эмасмиди? Хоразмда — Беруний, Бухорода — Ибн Сино, Тусда — Фирдавсий, Боласуғунда — Юсуф Хос Ҳожиб — булар ҳаммаси бир-бирига асрдош. Шунча зўр сиймолар чиққан аср — бизнинг улуғ бир юксалиш асримиз эди. Чингизхоннинг кўчманчи ўрдалари босиб келди-ю, маданий

тараққиётимиз ипларини бир неча аерга узиб ташлади. Улуғбек даврида Самарқандда, Навоий даврида Ҳиротда жуда кўп маданий даҳолар яна уйғонди. Янги юкөөалишлар асри бошланди. Лекин кажрафтор фалак буни ҳам бизга кўп кўрди! Яна кўчманчи султонлар маданий тараққиёт ипларини узиб, чалкаштириб юбордилар... Фақир Ҳиротда тополмай юрган қалаванинг учини шу ерда топгандек енгил тортмоқдамен. Мусофирлик жуда оғир бўлса ҳам, лекин башарият яшаб турган шу кенг оламда янги даҳолари уйғонган, илму санъатга астойдил йўл очилган Ҳинднинг борлиги қалбларга қувват берадир... Мен энди «Ҳабиб уссияр»нинг сўнги таҳририши шу ерда, қанотингиз остида тугаллаш умидидамен.

— Бажонидил!.. Биздан неки кўмак зарур бўлса тортинмай айтинг.

— Фақир Ҳазрат Мир Алишернинг кутубхоналарида кўп йил ишладим. Ҳусайн Бойқаро ҳазратларининг кутубхоналаридаги нодир қўлёзмалардан ҳам кўп фойдаландим... Энди... бу кутубхоналар Ҳиротда қолди.

Хондамир Бобурнинг ҳам эллик киши ишлайдиган улкан кутубхонаси борлигини билар, Ҳиротдан топиладиган нодир манбалар бу ердан топилиши мумкинлигига ишонар эди. Бироқ подшоҳнинг хос кутубхонасига анча-мунча одам йўлай олмайди. Хондамир шуни ўйлаб, гапининг давомини айтишга ийманди.

— Сиз бизни деб шунча жойдан келибсизу биз кутубхонамизни сиздан аягаймизми, мавлоно? — деди Бобур унинг ийманиш сабабини сезиб. — Абдулла китобдорга буюргаймен, сизга неки асар зарур бўлса топиб бергай. Кутубхонада хиндистоний китоблар ҳам кўп. Абдулла китобдорнинг ихтиёрида санскритни яхши биладиган таржимон олимлар бор. Шулардан бир-иккитаёвини сизнинг ихтиёрингизга берурмен, неки хизматингиз бўлса адо этурлар.

— Тоабад миннатдормен, ҳазратим! Густоҳлик саналмаса, яна бир эркалигим бор...

— Марҳамат, мавлоно.

— Ҳиротда ўзингиз ёзган саргузаштларингиздан парча ўқиб берган эдингиз. Мени мафтун этган эди. Агар шу асарингизнинг тайёр қисмлари бўлса, мен учун... энг азиз, энг нодир манба бўлур эди. Чунки сиз бошдан кечириб, тадқиқ этган тарихий воқеаларни бошқа ҳеч ким шундай яхши тадқиқ этган эмас...

Бобур отининг чимирилган қулоқларига тикилиб бир оғжим борди. У икки йилдан бери «Бобурнома»ни бошидан қайтиб кўчириб, яхлит бир асар ҳолига келтирмоқда эди. Бултур ёз иссиқлари тугаб, ёмғир фасли бошланганда жуда қаттиқ

шамол кўтарилган. Бобур чодирда ишлаб ўлтирганда ёмғир аралаш келган довул унинг чодирини йиқитиб, қўлёмаларнинг ўйлаб варақларини учуриб кетган эди. Бутун-бутун бобларни ёмғир-дovuл ҳалок қилган эди. Уларни тиклаш учун ҳалигача яхлит бир вақт топилмас эди. Қўлёмани шу аҳволда Хондамирга берса тўғри бўлармикин?

— Мен ўйлаб кўрай, мавлоно.

Бу орада улар Секри тоғининг этагидаги булоққа яқинлашдилар. Атрофи ораста қилиб қўйилган суви муздай булоқ Бобурнинг яхши кўрган жойларидан бири эди. Шу ерда Хондамир икковлари отдан тушдилар.

Тиниқ мавжларга тоза қумлар қўшилиб қайнаб чиқаётган булоқ сокин гулзорларни оралаб, шилдираб оқмоқда эди.

— Атроф шундай сокин,— деди Хондамир.— Кўл бўйида қурилишлар... Бундан икки йил бурун шу Секрида Рано Санго билан даҳшатли жанглар бўлганини тасаввур этиш мушкул.

Мана шу атрофларда бўлиб ўтган қирғиннинг энг таҳликали дамлари Бобурнинг тасавурида қайтадан гавдаланди. Ўшанда у нақд ўлимни бўйнига олиб қўйган эди. Ғарбдан Рано Санграмдай зўр саркарда Бобурниқидан етти баробар ортиқ кўшин билан бостириб келмоқда. Ичкарида фитна, хиёнат. Бобур лахўрлик Оламхонни икки минг кўшин билан Ғвалиор ҳимоясига юборган эди, у одам йўлни бехатар томонга буриб, аскарни билан Панжобга қочди. Ҳасанхон деган яна бир афғон саркардаси олти юз навқари билан Бобур қароргоҳидан яшириқча чиқиб, тунда душманга бориб қўшилди.

Шунинг устига Муҳаммад Шариф деган мунажжим: «Миррих ғарб томондадир, осмондаги юлдузлар бизнинг мағлубиятимиздан дарак бермоқда», деб овоза тарқатди. Беку навқарларни ваҳима босганини сезган Бобур Секри кўли яқинидаги қароргоҳга беш юздан ортиқ одамларини йиғди.

Дошқозонларда палов иишмоқда. Дастурхонларга ноз-неъматлар, олтин-кумуш суроҳийлар қўйилган. Соқийлар хумларда куч йиғиб ётган майлардан кўзачаларини тўлдириб олишмоқда. Улардан бири иккинчисига шивирлаб дейди:

— Эртага яна қирғин уруш бўлармиш. Шундай пайтда ичжулик базми кўнгилларига қандай сиғаркин?

Иккинчи соқий эътироз қилади:

— Ичжулик одамни ботир қилгай, ғам-ғуссани унутдиргай! Хумда хосият кўп.

Баъзи беклар ҳам: «Жангчиларнинг кайфиятини май билан кўтармоқ керак!» деб, базмнинг тезроқ бошланишини сабрсизлик билан кутмоқда эдилар. Ҳатто шаҳзодалардан Хумоюн билан Аскаррий ҳам хатарли уруш олдидан тўйиб кайф қилиш умидида эдилар. Бобур ўғилларининг отадан ибрат

олиб аллақачон май ичишга ўтганларини ҳозир яна бир оғриниб ҳис қилди-ю, кўлдан бери кўнглига туккан ниятини шу қирғинбарот арафасида амалга оширмаса бўлмаслигини ўйлади.

У савдарларга буюриб зиёфат бўладиган жойдан нарироққа каттагина чуқур қаздирди. Чуқур яқинига сандиқдай-сандиқдай иккита харсангтошни юмалатиб келтириб ўрнаттирди.

Беку навкарлар унинг нима қилмоқчилигини тушунолмади хайрон эдилар. Бобур олтин-кумуш суроҳийларга май қўйишни буюрди. Лекин дастурхон ёнига ҳеч кимни таклиф қилмади. Ўзи ҳам май тўла олтин суроҳий билан ҳалиги чуқур яқинида тикка турибди. Беклардан бири ёнидаги ўртоғига:

— Бугун тик туриб ичгаймиз, чамаси? — деб шивирлади.

Бобур ҳамма эшитадиган жарагдор товуш билан:

— Жаноб беклар! Йигитлар! — деб гап бошлади. — Таклиф бўлдики, жангчиларга май ичирайлик, токи дадил бўлиб майдонга кирсинлар. Аммо бошимиздан ўтган, билурмизки, май дадиллиги — алдамчидир. Маст одам жангда ажал паймонасидан қандай ичганини билмай қолур. Нажот қайда? Эртанги жанг биз кўрган қирғинларнинг энг мушқулию энг мураккаби бўлгусидир. Биз сепоялар ясадик, аробаларни занжирлар билан боғладик, ғалабанинг барча режаларини туздик. Энди бу режаларни энг нозик нуқталаригача беҳато амалга оширмасак мағлуб бўлгаймиз. Жангда ниҳоятда ҳушёр бўлмоғимиз керак. Нажот мастликда эмас, ҳушёрликдадир! Май ичиб кўп гуноҳлар қилдик. Энди мен ҳаёт-мамот жангига ҳалқумимни поклаб кирмоқчимен... Бир ўлим ҳар вақт бошимизда бор. Агар эртага куним битса, бу фоний дунёдан боқий дунёга май мастлиги билан эмас, имон поклигию тан ҳалоллиги билан кетмоқчимен!

Бобур ўша дамда чиндан ҳам бир ўлимини зиммасига олиб, беку навкарлари билан видолашаётган одамдай ҳаяжонланиб гапирган эди. Бу кўпчиликка жуда қаттиқ таъсир қилди. Бир лаҳзалик оғир жимликдан сўнг, Бобур шу бугун битган маснавий шеърдан тўрт сатрини ёддан айтди:

Кимки ўлмак ўзига жазм этар,
Ушбу ҳолатта билурсенки нетар.
Аритур барча гуноҳдин ўзин...
Тавба қилдим чоғир ичмакликдин!

Сўнгги сатрни баланд овоз билан айтгандан сўнг, суроҳийдаги майни оёғи остидаги чуқурга секириб ташлади. Сўнг суроҳийни чуқур ёнидаги харсангтошга қарсиллатиб урди. Олтин суроҳий ҳудуди учкун саччатгандай «даг-даг» этиб оқиб кетди.

ди-ю, кўкат орасига юмалаб тушди. Бундай ҳодисани умрлари-
да биринчи марта кўраётган беку навкарлар қўлларидаги май-
ларини нима қилишни билмай саросима бўлиб қолишди. Бобур
яна жарангдор, таъсирли товуш билан шеър айтди:

Олтину нукра суроҳи-ю, аёқ —
Мажлис олтин тамоми бул чоқ
Ҳозир айлаб борини синдурдум!
Тарк этиб майни кўнгил тиндирдум!

Беку навкарлар ханг-манг бўлиб туришибди. Кимлардир
қўлларидаги хушбўй майни чуқурга тўкишдан қизғанади. Ким-
лардир олтин-кумуш суроҳийларни харсангга уриб синди-
ришга журъат этолмайди. Балки Бобур ўзига эл кўрган бу
иш беку навкарларга жоиз эмасдир?

Ўзининг таъсирли нутқларию шеърлари билан ихлосманд-
ларини сеҳрлаб олишга ва кетидан эргаштиришга ўрганган
Бобур бугун ҳар қачонгидан ҳам ортиқ эътиқод билан сўзла-
моқда:

— Беклар! Йигитлар! Қачонгача нафсимизга тобеъ бўлур-
миз? Токай умримизни майга зоеъ этурмиз? Ичкуленинг ҳа-
ром кайфи кимга вафо қилибдики, сизу бизга вафо қилгай?
Олтину нукрага ачинманг! Суроҳийларнинг синиғини мискину
бечораларга улашгаймиз. Агар тангрим бизга мадад берса,
эртанги жангдан ғолиб чиқгаймиз! Май тўкилган мана шу
чуқур ўрнига обод бир манзилу мрамор войин қурдиргаймиз.
Ният қилайликки, войин зилолдай булоқ сувига тўлиб турсин.
Войин бўйига хайри-эҳсон уйи барпо этайлик. Токи бу уйда
ичкулик базмларининг сарфу харажатини, олтину нукра
суроҳийлар нулини муҳтожларга хайру эҳсон қилиб улаш-
синлар. Шу эзгу ният йўлида кимки менга ҳамдаму маслак-
дош бўлса майни тўксин, синдирсин майхўрлик олтинини!

Бобур Ҳумоюнга бир қараб олди. Бу қарашнинг маъносини
сезган Ҳумоюн:

— Ҳазрат отажон, мен доим сиздан ибрат олишга ўрган-
мишмен,— деди.— Дафъ бўлсин маю суроҳий!

Ҳумоюн майни чуқурга сеңди-ю, олтин суроҳийни харсангга
уриб синдирди. Ундан сўнг Аскарний, Тоҳир, Ҳиндубек... бир
неча соат ичида уч юзга яқин беку мулозим қўлидаги қадаҳини
харсангга уриб, май ичишдан тавба қилди. Бу ҳодиса ўша кун
қароргоҳдаги ўн мишг жангчининг ҳаммасига маълум қилинди.
Бобурнинг ҳаёт-мамот жанги олдидан чиқарган фармонида:

— Ўз нафсини енгган одамлар ҳар қандай ёғийни енгшига
қодирдирлар! — деган сўзлар махсус таъкидланди ва буни ис-
бот этадиган мисоллар муқаддас китоблардан ҳам келтирилди.

Бу ҳаммаси кўшин орасида тарқалган ваҳимани босишга ва одамларнинг руҳини кўтаришга ёрдам берди. Бошқа муаммолар жанг майдонида ҳал бўлди. Ғалабадан сўнг ўша чуқур ўрнига мәрмар войин, унинг ёнига хайри-аҳсон уйи қурилди. Харсанга уриб синдирилган олтин-кумиш суроҳийлар пули беваю етимларга, ғарибу муҳтожларга улашилди...

Бугун Бобур ўша войинга сув берадиган булоқ бўйида воқеани Хондамирга ҳикоя қилгач, кўшиб қўйди:

— Шундан бери бизнинг қаламравимизда май ичиш маън этилди. Ғазнидан Бободўст ўн тўрт туяда асл чоғирлар келтирилган эди. Узум суви ҳайф бўлмасин деб, хумлардаги чоғирларга туз солдирдик, май сиркага айланди. Маҳсус фармон билан ичкилик сотмоқ ҳам, келтирмоқ ҳам қатъий тақиқланди.

— Тарихда қоладирган ажойиб иш! Хотиралар китобингизга бу ҳодиса ҳам битилганми?

— Маҳсус бобда буни муҳорибанинг бошқа тафсилотларига кўшиб ёзмишмен. Хаттот китобининг тайёр қисмлари билан бирга шу бобни ҳам бугун кўчириб бўлмай. Оқшом ҳаммасини сизга берурмен, мавлоно. Ўқиб фикр айтурсиз.

Боя жавобсиз қолган илтимосига энди жавоб олган Хондамир кўлини кўксига қўйди:

— Сиз менга тенгсиз бир ишонч билдирурсиз, ҳазратим!

— Сизни Ҳиротдан чорлаб келтиришдан мақсад ҳам ижодий ишлар бўйича маслаҳатингизни олмоқ эди.

— Сарафрозмен!

Шу найт от дупури эшитилди. Йўлка охирида узоқдан от чоптириб келган чопар сакраб ерга тушди ва таъзим билан Бобур томонга кела бошалади.

— Аграда бирон шошилнич иш чиққанга ўхшайдир,— деди Бобур.— Мавлоно, агар мен пойтахтга кетсам, «Вақоий»ни сизга оқшом келтириб берурлар.

Бобур отини тутиб турган жиловдор томонга йўналди.

2

Секри тоғининг шимолий ёнбағрида салқин боғнинг тўрида жойлашган уч хонали шинам хилватхона мавлоно Хондамирга берилган эди. Бобур ўша кун Аградага жўнаб кетди. Мавлоно хилватхонанинг ўймакор айвонига чиқиб, ундан яхши кўринадиган шишадай тиниқ кўлни томоша қилиб ўтирганда хона хоснинг савдарбошиси Бобурнинг кўлёмасини унга олиб келиб берди.

Кўлёмза хаттот томонидан зарварақларга бениҳоя чиройли қилиб кўчирилган эди. Хондамир уни хона ичига олиб кириб, миз устига қўйди. Тепада ёнаётган шамлар-

ни миз устига яхши ёруғ берадиган қилиб ўрнат-
гач, кўзойнагини тақди ва асарни эҳтиёт билан варақ-
лаб ўқишга тушди.

Бундан ўн йилча аввал Бобур Хиротга иккинчи марта
борганида Хондамирга «Вақоий»дан ўқиб берган бобнинг
услуги мавлонони хиёл таажжубга солган эди. Мана бу қўл-
ёзмада ҳам Бобур қаламга олган воқеалар жуда мураккаб
бўлса-да, муаллиф уларни оғзаки ҳикояга яқин бир тарзда
хийла оддий услубда ёзган эди. Кўп жойларда Хондамир ҳат-
то Бобурнинг сўзлаш тарзини, оҳанги, баъзи бир шахсий хис-
латларини пайкаб: «Ғалати-ку!» — деб қўйди. Чунки отаси
Мирхонд Хондамирни ёшлиқдан бошқача эътиқодлар билан
тарбиялаб ўстирган эди. Бу эътиқодга биноан, насриавис
муаррих ўз шахсий услубини давр услубига бўйсундирмоғи,
ўз «мени»ни давр уммонига қўшиб билинтирмай юбормоғи
керак эди. Агар асарда муаллиф ўзини намоён қилаверса,
бу — нокамтарлик белгиси ҳисобланарди. Катта тарихий
китоблар ҳукмдорлар учун ёзилар, асосий таърифу тавеиф
ўшаларнинг ишларига бериларди. Назокатли ўхшатишлар,
жимжимадор мажозлар ва шоирона кўтаринки услуб ҳукм-
дорларга хуш келар ва барча муаллифлар бўйсунадиган бир
қонун ҳисобланарди.

Бобур мана шу қонунни бутунлай инкор этувчи услуб би-
лан асар ёзгани Хондамирга ортиқ даражадаги бир шаққок-
ликдек туюлди. Бобур ўгли Ҳумоюнга ёзган хатини ҳам кито-
бида келтирган эди:

*«...Хат битирда такаллуф қилай дейсен, ул жиҳаттин
муғлақ¹ бўладур. Бетакаллуф пок алфоз била бити, сенга
ҳам ташвиш оз бўлур ва ўқиғувчига».*

«Ажабо! — ўйланди Хондамир, — бетакаллуф тил билан
асар битмоқ Бобур мирзо учун пок услуб белгиси ҳисобланур
экан-да!» Хондамир ўзининг ўн йилдан бери ёзаётган «Ҳабиб
уссияр»ида назокатли такаллуфлар кўплигини эслади-ю,
ўзини ўнғайсиз сезиб, ўқишдан тўхтади ва айвонга чиқди.

Осмонда саккиз кунлик ой сузиб юрар, унинг нури қарши-
даги қўлнинг ўртасида ойдин йўлка ҳосил қилган эди. Қўлнинг
нариги четидан тоғ этагигача келган бу нур йўлкасида тўл-
қинлар жимир-жимири гавҳар жилвасига ўхшаб кўзни қа-
маштирарди. Лекин Хондамир шу нур ўйишида ҳам Бобур
тасвирлаган воқеаларни кўрар, уларнинг таъсирини хаёли-
дан узоқлаштиролмас эди. Сертакаллуф, сербезак услуб Хон-
дамирдан жуда кўп куч, вақт, меҳнат талаб қилар эди. Бундай
жимжимадор услубда асар ёзиш қанчалик қийин бўлса, уни
ўқиб тушуниш ҳам шунчалик қийин эди. Бобур икки томонни

¹ М у г л а қ — тушуниб бўлмайдиган.

ҳам бу қийинчиликдан қутқаришга интилса нимаси ёмон? Ўглига ёзган хатида «сенга ҳам ташвиш оз бўлар, ўқиғувчига ҳам» деганда у ҳақли эмасми? Унда Хондамирнинг юксак шоирона услубга оид эътиқодлари пучга чиқадими? Йўқ, бу мумкин эмас!

Хондамир қайтиб ичкарига кирди-ю, ўзининг ҳақлигига далил кидириб, очиқ қўлёзманинг давомини ўқишга тушди.

Ҳали ҳеч бир муаррих қаламга олмаган ғаройиб воқеалар бу қадар кўи! Хондамир китобнинг мазмуни янги ва мароқли эканига тан бермай иложи қолмади. Бобур ўзини-ўзи очиқ-часига муҳокама қилган, ўз хатоларини рўйирост ёзган жойларни ҳам Хондамирга жуда илиқ туюлди. Охирги бобларида яна ажиб бир хат учради. Бобур Аградан Кобулга юборган бу мактуб Моҳим бегимга атаб ёзилганини Хондамир сизди. Бобурнинг заҳарланиш тафсилотлари шу ерда битилган эди: *«Дастурхон устида икки-уч марта кўнглум барҳам уриб қусаёздим. Охир кўрдумким бўлмас, кўндум... Обхонага бориб қалин қусдим. Ҳаргиз ошдин сўнг қусмас эдим, балки ичганда ҳам қусмас эдим. Кўнглимга шубҳа кечди.*

...Жон мундоқ азиз нима эмиш, мунча билмас эдим, ул мисраъ борким:

*«Ким ўлар ҳолатга етса,
Ул билур жон қадрини».*

Тенгри таолонинг ишояти бор экандир, манга янги бошдан жон бағишлади».

Бобур ўз ҳаёти ҳақида бу қадар очиқчасига ёзгани Хондамирни ҳайрон қолдирди. Кейинги бобда яна бир тафсилот унинг эътиборини тортди. Ичкиликни бундан уч йил олдин ташлаган Бобур уни ҳалигача қайтиб оғзига олмас эди. Бунинг осон бўлмаганини Хондамир қуйидаги сатрлардан билди: *«Бу ўтган икки йилда чоғир мажлисининг орзу ва иштиёқи беҳад ва гоят эди, андоқки, чоғир иштиёқидан борлар¹ йиғламоқ сарҳадига етар эдим».*

Ўз истагига қарши курашиб, йиғлаш даражасига борганини очиқ ёзиш тождорлар орасида мисли кўрилмаган бир соҳибдиллик эканига Хондамир ич-ичидан тан берди. Очиқ-часига айтган мана шунақа оддий тафсилотлар туфайли Бобур унга ўзи каби бир инсон фарзанди бўлиб туюлди. Аммо бошқа тождорлар тарихий китобларда оддий одамларга ўхшаб кўринишдан қанчалик чўчийдилар! Улар эл-юртдан мумкин қадар баландда бўлишни, оддий инсондан кўра худога яқин-

¹ Борлар — «баъзи пайтлар» маъносида.

роқ туришни қанчалик яхши кўрадилар! Шунинг учун ҳам Хондамирдек муаррихлар подшолар ҳақида оддий одамлар тушунмайдиган баландпарвоз, сертакаллуф тилда китоб ёзишга мажбур бўладилар. Бобур ўзи подшоҳ бўлгач, бундай такаллуфларни ким учун ёзади? Ҳамма томонидан қабул қилинган давр услубининг қонушларини бузиб чиқиб, ўз ҳаёти ҳақида шундай эркинлик ва ростгўйлик билан асар ёзиши — ҳеч кимга қарам эмаслиги туфайли эмасмикин?

Бу фикр Хондамирни Бобурнинг услубидаги ўзгачалик билан гўё яраштирди. Шундан кейин Бобурга хос оддийликнинг теран бир шеърӣй нафосати ҳам борлигини, бу нафосат одами сехрлаб олишини сизди. Тун ярмидан ошганда эса асарда тасвирланган воқеаларга қизиқиб, услубини бутунлай эсдан ҳам чиқарди.

Тонгга яқин озгина ухлаб, сўнг яна ўқиниши давом эттирди-ю, қўлёзманинг охирига етмагунча ундан ажралолмади.

Бобур Секрига учинчи кун эрталаб қайтиб келди — кундузи хаво жуда иссиқ бўлгани учун йўлни тун салқинида босиб ўтган эди. У Хондамирни яна боғда учратди, иккови пиёда ўша булоқ бўйига келдилар.

Бобур йўл юриб чарчаган, уйқусиз ўтган яна бир тун юзини жуда сўлтиб қўйган бўлса ҳам у ўзини хушҳол тутиб:

— Мавлоно, менсиз дилгир бўлмадингизми? — деди.

— Ҳазратим, мен туну кун сиздан айрилмай суҳбатингизда бўлдим, сиз ёзган асар саҳифаларида унутилмас дамларни бошдан кечирдим.

— Ҳали охирига етмагандирсиз?

— Кеча пешинда охирги саҳифасини ёнганимча ҳамон унинг таъсири билан яшамоқдамен.

— Мени аяманг, мавлоно, ростини айтнинг.

— Ростини айтсам, сиз мени чил-чил сиздирдингиз!

Хондамир бу гапни шундай жиддий туриб, пчки бир дард билан айтдики, Бобур таажжубланиб тўхтади:

— Нечук сиздирмишмен, мавлоно?

— Услубингиздаги нафис бир соддалик қаршисида менинг юксак шоирона услубим ортиқча бир такаллуфдек туюлди.

— Э, такаллуфми? Аммо менинг аҳволим ўзингизга маълум. Жумлаларни такаллуф билан безашга фурсатим йўқ, эди.

— Асли гўзал бўлган юзга ортиқча зеб-зийнат не ҳожат? Ҳазратим, сиз адабиётимизда ҳали ҳеч ким қилмаган улуг бир ишни қилмишсиз. Муборак бўлсин!

— Миннатдормен, мавлоно. Бироқ ҳали мен бу ишнинг йўқолган саҳифаларини тикламоғим керак.

— Тиклашингизга аминмен. Охири яна бошқа неқ ишла-

рингиз ёзилгусидир. Бироқ шу туришда ҳам мен бу улкан асарингизни туркий тилда айтилган янги бир сўздек қабул қилдим. Мен аминменки, авлодларимиз сизнинг бу шоҳ асарингизни Алишер Навоийнинг «Хамса»си каби эъзозлагайлар. Чунки шу вақтгача туркий тилда битилган энг улуғ шеърый асар «Хамса» бўлса, шу вақтгача туркий тилда битилган энг улуғ насрий асар, мешимча, «Бобурнома» бўлгусидир.

— Мавлоно, гарчи муболага қилган бўлсангиз ҳам, дил сўзларингиз учун ташаккур. Мен бу асарни ниҳоясига етказиш учун бугун яна Секрига қайтиб келдим. Агар нуқсонлари бўлса очик айтинг.

— Фақир баъзи саҳифалардаги саналару номларда ноаниқликлар учратдим. Хусусан, Ҳиротга Ҳусайн Бойқаро саройинга оид боблар хиёл таҳрирталаб.

— Мана шу нуқталарда менга сизнинг кўмагингиз даркор.

— Бажонидил, ҳазратим. Неки ноаниқлик бўлса, барчасини алоҳида қоғозга ёзиб қўйдим. Асарингиз билан бирга бермоқчимен.

Шу пайт тенадан ўтаётган қушлар кескин ҳуштак чалганга ўхшаб нохуш овоз чиқаргани эшитилди. Бобур осмонга қараб, қорамтир-қизғиш калхатлар галаси қанот қоқмай учиб бораётганини кўрди. Сўнг уларни Хондамирга кўрсатиб:

— Бу йиртқичлар жанглardan сўнг ўлакса еб мазахўрак бўлмишлар,— деди.— Рано Санго билан бўлган жангдан сўнг мана шу кўл атрофларида, боғнинг ўрнида ўлиб ётган одамлар, отлар, туялар, филлар беҳисоб эди. Калхатлар қон хидини сезиб, узоқлардан гала-гала учиб келганлари ёдимда бор...

Бу хотира Бобурда нохуш туйғулар кўзгаганини сезган Хондамир:

— Начора, ҳазратим,— деди.— Ҳанузгача ҳеч бир улуғ давлат жангу жадалсиз барпо бўлган эмасдир.

— Сўзингиз чину, аммо... Сўнги йилларнинг воқеаларини қоғозга туширганимда, барча қурбонлар, тўкилган барча қонлар кўз ўнгимда шундай тўлиқ гавдаландики, уйкуларим ўчиб кетди... Бажур кўрғонида уч минг кишининг қиличдан ўтказилгани... Панипатда бир неча юз асирнинг тўфангдан отиб ўлдирилгани... Бизнинг одамлар ҳам калла-мишоралар қўнаргани...

— Ҳаммасини умр китобингизда рўйирост битмишсиз.

— Чунки авлодлар ҳақиқатни билсинлар, бизни фаришта деб ўйламасинлар. Қилган гуноҳларимиз ўзимизга нечоғлиқ оғир тушганидан огоҳ бўлсинлар.

Бобурнинг руҳида дам-бадам сезилиб қолаётган ички бир дард — фақат хасталик ёки чарчоқликдан эмаслигини Хонда-

мир энди сездн. Бобур ижодий ишга берилган сари унинг қалбидаги шох билан шоирнинг муроса килиши қийинлашиб кетарди.

Хондамир беихтиёр Ҳиротни ва Алишер Навоий билан Ҳусайн Бойқаро орасидаги мураккаб муносабатларни эслади. Бу икки зот ёшлиқдан бир-бирларини яхши кўрар эдилар, аммо подшоҳнинг шафқатсиз ишлари шоирнинг нафис туйғуларига шу даражада зид келар эдики, Алишер Навоий Ҳусайн Бойқаро билан бир шаҳарга, ҳатто бир мамлакатга сиғишмай қоладиган ва Хуросонни ташлаб чиқиб кетишга астойдил интиладиган пайтлари бўларди.

Ҳатто бир шаҳарга ва бир мамлакатга сиғмайдиган катта шоир билан подшоҳ Бобурнинг қалбида бирга яшашга мажбур эканлиги ва бу уни қанчалик қийин аҳволларга солишини Хондамир ҳозир яқиндан кўргандай бўлди. Унинг ёдига Бобурнинг:

Юз хайфки, зоеъ ўтадир умри азиз,
Афсуски, ботил¹ борадир умри шариф!

деган сатрлари тушди. «Шоир бу сатрларни подшоҳлик ташвишларидан тўйиб кетган пайтда ёзган бўлса керак!» — деган ўй кўнглидан кечди.

Бобур булоқ бўйига чўнқайиб ўтириб, кафтини муздай тиниқ сувга тўлдириб олди-да, уни симириб, хиёл тафти босилгандай бўлди.

Хондамир гапни ёқимлироқ мавзуга бургиси келди:

— Ҳазратим, Ҳиротда учрашганимизда сиз ўз ҳаётингизни... кўчки босган булоққа ўхшатган эдингиз. Ёдингиз-дами?

— Ёдимда бор.

— Фақир ҳозир тахмин қилдимким, Мовароуннаҳрда кўчки босган булоқ балки шу ерга келиб қайта кўз очгандир?

— Ақл бовар қилмайдир. Орада шунча узоқ масофалар бор.

— Лекин чинакам зўр истеъдодлар — ўлмас булоқларга ўхшар эканлар. Уларнинг кўзини ўн жойда бекитсалар, ўн биринчи жойдан яна ёриб чиқар эканлар!

— Лутф қилдингиз, мавлоно. Ҳозир ижодий иш мени худди шу тоза булоқдек ўзига тортадир. Жангларнинг қонли селлари, салтанатнинг тошқин дарёдай бетиним талотумлари жонимга тегди. Тожу тахт бевафолигини кўпдан бери сезиб юрибмен. Менга вафо қилса фақат ёзган асарларим вафо

¹ Ботил — қалбаки йўлдан бориш, адашиш.

қилмоғи мумкин. Ватанимга ўзим қайтолмасам ҳам асарларим қайтмоғи мумкин. Эндиги орзуим — мен туғилган юртимга қилолмаган фарзандлик хизматини асарларим қилса... Андижону Самарқандни, мени ўстириб шоир қилган ўлкаларни қанчалик соғинганимни билсангиз эди, мавлоно!

Бобур кўндан бери уйқусиз юрганиданми ёки соғинч ҳиссининг зўриданми, кўзлари беихтиёр ёшга тўлди.

— Мен ҳам Ҳиротни беҳад соғиниб юрибмен, ҳазратим. Лекин... ўзингиз айтган эдингизки, Ҳинд ҳам энди биз учун ватан. Ёзган асарларингиз Ҳинднинг шавкатига ҳам шавкат қўшғусидир. Ҳиндда барно қилган улуғ давлатингиз эса сизни вояга етказган Мовароуннаҳрга ҳам шуҳрат келтиргусидир.

— Зора шундай бўлса!— деди Бобур.

У Хондамир билан кечгача дардлашиб юрди-ю, кўнглини бўшатиб, ўзини анча енгил сезди. Бироқ кечаси яна уйқуси қочиб, тонг отгунча мижжа қоқмади.

АГРА.

ЮЛДУЗЛАР ГИРДОБИ

1

Яна ёзнинг жазирама иссиқлари бошланди. Бобур гоҳ девониюмда, гоҳ кутубхонада ишлар, мудом ичи куйиб, совирилган норинж шарбати ва яхна чой ичар, лекин чанқоғи ҳеч босилмас эди.

Бир кун пещин кечроқ Тоҳир хилват хонага уч-тўрт бош оқ кишииш узум олиб кирди. Ҳозиргина узиб ювилган олтин ранг кишииш доналари устида сув зарралари йилтираб туради. Кўндан бери бундай узумни кўрмаган Бобур таажжуб билан:

— Қайдан олдингиз?— деди.

— Ўзимизнинг Ҳишт Биҳишт боғимиздан. Самарқанддан келтирилган кишииш кўчатини ўз илкингиз билан экканингиз эдингиздами, ҳазратим?

Бобур қувониб узумдан бир бошини қўлига олди. Бу ерларнинг тарихида биринчи марта етиштирилган оқ кишииш сал серсувроқ бўлса ҳам, лекин унинг таъми Бобурга Самарқандни эслатди. Узум еган сари чанқоғи босилиб, ўзини бирдан тетик сезди.

— Буни Моҳимга кўрсатмоқ керак!— деб ўрнидан турди.

• Бултур кузда Кобулдан Аграга кўчиб келган Моҳим бегим бу боғнинг тўридаги мармар кўшқда эди. Бобур баркашдаги

узумни Тоҳирга кўтартириб, гулзор йўлкалардан кўшкка қараб кетди.

Ҳаво дим ва рутубатли. Яна пашкол фасли бошланиб, осмондан булут аримай қолган. Баркашдаги олтинранг кишмиш Бобурга шу булутларни ёриб ўтиб, узоқ Самарқанддан етиб келган ёруғ бир нурдек кўринарди.

Моҳим бегим кўшкнинг айвонида миз устига энгашиб алланарса ёзмоқда эди.

Айвонга Тоҳирни эргаштириб кирган Бобур:

— Узумимиз пишибди, Моҳим!— деди.— Бир татиб кўринг.

Моҳим бегим ўрнидан туриб, Бобурни одатдагидай таъзим билан қарши олди, лекин ўпкаси тўлиб, дуруст гапиролмади.

Сўнгги икки йил ичида ярасидан қолган асоратлар тузалиб, қўллари аввалгидай ишлайдиган бўлиб кетган Тоҳир узумни таъзим билан Моҳим бегимга тутди.

Моҳим бегим баркашни унинг қўлидан олиб, миз устига қўйди. Унинг қовоқлари шишиб, кўзлари йиғидан қизарганини пайқаган Тоҳир секин орқаси билан юриб чиқиб кетди.

Эр-хотин ёлғиз қолганларида Бобур:

— Сизга не бўлди?— деди.— Йиғлабсизми?

— Нафасим қисилди...

Моҳим бегим қирқ ёшга боргандан бери юзлари тўлишиб, анчагина семириб қолган эди. Кобулнинг енгил ва курук тоғ ҳавосига ўрганган бегим Жамна бўйидаги иссиқ кунларда сернам дим ҳаводан нафас олиш қанчалик қийин бўлишини аввал ҳам эшитган, бир чеккаси шу сабабдан тўрт йилгача Аграга келмай юрган, ахири Бобурнинг юзидан ўтолмай бултур келган эди.

— Пашкол фаслида мен ҳам жуда қийналиб нафас олурмен,— деди Бобур.— Ташвиш чекманг, ўрганиб кетурсиз. Қани, узумдан олинг!

Моҳим бегимнинг ҳеч нарса егиси келмас эди. Шундай бўлса ҳам кишмишдан икки дона олиб оғзига солди-ю, Бобурнинг кўнглига бўла:

— Яхши пишибдир,— деди.

— Мактуб ёзмоқчи эдингизми?

— Ҳа, Ҳумоюнга... Менинг нафасимни пашкол эмас, соғинч қисадир!

Тўлиб ўтирган Моҳим бегим бирдан йиғлаб юборди:

— Мен ҳаминша Ҳумоюннинг дийдорига зормен. Сиз мудом ўғлимни мендан узоқларга юборурсиз! Кобулда эканимда Ҳумоюн Жамнаю Ганга бўйларидан бўшамади. Мен Аграга келдим, Ҳумоюн Бадахшонга жўнаб кетди. Бадахшонни тинчитиб қайтди ҳамки, уни яна узоқ Самбхалга юбордингиз.

Қаерда бир хатар бўлса, ўшанга Ҳумоюн рўбарў! Қайси узоқ юртда мушкул иш бўлса — яна Ҳумоюн! Мен бу ерда хавотирликда қон ютиб изтироб чекурмен!

— Бунчалик хавотирланишининг не ҳожати бор, Моҳим!

— Сиз хавотирланмайсиз, ҳазратим, сизнинг фарзандларингиз кўн! Менинг ёлғиз фарзандим қолган! Учтасини тупроққа топшириб, шу биргина Ҳумоюн билан қолганмен!

Бобурнинг бошқа хотинлари ва улардан бўлган бошқа болалари ҳам борлиги Моҳим бегимда қанчалик мураккаб туйғулар кўзгашини Бобур ҳозир яна бир марта сездди. Шу пайт хонага саккиз ёшли Гулбадан чопиб кириб келди. Бўйнидаги жажжи тақинчоқларини шилдиратиб, отаси қаршисида эгилиб таъзим қилди. Лекин онасининг йиғлаб, ўртаниб гапирётганини кўрди-ю, хавотирланиб тўхтади.

— Моҳим,— деди паст товуш билан Бобур,— Ҳиндол билан Гулбадан ҳам сизга фарзанд-ку, ахир!

— Комрон мирзо-чи, ҳазратим? У киши сизнинг ўғлингиз эмасмилар? У киши Лахўрда оналари билан тинчгина юрибдилар! Нечун ҳамма балога Ҳумоюн балоғардон бўлмоғи керак?

— Чунки Ҳумоюн — тахт вориси! Мен қилмоғим керак бўлган мушкул ишларни Ҳумоюн қилиб ўрганмоғи керак.

— Мен хавотирланиб қон ютсам майли! Сиз бунга парво қилмайсиз, чунки бошқа хотинларингиз бор!

Гулбадан ота-онасини ҳеч қачон бундай мушкул ва ноқулай аҳволда кўрмаган эди. У кўзлари жавдираб, нима гап бўлаётганини тушунолмади лол бўлиб турарди. Ахир ҳазрат онаси подшоҳ отасига ниҳоятда меҳрибон эди-ку. Қобулдан икки ой йўл юриб, кела-келгунча унинг номини тилдан қўймай эъзозлаб гапирар эди-ку! Ҳазрат отаси ҳам уларга Аградан пешвоз чиқиб, Жалоли кўли яқинида кутиб олмаганмиди? Чарчаган отидан тушиб, бошқа от келтиргунларича сабри чидамаган Бобур Моҳим бегимнинг олдига пиёда келган эмасмиди? Сўнг суюкли хотинини эъзозлаб, уни отдан тушишга қўймаган, ўзи эса Моҳим бегимнинг оти ёнида уч чақиримча жойга пиёда борган эди-ку. Буни кўрган одамлар: «Подшоҳнинг ўз хотинини бу даражада юксак иззат-икром билан кутиб олганини умримизда кўрган эмасмиз!» — деганларини Гулбадан ўз қулоғи билан эшитган эди-ку. Ҳозир буларга нима бўлди?

Бобур қизчасининг ханг-манг бўлиб турганини сезиб, тез ўрнидан турди, баркашдаги узумдан бир бошини қўлига берди:

— Ма, қизим, е! — деб унга мулойим гапириб, эшикдан ташқарига етаклаб чиқди.— Бор, энди боғда ўйна.

У кўз ёшлариши ҳамон тўхтатолмаётган Моҳимнинг қаршисига қайтиб келиб ўлтирди ва ҳазин товуш билан деди:

— Моҳим, сиз мендан ҳар қанча ранжисангиз ҳаққингиз бор. Шарият руҳсат бергани билан ҳар бир мусулмон уч хотин олиши шарт эмас эди... Мендек сайёҳтабиат одам... умрининг ярмидан кўпини сафарларда, жангларда ўтказишини била туриб, уч хотин олиши... кечирилмайдиган бир хатолик бўлди. Бу хотинларнинг ҳеч бири мен орзу қилгандек бахтиёр бўлолмаганини... бугун сизга қараб кўриб турибмен... Кундошлик аламлари... Бир-бирига ўғай болаларнинг рақобати... Ота-боболаримизни ўртаган бу жаҳаннамлар бизга дахл қилмас деб ўйлаган эдим... Йўқ, мана, ҳатто сиздек суюкли ёрим ҳам... шу жаҳаннам азобидан кўзёш тўкмоқдасиз. Мажруҳ дилим сизни кўриб, баттар хасталанди.

Моҳим бегим Бобурнинг саргайиб қолган касалманд юзига қаради-ю, кўз ёшини апил-тапил арта бошлади.

— Ҳазратим, мендан озорланманг. Мен бир мунглик аёлмен. Сиз подшоҳсиз. Арзимни сизга айтмасам, кимга айтамен?

— Ҳа, мен подшоҳмен — бутун бало шунда. Неки хатолик, неки гуноҳ қилган бўлсам, ҳаммасининг бирламчи сабаби менинг подшоҳлигимдир. Ёшлигимда подшоҳлик занжирдан қутулиб кетмоқчи бўлдим. Лекин мени бу занжирдан халос қиладиган нажоткор топилмади. Энди умидим борки, менинг нажоткорим Ҳумоюн бўлғусидир.

Моҳим бегим Бобурнинг бу сўзларига ишониб-ишонмагандай унга термилиб қаради.

— Моҳим, мактубингизни давом эттиринг. Менинг номимдан ҳам ёзинг, Ҳумоюн Аграга тезроқ қайтсин. Кўзим тириклигида тожу тахтни эгалласин. Ёзинг, мен имзо чекурмен!

— Ҳазратим, сиз Ҳумоюнни тожу тахтга бунчалик интиқ деб ўйламанг! Ҳеч ундай эмас! Мен фақат ўғлимиз ёнимизда бўлсин демоқчи эдим, холос!

— Ёзинг, келсин!.. Фақат подшоҳ бўлиш шарти билан келсин. Бу махфий гаини ҳозирча сиздан бошқа ҳеч ким билмасин.

Бобурнинг нияти жиддийлигига энди ишонган Моҳим бегим:

— Сиз... Кобулга қайтмоқчимисиз?— деб сўради.

— Мабодо, оламдан кўз юмсам, Кобулда дафи этинглар.

— Нечун бундай дейсиз?

— Сиздан яширадиган сирим йўқ, Моҳим. Сиз Кобулда «фотиҳликнинг қасоси қайтса ёмон бўлур» деган эдингиз.

Шу гапингиз рост чикди. Подшоҳлигу фотиҳлик балолари малика Байда берган захар шаклига кириб, мешинг умримни кемирди. Агар мен ҳам бор кучимни фақат илму ижодга берсам, балки Берунийдек етмишдан ошармидим? Ёки Алишер Навоийдек олтмишга кирармидим? Бироқ мана, қирқ етти ёшимда умримнинг охири кўриниб қолди.

— Ниятни яхши қилинг, ҳазратим! Худо хоҳласа, ҳали умрингиз узоқ бўлғусидир!

— Не бўлганда ҳам энди подшоҳлик бас! Қолган умримни ижодга сарфламоқчимен! Менга саройлару қасрларнинг кераги йўқ. Мана шу Зарафшон боғининг бир гўшаси бўлса бас... Ортиқча савдару мулозимлар ҳам даркор эмас. Тохир офтобачининг бир ўзи менга етарлик. Ҳумоюнга шу қароримни айтиб, икковимизнинг номимиздан ёзинг!

Моҳим бегим Бобурга жуда оғир тегадиган мавзуларда ган очганидан энди қаттиқ пушаймон бўлди-ю, эрига илтижо қилиб:

— Мени кечиринг!— деди.— Мен ҳеч хаёлимга келтирмаган гап... Бу мумкин эмас! Мен бундай мактубни ёзолмасмен!

Бобур ўрнидан турди.

— Бўлмаса мен ўзим ёзгаймен,— деб кўшкдан чиқди.

У боғ оралаб хилватхонага қараб бораётганда гулзор йўлкада кичкина Гулбаданни учратди. Зийрак қизча отасини қийнаб юрган мушкулотларни тушунмаса ҳам унга ич-ичидан қайишиб, ҳамдардлик билдираётгандек мўлтираб қараб турарди¹.

2

Отасининг махфий мактуби борганда Ҳумоюн Самбхалда оғир касалга чалиниб тўшақда ётган эди. Мактубни ўқиғач, одамларига:

— Мени тезроқ Аграга етказинглар!— деб буюрди.

Дехлига келгунча Ҳумоюннинг иситмаси яна ошиб, касали баттар оғирлашди. Уни олиб келаётган Ҳиндубек йўлда бирор кор-ҳол бўлишидан кўрқиб, дарҳол Аграга хабар юборди-ю, ўзи Дехлида қолиб Ҳумоюнни энг яхши табибларга даволата бошлади.

¹ Бобурнинг фарзандлари орасида энг узоқ умр кўрган ва саксонга кирган Гулбадан бегим бөлалагида кўрган билганларини «Ҳумоюннома»да батафсил ёзган. У отасининг охириги пайтда тожу тахтдан астойдил кўнгли қолганига, ҳокимиятни Ҳумоюнга бериб, ўзи Тохир офтобачи билан бир гўшада яшамоқчи бўлганига далиллар келтирган.

Лекин дору дармон кор қилмас, қора безгакка ўхшаш бир дард Ҳумоюнни кечаю кундуз куйдириб, гўё жингак қилиб ташламоқда эди.

Аградан икки кечаю кундуз отлиқ йўл юриб, Моҳим бегим етиб келди. Дарё йўли тинчроқ ва салқинроқ дейишиб, Ҳумоюнни Дехлида кемага солишди-да, оқим бўйлаб Агра олиб келишди.

Ҳумоюнни тахтиравонга ётқизиб, саккиз йигит Зарафш боғига кўтариб кирди. Бобур ранги ердай ўнгиб кетган Моҳим бегимни кўргандаёқ, юраги «шув» этиб кетди. Йигитлар кўриб келаётган тахтиравон унинг кўзига тобутдай совуқ кўринди.

Ҳумоюн туни бўйи алаҳлаб беҳуш ётди. Фақат сахар палла кўзини хиёл очиб, тепасида турган отасини таниди, ўрнидан тургиси келиб қимирлади, лекин бошини кўтаришга ҳам мадори етмади. Отасининг махфий мактубида ёзилган гапга рози бўлолмаслигини айтмоқчи бўлиб:

— Биз... хизматда... сизсиз... — «Мумкин эмас!» дегандай бош чайқади-ю, кейин яна алаҳлай бошлади.— Фулга уринг... уринг! Кетди!.. Тўхта!..

Ҳумоюн нафаси қайтгандай талваса қилиб, ўзини у ёқдан-бу ёққа бир-икки отди-ю, яна ҳушидан кетди.

Сарой табиблари бу оғир дардга ҳеч бир даво тополмадилар. Моҳим бегим юм-юм йиғлайди. Бобур суюкли ўғлини ҳадеб ўтга-сувга солиб, шу касалликка ўзи ҳам сабабчи бўлгандай ўртанади. Оғир пайтларда Бобурга суяниб ўрганган одамлар бирон чора топишни ундан кутадилар. Лекин ҳозир у ҳам чорасизликдан ўзини кўядиган жой тополмай қийналди.

Кексайиб мункиллаб қолган шайхулислом Бобурнинг ёнига келди:

— Ҳазрати олийлари, кўп ғам чекманг, парвардигор ғойибдан шифо юборгусидир,— деди.— Табибларданки иш чиқмади, энди худо йўлига дунё молидан тасаддиқ қилмоқ керак.

Бобур шайхулисломнинг ниятига тушунолмай:

— Қайси молдан?— деб сўради.

— Жон омон бўлса жавоҳир топилур. Ўшал... ашхас олмос яхши тасаддиқ бўлгай.

Бобур Жамна устида кемада ўлтирганда Ҳумоюн келтириб кўрсатган олмосни эслади.

— Кўҳинурними?

Шайхулислом тасдиқ маъносида бош ирғади. Бобур ҳушини бир жойга йиғиб:

Тақсир, кимга тасаддиқ қилайлик? деб сўради

Қиймати улкан олтин хазиналарига баробар келадиган бу олмосни ўғрилардан қўриқлаб туриш учун ҳам жуда қўп навкар керак эди. Шунин биладиган шайхулислом «менга» дейишга тили бормади.

— Муртазо Али мазорига.— деди.— Дин йўлига.

Мазор ва Кўхинур олмоси бир-бирига мутлақо қовушмайдиган нарсалар эди. Диндорларнинг каттаси шайхулислом бўлганлиги учун оламини безайдиган бу гўзал олмос айланиб келиб унинг сандиғига тушиши аниқ. Бобур ҳозир молу дунёни ўйлайдиган аҳволда бўлмаса ҳам Ҳумоюнга тақдим этилган бу ноёб гавҳарга мункайган шайхулислом кўз тиккани уни сергаклантирди. Рухонийлар иложини топса подшоҳдан ҳам баланд туришга ва уларнинг бошига оғир кун тушганидан фойдаланиб ўз ҳукмларини ўтказишга интилишлари кўндан маълум эди.

— Тақсир, назарингизда, ўшал олмос азизми ёки меннинг жоним азиз?

Шайхулислом ҳанг-манг бўлиб:

— Нечун ундай дейсиз, ҳазратим!— деди.— Ундоқ олмосларнинг юзтасидан сизнинг бир мўйингиз азизроқдир!

— Миннатдормен! Ундоқ бўлса, мен Ҳумоюнга жаҳондаги барча олмослардан ҳам азизроқ бир нарсамни қурбон қилмоқчимен. Фақат бу қурбонни сизу бизга ўхшаган бандалари эмас, зарур бўлса, парвардигорнинг ўзи олсин!

Бобур ўзига умид билан қараб турган одамларнинг орасидан ўтиб, Ҳумоюннинг тўшаги ёнига келди.

— Ҳумоюн, жигарбандим!— деди у ҳамма эшитадиган товуш билан.— Сенинг бетоқатлигингга мен тоқат келтирай. Сенинг шу оғир дардингни худо сендан олиб менга берсин!

Беҳуш ётган Ҳумоюн бу гапларни эшитмас, лекин беморнинг хобгоҳидаги аёллар, мулозимлар, табиблар, рухонийлар — ҳаммаси Бобурга қулоқларини динг қилиб қараб турардилар.

Бобур умумий жимликда Ҳумоюннинг бошидан уч марта айланди-ю:

— Э, парвардигор!— деб илтижо қилди.— Менки Бобурмен, агар жоп бериш мумкин бўлса, умру жонимни Ҳумоюнга қурбон қилдим! Азройил меннинг жонимни олсин у худо Ҳумоюнга шифо берсин!

Моҳим бегим йиғидан тўхтаб, Бобурга қўрқув аралаш ҳайрат билан тикилиб турарди. Кекса шайхулислом эса ҳозирнинг ўзидаёқ Ҳумоюннинг соғайиб кетишини ва Бобурнинг ҳолсизланиб йиқилишини кутгандай анча вақт ота-болага бақрайиб қараб турди.

Лекин қутилган мўъжиза юз бермади. Бехуш Ҳумоюн алаҳлаб бир нима деди-да, яна жим бўлди. Бобур бошини қуйи солиб хобгоҳдан секин чиқиб кетди. Унда ҳеч қандай ўзгариш юз бермагани эса шайхулисломни саросимага солди.

3

Йиғирма уч ёшли Ҳумоюннинг йиғит юраги касалликни ахири сизди. Орадан бир ҳафта ўтгач, у касал кўришга келганларни ўрнидан туриб қабул қилди. Яна икки кундан сўнг отасини бориб кўриш учун ўзи уйдан чиқди.

Бобур кутубхонанинг хонаи ҳосида қадимий бир қўлёзмани ўқиб ўтирган эди. Ҳумоюн унинг қаршисида тиз чўкиб:

— Мен сизнинг илтижонгиз билан шифо топмишмен!— деди.— Ўзимга келганимдан бери худодан тилайменки, сиз мен учун қилган тасаддикни даргоҳида қабул этмасин! Бу улуг давлатни сиз барпо этдингиз, ҳаммамизнинг суянган тоғимиз ўзингизсиз! Парвардигор бизга раҳм қилсин!

— Мана, шукур, юрибмен-ку, ўғлим. Ҳозирги иситмаю уйқусизлик менда бултурдан бери бор.

— Рухонийлар: «Ҳазратим ўғлига келган нақд ажални ўзларига олдилар» деб қўнғлимга ғулғула солмоқдалар!

— Сен нечун уларга ишонурсен? Бошимизга оғир кун тушганда шайхулислом менга ўз ҳукмини ўтказмоқчи бўлди. Мана, хайрият, тузалиб кетдинг. Агар ўшанда унинг гапига кириб, Кўҳинур олмосини тасаддиқ қилсам, рухонийлар ғолиб чиқмасмиди? «Ҳумоюнни биз қутқариб қолдик, подшоҳдан ҳам биз зўрмиз!» деб тантана қилмасмиди? Сени бир умрга қарздор қилиб қўймасмиди?

— Илоҳим, сиз ҳақингиздаги қароматлари ҳам ёлғон чиқсин!

— Ҳар қалай, сен бир нарсани унутма. Рухонийлар подшоҳнинг тепасига чиқиб олса, тамом! Самарқанддаги Абдуллатифнинг инқирозию отасига қарши қилич кўтариши шундан бошланган.

— Токи тирикмен, бу ўғитингизни ёдимдан чиқармасмен!.. Энди... ҳазратим, Самбхал чегарасида яна тажовузлар бўлмоқда эмиш. Мен эртага жўнаб кетай, ижозат беринг.

Бобур ҳозир айтмоқчи бўлган сўзига алоҳида эътибор талаб қилиб, бир лаҳза жим турди.

— Ҳумоюн, Байда менга заҳар бергандан бери ҳеч ўзимга келолмаймен. Қолган кучим ижодга етса ҳам хўп гап. Энди давлат юкини сен елкангга олмоғинг керак. Майли, Самбхалга бориб чегарани тинчитгину ўрнингга Ҳиндубекни ҳоким қилиб, дарҳол Аграга қайтгин.

Ёмғир фасли ўтиб, осмон яна булутлардан тозаланди, тунлар салқин бўлиб қолди. Бобур уйқусиз тунларда боққа чиқар ва юлдузларни томоша қилгиси келиб осмонга қарарди. Лекин танида иситманинг баландлигидан осмондаги юлдузлар жойидан кўчиб, гирдобга тушиб айланиб кетаётгандай кўринар, кўнгли беҳузур бўлиб, осмондан дарҳол кўзини оларди.

Кундуз саройда давлат ишларини қилган пайтида гоҳ шайхулисломни, гоҳ нуфузли аъёнларни учратар, улар Бобурга аввалгидан ҳам пастрок, эгилиб таъзим қилишар, лекин ўлиши муқаррар бўлган беморга қарагандай мусибатли кўзлар билан қарашар, муомалаларидаги алоҳида мулојимлик ҳам шундан далолат берар эди. Уларнинг эътиқодига биноан, Бобур ўз ҳаётини ўглига қурбон қилган, шунинг учун Ҳумоюн тузалиб кетган, энди кўзга кўринмас ажал қиличи Бобурнинг боши устида осилиб турар эди.

Очиқ айтилмайдиган, ҳаддан ортиқ майин гаплар, таъзиму тавозелар остига яшириладиган бу машъум ишонч Бобурга жуда оғир таъсир қилар, гоҳо атрофида айланиб юрган ўлим шарпасини унинг ўзи ҳам сезгандай бўларди.

Мезон ўтиб, қавс ойи кирганда Бобурнинг касаллиги баттар оғирлашди. Бирор жойида яра ёки шиш йўқ, нуқул ичи куяди, иситмаси кўтарилиб, ухлай олмайди, ранги кун сайин сўлиб боради. Мавлоно Юсуфий мамлакатнинг энг машҳур табибларидан уч-тўрттасини чақиртириб маслаҳатлашди. Беморнинг томиридан қон олиб кўришди. Қоннинг ранги соғлом одамшиқидек тиниқ эмас, алланечук ириганга ўхшаб қолган эди.

Табиблар ўзаро кенгашиб, «Малика Байда берган захарнинг қонда асорати қолган», деган хулосага келдилар ва қонни тозалайдиган дорилардан, апор сувидан кўпроқ беришни буюрдилар.

Лекин бу парсаларнинг ҳеч бири кор қилмади. Бобур холсизланиб ётиб қолгач, Ҳумоюнга чопар юборишди.

Ҳумоюн келса, отаси ўз хобгоҳида баланд оқ тўшақда терга ботиб ётибди. Ранги сап-сарик бўлиб кетган. Бобурнинг бош томонида Хонзода бегим пат елпиғич билан унинг юзини елпияпти. Оёқ томонида Моҳим бегим ғам-ғуссага ботиб, хайкалдай беҳаракат ўлтирибди.

Ҳумоюн тиз чўкиб, отасининг тўшагини қучоқлади. Бобурнинг озгин қўлини ўпиб кўришди, сўрашди. Сўнг отасининг бу ахволига ўзи сабабчи бўлгандай ёниб гапирди:

— Нечун бизга бунчалик жон фидо қилдингиз, ҳазратим? Бобур мажолсиз товуш билан:

— Сен буни ўзингдан кўрма,— деди.— Иллат қонда эмиш. Билмадим... Ҳар қандай олов ҳам ёниб-ёниб ахийри бир кун...— Бобур «ўчади» демоқчи бўлди-ю, лекин аёлларни аяди:— алангаси пасаядир. Мен умр бўйи аёвсиз ёндим.

— Биз учун ҳам куйиб-ёнгансиз! Энди бу қарзларни узишга менинг бутун умрим етмагай!

— Қарзингни менга узолмасанг... фарзандларингга узарсен...

Бобур тўхтаб-тўхтаб сўзлаётган бўлса ҳам кўнглидаги гапларини равон айтаётгани Ҳумоюнни умидлантирди. У отасининг сўзини бўлмай, жим қулоқ сола бошлади.

— Темурийларнинг кўпчилиги... фидойиликни унутиб... йўқ бўлиб кетди. Ўғил отани ўлдирди. Оға инига хиёнат қилди... Оқибатда... бари разолатнинг қурбони бўлди... Ундан кўра... яхшиликнинг фидоси бўлган афзал эмасми?.. Мана амманг Хонзода бегим... Самарқандда мени қутқариб ўзини асоратга солди. Бу фидойилик мени ҳамиша... шундай бўлишга ундаб келди... Сен ҳам энди иниларингу... авлодларингни мардликка... фидойиликка ўргатгин.

Бобур тўшакнинг орқа томонидаги ҳарир оқ парданинг ортига бошини буриб қаради. Парда ортида одам борлигини Ҳумоюн энди пайқади.

— Тоҳирбек, жуздонни келтиринг,— деди Бобур.

Шу вақтгача қимир этмай ўтирган Тоҳир энди тез ўрнидан турди-ю, тоқчадаги катта чарм жуздоннинг ичидаги янги муқоваланган қўлёзмаси билан икки қўллаб кўтариб келди.

— Бадахшонда, «Вақоий»ни сўраган эдинг,— деди Бобур Ҳумоюнга.— Мана, ёзиб тугатдим. Ол.

Тоғлар орасида Бобур: «Бу китоб битганда менинг умрим ҳам тугагай!»— дегани Ҳумоюннинг ёдига тушди. У жуздон ичидаги китобни олиб пешонасига суриб ўпар экан, кўзидан тирқираб ёш чиқиб кетди. Йирик бир ёш томчиси зарҳал муқова устига томиб тушганини Бобур ҳам кўрди.

— Сендан илтимосим,— деб давом этди Бобур.— Буни авлодларинг ҳам ўқисин... Хатоларимни такрор этманглар. Яхши ишларим... оз бўлса, кўпайтиринглар. Бу китобдан нусхалар кўчиртириб, Самарқандга... Тошкентга... Андижонга... муносиб одамларга юборгин... Мен туғилган юрт билан алоқани узманглар. Шояд мен битган китоблар... икки орадаги алоқанинг ришталари бўлса...

Бобур ўглига васият қилаётганини сезиб турган Хонзода бегим ўзини ортиқ тутиб туролмади.

— Бобуржон, мен эгачингиз!.. Мен... мен сиздан беш ёш каттамен! Бу дунёдан кетиш навбати аввал меники! Сиз таслим бўлманг! Бобуржон, иним!

Хонзода бегим унинг подшолигини унутиб, «Бобуржон!» — деганда Бобур беғубор болалигини эслаб, кўнгли бир орзиқди. У беклардан ҳам, савдарлардан ҳам, бегоналардан ҳам, ҳатто суюкли ўгли ва хотинидан ҳам нуқул «ҳазратим» деган мурожаатни эшитар, кўп ишлатилавериб сийқа бўлиб кетган бу сўз унинг жуда меъдасига теккан эди.

Пиқ-пиқ йиғлаётган Моҳим бегим олдинги оғир суҳбатларни эслаб:

— Менинг хархашаларим ҳам сизни хаста қилди, ҳазратим!— деди.— Мени кечиринг!

— Моҳим, сиз мени кечирсангиз бўлди... Мен сиздан розимен... фақат энди мени ҳазратим деманг...

Моҳим Бобурни: «Кўз очиб кўрган танҳо ёримсиз, жисмимдаги жонсиз!» — демоқчи бўлиб оғиз жуфтлаб кўрди-ю, лекин атрофидагилардан уялди. Йиғи аралаш:

— Хўн,— дея олди, холос.

Бобур унинг айтилмаган сўзларини овозидан, кўзларидан сездди. Сўнг ўғлига юзланди:

— Ҳумоюн, мен сендан ҳам «ота» деган сўзни ҳали эшитганим йўқ.

«Ота» деган жўнгина сўзга ўрганмаган Ҳумоюн:

— Падари бузруквор!— деб кўрди. Бундан отасининг кўнгли тўлмаганини сездди-ю:— Отажон!— деди.— Сиз салтанатни менга бермоқчи бўлибсиз. Лекин ишонинг, мен бу тожу тахтдан сизнинг бир нафаслик умрингизни афзал кўрурмен!

— Мен сендан розимен... Энди мендан ҳам рози бўлинглар!

Хонзода бегим розилик сўрашга тили бормай ўртаниб йиғлади. Унинг йиғисига Моҳим бегим қўшилди.

Бу оғир аҳволнинг устига кириб келган мавлоно Юсуфий Бобурнинг кўзлари бежо бўлаётганини, уни қаттиқ тер босганини кўрди.

— Энди ҳазратим ором олишлари керак!— деб қўлига оқ докани олиб, Бобурнинг юзидан, бўйинларидан терларини арта бошлади.

Қийналиб нафас олаётган Бобур бош томонда турган Тоҳирга шивирлаб:

— Елпинг!..— деди.

Йиғи-сиғи билан Бобурни қийнаб қўйганларини энди сезган бегимлар секин чиқиб кетдилар. Бобур Ҳумоюнга:

— Энди эшик оға билан... аъёнлар кирсин,— деди.— Кўзим тириклигида... ҳокимиятни сенга топширай.

Ташқарида кутиб турган Муҳаммад Дўлдай ва бошқа нуфузли беклар кирдилар. Бобур уларнинг олдида подшолик тожини ўгли Ҳумоюнга топширди. Рози-ризолик сўраш пайтида беклардан бир-иккитаси кўзига ёш олгандай бўлди. Лекин

чиқиб кетаётганларида ҳаммалари энди Ҳумоюннинг атрофида парвонадай айланиб, янги июятлар умидида кўзлари тама билан ёнганини Бобур кўриб қолди.

Хонада Тоҳир билан шкёвлари қолгандан сўнг:

— Энди... беку султонларга менинг керагим йўқ.— деди.— Тоҳирбек, кечга... Мавлоно Фазлиддинни чақиртиринг.

Тоҳир Бобурга табиб Юсуфий буюриб кетган суюқ доридан ичиртирди, унинг қийшайиброқ қолган ёстиғини тўғрилаб кўйди. Сўнг савдарлар хонасига ўтиб, тоғасига одам юборди.

Айтилган пайтга етиб келган мавлоно Фазлиддин Бобурнинг ўлим тўшагида ётганини кўрди-ю, тугёп ичида:

— Ҳазратим, худо сизга қувват берсин!— деб кўлидан ўпди.

— Мен... подшоҳликни Ҳумоюнга топширдим... Минбаъд ҳазратим, деманг, мавлоно. Муносиб кўрсангиз... мени ҳам мавлоно денг.

— Биз Навоийни улуғ ижодлари учун «ҳазрат Алишер» дер эдик. Сиз туркий тиллик адабиётимизнинг Навойдан кейинги энг улкан сиймосидирсиз. Шу сабабли сизни шоир ва адиб сифатида «Бобур ҳазратлари» дейишга ҳақлимиз.

— Миннатдормен, мавлоно... Сиз Аграда, Секрида, Деҳалпурда ажиб кўшқлар, оромгоҳлар барпо этдингиз... Худо умр берса мен... Самарқанддаги Бибиҳоним мадрасасидек улуғ бир... мадрасанинг тарҳини сизга... чиздирмоқчи эдим... Опасингиларимизнинг қадрини бошимизга... кўтарсак арзигай...

Мавлоно Фазлиддин Бобурнинг сўнги кучларини тўшлаб, қийналиб сўзлаётганини сизди-ю, унинг фикрини ўзи давом эттирди:

— Доно сўзларни айтдингиз, ҳазратим! Чиндан ҳам халқимизда бу одат азалдан мавжуд... Самарқандда Бибиҳоним мадрасасидан ташқари Шоди Мулк бегим мақбараси бор. Ҳиндларда ҳам аёл зотига эҳтиром зўр экан, ҳатто сифшадиган худолари орасида ҳам аёллар бор... Бизнинг Ҳироту Самарқанддаги энг яхши меъморчилик анъаналаримизни Ҳиндистоннинг энг ажиб анъаналарига пайванд этиб, аёл зотиини улугловчи бир мадраса қуриш менинг ҳам энг эзгу орзуларимдандир!

Бобур мавлоно Фазлиддиннинг Хонзода бегимга бўлган ёшлик меҳри замона зайли билан қандай қурбон бўлганини эслади-ю:

— Мавлоно,— деди,— менинг эгачим Хонзода бегим... инсонийликда тенгсизлар!.. Агар сиз орзу қилган... мадрасани қуриш бизга nasib бўлса... уни «Хонзода бегим мадрасаси...» деб атасак арзир эди...

Мавлоно Фазлиддиннинг кўзларида яшин каби бир олов чақнади:

— Ҳазратим, сиз ҳозир менинг қўзимга муқаддас бир мақсадни кўрсатдингиз! Агар бу мақсадни рўёбга чиқаришга менинг умрим етмаса, уни фарзандларимизнинг дилига жо этиб кетгаймен. Токи улар ҳинд меъморлари билан ҳамкорликда халқларимизнинг аёл зотига бўлган эҳтиромини улур бир меъморчилик обидасида ифода этсинлар!

Бобурни тер босди. Унинг ҳарир оқ кўйлаги қорайиб танашига ёлишиб қолганини кўрган Тоҳир безовталаниб ўрнидан турди:

— Мулла тоға, ҳазратимни чарчатиб қўймайлик!.. Табиб «кўп ҳаяжонланмасинлар!» деб тайинлаган эди...

Сухбатнинг тафти чиндан ҳам баланд бўлаётганини энди сезган мавлоно Фазлиддин ўрнидан кўтарилди:

— Ҳазратим, энди ором олинг! Мен кейин яна келурмен!..

Бобур мавлоно Фазлиддинга қараб:

— Яна бир ўтинчим бор,— деди.— Оламдан кўз юмсам... Кобулда ўзингиз тарҳини чизган беғ бор... Тоғ тепасида... Абадий оромгоҳим... ўша Гузаргоҳда бўлсин... Ортикча даб-дабасиз... шоирона бир тарҳ чизинг...

Мавлоно Фазлиддин ўпкаси тўлиб гапиролмади. Тасдиқ маъносида бош ирғади-ю, кўзидан опноқ соқолига оқиб тушган ёшини аргиб эшикдан чиқди.

Тоҳир Бобурнинг тердан ҳўл бўлган ички кийимларини алмаштирди. У ўзини одатдагидай осуда тутиб, кундалик хизматларини қунт билан адо этар эди. Бобур чапқаса сув берадиган ҳам, нафаси қайта бошласа елпийдиган ҳам Тоҳир эди. У шу ерда бўлса, Бобур сокироқ ётишини мавлоно Юсуфий ҳам билар, шунинг учун Тоҳирни туну кун беморнинг олдидан кеткизмас эди.

Бугун кечаси Бобур ичкарида ҳадеб беҳаловат бўлавергандан кейин Тоҳир савдарларни чақириб, уни тўшаги билан ҳовлидаги усти очик мармар супага чиқартирди.

Агранинг кеч кузи худди Андижоннинг баҳор пайтларидек салқин ва майини туюлар эди. Қоп-қора осмонда юлдузлар чарақлаб турибди. Иситмаси баланд Бобурга юлдузлар яна гирдобга тушиб айланаётгандай ва бир-бирларига урилиб кетаётгандай кўринди. Бобур кўзини юмди:

— Бадашимда... қон уюшиб қолаётгандай...— деди Тоҳирга

Тоҳир унинг елкаларини, қўлларини, кейин оёқларини сикип-секин уқалай бошлади. Бобур бундан сал енгил тортгандай бўлди-ю, кўзини очиб яна осмонга қаради.

Юлдузлар энди жой-жойида тўхтаб, сокин пур соча бошлади. Ана Олтин Қозик. Унинг ғарб томонидаги Етти Оғайни юлдузлари уфққа оғиб тушиб кетяпти. Шарқдан эса бир тўп бўлиб Хўлқар юлдузлари кўтарилиб келяпти

— Бизнинг Қувада ҳам Хулкар худди мана шунақа бўлиб чиқар эди,— деди Тоҳир.

Бобур ҳам болалиги ўтган Андижон осмонини эслади. Мана шу Етти Огайни юлдузлари ўша ерда ҳам Олтин Қозикни айланиб ўтиб, ғарбга ботиб кетарди. Ўша ерда ҳам Етти Огайни уфққа бош қўйган сари Хулкар юлдузлари осмоннинг баланд жойларига чиқиб борарди. Бобур ўсмирлигида Хулкар юлдузларини олмосдан ясалган варракка ўхшатар эди. Думини қувноқ силкитиб учадиган олмос варрак унинг хаёлини яна мусаффо болалик йилларига олиб кетди. Осмон дунёнинг ҳамма жойида бир экани, умрининг бошланишида Андижонда кўрган юлдузлари умрининг охирида Аграда ҳам чақнаб тургани унга сўнги бир тасаллидек туюлди. Бобур осмонга қараб ётганда яна ёш, соғлом йигитга айланиб, Андижон чорбогининг супасида ётгандай бўлди.

Бир лаҳзалик бу ширин ҳис кетидан яна шафқатсиз бир қалтироқ босиб келди-ю, юлдузли осмонни гирдобига олиб, гир-гир айлантира бошлади...

Тун ярмидан ошганда Тоҳирнинг ўкириб йиғлагани қоронғи боғни зир титратди...

ХОТИМА

Мавлоно Фазлидин Кобулда Бобурга анвой рангли мармарлар билан зийнатланган серфайз бир макбара қуришга улгурди, лекин Хонзода бегим номига мадраса қуриш унга nasib бўлмади, унинг бу орузини орадан юз йиллар ўтгандан сўнг Бобурнинг чевараси Шох Жаҳон қурдирган машхур Тож-Маҳалда улуг ҳинд меъморлари рўёбга чиқарган бўёсалар эҳтимол.

Тоҳир «Бобурнома»дан кўчирилган нусхаларни адибнинг Андижондаги, Тошкент ва Самарқанддаги мухлисларига элтиб топширгач. Ўзи Робия билан бирга Қувага қайтди. Улар умрларининг қолган қисмини тугилган юртларида ўтказдилар. Бироқ ўғиллари Сафарбек мавлоно Фазлидиннинг фарзандлари билан бирга Аграда умрбод қолдилар ва ўша ерда оила қуриб, ҳинд халқига қўшилиб кетдилар.

Бобур тузган улкан давлат ўз қудрати ва маданий ёдгорликлари билан жаҳонга танилиб, уч аср умр кўрди-ю, тарихда қолди. Унинг авлодлари бугунги кунга етиб келолмадилар — энг охирги бобурийлар ўтган асрларда илғиз мустамакачилари даврида маҳв этилди.

Фақат Бобур ўз қўли билан ёзган энг яхши асарлар ҳалигача тирик бир қалбнинг ҳароратига тўлиб, одамларга ҳамон маънавий озик ва завқ берапти. Тўғри, унинг бир умри қоронғи осмонда оловли из қолдириб учган юлдуздек тез сўнди. Лекин ўлмас асарлари саҳифасида салкам беш асрдан бери давом этиб келаётган иккинчи умри — бу юлдузнинг тундан тонгга қараб учганини ва ўз нурини келажакка йўналтирганини айтиб турибди. Бобур қалб ўтига йўғириб яратган маданий мерос бугунги сернур авлодларни баҳраманд қилгани сари унинг ана шу иккинчи умри ҳам қоронғи тунлардан кейинги ёруғ кунларда астойдил обод бўляпти.

ҲАҚИҚАТНИНГ МАШАҚҚАТЛИ ЙЎЛИ

50-йилларнинг ўрталаридан мамлакатимиз ижтимоий-сиёсий, маънавий ҳаётида қандай ҳам кескин бурилиш юз бера бошлади, партия большевистик принциплар ва ўз-ўзини таъкид руҳини намойиш этиб, омманнинг мададига таялиб, шахсга сизилиши оқибатларини, партия ва давлат раҳбарлигининг ленинча нормаларидан чекинишларни тугатиш, субъективистик, волюнтаристик тарздаги ҳатоларни тузатиш юзасидан қатта инларни амалга оширди, совет демократияси янада ривожлантирилди, социалистик қонунчилик мустақамланди; идеология соҳасида догматизм ва кироятхонликка зарба берилиб, ошқоралик ва эркин фикрланга йўл очилди. Буларнинг ҳаммаси адабиёт ва санъат ривожига янги бир тўлқин олиб кирди, ижод олдида турган бир қатор суъвий тўсиқлар баргараф этилиб, асарларда ҳаёт ҳақиқати бор бўйича — бутун мураккаблиги, зиддиятлари билан аке эга бошлади. Ана шу мусоаффо иқлим шароитида адабиётга бир қатор умидли ёш қаламкашлар кириб келди, улар ўзларининг илк истеъодли асарлари билан янги давр руҳини, даврининг янгича ҳис-туйғуларини, қарашларини, кескин ўзгаришлар палласи муаммо ва драмаларини олиб келдишлар.

Шу авлод вакили Пиримқул Қодировнинг илк ижодий машқлари матбуотда 40-йилларнинг охириларидаёқ кўрина бошлаган. 1950 йилда «Студентлар» деган ҳикояси алоҳида китобча бўлиб чоп этилган бўлса ҳам, 1957 йили ёзиб тугатилган «Уч илди» романи, ха, айни XX съезд руҳи билан йўғрилган шу асари орқали ёзувчи сифатида танилди. Уша йилнинг кеч қузида роман қўлёзмаси республика Ёзувчилар союзида муҳокама қилинди. Муҳокамада устоз адиб Абдулла Қаҳҳор: «Анча вақтдан бери мен ўзбек адабиётида момақалди роқ гулдуросини эшигмай юрган эдим. Назаримда, мана шу асар адабиётимизга момақалди роқдай гулдурос солиб, чақмоқдай ялтिलाб кириб келяпти», дея юксак баҳо берди. Бу баҳо ўша кезларда, эҳтимол, баъзи бир овларга муболага бўлиб туюлгандир. Бироқ Абдулла Қаҳҳор ҳақ эди.

«Уч илди» 50-йиллар ўрталаридаги муҳим тарихий жараёнларнинг қайноқ изидан бориб ёзилган. ўзбек адабиётида, балким қўлмиллатли совет адабиётида шахсга сизилишининг похуш оқибатларини биринчилардан бўлиб аке эттирган йирик асардир. Шахсга сизилиши муҳитида етишган, догматизм ҳамда вульгар социологизм ақидалари билан заҳарланган, демагогияни ўзларига қурол қилиб олган, шу ақида ва қурол воситаида мансаб мартабаларга, илмий даражаларга кўтарилган, ҳолис, истеъодли, ҳақиқий фан заҳматкашларини йўлдан олиб ташлашга эришган кимсаларнинг муҳдиши хатти-ҳаракатини, асл қиёфасини фаш этиш, кескин бурилиш шароитида етишиб чиққан ўшандай кимсаларга, қабоҳатларга қарши турган янги тиндаги кишилар курашини кўрсатиш, ҳимоя қилиш — романининг асосий говийий-бадиий мундарижасини, пафосини ташкил этади.

Роман воқеалари бир олий ўқув юртида бўлиб ўтади, асар қаҳрамонлари зиёлилар — профессор-ўқитувчилар, аспирант ва студентлар, асардаги интригалар эса, асосан, идеологик-мафқуравий курашлар теварагида кетади; асарда ёшларнинг ишқ-муҳаббати, севгидаги адашишлар, янгича ва эскича қарашлар, янгича қарашларининг таитанаси, ўқув-тарбия масалалари билан боғлиқ можаролар ҳам қаламга олинади, бироқ бу можаролар ҳам ҳар хил йўллар билан бош масалага — идеологик-мафқуравий курашларга бориб уланади, персонажларнинг ҳақиқий бисоти асосан ўша бош масалага муносабатда намойиш бўлади. Бу жиҳатдан «Уч илди» маълум даражада Абдулла Қаҳҳорнинг «Сароб» романини ёдга туширади.

Дарвоқе, Пиримқул Қодиров Тошкент Давлат университетиде ўқиган, бадниятга майл кўрсатиб, ижодий машқлар қилиб юрган пайтлардаёқ Абдулла Қаҳҳор асарларига ихлоси ниҳоятда баланд эди, илк машқларидан бирини Абдулла Қаҳҳорга ўқиб бериб, устоз маслаҳатини олган, кейинроқ Москвада аспирантурада Абдулла Қаҳҳор ижоди бўйича илмий тадқиқот олиб борган, бу улкан санъаткор маҳорати сирларини махсус ўрганган эди. Ёзувчи «Уч илди» да студент ёшлар, зиёлилар ҳаётига мурожаат этар экан, сал бурун ўзи меҳр кўйиб таржима қилган Константин Фединнинг «Илк севинчлар» романи қатори «Сароб» тажрибаларидан руҳланди, озик олди. «Студентлар ва зиёлилар ҳаёти «Сароб» романида қанчалик теран ва таъсирли кўрсатилгани кўичликка маълум,— деб ёзади Пиримқул Қодиров «Адиб сабоқлари» мақолисида.— Мен ҳам биринчи романимни студентлар ва зиёлилар ҳаётидан ёзмоқда эдим... Тилда, таъсирий воситалар танлашда Абдулла аканинг энг яхши анъаналарига кучим етганича амал қилдим, аммо «Сароб»даги психологик теранликлар, айниқса, салбий қаҳрамонларни ичдан кўрсата олиш санъати мен учун эгаллаш маҳол бўлган марралар эди».

«Уч илди» романи ҳам худди «Сароб» каби икки студент ёшнинг бир-бирлари билан танишуви, муҳаббатни билан бошланади; бу ерда ҳам «Сароб»даги сингари ёшлар орасидаги севги ришталари уларни даврнинг ижтимоий-мафкуравий давралари билан боғлайди: роман қаҳрамони Маҳкам меҳр кўйган қиз Гавҳар «урилган», «номига доғ тушган» кишининг — тарихчи олим Тошевнинг қизи бўлиб чиқади. Тошев эса худбин, мансабнараст, демагог ва даққи кимсалар қутқусен билан «мафкуравий хато»лар қилганликда айбланиб, партиядан ўчирилган, ишдан четлатилган. Маҳкам учун энди секин-аста университетдаги, факультетдаги носозлик ва носоглом муҳит — декан Ҳақимов билан Эшонбоевнинг қисқир ишлари, ҳалол, олижаноб, етук олим Акбаровга қарши уюштирилган бўҳтондан иборат ғоявий айбномалар сирни ошкор бўла боради. «Сароб»даги мафкуравий курашларнинг моҳияти аён; гарчи, бош қаҳрамон Саидий дуч келган Муродхўжа домла, Салимхон ва Мухторхонлар яширин йўллар билан кураш олиб бореалар ҳам, уларнинг янги жамият душмани экани маълум; «Уч илди»да эса ўзгача манзара: ўзларини социалистик ғоя нособонлари деб санаган кимсалар аслида шу ғоя, шу тузум зарарига иш кўрадилар, улар назарида социалистик ғояга эид борганлар эса шу ғоя, шу тузумнинг садоқатли одамлари бўлиб чиқадилар. Ёзувчи шу мураккаб тоифа одамлар асл қиёфасини, туб моҳиятини очишга уринади. Асар бош қаҳрамони, янги муҳит авлоди вакили Маҳкам дуч келган энг хатарли хавф — декан Ҳақимов билан унинг шогирди, издоши Эшонбоев. Аввало уларнинг мафкураси, мафкуравий кураш усули хавфли. Шахсга сиғиниш муҳитида шаклланган кишиларни бошқаришнинг осон йўлларида бири — кўрkitиб бошқариш йўли бўлган. Ҳақимов шу усулига амал қилади, у ўзининг гашига тегиб юрган одамларга худди шу усул билан муомала қилади ва муайян муваффақиятларга эришади. Бу соҳада унинг энг катта муваффақияти — Умаровнинг қамалиб кетиши, Тошевнинг оғир жазо олиши, Акбаровнинг эса таъқибга учраши. Бу тилдаги кишилар қилмишининг хатарли жойи шундаки, улар пичоқ ўқталиб кўрkitмайди, энг азиз сўзларимизни, ғояларимизни, энг азиз ахлоқ нормаларимизни пичоқ қилиб ўқталиб кўрkitадилар. Ҳақимов характерининг яна бир жиҳати шуки, ўзидан «настроқ» турганларнинг кўрkitиб ҳурмат қилишига ўрганган Ҳақимов ўзидан «юқори» турганларни кўрkitиб ҳурмат қилади. Бу хилдаги кўрkitишу кўрkitишларнинг захари факультетда, университетда, борингки, республикада, мамлакатда қанчадан-қанча одамларнинг онгини захарлаган экан! Кўрkitиш ва кўрkitишнинг энг захарли меваларидан бири ёлгон билан қаллоблик. «Ҳеч ким ўз-ўзидан ёлгончи бўлмайди. Ахир ростгўйликнинг афзаллигини, гўзаллигини ким билмайди? Лекин киши рост гаши айтишдан кўрксаю бирор нарса дейишга мажбур бўлса, ёлгон гапирди. Бир марта, икки марта, уч марта шундай қилади-ю, кейин ёлгон билан мушкулни

осон қилишга ўрганиб қолади. Аввал кўрққанидан ёлгон гапирган киши, кейин ёлгоннинг фош бўлишидан кўрқиб ёлгон гапирди. Бу ёлгон аввалги ёлгонга қўйилиб баттар кўрқитади. Кейин кўрқувдан — ёлгонга, ёлгондан — кўрқувга узлуксиз йўл очилаверади. Агар ҳамма Ҳакимовдай кўрқитиб бошчилик қилиш йўлига ўтса, ҳаммаёқни ёлгончилик, қаллоблик босиб кетар эди». Асар персонажларида бири — ҳалол, виждонли педагог — олим Акбаров томонидан айтилган, буидан ўттиз йил бурун битилган бу гапларда шахсга сиғиниш муҳитида шаклланган зўравонлик психологияси моҳияти нақадар аниқ-равшан ифода этилган. Бундай бошқариш усули жиддий маънавий никирозларга, қўплаб жиноятларга йўл очиб берганлигини, бу ҳол халқимиз учун қанчалар қимматга тушганлигини бугун ҳамма билади.

II. Қодиров талқинида чин севаги фақат икки ёшнинг бир-бирига самимий талқиниши, қўнгил сурури, бегараз муносабатигина эмас, балки қатта масъулият, улар орасидаги маслак, эътиқод, мафкуравий ҳамкорлик; самимий, интим севаги иқтимоий мазмун билан бойиша, одамни юксак мақсадлар сари ундайди, кенг миқёсларга олиб чиқади. Айни шундай талқин ёзувчининг галдаги асарлари «Қора кўзлар» романи ҳамда «Жон ширин» ҳикоясида янада сайқал топади.

«Қора кўзлар» романи ёзувчи ижодида олга ташланган қалам, ўзбек романчилигида муҳим ҳодиса бўлди. Қинилоқ, аниқроғи, чорвадорлар ҳаётидан олинган бу асар кишлоқ ҳақидаги стереотипларни, бир ёқлама, юзаки ширин тасаввурларни чилларччи этиб, адабиёт юзиши ҳаётнинг ўтқир муаммолари, чигалликлари томон буриб юборишда муҳим роль ўйнади.

Ширинқул Қодировнинг «Қора кўзлар», «Олмос камар» романи, «Жон ширин», «Қайф», «Эрк», «Мерос» каби ҳикоя ва қиссалари, қўплаб публицистик мақолаларида 60 - 70- йиллар ҳаётининг қўн томонлари, ўтқир муаммолари ҳалол ва мардона туриб ўрғага қўйилган, ҳаётдаги мураккаб, зиддиятли жараёнлар теран бадний таҳлил этиб берилган. Агар «Уч паллиз» ёзувчи ижодида улкан ва кескин иқтимоий муаммоларга қўл уришда дадил тажриба, ижодий жасорат саналса, «Қора кўзлар» романи реал ҳаёт бағрига, турмуш мураккабликларига, одамларнинг руҳий оламига чуқур кириб боришда ёзувчи истеъдодининг янги қирраларини намоён этишчи асар бўлди. Адабиётшунос олим Матёкуб Қўшқонов ҳақини равишда «Қора кўзлар» ни «она асар» деб атайд.

«Қора кўзлар» авторини олис кишлоқ, орқада қолган хўжалик ҳаётини роман кўзгуенга солиб, бор ҳолича кўрсатди. Асар бошдан оёқ оддий, камсуқум, заҳматкан мекнат аҳлига, ҳар қандай мураккаб, мушкул вазиятларда ҳам инсоний фазилатларини сақлаб қололган асл инсонлар — қора кўзларга чуқур ҳурмат, ҳамдардлик руҳи билан сугорилган. Ёзувчи худди ўша қора кўзлар — ҳалол, камсуқум, жафоқаш кишилар бошига тушган қуфратлар учун чин дилдан қайғуради, улар адашганида астойдил ачинади, уларни чалғитган, турмушини, тақдирини чигаллаштирган ҳаётий-маънавий омиллар устида теран мушоҳада юритади. Улар бахтига зомин, камолотига, олижаноб мақсад, орзу-иштиҳилларига тўғанок бўлаётган кимсалар қилмишини, тубан маънавий дунёсини қаҳр-ғазаб билан фош этади.

«Қора кўзлар»да 60 йиллар бошларидаги кишлоқдаги социал муносабатлар яхши таҳлил этиб берилган. Бир вақтлар ҳалол, эл-юрт гамини ўйлайдиган чин коммунист — раҳбар ходимларнинг ғайрат-ташаббуси, эл қўнлига йўл топиб, уларни улуг ишларга руҳлантириши туфайли Ойқўл обод, фаровон хўжалик бўлган. Афсус, 30-йиллардаги мураккабликлар, уруш даври келтирган қуфратлар, урушдан кейин йўл қўйилган хатолар, субъективистик ва волюнтаристик чала-думбул тадбирлар, чуқур ўйланмаган қарор ва кўрсатмалар, энг ёмони, ўша мураккаб шароитда етишиб чиққан мунорфок, қалтабни, худбин, бюрократ раҳбар ходимларнинг айби билан Ойқўл хўжалиги чўкиб қолган. Бу ерда коллектив хўжалик, социал адолат принциплари оёқости этилади, бу ҳол одамларнинг руҳиятига, инсонч-эътиқодига раҳна солади.

Романда шахсга сиғишиш, волюнтаризм ва субъективизм муҳтида етишган мансабдор шахсларнинг хилма-хил образлари яратилган. Булар — Ортиқ, Давлатбеков ва Исмаи боболар. Давлатбеков Ойқўлга раис бўлган кезлари қилган энг катта гуноҳларидан бири шуки, у «чорвадорликда Американи қувиб етиб, ўтиб кетамиз! Рязанликлар ташаббусига қизғин қўшилиамиз», деб радиоларда жар солган, газеталарда чиққан. Давлатбеков рязанликлардан ҳам ошиб кетишга иштибли, эллик тўққизинчи йилда гўшт тошшириш иланиши икки юз эллик фойза бажаради ва орден олади. Ўша йили Ойқўлнинг чорваси аввалидан беш барабар қамайиб кетади. У ўз нафен, шон-шухрати йўлида кўнчилик манфаатини сира тап тортмай қурбон қилаверади. Худбинлик, манфаатпарастлик, мансабпарастлик бобида Ортиқ Давлатбековни ҳам ортда қолдириб кетади; у ҳам нафен йўлида ҳеч нарсадан қайтмайди, унинг учун шахсий майл олдига эл-юрт манфаати, оддий одамгарчилик, ота-она, яқин кишилар олдидаги қарз-бурч, ор-номус, инсонлик шаъни бир пул. Унинг ақидаси — нима қилиб бўлмасин, катталарга ёқиш; ишиси Аваз унга: «Сиз мунча директорга ёқинга тиринасиз?» — деб дашином берганида у: «Соддасан-да, ука. Битта мени шундай деб ўйлайсанми? Директорнинг ҳам ўзидан катталарга ёқишга тиришади. Юқоридагиларга ёмон кўринган одам «маъсул ишда ярим йил ҳам ишлаб олмайди», дейди. Аваз яна: «Пастдагиларга ёмон кўринса-чи?» дея ишанда қилганида юзеизлик билан: «Бу ҳам ёмон. Лекин юқорида суяйдиганинг бўлса, «пастдагилар» суймаса ҳам беш-олти йил чидаб бериши мумкин», деб жавоб қилади. Булар шунчаки ака билан ука орасидаги келишимовчиликларни таъкидлаш учун келтирилган гаплар эмас, балки ўша кезлари хийла кенг тарқалган Ортиқ типидagi раҳбарлар мафкурасининг айнан ўзидир. Шу ақидага амал қилган раҳбар ходимлар халқ манфаати учун қанчалар зарар келтирганини мана энди бутун даҳшати билан кўриб-билиб турибмиз!

Табиийки, шу тур раҳбар ходимлар, даҳшатли махлуқлар қилмиши, қишлоқдаги социал ва иқтисод соҳасидаги мураккабликлар одамларнинг маданий-маънавий турмушига, маънавиятига ҳам ўз салбий таъсирини кўрсатади; қоқоқ тушунча, одатларнинг кенгрок амал қилиши учун қулай замин яратади, қоқоқ тушунча, ва таомиллар билан социал соҳадаги адолатсизликлар қўшилиб, оддий меҳнат аҳли, айниқса, аёллар ҳаёти ва тақдирини чигаллаштириб юборади. Романда буни ёзувчи Аваз, Холбек, Хулжар, Жаннатой, Чўлпоной, айниқса, Мадаминжон билан Маъсуда гақдири орқали фойта таъсирчан ифода этади. Роман ичида келтирилган «Ўтган кунлар»даги уста Олимнинг мунгли севги саргузаштларини ёдга туширадиган, бир томондан, мустақил, иккинчи томондан, асар ғоявий-бадий проблематикаси билан туташиб-чирмашиб кетган Мадаминжон ҳикояси, унинг ўз турмуш ўртоғи Маъсуданинг фожией қисмати ҳақидаги алам-изтиробларга, ўқинч-армонларга тўла қиссаси жаҳолат ва социал адолатсизликларга қарши ўткир айбнома, аччиқ ҳаёт сабоғи каби янграйди. Гулдай поэтик, маъсум, гўдакдек сода, бегубор Маъсуда жаҳолат зугуми, ўзининг гўдакларча мўмин-қобиллиги, қоқоқ таомилларга қаршиликсиз итоати, ўз ҳақ-хуқуқи учун кураша билмаслиги, ҳаттоки буни ҳаёлга келтирмаслиги, оилада ҳам, далада ҳам ўзини аямай ишлаши, энг асосийси, даҳлдор шахслар — эри, қайнонаси, хўжалик раҳбарларининг эътиборсизлиги туфайли соғлиғини бой беради, бедаво дардга йўлиқиб ҳалок бўлади... Маъсуда қисмати романдаги Хулжар, Жаннатой, Чўлпонойлар, уларнинг кадрига етмай ҳаётини захарлаётганлар учунгина эмас, мумман, 60-йиллар ўзбек қишлоқларидаги реал аҳвол ҳақида жиддий оғоҳлантириш эди!

Айни шу мотив ёзувчининг галдаги асарлари — «Жон ширин» ҳикояси, «Эрк», «Мерос» қиссаларида яна ҳам кескинрок оҳангларда янгради. «Жон ширин» ҳикоясида автор фақат ишни, пахтани, план бажаришни, шу орқали келадиган шон-шухрагининга ўйлаб, одамлар ҳақ-хуқуқи, соғлиғи ҳаттоки, ҳаётини унутган қиссаларининг ҳақиқий башарасини кўрсатади. Фаросатсиз бригадир, унга бўйрук берган зўравон раис, раиснинг гафдага ки...

секретари — мана шу бир-бири билан чирмашиб кетган халка жинояти ту-
файли «дори сенилган» пайкалда ишлашга мажбур этилган бир неча киши
захарланади, бир порасида ҳалок бўлади. Ачишарин жойи шуидаки, бу ишда
гуноҳкорларни аниқлаш, айбни бўйинига олиш, айб учун виждонан эзилиш, бу
аҷчик ҳақиқатдан тегинли сабоқ чиқариб олиш ўрнига, гуноҳкорларнинг
ўзлари ишни босди-босди қилишга тиришадилар, ҳўнг-ҳўнг йиғлаётган отани
бунга қўндирмоқчи бўладилар, бу ишга рози бўлмаган, ҳақиқатни химоя
қилиб чиққанларга қарши бисотларидаги ҳамма усулларни ишга солиб кураш
олиб борадилар: жафокаш ва ҳақиқат тарафдорларига садака-ниҳом ваъда
қиладилар, бунга қўнмагач, дўқ-нўписа, дағдагага ўтадилар, демагоглик билан
ўз қилмишларини оқламоқчи бўладилар. «Биз пахта фронтининг жангчилари-
миз. Фронт эса қурбонсиз бўлмайди». Уларнинг ақидаси шундай! Гарчи,
«Эрк», «Мерос» асарларида пахта фронтининг шу хилдаги «жангчилари»,
«командирлари» образи берилмаган бўлса-да, «Эрк»даги Ойшахон аввало
онладаги қоқоқ тушунчалар, оилавий чигалликлар, қолаверса, худди «Жон
ширин» ҳикоясидаги «жангчилар» билан «командирлар»нинг бифарқлиги,
шафқатсизлиги туфайли, фақат меҳнат билан бўлиб социалистик жамият
муҳайё этган ҳақ-ҳуқуқлардан, имкониятлардан бебахра, маънавий-маданий
жиҳатдан орқада қолиб кетади. Ҳўзининг эрки, нафсонияти, аёллик шаънини
ерга уради, ҳаёти жар ёқасига келиб қолади... «Мерос» қаҳрамонлари,
хусусан, она пахта далаларида жонивор — от, темир — кетмон дош берол-
маган меҳнат машаққатларига дош бериб ишлайди...

Ёзувчи ўзини аямай меҳнат қилиш, халқимиз учун ота-боболардан
қолган мерос, ҳаётий, тарихий зарурат эканини асло унутмайди, айни пайтда,
социал адолат асосига қурилган бизнинг жамиятимизда меҳнат кишини,
айниқса, деҳқон меҳнати, заҳматкаш аёл зоти қадрга, ҳурмат-эҳтиромга
муҳтожлигини алоҳида таъкидлайди, маълум даврларда муайян сабабларга
қўра эътибордан четда қолган шу муаммога жамоатчилик эътиборини тор-
тади, ҳақиқий совет ёзувчисига хос позицияда туриб бу борадаги реал
аҳволни дашгал айтади.

70-йиллар давомида ёзувчи икки йиллик асар — тарихий темадаги «Юл-
дузли тушлар» ва замонавий мавзудаги «Олмос камар» устида иш олиб борди.
Бурида беш аср бурунги гоёт мураккаб, зиддиятли тарихий давр, даврнинг
ўта шафқатсиз ҳақиқати, Бобурнинг машаққатли ҳаёт йўли, ундаги шоир ва
шоҳлик майллари орасида кечган муросасиз кураш, улкан шахснинг хайрли
ишлари, олижаноб фикр-туйғулари ва кечириб бўлмас хатолари, бу хатолар
учун чеккан алам-изтироб ва ўкинчлари, ўтмишнинг аҷчик сабоқлари... Ик-
кинчи асарда эса ҳозирги фан-техника инкилоби даври, урбанизация суръати
қулф уриб турган улкан ва тизиз шаҳар ҳаёти, ўта замонавий, фан-техника
инкилоби бошида, гирдобда турган кишилар турмуши, тақдир, ўшандай
шаҳар истикболи ҳақидаги ўй-режалари, муваффақият ва йўқотишлари...

«Олмос камар» 1977 йилда чоп этилди, асар теварагида баъзи мунозара-
лар бўлди, умуман, танқидчиликда ижобий баҳо олди. Аммо ёзувчи асардан
қўнгли тўлмади, роман устидаги ишнинг давом эттирди. 1983 йилги романининг
тубдан қайта ишланган варианты майдонга келди; шу вариантни рус тилига
таржима этилди, рус китобхони уни яхши қабул қилди, марказий матбуотда
у ҳақда ижобий фикрлар баён этилди, роман СССР Ёзувчилар Союзи
мукофоти билан тақдирланди, марказий телевидение буюртмасига биплан
республика киностудиясида роман асосида икки серияли фильм яратилди.

«Олмос камар» романида тизиз шаҳар ҳаётига оид маънавий муҳит, меш-
чанларча турмуш кечираётган айрим шахсларнинг маънавий шқирози яхши
очилган. Бироқ ёзувчи шу билан чекланмаган. Асар қаҳрамонлари орасидаги
кескин кураш она табиятни, табиий гўзалликларни, маънавий сарҳамдалар-
рини асраш-авайлаш масалалари устида кетади. Фикрий жиҳатдан чекланган,
тор шахсий манфаатини, мансабу мартабаларни ўйлайдиган даққи, демагог
масъул ходимлар, нуқул қудратли техника, технократия тарафдорлари бўлган

«бетон одам»лар шаҳар тақдирини хатарли жар томон етаклайдилар. Асар бош қахрамони — ландшафт архитектори Аброр нажот йўлини излайди, у она табиатни — ерни, оқар сувларини асраш, анҳор ва арклар соҳилини кўкаламзор сайлгоҳларга айлантириши, бу борада миллий-маҳаллий шароит ва хусусиятларни ҳисобга олиш, халқимизнинг неча асрлик тажриба ва анъаналарини давом эттириши учун курашади; лўттибоз Шерзод Баҳромов ва унинг маслақдошлари Аброрнинг олижаноб мақсад ва интилишларидан ғаламислик билан «хунук бир маҳаллийчилик, миллий махдудлик» белгиларини кидирадилар, унинг атрофида ҳар хил тўхмат ва бўхтонлар уюштирадилар.

Адиб яратган ижобий қахрамонлар орасида Аброр образи алоҳида ажралиб туради. Айтиши мумкинки, ёзувчи ўзбек адабиётида биринчилардан бўлиб фан-техника революцияси бошида, урбанизация суръати жўш урган тигиз ва улкан шаҳар ҳаёти масалалари ичида турган, елкасида ҳозирги замоннинг катта юкни, ташвишларини кўтарган, мураккаб ҳаётий масалаларга жавоб излаб, нажот йўлини топишга эришган фикрловчи, олижаноб курашчи қахрамон — ҳақиқий замондошимиз образини яратилишига эришди.

Сўнги йилларда мамлакатимизда ўтмишга, тарих сабоқларига қизиқиш кучайди. «Юлдузли тунлар» романи тарихий мавзудаги бошқа энг яхши асарлар қатори жамият маънавий ҳаётидаги шу кайфиятнинг бир ифодаси, ёзувчи Асқад Мухтор сўзлари билан айтганда, «халқимизнинг бой ва шонли тарихига улуғ ҳурмат ёдгорлиги, тарих сабоқларига астойдил қизиқиш самараси» сифатида майдонга келди. Бу роман ўзбек ва рус тилларида қайта-қайта нашр этилди, бошқа қардош тилларга таржима қилинди. «Юлдузли тунлар» ҳақида ҳам кўп илиқ гаплар билан баробар таъқидий мулоҳазалар, баъзан ҳақ, баъзан ноҳақ эътирозлар билдирилди. Ёзувчи айрим фойдали таъқидий мулоҳазаларни ҳисобга олиб асарга баъзи таҳрир, тўлдиришлар киритди, Бобурнинг фотиҳлик юришлари, моҳиятини, шох ва шоир Бобур зиддиятларини янада кескинроқ очадиган янги лавҳалар қўшди.

«Юлдузли тунлар»га баҳо бераётганда бу асар тарихимизнинг ўта мураккаб, чигал даврига, ниҳоятда зиддиятли тарихий шахс — ҳам истеъдодли олим, гуманист, тараққийпарвар, ҳаққўй шоир; ҳам тишқ темурийзода, саркарда, фотиҳ шох ҳаётига бағишланганлигини, ёзувчи олдида қийин, масъулиятли ижодий вазифа турганлигини назарда тутмоқ керак.

Асарда шоир ва шох Бобур ҳаёти тасвири муҳим ўрин тутди. Бу улкан, мураккаб шахснинг тарих саҳнасига чиққан кундан бошлаб то ўлимига қадар салкам қирқ йиллик ҳаёти, шунингдек, шахсий қиёфаси, оилавий муҳити, ижодкор — шоир, носир, олим сифатидаги маънавий-руҳий дунёси; саркарда, шох, фотиҳ сифатидаги фаолияти — барчаси бир роман имконияти доирасида кенг ёритилади. Гарчи, романда Бобур ҳаёти кенг ўрин тутса-да, асар сюжетини ҳаракатга келтирадиган куч Бобур шахси, фаолияти эмас, биринчи гада тарихий ҳодисаларнинг ўзидир. Ёзувчи XV аср бошларида юз берган Ўрта Осиё, шунингдек, Афғонистон, Ҳиндистон тарихидаги муҳим воқеаларни, жангу жадалларни ҳаққоний гавдалантириб берган. Бобур ҳаёти, тарихий воқеалар ифодаси билан ёндош ҳолда оддий меҳнатқаш халқ турмуши, аҳвол-руҳияти, тарихий жараёнларга муносабати, ўзаро урушлардан, босқинчилик юришларидан чеккан жабри, шулар билан баробар, Бобур тўқнаш келган дахшатли қучлар — ўзини «имомни замон», «ҳалифан раҳмон» деб атаган Шайбонийхон, Шох Исмоил, Иброҳим Лоди, уларнинг ҳадсиз лашкарлари, беқлар, хилма-хил ижтимоий гуруҳлар, диний мазҳаблар, улар орасидаги зиддиятлар тавсифи — буларнинг барчаси асарда муносиб ўрнини тошган.

«Юлдузли тунлар»га фоят ишончли манбалар, аввало «Бобурнома» билан «Хумоюннома» асос бўлган. Бу манбаларда Бобур ҳаёти ва фаолиятининг барча босқичлари, Бобур яшаган даврнинг хилма-хил томонлари мазкур жанр имкониятлари, ўша замон савияси даражасида яхши ёритилган. «Юлдузли тунлар» авторни тасвирида ана шу ишончли фактларга таяниб иш қўрган бўлса-да, ҳеч қаерда фактлар қулига айланиб қолган эмас, «Юлдузли тунлар» ҳужжатли асар эмас, у «Бобурнома» билан «Хумоюннома»даги

мавижд фактларнинг шарҳи, тавсифи ҳам эмас. «Романдаги тарихий ҳужжатлар билан тасаввур, фантазиянинг нисбати менинг замонавий асарларимдаги бугунги ҳаёт ва унинг тасвири орасидаги нисбатдан унча кўп фарқ қилмайди.— дейди ёзувчи биз билан суҳбатда.— Фақат ташқаридан қарагандагина романи ёзувчи тасавури ва фантазиясидан кўра ҳужжатларнинг ўрни, салмоғи ошмакчи туюлади». Ёзувчи манбаларга икждий ёндашади. Бу жиҳатдан «Юлдузли туллар» реалистик романининг имкониятлари, социалистик реализмнинг ҳаётни бадий тадқиқ этиш, тарихни бутун мураккаблиги, зиддиятлари, диалектик яқлитлиги билан тўлалигича гавдалантириш, чин моҳиятини очиб бериш бобидаги куч-қудратини намойиш этувчи ҳужжат сифатида ҳам қиммати. «Бобурнома» ва «Хумоюннома» маълум маънода ўз давридаги кўзгуси, бу асарлар ҳам тарихий ҳужжат, ҳам бадий тасвир намунаси сифатида қарли. Айни «Бобурнома» ва «Хумоюннома»даги ҳодисалар, картина ва персонажлар «Юлдузли туллар»да ҳам учрайди. Бироқ «Юлдузли туллар» муаллифи энди уларга реалистик ёзувчи кўзи билан қарайди, ҳодисаларни шунчаки ҳаққоний, жонли гавдалантириш билан кифояланмай, улар орасидаги чуқур диалектик алоқадорликни, туб моҳиятини очади. Романини ўқиб темурийлар салтанатининг тақдири, шоир ва шох Бобур фожиясининг туб илдиларини аниқлаб оламиз, юракдан хис этамиз.

«Юлдузли туллар»даги ёзувчининг энг катта ютуғи, шубҳасиз, Бобур образидир. Дадил айтиш мумкинки, ҳозирга қадар ўзбек адабиётида Бобурдек мураккаб, зиддиятли тарихий шахс образи яратилмаган эди. Бобур образига адиб реалистик алабённинг чуққисиди туриб хилма-хил томондан ёндашади, бироқ бунда ичкил партиявий-синфий позицияда туради; Бобурнинг шоир, шох ва оддий инсон сифатидаги ҳам кучли, ҳам ожиз томонларини, ҳаётни ва шахсиятидаги барча фазилату қусурларини бор бўйича кўрсатади. Ёзувчининг реалистик маҳорати, хусусан, мураккаб шахс Бобур билан уни қуршаган муҳит, тарихий шароит орасидаги муносабатни очишда кўришади.

Гап шуидаки, Бобур ўрта асрнинг ўта мураккаб, зиддиятли бир даврида яшади. Темур насли орасида темурийлар салтанатини энг қалтис дамларда сақлаб қолиш учун астойдил курашган энг саботли шахс ҳам, янги империянинг асосчиси ҳам шу Бобур бўлиб чиқди. Демак, Бобур шахс ва саркарда сифатида қудратли давлатнинг сўнги кушлари — емирилиш даври фожиясини татиб кўрган мағлуб, лекин йиқилса ҳам курашдан тоймаган, ахиддан қайтмаган, бирлашган қудратли давлат тузиш режаларини ўзга элларда амалга оширишга мажбур бўлган ва бунга эришган ғолиб шахс. Иккинчи томондан, Бобур Шарқнинг улут мутафаккирлари, биринчи гада Алишер Навоийнинг юксак гуманистик ғоялари руҳида тарбияланган, инсон қалбини, унинг дарду ташвишларини юракдан хис этишга қобил баркамол бир одам, поэтиктаб, ҳаққий шоир, санъаткор, олим. Бобур тахтга ўтирган биринчи кундан бошлаб унинг зиммасидаги шохлик бурчи билан инсонлик, шоирлик туйғуси бир-бирига тўқнаш келади, шу зиддият умр бўйи давом этади. Бобур кўнгли эзгу туйғуларга мойил, тоғу тахтнинг бевафоллигини, шафқатсизлигини билади, неча бор ундан воз кечмоқчи ҳам бўлади; бироқ, айни пайтда, ўзининг темурийзода эканини асло унутолмайди, темурийзода сифатида салтанат олдида ўз бурчи ва масъулиятини ҳамма нарсдан устун кўяди. Шу бурчин адо этиш йўлида адалсиз кўргуликлар — оғир жудодликлар, қийноқлар, хўрликлар, таҳқиру надоматлар — барча-барчасига дош беради; у шафқатсиз замонда яшаётганлиги, йиртқичлар орасида кийик бўлиб кун кўрөлмаслигини хис этади. Унда зўрликка зўрлик, зарбага зарба билан жавоб бериш истаги кучли, бу эса ўз навбатида уни кўи шафқатсизликлар, гуноҳлар сари етаклайди. У раият ғамини ҳам ўйлайди, аммо раиятнинг деса, бу ҳол беклари навкарлар маишфаатига зид келади; беклар, навкарларсиз эса тоғу тахтнинг идора этиш мумкин эмаслигини яхши билади; шу тариқа, беихтиёр, раият маишфаатига хилоф ишлар қилишга мажбур бўлади; Бобур шох ва саркарда сифатида амалга ошираётган кўи ишлар «хатолит», Ҳинд сари йўл олиш «юзи қаролит»

эканини ўзи ҳам сезади, чин инсон, шоир сифатида бундан қийналади. Бобурнинг энг оғир руҳий драмаси, фожиаси ҳам ана шунда. Буларнинг барчаси романда юксак маҳорат билан ифода этилган.

Шу билан баробар, ёзувчи тарихда ўтган шахсларга баҳо беришда марксча-ленинча йўл-йўриққа амал қилган ҳолда Бобурнинг ўз даврига нисбатан амалга оширган хайрли, прогрессив тадбирларини, хусусан, марказлашган давлат учун кураш, Ҳиндистонни бирлаштириш, дин ва диний маъзабларни муросага келтириш, ободончилик ишларини йўлга қўйиш, майхўрлики ман этини сизгари ишларини объектив тарзда ҳаққоний кўрсатиб беради.

Пиримкул Қодиров устоз адиблар Алексей Толстой, Абдулла Қодирий, Ойбек, Мақсуд Шайхзода тажрибаларига таянган ҳолда «Юлдузли тунлар»-да ўзининг синфий-партиявий позициясини, тарихий давр ва тарихий шахс зиддиятларини, асосан, шоир ва шоҳ Бобурнинг руҳий зиддиятлари орқали ифода этади. Асарни синчиқлаб ўқиган дидли китобхон тахтга ўтирган биричи кун, илк дақиқалардан бошлаб то умрининг охирига қадар Бобурнинг бутун ҳаёги мана шу зиддиятлар ичида кечганлигини — шохлик, фотиҳлик унга ҳадсиз гуноҳ, ғурбату азоб, таънаю дашином, шоирлик эса хурмату эътибор, мангу шухрат келтирганлигини ҳар қадамда кўриб, хис этиб туради. Оддий меҳнат аҳли Бобурни шох сифатида эмас, биричи галда шоир, маърифатчи сифатида хурмат қилади. Ёзувчи бутун асар давомида Бобурнинг шох сифатида қилган шафқатсизликлари унинг энг катта гуноҳи эканини доимо, ҳатто кўп ўрнида ошқора таъкидлаб боради.

Пировардида, оддий меҳнат аҳли вакиллариининг шоир ва шоҳ Бобур ҳақидаги фикрларини келтирмоқчиман. Бобурни маърифатли, одил шох деб билган, сидқидилдан унинг хизматида бўлган Тоҳир бир вақтлар Кува ёнидаги жангда ўзини ярадор қилган ёв лашкари жангчиси Мамат полвон билан танишиб, дўстлашиб қолади ва зўр алам-изтироб билан: «Бу подшо-ларининг уруш-жанжаллари бешларидан қолсин!.. Сиз бир қосиб бўлсангиз. Мен бир деҳқон эдим. Келиб-келиб биздай заҳматқашларни бир-биримизга душман қилиб қўйган замонанинги уйи куйсин!» дейди. Бу сўзлар давр ҳақида, шох Бобур ҳақида зўр айбнома каби янграйди! Бобур Ҳиндистонда подшони-нинг жонига қасд қилган одамларни аёвсиз жазолаш ҳақида махсус фармон чиқаради, кўнлар қатори ўз юртини баҳодирона ҳимоя қилган доворак ҳинд филбон ҳам таъқиб остига олинади. Лекин оддий меҳнат аҳли орасидан чиққан Фаэлиддин билан Тоҳир филбонни ҳимоя остига оладилар, ўз юрти шаъни деб Бобурдан қасд олмақчи бўлган филбон ишини гуноҳ эмас, балки шараф деб биледилар. Улар Бобурнинг шоирлигини, маърифатпарварлигини хурмат қиладилару шох сифатидаги шафқатсизликларини ҳазм эта олмайдилар.

Ниҳоят, шоир Бобурнинг ўзи: «Неки хатолик, неки гуноҳ қилган бўлсам, ҳаммасининг бирламчи сабаби менинги подшоҳлигимдир», дея узи-кеси-ни қирор бўлади. Бобурнинг Хондамир билан суҳбатда айтган: «...авлодлар ҳақиқатини билсинлар, бизни фаршга деб ўйламансинлар. Қилган гуноҳларимиз ўзимизга печоглик оғир тушганидан огоҳ бўлестилар... Жанглариинг қонли селлари, салтанатнинг тошқин дарёдай бетиним талотумлари жонимга тегди. Тоғу тахт бевафоллигини кўндан бери сезиб юрибмен. Менга вафо қилса фақат ёзган асарларим вафо қилмоғи мумкин. Ваташимга ўзим қайтолмасам ҳам асарларим қайтмоғи мумкин Эндиги орзуим — мен туғилган юртимга қилло-маган фарзандлик хизматимни асарларим қилса...» — деган сўзлари — бу шахс драмасининг, асар ғоявий-бадиий концепциясининг яқуни, Бобур умри-нинг аччиқ сабоқлари наби янграйди.

Пиримкул Қодиров замонавий мавзудаги, замондошлари ҳақидаги асарла-ри каби тарихий романи «Юлдузли тун»ларда ҳам шу тариқа ҳақиқатини қидиради, ҳақиқатнинг тубига, моҳиятига етишга иштилади. Бадиий ижодда ҳақиқатнинг тубига етиш йўли эса ниҳоятда мушкул, машаққатлидир.

МУНДАРИЖА

ЮЛДУЗЛИ ТУНЛАР
Роман

3

* Умарали НОРМАТОВ
ҲАҚИҚАТНИНГ МАШАҚҚАТЛИ ЙЎЛИ

440

* © Фафур Фулом номидаги Адабиёт ва санъат нашриёти, 1988 й.

На узбекском языке

ПИРИМКУЛ КАДЫРОВ

ИЗБРАННЫЕ ПРОИЗВЕДЕНИЯ В 3-Х ТОМАХ

Том III

ЗВЁЗДНЫЕ НОЧИ

Р о м а н

Редактор *Ҳ. Маҳмудова*

Рассом *В. Шумилов*

Расмлар редактори *М. Карпузас*

Техн. редактор *М. Мирражабов*

Корректор *Д. Абдуллаева*

ИБ № 4075

Босмахонага берилди 02.03.1988. Босишга руҳсат этилди 08.09.1988. Формати 84×108¹/₃₂. Босма-
хона қоғози № 1. «Тип. бодош» гарнитураси. Юқори босма. Шартли босма л. 23.52. Шартли кр-
оттиск. 23.52. Нашр. л. 27.5. Тиражи 60000. Буюртма 1113. Баҳоси 2 с. 20 т. Шартнома 155—87.

Фафур Фулом номидаги Адабиёт ва санъат нашриёти, 700129. Тошкент, Навоий кўчаси, 30.

Ўзбекистон ССР Нашриёт, полиграфия ва китоб савдоси ишлари Давлат комитети «Матбуот»
полиграфия ишлаб чиқариш бирлашмасининг Бош қорхонаси, Тошкент—700129. Навоий
кўчаси, 30.

2 с 20 т

